

福建地方志丛刊

# 长乐县志

下  
〔民国〕李驹主纂

福建省地方志编纂委员会主编  
福建人民出版社出版

福建省地方志编纂委员会主编

福建地方志丛刊

# 长 乐 县 志

下

〔民国〕李 驹主纂

长乐县地方志编纂委员会整理

福建人民出版社

1993年·福州

PDG

(闽)新登字 01 号

责任编辑 蓝大灯 吴锦通  
封面设计 刘燕华

长 乐 县 志 (上、下)

[民国] 李 驹 主纂

长乐县地方志编纂委员会 整理

\*

福建人民出版社出版、发行

(福州得贵巷 59 号)

福建福州七二二八分厂印刷

开本 850×1168 毫米 1/32 40.125 印张 8 插页 956 千字

1994 年 3 月第 1 版

1994 年 3 月第 1 次印刷

印数:1—2000

ISBN 7—211—02254—X  
K·170 定价:(上下二册)60 元

## 长乐县志目录

- 卷首..... (1)  
    各图 方括 县城 县治 学宫 吴航书院 武庙  
        文昌宫 十二景
- 卷一..... (45)  
    疆界沿革表 形胜疆域附
- 卷二..... (50)  
    纬候表 仍旧志星野 星野 躔度 占验 气候
- 卷三..... (53)  
    大事志 灾祥附
- 卷四..... (63)  
    山川志 井泉附
- 卷五..... (76)  
    水利志 湖 塘 斗门闸 海堤 港 浦 埭 坝 溪  
        沟 圳 陂 堰 洋 坑 桥 渡 附各埠小轮船
- 卷六..... (129)  
    城市志 城池 防海各城 廨署 库 街市 巷 乡都  
        农商会所邮局教堂附
- 卷七..... (144)  
    名胜志 古迹 第宅 庵堂寺观 园亭 宫院 坊 墓  
        塔 碑 岩 潭 屿 洞 池
- 卷八..... (186)  
    户口志 屯丁 耆寿附 给品服及匾音者附
- 卷九..... (213)  
    赋税志 土田 屯田 正赋 杂征 新旧正杂一览表



卷十.....	(233)
物产志	谷属 布属 蔬属 蔬属 果属 木属 竹属 花属 草属 药属 畜属 毛属 羽属 鳞属 介属 虫属 货属
卷十一.....	(273)
度支志	解支 存留 民国出款
卷十二.....	(287)
职官志	文职 武职
卷十三.....	(330)
学校志	学宫 附清训士文并赞 典礼 规制 祭器 乐器 书籍 射圃 射器 泮额 学租 书院 社学 各 区高等小学校 各区公私立国民学校
卷十四上.....	(401)
选举志上	进士 乡科 贡生 廩增附贡附 前志例贡 前志监选 前志吏选 附贡补遗
卷十四下.....	(537)
选举志下	钦赐 荐辟 各种考试 武科 武功 封赠 叙荫 各咨议局各议会选举议员 农商会教 育会附 各学校毕业生
卷十五.....	(597)
武备志	警察警备队附
卷十六.....	(603)
礼俗志	
卷十七.....	(607)
惠政志	
卷十八.....	(612)
祠祀志	秩祀 里祀
卷十九.....	(649)

艺文志 著述	
卷二十上	(663)
艺文录上 诏诰 谕祭 宸翰 劄子 书 序 记	
卷二十下	(756)
艺文录下 诗 赋 文 杂著	
卷二十一	(847)
列传一 名宦	
卷二十二	(863)
列传二 儒林	
卷二十三	(877)
列传三 名臣	
卷二十四	(920)
列传四 循绩	
卷二十五	(950)
列传五 文苑	
卷二十六	(966)
列传六 忠义 节概 孝弟 义行 隐逸 流寓	
卷二十七	(1017)
列传七 方技	
卷二十八	(1026)
列传八 方外	
卷二十九上	(1030)
列女上 节孝 孝妇孝女附	
卷二十九下	(1201)
列女下 贞烈 闺秀 贤媛 寿妇附	
卷三十	(1256)
杂录	



## 长乐县志卷十九

### 艺文 著述

文字有厄运，则摧残湮灭，不尽归罪于秦火，幸天未丧斯文，犹于破篋蠹余，得名师宿儒之遗迹。零缣片楮，不啻获径寸之珠，而斐然增斯志辉者，来学沾溉于斯，当亦祷祝馨香，幸灵光之未泯没欤！志艺文。

### 著述

#### 经部

宋 黄 榘《系辞传解》一卷，《尚书说》十二卷，《续仪礼经传通解》二十九卷，《礼记集传传注》十四卷，《论语意原》一卷，《论语通释》十卷，《孝经本旨》一卷，《六经讲义》三十卷。传见《儒林》。

张 洽《春秋集注》十一卷，《纲目》一卷，《左氏蒙求》。按：此据《张氏世谱》补。传见《儒林》。

刘 砥《论语解》八卷。传见《儒林》。

刘 砺《禹贡解》二卷，《孟子解》七卷。传见《儒林》。

陈如晦《论语问答》。传见《儒林》。

陈 洽《孝经正义》一卷。

- 元 郭 隲 《易说》、《春秋传论》十卷。传见《儒林》。
- 敖继公 《礼记集说》十七卷。传见《儒林》。
- 欧阳侁 《四书释疑》十卷，《五经要旨》。传见《儒林》。
- 明 陈联芳 《书经浅说》四卷。传见《名臣》。
- 陈名宾 《书经讲述》。
- 陈大漉 《诗经义》四卷，《春秋管见》，《四书口义》四卷。传见《名臣》。
- 李丕显 《诗经达说》四卷，《四书达说》五卷。传见《名臣》。
- 石 磐 《诗经艺圃说》。传见《名臣》。
- 叶有禄 《诗经印》五卷，《四书经印》二十卷。
- 陈肇曾 《春秋四传辩疑》。
- 柯尚迁 《周礼全经释原》十二卷，又《附录》十二卷，《曲礼全经》十五卷。按：旧志作《三礼全经》，无卷数，今从续通志。
- 谢 符 《礼记说》。
- 林 恕 《孝经笺》一卷。传见《循绩》。
- 林 山 《孝经集类》二卷。传见《循绩》。
- 郑世威 《经书答问》十卷。传见《名臣》。
- 李士黼 《五经纂要》。传见《隐逸》。
- 清 欧阳士超 《周易本义删补便读》三卷。按：一作陈士超，今仍旧志。
- 陈 晓 《书经串解》，《诗经串解》。
- 梁上国 《古文尚书条辩》五卷，《驳毛氏大学证文》一卷。传见《名臣》。
- 陈可御 《诗经领要》四卷。
- 林豫吉 《诗经谛解》。
- 陈道极 《葩经要解》六卷。传见《文苑》。
- 陈万春 《诗经编义》八卷。传见《文苑》。
- 林琼蕤 《左传评注》，《四书说解》。传见《循绩》。

黄一桂《读左广义》。传见《文苑》。

梁章钜《夏小正经传通释》四卷，《论语集注旁证》二十卷，《孟子集注旁证》十四卷。传见《文苑》。

陈时夏《周礼要解》二卷，《学庸释注》二卷。传见《孝友》。

柯龙章《仪礼笺注》三十本。传见《文苑》。

刘德威《周官辩非》。传见《循绩》。

黄荣庚《仪礼精华》。传见《忠义》。

陈汉章《四书讲章》。按：《文苑传》陈范亦有《四书讲章》，今仍旧志存其一于此。

杨元挺《学庸正宗》。传见《孝友》。

郑任钥《朱子四书或问小注》二十卷。传见《名臣》。

欧阳文《四书集说》五卷。传见《孝友》。

谢绍鼎《四书辩讹》。传见《文苑》。

陈九鼎《四书便说》。传见《循绩》。

陈汝楫《学庸迹言》。传见《义行》。

谢世南《蒙斋讲义》二十四卷。传见《义行》。

梁运昌《四书偶识》。传见《文苑》。

高钟焯《四书精义》。台谿人，字以豪，一字璠圃。邑诸生。博览群书，尤耽程、朱学，开讲席三十年，出其门者，多知名士。

王 溱《四书笔记》。传见《文苑》。

王颖如《孝经颂赞》一卷。传见《文苑》。

吴 第《五经俟论》。传见《文苑》。

陈永书《诗书条贯》三卷。传见《文苑》。

陈庚焕《五经补义》。传见《儒林》。

谢章铤《毛诗尚书左氏传注疏》、《毛本阮本考异》二本。传见《儒林》。

董炳章《经义解纷》四卷。

ZBR90/03



陈瑞唐《养正书塾四书义》二卷。传见《文苑》。

### 史部

宋 张 洽《续通鉴长编事略》，按：此据《张氏世谱》补。《地理沿革表》。

郑性之《宋编年备要》十卷，按：此书与陈均同撰者。《端平奏议》。传见《名臣》。

林 通《长乐图经》。宋县令袁正规序，其略曰：“长乐在十二邑之中，地非沃壤，鱼盐之利，岁上于公家者，常居诸邑之最。其如文物之盛，山川之美，《闽记》遗落多矣。乃属邑人林通博采其事为《图经》，或有未完，待好事者补之可也。宋元祐三年岁戊辰。”传见《文苑》。

刘 砥《王朝礼记》七卷。

林 楠《姑孰志》。传见《文苑》。

明 李 骐《国史补》二卷。

谢肇淛《史考》、《史测》、《史觚》二十一卷，《百粤风土记》一卷，《吴兴支乘》，《滇略》，《北河记》八卷，《鼓山志》八卷，《支提山志》八卷，《方广岩志》五卷，《粤藩末议》，《八闽饘政志》十六卷，《晋安艺文志》三卷，《居东日纂》。传见《名臣》。

刘则和《长乐志》八卷。

郑世威《长乐志》八卷。

刘沂春《龙峰岩志》、《出云岩志》。传见《名臣》。

郑建邦《滨海民瘼》。

高 淮《剑谱》一卷。传见《文苑》。

林 敏《八闽海错疏》八卷。传见《隐逸》。

谢 杲《节义录》。传见《节概》。

谢 杰《使琉球录》六卷。传见《名臣》。

清 陈庚煥《二十二史人物表》，《二十二史图经》，《二十二史年

表》，《易堂隐德录》六卷，《崇德同心录》一卷，《日记古人言行录》。

吴 第《纲目绪论》、《纲目舆地便览》。通志作要览。

梁章钜《三国志注旁证》三十卷，《枢垣纪略》十六卷，《国朝臣工言行纪》十二卷。

梁运昌《史汉眉评》。

林谦光《台湾府志》，《台湾纪录》。传见《循绩》。

郑 晃《粤东文诰》二卷。传见《文苑》。

高于冈《松源纪绩》四卷。传见《循绩》。

严梦两《居官格言》。传见《循绩》。

陈 骝《蓟游草》。据旧志集部陈骝《南雅堂纪事》记载有是书，因补之。传见《文苑》。

梁上国《奏疏》一卷，《数目通典》十七卷，按：江田《梁氏诗存》九山名下不载此书，而梁剑华天池公有《数目通考》十二卷。旧志既载，今姑仍之。《山左游记》一卷，《辽沈游记》一卷，《粤西游记》一卷，《山右游记》一卷，《闽海人文》五卷。

陈学良《刺桐城纪游》。字廷汉，一字梅谷。雍正间国学生。

陈永书《事类数目考》二十卷。传见《文苑》。

梁云铤《辽东行纪》三卷。

黄见三《学宫景仰编》四卷，《全史辑要》二卷。

石 暄《后汉精华录》，《战国策精华录》，《建游记》，《冷斋日记》。传见《孝友》。

### 子部

唐 林慎思《伸蒙子》三卷，《续孟子》四卷。传见《名臣》。

宋 陈 烈《孝报经》。传见《儒林》。

陈长方《步里客谈》。旧志据《宋儒学案》补入。传见《儒林》。

陈如晦《讲义》。

元 欧阳侁《性理字辨》，《格物启蒙》二卷，《忠孝大训》二卷，《女范》二卷，《幼学》一卷。

明 陈 省《得间子》四卷，《老子疏因》。传见《名臣》。

高 淮《竹所老人书》。

谢汝洋《顾行愚言》。传见《文苑》。

林世章《同心录》、《自警训》、《皇极经世汇编》。传见《名臣》。

林裕阳《省身日录》，《蕉鹿篇》。传见《名臣》。

蒋奕芳《读书解》二卷，《破迷论》一卷。

陈名宾《理学真伪论》。

郑文霖《耽犁子》一卷。传见《隐逸》。

石 磐《菊径漫谈》十四卷。

谢肇渊《长溪琐语》，《纪余》四卷，《五杂俎》，《麈余》四卷。

刘 布《印史辨微》。传见《方技》。

谢廷柱《堪輿管见》一卷。传见《循绩》。

谢 杰《太上感应篇增注》四卷，《李头陀传》。按：此篇通志、府志皆阙撰人名，彭志据贺志作谢杰，今亦仍之。

清 郑任钥《乐苦述略》，《自治要纂》，《朱子或问小注》，《矢口》一卷。

梁章钜《仓颉篇校正》三卷，《古格言》十二卷，《经尘》八卷，《退庵随笔》二十四卷，《读渔洋诗随笔》二卷，《归田琐记》十卷，《浪迹丛谈》十一卷，《续谈》八卷，《三谈》六卷，《制义丛话》二十四卷，《楹联丛话》十二卷，《续话》四卷，《胜话》二卷，《巧对录》四卷。

陈庚焕《师门瓣香录》，《尊闻录》，《于麓塾谈》，《畜德随笔》，《童子揆谈》一卷，《北窗随笔》，《庄岳谈》一卷。

陈世元《金暮传习录》二卷。世元字捷先，国学生。是书有乾隆戊子陈

一德序，及方廷珪、林龙友、林正焕诸跋。世元之先，诸生名经纶者，明万历年，贾于吕宋，携番薯归，献其种与法于巡抚金学曾，金为刊行其法。至世元贾于山东，复运种以教育、豫之人。上卷录土宜栽种之法，及吕宋携归至青、豫教种始末，下卷则录歌赋与题咏也。

王膺祺《太平新书》三十章，《纂集太平清谕》十六条，《爱书金矢》。

林谦光《甲子图》。

林豫吉《管子删定》，《南华约旨》，《三才叙断》，《续离骚》。

王 溱《福鼎方言》。

梁上泰《漱芳编格言》四卷。

郑 冕《犴狴晨钟》一卷。传见《文苑》。

林日芑《涵秋医方》。传见《文苑》。

陈念祖《伤寒论浅注》，《伤寒方论》四卷，《金匱要略浅注》十卷，《歌括》六卷，《医学实在易》六卷，《医学实在难》，《女科要旨》四卷，《景岳新方》，《八阵砭》四卷，《十药神书评注》，《时方妙用》四卷，《时方歌括》二卷，《本草经读》四卷，《医学三字经》四卷。按：《时方妙用》以下，即所谓公余四种也。传见《循绩》。

梁云鏞《琴谱》二本。

陈应驹《游磁九梦》、《续梦》、《又梦》共三本。

石 暄《歌括简篇旁注》。

郑敷亨《算经汇源》。采旧志本传补之。

### 集部

唐 林慎思《文集》二卷。

卓 云《诗集》四卷。传见《文苑》。

宋 林 桷《横塘集》十卷。

黄 榦《勉斋文集》十卷。

刘 砺《文集》。

陈 洽《遗稿》。

赵汝腾《蓬莱集》。

陈如晦《文集》。

赵以夫《虚斋乐府》二卷。传见《名臣》。

张 镇《榕谷集》一卷。

潘 枋《诗集》四卷，《乐府》一卷。传见《节概》。

姚 勉《雪坡集》。传见《文苑》。

高应松《笈亩集》一卷。传见《忠义》。

元 郭 隍《梅西先生集》二十卷。

明 陈洵仁《黄门集》。传见《文苑》。

王 坚《三山樵稿》二卷。传见《名臣》。

陈仲完《简斋迂稿》十卷。曾殿撰策有序，见《艺文》。传见《名臣》。

陈仲进《南雅堂集》。金学士幼孜有序，见《艺文》。传见《名臣》。

郑 定《澹斋集》二卷。传见《文苑》。

陈 登《石田集》四卷。传见《文苑》。

陈 全《蒙庵集》二卷。传见《文苑》。

高廷礼原名榘。《啸台集》二十卷，《木天清气集》十四卷，《唐诗品汇》九十卷，《拾遗》十卷，《唐诗正声》二十卷。传见《文苑》。

陈 亮《沧洲集》一卷，《储玉斋集》。传见《文苑》。

王 恭《凤台清啸》二卷，《草泽狂歌》五卷，《白云樵唱》二卷。

吴 实《补斋集》一卷。传见《名臣》。

马 铎《梅岩集》二卷。传见《名臣》。

高 淮《归田集》四卷。

林 绍《林泉清响集》一卷。传见《隐逸》。

李叔玉《梅轩集》一卷，一作《梅庵集》。《梅花百咏》。传见《文

苑》。

谢士元《约庵集》一卷，《咏古集》四卷。传见《名臣》。

陈维裕《友竹集》。传见《名臣》。

陈崇德《偶存集》十二卷。

林廷选《竹田集》二卷。传见《名臣》。

谢廷柱《双湖集》十卷。

陈大漫《拟陶拟杜》二卷。

郑世威《岱阳汇稿》六卷。子应晓《辟佛论》，《主敬说》，《儒窟集》，《识字万一云涵集》。

林 恕《西桥集》二卷。

陈联芳《青田集》四卷。贺志作《春田集》。彭志据府志改作青田，盖青田联芳号也。今仍之。

陈 省《幼溪集》六卷，《武夷集》四卷。

林世章《桃源耕隐集》二卷。传见《名臣》。

谢汝韶《天池藏稿》十卷，《碎金集》八十八卷。传见《名臣》。

陈时范《狮江集》二卷。

谢 杰《北窗吟稿》十二卷，李相国廷珙有序，见《艺文》。《杜律詹言》二卷，一作筌言。《白云天灵稿》。

谢肇渊《小草斋集》二十八卷，叶相国向高有序，见《艺文》。《文海披沙》，《诗话》。

蒋奕芳《金粟园诗稿》十卷。

林永光《澹然堂诗集》。叶相国向高有序，见《艺文》。

叶有禄《五峰杂咏》一卷。

郑建邦《小草斋集》。

陈良贵《南坡集》。

陈 耕《海霞诗集》。

马思理《玉尺山房诗选》。传见《忠义》。



刘沂春《珑洞集》二十卷。

陈奎辉《寤寐斋集》。传见《节概》。

陈肇曾《濯缨堂集》，《江田陈氏诗系》，《昌基诗集》。按：旧志注，昌基，即肇曾名。

陈希友《焚余草》，《粤中吟草》，《蓼岩草》。传见《忠义》。

陈希声《深谷山房集》。

陈汉臣《榕溪集》一卷。传见《隐逸》。

戴天锡《群珠摘碎集》二卷。

梁珪《江南草》、《楚游草》、《江西游草》、《雪园诗稿》共四集。传见《文苑》。

马葵日《仿池诗选》。

林逢经《苦竹吟》。传见《文苑》。

陈鸣石《竹溪前集》，《抱冰集》。

陈毓贤《南阳陈氏考懿集》。

郑应午《六书考古》。

清 吴道来《邺城百咏》。传见《文苑》。

王颖如《天籁集》三十卷，《续集》，《三楼纪胜》。

陈 驺《雪鸿堂诗文集》十卷，《南雅堂纪事》，《中轩集》。按：旧志《南雅堂纪事》注，载有是书，因补之。

陈 驺《偶庵集》三十卷。

林谦光《华萼堂集》。

叶起沈《飞嗽集》。

严尚英《塔影斋集》、《塔影斋诗话》二卷。

陈汉章《天游居文集》四卷，《古文丝声集》。传见《文苑》。

陈子钦《铁云集》。传见《文苑》。

郑 晃《华胥内外集》二卷，《拜石山房近草》一卷，《偶笔诗集》二卷，《藏山堂诗集》一卷，《秋心集》。

林豫吉《松址集》。豫吉字卜飞，号松址，康熙甲戌进士，籍福安。诗学杜，有骨力。

谢肇凤《一麈亭诗集》。

高于冈《问轩诗集》二卷，《庐山续吟》一卷。

郑纯礼《梦樵轩集》。

吴文焕《剑虹初稿》、《续稿》。传见《文苑》。

严梦两《治经堂诗集》。

陈范《二闻堂集》。传见《文苑》。

吴士宏《对山诗文集》。

陈师《盟山诗帖》四卷。

郑翥《谷远堂诗删》二卷。

杨元挺《于岩诗文集》，《古文评本》。元挺字永哲，一字于岩；康熙间诸生。

谢廷标《草堂蛙吟诗集》二卷。

陈献琛《湖光堂文集》四卷。

林邦锡《乐天诗集》。

林翰《寄乐轩诗集》。

林琼蕤《兰瑞堂稿》，《唐诗直解》。

吴化《希轩文集》。传见《文苑》。

郑汉章《宦游舒啸诗文集》。传见《循绩》。

谢绍鼎《春草堂诗剧》。

王思猷《漱玉集》四卷。

陈畴《北行纪事诗集》。传见《循集》。

林调燮《象虚亭稿》。采旧志本传补之。

陈化龙《归田草》。传见《名臣》。

梁上泰《漱芳斋诗文集》四卷。

陈奇铤《铸研斋集》二卷，《落花诗》一卷，《见闻录异》二

卷。传见《文苑》。

谢春晖《莲湖诗钞》二卷。传见《循绩》。

梁上国《九山集》十卷，《进御诗赋》一卷。

刘永标《盥白斋诗钞》四卷。传见《循绩》。

刘建区《九一山房稿》。采旧志《刘永标传》补之。

陈学颖《韬园诗集》。传见《名臣》。

邱玉山《两峰诗集》四卷。传见《义行》。

梁章钜《退庵文存》二十四卷，《藤花吟馆诗钞》十二卷，《退庵诗存》二十四卷，《续存》八卷，《退庵题跋》二十卷，《续跋》二卷，《雁宕诗话》二卷，《江田梁氏诗存》九卷，《东南峒外诗文钞》三十卷，《闽诗钞》五十卷，《东南峒外书画录》二十卷，《文选旁证》四十六卷，《东南峒外诗话》三十卷，《长乐诗话》八卷，《南浦诗话》四卷。

梁际昌《瞻彼阙斋诗文集》六卷。

梁运昌《秋竹斋诗文集》，《两汉魏晋宋齐诗式》，《苏诗钞》，《唐人风格集》，《杜韩诗细》，《唐诗随笔》，《杜园说》，①《陈氏古音改订》，《读诗考韵声谱》。

陈心炳《韵语琐掇》，《说文小笺》。

梁云铤《山居小稿》一卷，《正心斋诗文集》六卷，《养心录》三卷。

陈时夏《榕轩诗存》。

陈金汉《海外近作》、《西行诗帙》。

陈庚焕《惕园文稿》十六卷，《外稿》一卷，《诗稿漫存》四卷。

王嘉宾《竹溪笔记》四卷。传见《义行》。

陈澍霖《秋田吟草》二卷。传见《义行》。

陈澍云《漱芳山房诗集》三卷，《文集》一卷。传见《循绩》。

梁云鏞《无俗声室诗文集》八卷。

王 濂《足雨宦诗钞》，《诗释人》，《韵学指南》，《说文音声谱》，《文选音韵》，《经典释文校正》。

刘建庚《有不为斋诗文集》。

刘建韶《宜兰室集》。采旧志《刘永标传》补之。

陈尧书《政余吟草》。传见《循绩》。

刘德威《霁岩文稿》。采旧志《刘永标传》补之。

陈 趋《偶峰集》，《纯武堂诗文集》八卷，《外集》，《姚金集句摭余》。传见《文苑》。

冯承基《古今诗集》，《四六骈体》。传见《文苑》。

郑任钥《文章正宗》，按：真西山亦有此书。《莱川诗集》。

严永龄《排律咸英》十二卷。

吴应造《海录碎事钞》。

陈昌蚤《琐音诗选》。

谢 瑾《偶见集》三十六卷，《怀溪诗话》八卷。

王元麟《秋江集注释》。

陈良琨《冰壶诗集》四卷。

陈田氏《敬和堂笔训》。氏陈时夏妻。此书有自序，又廖鸿基、王庆云、郭柏荫为之序。

许馥荃《琴音轩诗词》四卷。传见《国秀》。

李蕊馨《霜筠轩诗草》，《篝灯课读草》。传见《国秀》。

陈应驹《亦足轩杂录》二卷。传见《文苑》。

郑森荣《苟有山房初稿》一卷。

林廷玠《述斋全集》一卷。传见《孝友》。

施 寓《思鲁室诗集》一卷。传见《义行》。

谢章铤《赌棋山庄文集》九卷，《余集》五卷，《诗集》十四卷，《酒边词》四卷，《词话》十卷，《掇余偶录》四卷，②《续

录》四卷，《围炉琐忆》一卷，《藤阴客赞》一卷，《稗贩什录》四卷，《闽音通》二卷。

董炳章《屈蠖斋丛稿》四卷。传见《循绩》。

陈亦瞻《养正堂文集》。传附《文苑》。

郑兴宽《含哺吟》，《海滨哺唱》，《棋谱》。传见《方技》。

陈超《浣肠居诗文集》三卷。传见《方技》。

陈赉《医学研余》六卷。传见《方技》。

郑际昇《临症心得》一卷，《痘疹指南》一卷。传附《方技》。

郑勋《洗耳余音集》，《和蜂吟集》。

高玉豪《长乐乡土志》。

林蕊仙《绣余吟集》。邱景湘妻，传见《闽秀》。

陈尹孚《钟峰吟稿》六卷，《闲余集》四卷。

陈沅熙《鸣盛集》，《守拙居诗稿》。

林振光《迎碧山房诗文集》，《海南公余随笔》。

## 校注

① 《杜园说》，应为《杜园说杜》。今人叶恭焯序：福州郭曾炘《读杜札记》云：“长乐梁曼云运昌著有《杜园说杜》二十四卷，考证史实，抉剔爬梳，粲然大备。”

② 《掇余偶录》，应是《课余偶录》之误。

## 长乐县志卷二十上

艺文录上 诏诰 谕祭 宸翰 札子 书 序 记

诏诰

宋理宗赠黄榦朝奉郎诏 绍定六年

洙泗之斯文未丧，得颜曾数子羽翼而其教大明；伊洛之正学方兴，得尹杨诸人发明而其传益广。今有倡道武夷，而门人之中卓然以扶世立教自任，是国家之所当尊尚也。尔绍兴名御史瑀之子，庆元朱侍讲熹之甥，密察精思，尽得师承之正；笃行力践，发为德业之光。矧熹于易簪之时，属尔以传道之托，讨论三礼，敷绎四书。朕今读其书，求其徒，思坚正宏毅如榦者，既不得与之同时矣，则追崇一秩，燕及后昆，朕又何爱焉。可特赠尔朝奉郎，仍与一子恩泽。

宋少帝手诏敕赐高应松奏辞免除端明殿  
学士同签书枢密院事兼参知政事

丰水材储，正诒翼子；疾风板荡，始识诚臣。卿经纬全才，险夷一节。当国乱身危之际，政主忧臣辱之时，人多偷生以自全，卿



独效死而勿去。不扶不持，则焉用彼；将恐将惧，惟汝与予。遂由冬官之联，径擢斗枢之贰。今之天下，甚如厝火之及燃；古之大臣，当若同舟而共济。亟祗成涣，无事鸣谦。所辞宜不允。故兹诏示，想宜知悉。

### 谕祭

#### 南京工部尚书林廷选赠太子少保并谕葬祭文

制曰：朕式稽古制，优礼大臣。生隆以官秩，歿重以褒恤者，所以笃始终之义也。故南京工部尚书致仕林廷选，历扬中外，茂著贤劳，梓里归荣，倏然告逝，眷言往勩，恤典宜申。兹赠太子少保。于戏！官保已晋于孤卿，宠褒实荣于华袞，冥灵不昧，涣命是承。

谕葬曰：惟卿器识深沉，才猷练达。早登甲第，出补郡推，遂以廉能擢任风纪。明刑敷政，迭长名藩；较望论资，乃迁棘寺。秩加都宪，岭南扬抚馭之声；位正工曹，留署著阜成之绩。既遂乞休之请，方期寿祉之绵，俄闻讣音，曷胜悼惜。念贤劳之往绩，宜恤典之涣颁。爰命有司，为营兆域。特兹遣祭，以申眷怀。明灵有知，尚克歆孚。

谕祭曰：卿以先朝旧臣，归休故里，方膺寿祉，詎意沦亡，日月易流，倏临奄窆。载颁谕祭，用笃始终。灵爽如有，服之无致。

副都御史谢士元 明弘治 年

谕祭曰：尔发身科第，擢属地官。茂著才猷，而出知名郡；克勤抚字，而载参大藩。寻加方伯之阶，爰晋都台之副。声华久播于旬宣，功业复称于巡抚。方隆委任，遂乞归休，宜享暮龄，胡

遽云歿？特兹遣祭，仍命有司为营葬域。尔灵不昧，庶其歆承。

大理寺评事林公黼 明嘉靖 年

谕祭曰：尔发迹贤科，历官棘寺。先帝整旅，将事南征，伏阙上章，志期止辇。权奸构祸，捶责而亡，追念忠诚，曷胜悼惜。特加褒赠，延赏后人，谕祭载颁，用昭恤典。尔灵不昧，庶克歆承。

刑部右侍郎郑世威赐谥 明隆庆 年

制曰：士有特操，每景行于异世；典崇节惠，爰追贲于贤人。惟余夔介之臣，宜有袞褒之宠。尔原任刑部右侍郎郑世威，性资端恪，学识深醇。清修雅慕先民，劲节独超流俗。始徘徊于郎署，继更历于臬藩。直道难容，见几而退。迨先皇之求旧，翥硕于田中，一岁四迁其官，不日将大其用。辞荣家食，砥志真修。缙绅望之若冥鸿，后学尊之如鼎吕。为海宇淳庞之彦，享康强大耄之龄。虽被恤恩，尚稽谥典。采佥同之舆论，爰申锡以嘉名。兹特赐尔谥曰“恭介”，锡之诰命。于戏！宠辱不惊，朝野尚留清誉；初终一节，士林共仰高标。纶丝涣颁，乡闾永式。

谕祭曰：惟尔志行端方，学术纯正。策名郎署，展采臬藩。中废起家，荐躋卿贰。方期听履，遽赋初衣。甘淡泊以长终，痛典型之倏谢。顷因疏请，特沛恤恩。如在芳灵，服兹殊宠。

户部尚书太子少保谢杰 明 年

谕祭曰：惟卿秉心贞洁，操行端庄。释褐大廷，抗旌异域。夷金能却，君命有光。逮列寺之荐更，闻奉公之益邃。建牙虔镇，萑苻之警全销；正席仓曹，京坻之储日积。未究厥用，遽瘁尔躬。言念劳臣，可无异恤，特颁谕祭，以轸遐思。灵如有知，服兹宠渥。

## 宸翰

## 明太祖题宋陈容九龙图赞

蛰於渊底，阳回即起，倏起太虚，黑云见体。右起蛰龙。蜿蜒其身，翔海而吟，似怒而飞，鬣起遥岑。右怒飞龙。至阳出蛰，鬣舒赫烈，顾阴而行，游天遂悦。右杂龙。配阳至刚，电掣上方，飞云逐队，时雨致雾。右雌龙。既悦且翔，玩珠海洋，飞涛泼天，变化愈昌。右簸珠龙。舒海气，玩明珠，黑云无罅，神化莫测，收功天下。右次簸珠龙。脱胎以蜿，步云以蜒，必教而兴，利济无边。右娇龙。呼子而驾，一吟一咤，飞云九霄，雨泽天下。右苍龙。匿身不见，端光赤练，蜒躯一跃，九天掣电。右戏龙滚电。

## 札子

## 荐教授陈烈充太学博士札子

欧阳修

伏见国家崇建学校，近年以来，太学生徒常至三四百人，此朝廷盛美事，数百年未尝有也。然而教导之方，必慎其选。其进德修业，必有笃行君子，可以不言而化者，使居其间，以为学者师法，庶几内修其实，不止徒聚之多，为虚名之美也。伏见福州处士陈烈，清节茂行，著自少时，晚而益勤，久而愈信。非惟一方学者之所师，盖天下之士皆推尊其道德，谓宜以礼致之朝廷，必有裨补。近闻命以官秩，使教学於乡里，其礼甚薄，未足以称励贤旌德之举。臣今乞命以博士之职召致太学。虽未能尽其才，亦足以副天下学者之望，而诵朝廷崇贤劝学之实。今取进止。

## 荐直讲陈烈不次任用札子

宋 陈 襄侯官少师

伏见前授安州司务参军、充国子监直讲陈烈，心仁气刚，才智卓越。学圣人之言，而必践其实；稽先王之法，而必适于时。博通群经，尤明于典礼之奥。其为文章，渊源浩博，肆笔而成。求之今日，鲜有比者。庆历初，尝与乡贡，试于礼部。罢归乡里，无复仕进，安贫力学，积四十年著书数万言，未见其止。仁宗朝，尝因近臣论荐，及本州监司长吏高其风节，数以名闻。累降召命，以学官起之，辞而不至，世以为洁身独行之士，是非知烈者也。烈之所学，皆孔孟之学，观其事业，足以有为。自以身载圣贤之道，不为苟进，可以礼致，而不可以利屈，如斯而已矣。伏思陛下临御以来，博延髦俊，得人之盛，跨越百王，如烈之贤，不为难致。望陛下特以礼命召致阙廷，赐对清问，使陈二帝三王之治，六经四书之要，与夫当世之务，必有以上称陛下尊贤重德之举。今保举堪充清要，不次任用，后不如所举，臣甘坐而欺之罪。谨具，奏闻。

## 黄寺丞榦请谥文肃议

吴昌裔

造道入德之方，莫过致知居敬而已。《尧典》首论钦明文思，而圣人之道以传；孔门申言博文约礼，而圣人之道以立。《大学》格物致知，《中庸》学问思辨，则穷理之极功也。其曰诚意正心，曰戒谨恐惧，则治心之要法也。盖吾心之灵，万物毕备，必主一收敛，以澄其源。圣贤之书，嘉言具列，必随事穷格，以精其义。二者盖亦相发不容以偏废也。程子曰：“涵养须用敬，进学则在致知。”朱子曰：“主敬以立其本，穷理以进其知。”两先生挈提纲领，

开示后学，至矣！勉斋黄先生，自登文公之门，即喜此身有所归宿，于是万事悉置，而专探索于义理之渊；一物不留，而常提省于神明之舍。谓学问无穷，不可以轻儇浮浅得也。则远而观诸阴阳道器之运，进而求诸精气魂魄之神，大而察诸性道中和体用之贯，微而考诸敬义文礼知行之精。文公四书，口授面讲，一义必绎，一字必订。既尝与于讨论之事，而先生所著，《礼》有续编，《语》有通释，《大学》有经解，《中庸》、《孟子》有讲义，尤足以发明师传未发之言，则先生之致知可谓密矣。知心为活物，不可以纵肆缓慢求也，则以《丹书》“敬胜怠”之语列坐右，以《洪范》“恭作肃”之训授诸生，其操心也静而一，其应物也动而明。吾义可安，虽箪瓢屡空，有所不厌；吾志可存，虽筦库卑官，有所不屑。其在州县，宁以匹夫不被其泽为耻，不以一时近利为己功；其参幕府，宁以杀一不辜为戒，不以流俗姗笑为己病。力可以自任天下之重，而见不以礼，不肯曳裾于权门；才可以经纶天下之经，而招非其道，不忘志在于沟壑，颓檐败壁，人不堪忧，而风味萧然，尝有坚壮之志；暮龄宿疾，岁不我与，而讲论亶亶，一无衰惰之容，则先生之持敬可谓笃矣。世之学问溺志卑近者，既骛于方策，而不能存养本原；驰心高妙者，又略于章句，而不务研索义理。惟文公发明致知主敬之义，每使学者互进功程，其说固已内外兼该，而先生体贴居敬集义之旨，专欲教人点检身心，其功尤为近里亲切。是则文公有功于程氏，而先生有助于师门，千载师友之盛，真所谓颜曾之于洙泗矣。文公尝称直卿“志坚思苦，吾道之托在此无憾”，则文公之文，不在兹乎？先生尝曰：“先师以畏状敬，榦又看得肃字较密。”则先生之肃非苟知之乎？其允蹈之乎！溢法，道德博闻曰“文”，刚德克就曰“肃”，合二字而溢先生，夫谁曰不宜？



## 书

## 答黄直卿书

朱 熹

南轩云亡，吾道益孤，朋友亦难得。十分可指拟者，所望于贤者不轻。千万勉旃。此中文字，彦忠皆写得，已属令一一呈似矣。郑台州相见否？更劝其子细讲学为佳。书来，所说殊未端的，可惜只如此便更不求进步也。

又

朱 熹

斋中朋友，终年相聚，当有极精进者。此间诸人，来去不常，然气习偏蔽，各任己私，亦难尽责一人不是。大率江乡人太的确而失之固执，此间人太平易而流于苟简，此古人所以有矫性齐美之戒也。今敬子已归，临行又与安卿不足，只恐向后精舍规绳又旷阔耳。安卿将来，却须移出旧斋，自不与精舍诸人相干也。《礼书》须直卿与二刘到此并手料理，方有汗青之日。老拙衰病，日甚于前。目前外事悉已弃置，只此事未了为念。向使只如余正父所为，则已绝笔久矣。不知至后果便能践言否？予日望之也。

## 答张元德书

朱 熹

细读来书，知进学之意不倦，甚慰！读书切忌贪多，唯少则易以精熟，而学问得力处，正在于此。苟为不熟，不如稊稗，非虚语也。《大学》等书，近多改定处，未暇录寄。亦有未及整顿者，如《论》、《孟》两书，甚恨其出之早也。此间事虽不多，然亦终



日扰扰，少得暇看文字，甚觉岁月之可惜也。《通书》太极之旨，更宜虚心熟玩，乃见鄙说一字不可易处，政使濂溪复生，亦必莞尔而笑也。

又

朱 熹

来书所论通复二字甚密，然亦有未切处。“继之者善”云者，造化流行，万物方资以始而未实也；“成之者性”云者，物生已实，造化与物各藏其用而无所为也。在人则感物而动者，通也；寂然不动者，复也。以此推之，图象隐然，不待多言而自可默喻矣。四德则阴阳各二，而诚无不贯，安得不谓五行之性乎？凡此，更反复之，当自见也。

呈朱子书

张 洽

尝读欧阳公论许世子止之事，未免疑之，及读《胡文定公传》，未足以破其疑，洽继而考之《左氏》、《公羊》之传自明。但后人因《谷梁》不尝药之说，遂执此一句，以为止之罪如此而已。殊不考《左氏》曰：“许悼公疟，饮世子止之药卒。”《公羊》曰：“止进药，而药杀也。”此可以见悼公之死于药矣。当时之事，虽未有明文，而洽尝观近世治疟者，以砒霜锻而饵之多愈；然不得法，不愈而反杀人者亦多矣。悼公之死，必此类也。不然，当时所进非必死之药，止偶不尝而已，则《公羊》何以谓之药杀？世子何为遽弃国而出奔？孟子曰：“杀人以梃与刃有以异乎？以刃与政有以异乎？”进药而药杀，可不谓之弑哉？其所以异於商臣、蔡般者，过与故之不同耳。心虽不同，而《春秋》之义一，施之者以臣子之子君父不可过也。如此观之，似足以正近世经传之失，而

破欧公之疑。不识先生以为何如？

### 与刘砥刘砺书

宋蔡元定

元定衰老，非久於人世，今乃得与昆季为友，共了此事，又何幸也！先生正月两到家，闻盛称用之资禀忠厚。凡学，须要用工，克己为仁，不可作好题目看。第一义不可作天下第二等人。道学晦蚀久矣，本朝诸先生幸得之遗经，是天未丧斯文也。未丧斯文，自然生此善类，非人力也。释老之所以盛，盖亦天地气数使然。况天下大经与天地并者乎？忧闷之甚，偶作此书，心开目明，不觉盈幅，况得同堂合席共议天地之化育者乎？进学之心，朋友中未见其比，先生之门，当不寂寞矣。

序

### 图经序

县令袁正规

事物之来，新故相仍，则有置有废，有兴有衰，而出于人成，本于自然者，殆不一也。其井邑迁徙，里闾经画，贤人伟德，灵踪异物，祠蓝构植，源泉漫渍，累数千百载，间见错出及废置兴衰之由，或湮没而不得闻，亦近世之所病也。乃必事事询之于博学多识之士而后究，盖亦劳矣。况事之所当知者，亦岂少哉？昔人每著于铅策间，后之览者，潜心遐想，虽岁甚久若出今时；虽世甚远若粲然在目。此《图经》之所不可无也。事物之大类能总之简册，便阅于人，条分缕析，历亿万年若数一、二日之易，况兹一邑乎？又其来未甚久也。夫创始者难为功，续终者易为力，非不知简册之便，其泥于常情，而倦于创始，其亦夙夜在公而未暇

欤？不然，则邑之《图经》何可得而阙也？嗟夫！人每失于因循，事或忘于持久，知此则其于事也几希矣。长乐在十二邑之中，地非沃壤，鱼盐之利，岁上于公家者常居诸邑之最。其如文物之盛，山川之美，闽记遗落多矣。乃属邑人林通博采其事为之图经，或有未完，待好事者补之可也。宋元祐三年岁戊辰。

### 筒斋陈公挽诗序

明曾 棨状元

昔杜少陵作八哀诗，以追述当时名卿巨公之遗德，而寓其悲伤哀悼于无穷。虽其人之事业皆已载之史传，可考而见矣。诗虽无作可也，然所以哀之者，少陵之私情也。诗发乎情，止乎礼义。由是言之，少陵之作其可以已乎？故至于今，使人读之，犹可以想见其人之风姿气概之雄，勋业文章之盛，恍然若身亲见之，莫不为之低徊怅叹，以其人之死为足悲也。然则诗之感人若是其至矣乎？后世挽诗，盖此意也。今左春坊左赞善兼翰林编修长乐陈公仲完，以疾卒于北京之官舍，一时交游士大夫既皆临哭之，且复相与赋诗以寄其哀挽之意焉。公之子冷，来归公之丧，汇所得诗凡若干篇，诣余泣拜，请为之序。盖公自少颖敏而端重，始以乡荐分教延平郡学，再调宁国，用荐擢翰林，继迁春坊，仍兼编修之职。自居侍从二十余年，恪恭所事。由是纂修之功、辅导之益为多焉。其为学本於躬行践履之实，坦夷直谅，无所矫饰；为文章不事藻绘，而词义粲然；与人交，一皆诚确，而始终弗变。其为人长身玉立，望之伟然，平生喜怒未尝形于颜面，终其身不闻叱咤之声。故卒之日，识与不识皆知其为笃厚君子也。呜呼惜哉！公之历官行事，载於铭志，兹弗复详，第序士大夫所以作诗之意，以答冷之请。嗟夫！后之诵此诗以怀思於公者，抑安知其不为之慨然遐想而兴叹乎？予知公之遗德可不泯矣，故序。

## 南雅集序

明大学士杨 荣

中书舍人陈登思孝，以其先人江山令仲进先生所为诗曰《南雅集》者来请予言以识之。盖先生以文学仕进于时，历宜阳、韩城二县丞，以至江山。其为人纯粹而岂弟，所历皆有善政，故其登於诗者，温厚和平，而皆出於性情之正，何其至哉！后之人得而读之，宁不有所感发而兴起乎？诗可以观，可以兴，信矣。三复是编，书於末简，以俟知先生者焉。

## 南雅集序

明大学士杨士奇

中书舍人闽郡陈思孝，出其先君子仲进先生《南雅集》一编，读之，长篇短章，随兴所至，丰约合度，而音律格调不愧古作者。至若述人情，明物理，一归之和平忠厚，其善于为诗者欤！先生尝丞宜阳、韩城，后知江山，皆有善政。传之登高能赋，可以为大夫先生，殆近于是乎？昔成周之盛，《大雅》之诗实始二《南》。先生南产也，题曰“南雅！”其意亦欲歌咏国家之盛欤？惜乎，其遽歿矣。

## 南雅集序

明翰林学士金幼孜

余观天下文章莫难于诗。诗发乎情，止乎礼义，其辞气雍容，而意辄深长者，必太平治世之音。然求之古作而征之于今，何其寥寥也？此余所以读《南雅》之集，而重有感焉。南雅乃三山陈仲进甫因其所作以为号也。仲进力学好古，而尤工于诗，所以为古今体五七言各臻其妙。辞气之间，雍容不逼，而悠然有深远之

趣，其治世之音欤？且工于言者，未必能通于政事；通于政事者，未必能工于言。仲进既工于言，而历仕数县，又皆卓卓然有善政以及于人，此尤人之所难能者。仲进之子，中书舍人登，间以此编相示，且请予一言。予阅之数日，喜其言之合乎古，而有征于今也，故书以归之。

### 南山书院序并歌

县令潘 府

皇帝元年，用大臣议，天下郡县毁私创寺观，及禁滥充僧道徒。长乐知县潘府闻诏欢欣鼓舞，乃再拜稽首言曰：“辟异端，崇正学，吾志也。况承明诏，旷古奇逢，于今盛典，臣子当力行之。”遂召诸僧道，宣谕朝廷威福，驱其徒二十余人，悉归之农。明日具米醪，躬率僚属耆老，劝农东郊，过三峰塔门，亟毁撤之，用置劝农亭。府日登亭观稼，农悦益勤厥务，是年大有。乃复毁其殿左右廊，增置预备仓，分周贫、济乏二廩，积谷以万计。府欣然曰：“民食稍赢矣。”遂毁南山寺堂，因其形胜，更相度之，改立南山书院，用以养蒙士。府自愧无状，不能为子弟表率，乃立乡贤祠于院北，以风励之。又恐教不达于下，循行四乡，尽去诸庵舍，改立乡约堂。凡乡大夫及民高年有德者，深衣大带，月朔宴会于斯，遵行朱子增损《吕氏乡约》礼，务合时宜。每孟月，约正挈持善恶簿诣书院考较之，俾民知所劝惩。府虽不敢自谓寓政教兼隆之义，亦庶乎崇正辟邪之意。虽然，向非明诏颁示，府等虽有心，空言何补？今日之举，皆朝廷之力也。盛世一歌，容可已乎？幸观风者采而献之明天子。歌曰：“斯道在天地，万古如一日。世运或盛衰，圣贤靡常出。否泰恒相寻，道乃有通塞。邪说肆淫哇，仁义以晦蚀。孔孟百世仇，蠢兹老与释。退之崛起，鞭鋤颇用力。正脉尚幸存，千百仅十一。天生明圣主，斯道赖主张。



孔孟仇我复，晨起奋乾刚。佛子还西狄，法王窜遐荒。寺观孰私创？亟撤其宫墙。老释孰为徒？亟复尔冠裳。大臣协谋议，宣布及四方。小臣不自量，誓欲扶纲常。奉命巡都鄙，正气凛秋霜。厥邪一归正，正学日以昌，明圣自天界，斯道为生光。歌颂乃臣职，勒彼南山石。南山峻极天，天子亿万年。”

### 宋季勤王陈氏一门三忠诗集序

明状元朱之蕃

国家所恃以纲维，世道人心所赖以植立者，惟是忠孝节义为之根柢。所贵乎学士大夫身体力行，而不以盛衰易其志，不以生死动其衷，乃足与天地永存，称不朽于世耳。当宋景炎时，元焰燎原，赵鼎改物。文丞相、张枢密冀以一成一旅，振中兴厄运，而海滨陈氏父子兄弟三太学，破产率族以应义举。南剑摧锋，军声始振。相念驾泊闽海，奏荐子华公作令福清，以简军实，壮声援为己任。拮据方有次第，而胡酋阿刺罕已陷福州。宋帝移舟泊泉，而贼臣蒲寿庚者，通虏叛降，帝舟复移于潮。公从枢密往讨泉贼，奋勇斩戮，将围其城，贼欲遁去，而胡酋唆都兵适至，大战凤凰山之麓，军中不知福清公所在，而公之子宗傅、侄老成，遂陷阵寻救，中伤并殒。陈氏之族，死于是役者，百七十余，人，惨亦极矣，而公顾独得无恙。事闻，驰赠建祠，以慰二公忠孝英魂。公哭子侄以诗云：“便应作厉鬼，虏酋尽杀伤。”其志在报仇雪耻，留其身以有待，固未能一日忘宋也。事既终不可为，而竟资志以歿，惟谆谆戒子孙勿背宋事胡。率其明训，百年不移，千人罔替。至明兴胡灭，而公之孙子始贵显绳绳，郁称望族。当高皇帝时，蒲贼遗裔，以他事与人揭奏於朝，高皇帝廉其叛逆状，追戮遂无噍类。三公盖黜黜而显报之，以昭劝戒于二姓之存亡盛衰间矣。公之十世孙长祚，为南少司空，追述遗烈，修传征诗，登歌于几筵

以伸时享，哀辑成帙，属蕃有言以弁首简。蕃窃叹三公之忠义，迄今几历四百年，如日月之中天；司空之孝思，远溯几四百年，如川流之会海。其炳朗之休光，渊源之世济，皆笃钟于宇宙之正气，而维系乎伦纪之至理，非徒为陈氏之家乘生色而已也。爰抒不斐之辞，用志景仰之实。观感兴起，人有同心，昌后承先，陈之家法固世之当共法而永传者欤。

### 南阳陈氏考懿序

明状元舒 芬

昔武王克商，曰乃反商政。政由旧，则周礼之制，固损益乎商也。孔子学周礼，乃曰“宋不足征”，胡不取诸周礼？则于商之旧章或可窥见万一耶？予观陈氏考懿，知孔子之心矣。孔子去周之盛时五百余年，则周礼亦弊之极矣。是以诸侯擅相盟会侵伐，虽灭国、封国，亦不禀命于周天子，岂周礼固如是哉？故欲求诸商之故国，庶几其有征也。然文献不足矣，虽欲拨乱世反之正，抑孰尊而孰信哉？南阳陈氏，当我太祖太宗创制之初，人才彬彬，一家而官翰林者且三人。至吾同年户部员外郎则英甫，盖未及百五十年也，而世有不知者矣。则英为是惧，乃汇次当时名公之文以记之，题曰“考懿”。夫考懿者，岂徒足征陈氏之文献哉！乡举里选之礼废，而科目以空言取士，虽我朝有不免也。但观陈氏之三翰林，果之虽以取士及第，拔编修，然终其身仅迁侍讲耳。仲完以训导受修撰王褒之荐，擢编修，未逾年即简为左春坊左赞善，仍兼史职何也？思孝之为中书也，又自荐为县丞，屡荐而擢也。思孝之父仲进，亦以荐历升江山知县，而著循良之绩焉。由是观之，祖宗创制之初，虽以科目取士，而任人之实不废选举之礼也。今惟科目资途之徇，而人之贤不肖略不暇问，是以世道日卑，风俗日陋，有志之士，往往以为制非周典，其弊所必趋也。使余非观



陈氏考懿，亦乌知祖宗经制之善，而今日有司固弊之哉！然则考懿之集，可以窥见一代之文献矣。刻成，则英来请序，予因是而重有所感，乃不讳而书之云尔。

### 南阳陈氏考懿序

明尚书林 俊号见素

文以传为不朽。夫有其实，则有其鸣，自鸣，鸣也。假善鸣以鸣，亦鸣也。陈之考懿，文献其足征矣。陈自浮光入闽，十五世南阳翁自玉融徙江田，传龟图公第宋进士，为国子丞，信州知府。永乐间，简斋公以文学被荐为编修，为左赞善，仍兼编修大典。蒙庵公以廷试第二入为编修，为侍讲。石田公以篆书造妙，荐待诏，转中书舍人。当时制作，多出三先生之手。夫翰苑文宗，虽老师宿儒，造物尚有所靳，陈独世世相沿袭，识者拟之吴之正献、正肃，苏之文忠、文定，韩之持国、康国，宇文之仲理、仲通。…时立言家又为之记、传、序、表、铭、赋、诗、赞以宣发懿灵，歆当时而振耀来世。噫，盛矣！裔孙地官郎中毓贤哀而集之，棠陵方思道又为之编次。南阳开其原，考懿备其规。追烈昭其武，表淑阐其贞，述孝纪其承。穷原则仰心专，循规则守心一，踵武则趋心疾，树贞则立心奋，笃承则继心勤，陈文献子是乎备。备可传也，与藏故笏故砚故墨异矣。

### 林永光诗集叙

明太师叶向高

予与永光少相善也。同时有陈方伯道良，林给谏谨任，皆尝从先大夫讲业。四人者为笔研交，而永光最昵就余。余少年旷佚，而永光循循若处子，其文章亦静婉绰约饶藻泽，见者赏心。三山诸名士结社谈文，争欲得永光。永光每奏一篇，则社中俱废。时

余未有名，而永光独相推许过于余子。岁丙子，永光、道良、谨任同举于乡，而余后三年始上公车。道良以丁丑第，余与谨任同第癸未，永光乃竟抱刘蕡之屈，无不叹之。道良、谨任先后居谏垣，皆有声。余备员词林，而永光乃为令连山，又自连山移守永宁，其地皆仅如弹丸，错杂夷獠间，使他人居之，将不胜其落寞萧骚，无聊不自得之感，而永光处两地皆甚适。每与余书，第言居官奉职，勉自树立，不敢苟然以负故人耳。初不知其官之为投荒，而地之为蛮烟瘴雨也。衙斋无事，乃益读书理篇咏，于诗日工，其名亦日起；而余为词臣，久之益颓落不自振，每读永光所寄诗，辄自愧矣。世恒言诗能穷人，此虽未必然，乃历观前代达官贵人，以诗名者殊少。此非尽才拙也。诗之情超，而役役者之于情则不适也；诗之境淡，而炎炎者之于境则不入也。卑者以情而逐境，高者以境而累情，何以能诗？夫永光之诗，虽其才具格力之不同，而其境之为连山、永宁，与其情之因连山、永宁而发者，不亦甚淡而能超哉？然则，永光之所以安于其官，而忘其投荒者，其殆有乐乎此也。永光别余且十年，尚滞遐方；谨任以直言谪归；道良遂化为异物。升沉聚散，生死之际有足悲者，故书此以贻永光，非以叙其诗也，聊以识吾与永光生平交游之概有如此耳。

### 北窗吟草序

明大学士李廷机

京兆谢公，与余同庚午举者也。余向得公诗一二诵之，窥豹一斑耳。今手是编，诸体种种备焉。自昔谓诗有别才，非关书也；有别趣，非关理也。公诗固从读书穷理中来，而材趣自足，故辞赡而气道，致密而响逸，足以规摹前秀，鼓吹休明，称诗颖已。夫诗以赋事见志，声音之道，本与政通。故吉甫作颂，穆如清风。

《诗》三百篇，往往矢自贤士大夫之口。自功言途折，而始有从政不达，专对不能，如尼父所讥者。今代自李、何二三君子以诗鸣，已不竞于仕。其它搢管登坛，骚雅自命，而及其从政，率豪举疏节，挂于吏议者比比。于是墨守之士，戴星衡石，以吏为师，乞乞簿书，期会间鲜复讲诵风雅。而公自起家大行，以至今官，所至职思其居，精核细综，号为治办；顾能有余力以游于作者之涂，仕不废学，吟不妨政，声律吏事两擅其长者乎？世风既下，甫尔蛩鸣，傲然虎视，哆口而谭建安、开元之业，若无人然。而公逡逡笃行，即以余之习于公，每见其蒿目时艰，缕指世务，未尝及诗，即是编非其邑属请之之勤，犹不欲发篋也。如公敦厚，盖得诗之教者，诗其必传。

### 北窗吟草序

明尚书冯琦

今之为诗者，一何与古异也？古人之诗，情而已。若远若近，若切若不切，而可以自纾其情，可以谕人之情。人已之情两尽，而语不必尽，彼与我知之，而后人有不及知者，此古人之所工也。其在后人不然，其人其地其事，与夫官秩姓氏，皆引古事相符合，以为典切而已。情不必纾，人情不必谕，语已尽而读之不了了，一了而遂然无余。盖古人以情为诗，而后人以诗为情。古人似虚而实，后人似实而虚，虚调易拟，实境难工，出乎虚者有极，而入乎实者难穷。盖天下千变万化，惟情而已。今人以意为云雾、鬼神，肖不肖无可据也。然不过数十百端，即彼与此相类矣。善画者，图天下人，妍媸美恶肖不肖立见，苟得其真，则万亿人无一相类者，此虚实之别也。司寇谢公尹京兆时，因魏长公识予，以诗命余序之，余受而卒業。法而雅，详而典，肌丰而骨强，色正而语和，咏物则妍丽于徐、庾，述事则沉酣于子美，事无牵会，语

无湊泊。因实境所至，而因以命之意者，合于古人之所谓情，而余所称写真者耶？苏子瞻称画竹，必有成竹于胸中，执笔熟视，见所欲画者，急起就之，如兔起鹘落，稍纵则逝，此真能得竹之神者也。诗亦有神于此，当其卒然而遇，冥然而合，情与境相际而生。夫无外境，即内对不起，然当其胸中所无，即外感之不应也。此无他，神相得也。谢公起自闽，生而揽结武夷之胜，又官使垣，辙迹半天下，琉球之役，波涛万里，与天俱碧，历岁始致命于阙下，比之子长龙门、会稽之游，益远益奇，而一写之于诗，不知情生于境，境生于情？要之，非谢公所历，不足以益谢公，非谢公，虽有江与山不为助。此无他，神相得也。谈诗者执余说以窥谢公，因谢公以稽古之作者，庶几旦暮遇之。总之，不离实情实境者近是耳。

### 小草斋集叙

叶向高

诗与文从来罕有兼至，诸能诗者，多以为诗难于文。余以诗自歌行长篇外，寥寥数语耳。又有前人成句，可供俚订，资撮拾，虽难工而易成。若文则连章累牍，多至数千言，少亦数百言，如凌云之台，建章之宫，非材木素具，何以结构？即材木具矣，而非工师之手，亦不能运量。故其难工与诗同，而成亦不易。历观前代，自《骚》、《选》而下以至我明，以诗名家者殊多，文则可屈指数。若合诗与文而俱工，则虽班、马、李、杜、崆峒、大复诸名家，皆不能也。吾郡在国初十子即以诗鸣。其后如少谷先生辈，皆拙于文。迩来才士彬彬，颇以兼至自负。而竟其所就，长短得失，亦自可见，不容掩也。今读方伯在杭谢公《小草斋集》，则庶几矣。公诗体裁声调，酷似唐人，凡为唐诗者无能过。公已有别梓。兹集二十八卷皆文。序记之雄深，碑传之博奥，论赞之

精严，尺牋之朗畅，铭、诔、杂著之尔雅，皆斐然质有其文，足与其诗相伯仲。盖公资性绝异，十岁即能声律，又酷好读书，凡经史子集，以及稗官家言，无不探讨。余在纶扉，公方郎水部，日从余借秘书抄录，录竟即读，读竟复借，不浹岁而几尽吾木天之储。昔人所谓书淫，公殆似之。计其胸中所蓄不啻万卷。而又赋才敏妙，笔端驱役，无不如意。殆天之所授，人复成之。固宜寒俭苦澀之士，望公绝尘，瞠乎其后者耳。公历官所至，皆有治迹。其在粤西最著，时黔蜀苦乱，粤西为密邻，当事者责以纓冠之谊，而壤瘠民贫，无以应。公为调剂其兵食，驾馭其上司，酌量其缓急，事事中窾会，故师行而民不困。黔围解，粤亦晏如。余尝语主爵，当俾公开府其地，而主爵不应。亡何，余归，公亦歿矣。每思公之兼才，不独文与诗，使天假之年，庙廊能用公，其所树立尚未可量，而仅以方伯止哉？世传公著述自兹集外，尚有数十种，其评鹭记载，排纒谐调，无一不粲粲悦人心目。即晋人《新语》，唐、宋诸小说之善标识者，不能及也。余喜读公杂著甚于其文，每一开卷，常惟恐尽。然则公之所可传，亦不独其文与诗。兹第论其文耳。方余出山，亦有小草篇，盖窃取公家太傅之意。公为之序，盛称余历事三朝之苦心，而勉其毋愆然求去。余虽不能从，而心感公知我。今序公文，重有慨也。嗟夫！安得公存而与之论出处之际哉！

### 谢工部诗集序

李维楨

本朝诗人与李唐等埒。闽则林子羽正始，郑善夫中兴。其在子今，项背相望，就余所见，若叶学士晋卿，曹宪长能始，邓汝高参议，谢在杭工部，皆高廷礼所谓名家、大家也。叶醇雅典则，以相业掩；邓秀朗闳深，以中道夭；曹简练冲澹，而遭回仕路，与



谢略同。二十年前读在杭诗，以为闽士无辈，顷始卒業其全集云。賦则牵引广譬，穷态极思，驰驱不失，兴寄殊远。平子、文考、安仁、士衡之流也。乐府则丰约文质，适得其中，房中、铙歌之流也。俯而为六朝，白苧、子夜之流也。五言古，贍而不俳，华而不靡，或朴茂浑成，或清虚旷逸，鲍、谢、陶、韦之流也。七言古，音节鲜明，气势沉郁，抑扬阖辟，变幻超忽，高、岑、王、李之流也。五七言律与长律，比耦精严，骨力劲挺，刻画不过巧，瑰丽不近夸，盛唐诸子之流也。绝句，意在笔先，韵在言外，春容警策，短长合度，太白、少伯之流也。统而论之，商彝、周鼎为古质，而薛谈、秦青为声调，干将、莫邪为锐颖，而高唐、下蔡为柔曼，行云流水为自然，而削鱗弄丸为用奇，敦陈整旅为方格，而冠冕佩玉为雍容，绝巖乔林为耸拔，而幽谷寒泉为沉邃，诗家之美，集大成矣。抑何修而臻此？盖诗有法存焉，离之者野狐外道，泥之者小乘缚律。在杭书破万卷，神游千古。其专一如痾痿承爨，其积累如纪消养鸡，其赏鉴略牝牡骊黄，如九方皋相马，举止无俗累，出入皆天机。故其诗率循古法，而中有特造孤诣。体无所不备，变无所不尽。杼轴自操，橐籥靡穷，斧凿无痕，炉锤独妙。试取两京、六朝、四唐诗并观，虽胡宽营新丰，纪昌学飞卫，不肖于此矣。岂夫才有偏至，识有偶中，鹵莽灭裂，从事学问者，窃窥藩篱之外，可妄亿室中之藏乎？在杭文倍于诗，而诗先行。今诗道向衰，余将以在杭为砥柱，请质之叶、曹两公然否。

### 谢在杭诗序

明屠 隆

黄白仲与予抵掌海内辞人，遂及闽士，而指屈在杭。谢君才横绝一世，早岁登坛，所称诗峭犷秀伟，卓然名家。为入轩轩霞举，亭亭物表，趾高视卑，冲襟可挹，且薄收效於三事，而厚殫

力于千秋。异日者与子东面而争牛耳之盟，必夫夫也。不佞逡巡避席曰：“主臣，余雅知在杭。夫闽山水秀甲齐州，灵爽之气，蜿蜒磅礴，尽发此时。方来之俊，云蒸泉涌，先后通名字不佞者无虑数十家，削牍有至万余言者。洞目骇心，观听于是为巨。要以闽中白眉，则首推在杭。亦犹海错之推西施乳，荔枝之推陈紫、江绿，而山川之推武夷九漈也。”不佞向慕谢君，往年尝赋诗四章，将讯之吴兴。寻如金阊，稿为云间人篡去，不得达。又一岁而晤在杭虎林，酒铛茶鼎，不律如意，相得甚欢，不佞酒中戏语在杭，五霸桓文为盛，降而秦穆、楚庄渐以菱芡，再降而卑之乎，吴子欲承一时之乏，妄规此物，踉跄黄池之上，卒为天下笑。不佞与弇州、新都交臂接袂，则亦惟是邾、莒、滕、薛之奉齐、楚、秦、晋尔。自两公即世，此物漫无所属。而海内操觚者如云，亡弗张目扼挈，起而争之。世有虞于不佞者，极口而訾，极力而挤，若惟恐不佞之一旦登弧以登。如目之有翳，必去而后快。不佞轩渠，我其鹑雉耶？腐鼠此物久，而鷓尚吓我。且桓文既没，余岂不度而为吴子哉？余且跳而托于团焦净业矣。以故遇世之嗜古而操深心者，急名而鼓盛气者，才望既久而势可几者，人地未至而力可副者，余必长跪奉此物进之。力副而势几，则在杭其人。所为峭嶭秀伟，轩轩亭亭，斯登坛之器，白仲之人伦鉴不爽也。在杭别后，使使以诗序见属，余业撰一首贻之，使者乃为殷豫章，浮沉又不达，而故草又寻逸去。在杭数以诗责逋，会余奉大讳毁甚，不能搦管。居一岁而始为勾当，则不能举旧作一语，遂更著成篇，工拙不可知，大都视旧作加详焉。两纂著而两不达，岂亦有数耶？不佞近论诗，如琅琊、历下，有才力而寡性情，务声调而乏自得。由两公为政，士争趋之成风，风人之旨殆尽。必也取三谢之清苍，救六朝之浮靡；采王孟之简澹，济李杜之沉雄。今天真与奇藻并烂，名言与劲气相宣，斯其极，则妙境哉！在杭辩此审矣。不佞性疏



而轻名根，应世诗文，无论多至洋洋纒纒千万言，寡至寥寥数语。往往援笔矢口，布之通都，工拙惟命。近以学道，戒绮妄，疏笔研，人购之未尝不应。愈援笔矢口，了不经意，其以夫夫才尽而舍旃，幸甚。盖不能峻龙门拒人，又不能苦心竭力而与海内争此物，则亦惟名根轻故，为语操觚诸君子，尤复以腐鼠吓我哉！余之衔璧舆榱久矣。

### 小草斋集序

张献翼

夫唐以诗取士，士咸工诗。然大历抡才，曾不逾十，建安作者，仅若而人，诗可易言哉？后尚经义，而诗几于亡。既乏博依之学，安取缘情之藻？无怪乎今之诗不逮古也！明兴，作者辞宗正始，格祖开元，浸淫至孝武之朝，献吉李氏，仲默何氏，昌谷徐氏，彬彬振藻辞林，而海内亦且向风矣。迨嘉、隆间，前有皇子循兄弟蔡子木，后有于鳞、元美诸君子继起，皆振藻郎曹，不在大历建安之下。宫商杂奏，而并出雅音；丹素互施，而悉呈艳绘。猗欤盛哉！闽中有十子诗，余恨生晚不及见。又有七子诗出，予读之而愧在于前，愿为下拜焉。七子之外，复有陈子卿、谢在杭二君，皆与予善。诸君子逞雕篆之技，绋笔札之交，抵掌而谈秦汉，奋力以挽风骚。诗教风行，作者云集。音非朱弦，辞非黄绢，宁弃去不屑就也。沿流于十九，溯源于三百，岂徒尚经义，取青紫而已哉！在杭适解褐鸿渐，将上书凤鸣，以儒术缘饰史事，振鹭羽于彤阶，奏鸾音于清庙，匪直以铅槩垂声者。是编也，蓄藻于建安，腾声于庆历，希躅于少陵，泛驾于长庆，兼综潘、陆，妙契陶、韦，故其缀辞婉以丽，其御气雄以健，其摅思优以隽，其援事典以则，其振响和以平。荇华喻好于春风，芙蓉比妍于秋水，才情信美，而寄兴尤深矣。坐见纸贵都门，谱传乐府，近自凤掖，

远屈鸡林。如尝鼎一脔，已知其味；观凤一羽，已知其德。于鳞、元美已死，非君将谁与哉？粤稽谢氏，最钟康乐，元晖托迹于宣城，惠连通梦于池草。宣远嗣响，希逸流声，千载而下，乃有在杭，可谓克遵家范，无替世美矣。余兄弟弱龄嗜诗，究心作者，诸君子间有占缀，若握灵蛇而得珠；至于讥评，敢谓操龙渊以议割？乃知诗固难言，知尤不易，岂其要之？亦惟勸之而已。

### 陈氏族谱序

明侍郎王世贞

左氏有言，先王因生赐姓，胙之土，而命之氏，盖其时多世臣云。以故宗法得提衡其间，与治法相左右而不废。太史公之为史，人为之传，而其有爵而不替者，特名之曰世家，夫亦命氏之遗指哉。若江左之有贵姓也，则自王、谢始也，顾、陆而朱、张肩之也。江左人而为隋，而王、谢之贵小屈，而崔、卢、李、郑之贵兴，魏孝文为之嘘而籍之。及其末也，虽唐文皇以天子之尊，求胜之而不可得。然其人皆以姓贵者也，非能贵姓者也。五季之中原，日寻于干戈，至靖康而悉以倭虜。衣冠之士，脱锋刃而窜匿于吴、越、闽、广之间，抱其遗编以海其子弟，出而当太平之用，故天下之所称贵姓者，渐不在北而在南。荐辟、科举之政行，天子所与共天下者，皆彬彬诸书生，诵法孔子之辈。士或旦白屋而夕朱户，其子弟习其遗编以继显，故其姓之所以贵，渐不在纨袴，而在诗书。此其人皆贵姓者也，非以姓贵者也。今东南名诗书族，毋如闽，而闽之族，毋如陈，余皆与其雋善。今年大中丞公某抚关中，出其书一编示余，曰：“是谱也，伯兄太仆芹之属草，而某为之润色者也。是家大人中宪公之志也。”读之，则其先为光州之固始人，从王潮入闽，而家之福清南阳村。三传而讳泰者，徙长乐之江田；又四传而公文海，复徙古县；又八传而为中顺公某、

中宪公某；又一传而为今中丞公及其伯兄中丞某，再传而为县令雋、长祚，此其最章章盛者也。其留江田而显者，给事某，曰提学洙。自江田而徙闽之青铺显者，曰大仆联芳。自古县而徙闽之南台显者，曰兵部时霖。凡闽之为陈四，而皆出固始，又皆其人能自贵姓者也，君子以是知诗书之泽远矣哉。且陈之先出虞舜氏，世世称侯邦焉，以宾于夏、殷、周，而其嗣世至篡梁之祚，用衣冠倾中原。而中丞公谓之远而不足征，独断自公泰始。推是指也，以别嫌而统同，敦始而修睦，志其所以为陈者耳。凡不佞所称述者，皆非中丞指也。虽然，为陈后者，能绍明其诗书，务以人贵其姓，而毋藉姓贵，虽由此百世可知也。

### 送江镇鲁明府擢临江别驾序

左都御史击珙殉难 杨 涟  
 钦赐祭葬谥忠愍公

公何以来应山？而合邑之官民欢而庆；亦何以去应山？而合邑之官民悲且思。盖以凤檄飞驰，鹤琴随往，一时僚友，爱结情联。临歧话别，青衿赤子，遮途卧辙，皆含泪酸衷，比之婴儿弗得乳于母，徬徨乎亦何依？是故忘之不能，留之不可，不得不假之诗歌以鸣眷恋莫舍之意。《诗》曰：“蔽芾甘棠，勿剪勿伐。”公之德既不殊于召伯，则民之咏亦何异于甘棠哉！公也政声劳绩，嘉之两台者，屡著荐章，屡呈天府。深仁厚泽，布于民间者，浹肤沦髓，勒骨铭心。视同寅若庭帟骨肉，待属吏若父子家人。据以相契之殷，相得之素。仗庇者，快瞻依之托；沐恩者，怀衔结之酬。古云“有斐君子”，其公之谓与？“终不可谖”，其不忘公之谓与？至于千佛宫殿，百子祠堂，与夫桂香台阁，总皆公之功德，遗而为爱，去而为思，生祠图像，应之人能容缓耶？第人有乐邦之驾，不复有应山之知，彼郡之寅友、四民，何幸获所资凭，此邑

之属吏四方，何勿幸失所倚藉。尚冀莺迁之后，大而开府全楚，如马德安之复来；次而参守郢都，如邓承天之再至，则故邑遗黎，欢迎问劳，又当何如？此人事之或然，合而离之而仍合，聚而散之而仍聚，相循不穷者。稿成，钱子等读之皆曰：“可以为文矣。”是以壮其行。

### 颂邑侯郑月翁德政序

明工部侍郎董应举

新宁令君，予所知者，前有贞庵蒋公，后有四可李公。蒋公好文而勤士，能知民所缓急，动中其心。李公笃于民而练于政，庭无留讼，邑无逋赋，左右无宿奸。两公相去数十年，而贤声相照，卒无有及之者。乃今始有月庵郑公。郑公之为人也，慈而惠，勤而断，廉辨而有立。有李之练习，而好文勤士如蒋。初至才数月耳，已清宿案三百余。最恶赌盗毒草，其法必行，而人不敢犯。敛束衙役，胥吏亦立听处分无所与，贖缓多宥。有积讼三十年不能决者，决之而大家咸允，独所不避者强御耳。于民则柔之，曲求其所苦。其追征也，惮劳者责赋于见役，各甲所逋莫之问也。公曰：“如此则益逋。”于是悉比各甲，且比各甲之朋户，不逋者免。其始虽劳，其终乃逸。而审编又甚公，如家至而户察焉。新宁故瘠邑，半滨海，当蒋李二公时，海祸不烈，得专心于成民。今祸烈矣，公至，简伉健以待有事。又欲城要害扼贼往来之路，而苦子无资，日缉缉而不已。属又有册封、外国之役，徒御旁午，纷不可问。公只勤以将事，坚忍以为百姓，蹇然不敢宁。凡此皆二公所无者，公当其难，亦其所遭之势然也。公尝念国挈腕民穷，而注心于屯政。谓予曰：“使某得为朝廷老农夫，被襖瘴瘵所不辞痒。”观其意，岂以华胄为心哉？苟利国家，致身以之，此又方今仕路之难得者也。今政方期，民已歌舞之。当入覲，而当事以地方留



公，且兼摄福唐，士绅争为歌颂，如复得乳于慈母焉，则公之为政可知矣。公深于经术，其学以治气养心为务，不跲为声名。故其感人最深，而事事有立，古所谓大受君子，非公其人欤？

### 送练生赴阙为其先中丞请恤序

明侍郎董应举

余向闻练生至都门，能使松月中丞见梦，以明其后事，大异之。当靖难时，雷霆至震也，挟以陈瑛之酷毒，其芟夷至众，宜无得脱者，何以能存一线之绪于长乐？且黄分宜、方宁海、齐溧水、张泽州及中丞，非当时所最烈最惨者哉？而分宜之子田经且存楚，宁海幼子存于魏，典史泽溧水之族存于六岁儿，泽州曷且以一子脱然，则天之巧全忠臣，岂瑛等所能灭者？及观新淦、峡江争祀中丞，而留都诸处，各有正学诸公祠。春秋奔走，不啻子孙，大忠大节，生气勃勃宇宙间，固不论后之有无，况乎其竟有也！成祖尝论逊国诸臣，彼食其禄，自尽其心。大哉言乎！惜为瑛等所误，徒以成诸臣不畏十族之名于天下万世耳。然而雷霆方霁，日月旋明，瑛与景隆，旋亦见法，其子孙竟何如哉？此可为天下后世之一鉴。或以革除之际，朝非易姓，苟不从权，何必激而隳宗？是固然矣。然人各有志，义烈所形，何暇反顾？彼教官典史，吏目皂隶，戍卒樵夫，如陈思贤、黄谦、郑华、茅印、储福等，赴义相踵，况赫赫受知如中丞等？此而可左右袒，是无君臣也。成祖“自尽其心”之论，已明教天下之为臣矣。图其事而避其身，抑心谓何？固知逊国诸臣不得不烈烈死也，岂暇顾恤九、十族哉！不爱其死，而死犹生，不爱其族，而族犹存，此则天之有意乎其间，以待乎主纲常、终明训者。昔钱习礼以中丞有连为人所持，成祖曰：“子宁若在，朕犹将用之，况习礼乎？”宣宗亲诏琼琼，悯其父之忠而绝嗣，而官其婿。身欲用，况于褒恤？婿

欲官，况于子孙？生行矣，今岂无导上心为中丞地者哉！加意忠烈，以劝臣子，亦千载之快事也，故为之歌以劝其行：“北风吹裂金陵水，潜龙自失神龙起。耿耿中丞舌向天，白日黄尘满西市。井里沉湮二百年，独留一线三千里。乾坤依旧气长存，日月虽蚀光不死。我欲为君叩九阍，千世万世扶天纪。”

### 练生赴阙为其先中丞请恤序

明布政谢肇淛邑人

呜呼！金川门之变，何忍言哉！当元黄血战，玉石俱焚，如齐、黄、方、练诸君子，业自分覆巢之下无完卵矣，乃不意逾二百年，隔数千里之外，而得其遗裔以奉殯殮也。可谓非天道哉？方峽江之来聘也，以嫡则练纓当往，而纓安土重迁，遂逊于其弟绮，俾授衣巾。今纓子思祖长矣，际皇仁之浩荡，念忠魂之未雪，手裹中丞遗事，万里伏阙，泣血上书，冀请褒恤之典，以下报九原，其志亦可哀也。余谓中丞公之忠节，与日月争光，固无可复论。在文皇帝时，亦有“子宁尚在，朕当用之”之语，而章皇帝所为，诏其女，官其婿者，纶綍郑重，辞旨凄惻，固已廓解网之殊仁，宏不孥之大造矣。当时，固未知公之有后耳。令甲九列以上，没则有谥，有赠，有祭，有荫，而死事者，加一等。于忠肃之死谗也，杨忠愍之死谏也，孙忠烈之死贼也，异代之下，皆已贲鸿名荣来裔矣。公以少宰兼御史大夫，秩不为不崇，而从容就义于可左右袒之顷，视三君子难尤倍蓰。今日之褒恤，固天下万世舆论之公，而亦国家磨钝励世之大典也。练生行矣。有圣天子、贤公卿、百执事，启金滕之遗策，读陨霜之哀辞，必有怆然动念，而毅然为任其事者。余淹扮榆之役，尚未之能先也。乃为歌变徵以送之三阕。宾客祖道者，虽发上冲冠，亦欣欣有喜色也。

## 书练公遗事

明知县夏允彝

文皇帝之入靖难也，建文之臣，守死不变者数十百人，惟练、方两公最烈。观其身裔族灰，无一言少逊以彼其意，相率赴死，惟恐或遗耳。当时以万乘之威，欲快志于所疾恨，一言与连，罔不糜碎。天风感人，闻者咸暗，岂复有藏亡隐孤，曲全其如线之脉者哉！乃方正学之胤，固全于峰泖间；而练公之子孙，至今犹在新宁。余生于峰泖，吏于新宁，两公之胤，俱及见之。故知忠孝之人，天道所不绝，自有扶持而安全之者，万乘不能加，燎原不能及，非两公之胤不可绝，盖忠孝之道不容绝于人心也。练公事，史载甚详，其遗胤之获全，谢在杭已记其事，余不复道。余友王中翰应遵语余曰：“神宗时，公之子孙思祖者，上疏于朝，言公死难事。执政怜之，将授以官，已拟俞音矣，祖忽病且死，呼中翰曰：‘夜梦吾先人敝冠败白布衣，怒而责祖曰：尔何得妄言乞官？是违吾志，吾不终令尔获受一日禄也。相传吾先人被难时，其冠敝，其衣白，吾且受殓于吾先人，子其为我具终事，’越日果死。”嗟乎，烈哉！文皇帝尝曰：“使练子宁若在，朕当用之。”此帝王之道也。推公之志，即文皇帝宥而大用公，公亦必不愿。生二百年之后子孙将一就禄，即阴殓而杀之，视食薇之节，不尤伟欤？虽然，公之志则然耳；睹公之胤而不思所以优存之，毋乃忠孝之心或泯欤？吾乡已特祠祀正学，又与其子孙两青衿奉祀事不绝。此非公之所乐受，要亦不容已也。余既上书主文使者，保其胤，得仍隶学宫。尤望后之人之益优之，故记其遗事。



## 江田陈氏家集序

明侍郎曹学佺

友人孝廉陈昌基，辑其令先文献，自大令公以下至司马公，为集若干，胪次而列之，且序其阅历行传于前。余以通家世讲，后起斯文，因得而卒業焉。乃掩卷叹曰：予向知江田陈为三山族望，而不知其盛之至于斯也。昔夫子殷人也，尚论夏、殷之礼，悼杞、宋之无传，以文献不足征故也。晋韩宣子观《易·象》与鲁《春秋》，谓周礼尽在鲁矣。夫春秋之时，周之为周可知也。列国以富强狙獮相尚，而何有于文？而鲁犹庶几哉！秉于礼义，故夫子谓其一变而至子道。至于道者，即东周之大指也。夫子岂以此而私鲁哉！夫言以载道，言之无文，行之不远，所从来矣。故宣子之受享而赋角弓，季武子始赋绵、后赋节之各卒章，而宾介酬酢，犹知有诗教焉。然春秋之时，世其官而不必其诗，然则周礼之存者，固亦简编方册也焉尔。犹夫好事之家，牙签缥帙，盈箱累架，而未必能作，作者亦未必能述之谓也。若陈氏者，或以牧民，或以学士，或以文学侍从，或以戎备劬勩，盖彬彬乎质有其文焉。不惟世于学，而且世于诗。今其集俱在，读者论其世，足以知其盛也。然余观宋玉山汪公之论曰：“国家方全盛时，士大夫家集之藏，未必轻出，中更党禁，愈益阂匿，故一旦纷扰，遂不复见。某方待罪太史，讨论熙宁、元丰以来公卿大夫事实，虽前修盛德，盖有不待言论风指知者。然而传信垂后，不可以无证，诏求遗书，将以补史氏之缺。久之，无送官者，每为之阁笔而叹。”夫我国家荡平正直，右文弛禁，二三百年来并无有诗人而获祸者。顷士大夫虽稍角元黄，而乃心王室，则人人思自靖献，而圣明在宥，又以虚公之意行之，而日消融其方所。予知先后在朝在野之称诗，皆以讴歌圣代而自适，其有今日也。然则论陈氏之世者，又观当代之世，而知其盛之有由也。是为序。

### 陈克韞寤寐斋集序

明大学士谥忠端黄道周

闽诗之兴，始于欧、黄，至郑祠部称盛矣。中间作者五六十家，长乐诸老，几据其半。故长乐之于三山，犹昆岑之有群玉也。陈克韞思致清深，才藻敏妙，本其家学，畅以惠风。自公车以还，逮秉铎之始，先后歌吟凡数百篇，皆和美遒逸可诵。仆病懒，寡所睹记。近读徐、曹诸先生所刻晋安诗，大率包备矣。方宋时，盛称江右，江右嶮削，有孟、贾之风。明兴，雅誉吴门，吴门韶秀，兼许、韩之旨。吾闽理逊江右，韵逊吴门，而刻镂整暇，备有其体。以今而观，能始之派，渐于建安；在杭之徽，被于徐、庾。声永所依，鸾麟辈出。郑之始乱，未足多也。克韞方勤思经术，摅怀道纬，但因其流汇，试为波澜，而浩漉之观，遂复无际。讽咏其诗，见其人从容渊穆，该廊岩之美，遇所得意，即使正、嘉之间，姑苏诸公舐笔濡毫不是过也。吾乡往时排比诸习，顷遂顿尽，绎其言，有不囿于嶮削韶秀者。短律如“人清云亦爽，僧倦灶无烟。”“潭深寒石影，风紧老人颜。”其起结云：“独酌爱微醺，临溪看水纹。”“长安晴雪后，河柳起朝鸦。”仆每对客诵之，余俱称是。因寤寐斋，为附数言于此。

### 江田诗系序

尤 侗

江左诸王，人人有集，当时以为美谈，惟阳夏之谢，陇西之李，差足相方，然未有合为一集者。今江田陈氏，由宋迄明，能以诗世其家，而断自子华公称首。盖公以太学起义，二子战死，有三忠之目。厥后子孙无一仕元者，此其忠烈之气，光远有耀，可传于后世者也。七闽为人文渊藪，载籍之富，几汗牛马。乃数十

年来兵火流离，十不留一。予过而问之，故家遗业，迥非昔矣。无论夹漈草堂，不可复识，即求曹氏之石仓，而已荡为荒烟蔓草间。或有一二残编断简，仅与海波上下，若有若无之中。昔人所叹声华湮没，光灵歇绝，虽有孝子慈孙，鲜有能保其球璧者。而陈氏《江田》一集，笔精墨妙，岿然如灵光独存，岂非幸耶？抑或有实式凭之者在也。陈氏之贤者曰昌箕，先为纂辑，有能始、牧斋两先生为序，今继之者伯驹、紫岩二君复加编次，而征序于余。余读未卒业，慨然有盛衰之感焉，矧其后人能无手泽之思乎？藏其书，传其人，斯亦颍川之甘棠也。

### 陈惕园诗稿漫存序

乡贤谢金銮

陈庚焕，字道由，一字惕园。其先世自长乐徙居福州。父指云先生，与先君子相契厚，故道由与余为世交。生同年，居同里也。道由幼读程朱书及《通鉴纲目》，长涉猎诸史，举其辞不蹉一字。子嘉言懿行，辄默识之，莫逆于心，口津津不能置，务力行，刻苦自治。凡衾影幽独之事，必籍记之。切齿誓心，为克治之学。自余少年，交官志斋、陈耻斋，日聆其绪论，退则与道由私相砥砺，盖余畴昔师资之藉，自官、陈二公外，得于道由者为多。岁丁未，余年逾三十，始出远游，谋饘粥之计。其时志斋已奔走于外，而耻斋亦有浙水之行。自是以后，十数年萍梗浮沉，踪迹各散。未几，官、陈二公相继而歿，而道由亦家计寥落，以明经教授乡里间。计余自丁未后，维琅山、秦屿均三年，及归读许氏园，则乙卯、丙辰两年，犹可闭门谢客，中间庚戌入都门，则藉求当世著述，以资考订。前后凡八九年，颇能毕力于圣贤之言，如少时业其他，至今则皆鹿鹿耳。意道由家居执经，日与古人相对，必能日扩所闻，使见义益广而精，力行益固以大，而余卒未获复共

朝夕，以深窺其所藏也。昔孔子歿，門弟子各歸其鄉，據所得為樹立以自見。而西河子夏氏，其稱最著。然投杖之拜，記自《檀弓》，始則三罪在身，而猶呼天自白，則離群索居之患，可勝言哉！彼諸子者，得聖人為依歸，其所培植者至深且厚，而猶如是，況余之與道由哉！蓋吾二人者，其離群索居亦已久矣。曩德化鄭六亭嘗與余書曰：“吾輩讀書人，或以佳文篤行，獲有令聞，稍稍薄宦，前後便如兩人，吾人所見亦屢矣。故自登籍後，嘗以此為兢兢，此時此事，不能不傾心于子也。”嗟乎！余自入仕後，所賴以提撕警覺者僅有六亭，而各處一方，不能相聚，則余過惡叢集，又孰從而指數者？思六亭愈不忘道由矣。道由好讀書，多聞典故，而達于世事，志不在詩古文，偶然為之，輒入作者之闕奧。存詩不多，要其立旨多關於風教，抑其所樹立可見也。

## 二十二史圖初編自序

陳庚煥

約《二十二史》所載，上始羲、軒，下迄有明庄烈之紀，為年四千六百有奇；帝王代興，二百五十有一。次其事迹，分為兩圖：由周而上，隆古升降之迹也；由秦漢而下，後世得失之林也。代為歌訣，便強記也；孔、孟有譜，詳聖賢也；前言往行，名臣字謚，散附於其間者，備參考，存法戒也。三代以上，史多闕謬，旁采群書，存疑也；三代以下，正史既備，一宗正史，史有異同，亦參他說，傳信也。汗牛充棟之籍，縮以盈指之圖，期於首尾易尋，分合易見，雖視正史未能千萬之什一，然用代群史之目錄，則于稽古之力，或亦不為無助。命之曰《二十二史圖》。圖也者，著其迹而已。若曰以之論史，則何敢？

## 敬和堂笔训序

工部尚书谥文勤王庆云

昔白香山作元夫人墓志云：“漆室、缙紫，烈女也，及为妇，则无闻；伯宗、梁鸿之妻，哲妇也，及为母，则无闻；文伯、孟氏之亲，贤母也，为妇时，亦无闻。今夫人三者具美，可以冠古今矣。”兹读江田陈母田孺人笔训，及其哲嗣楠斋所状闾行，则女德也，妇道也，母仪也，三者备之矣。质以香山所云，何多让焉。且其懿训所垂，自立品、读书，以及治家、接物、居官之道，一切实而可循，则不独元夫人所不逮，即古来诸贤媛，亦鲜有闻焉。想其聪哲明敏，温恭柔顺，如所称动合礼仪，言成规矩者，乃能有是欤？然则楠斋之提躬砥节，力学成名，皆本诸母教矣。欧阳公曰：“见其子之贤而有立，则知其母之义方。”信然。

## 前題

湖北州同林滋秀

近世鸣鸪比德，弋雁称贤。遵姆教于笄年，式妇仪于缡岁，善心为窃，徒留种桔之言；嘉耦曰妃，只尽采蘋之职，其或哀深茆独，抚及遗孤，和丸之诲虽殷，剝荐之情良苦。鲜有微言所发，大义攸关，如长乐县田氏孺人者。孺人茂荆华胄，咏絮才媛。诗书淪其心源，文史疏其智府。归我同年友陈常于先生，廿年伉俪，四德懋修。不幸而先生溘逝，儿方背父，母欲兼师，特书遗训一编，授其子诸迁昆仲。今秋寄余读之，言近指远，情深文明。其督儿书，尊师道，引小学，则孟氏母之论信教也；述先德，明天理，种心田，则欧阳母之论厚仁也；防间断，戒繁华，勤省察，则文伯母之陈劳逸也；立志气，存忠厚，望家声，则崔篆母之笃文行也；售牧豕，安贫贱，忍饥寒，有若陈婴母之薄富贵焉；孝舅姑，睦



妯娌，怀弟侄，有若钮滔母之循礼规焉；严视子女，恕待臧获，有若延年母之慈爱居心焉；慎营丧葬，邪辟道僧，有若范滂母之正大为法焉。身为女士，志在圣贤。论城乡习俗之淳漓，别今古人才之臧否，以视《鲁斋语录》、《涑水杂仪》、《阳明文钞》、《定宇事略》、《大临乡约》、《士晋宗规》、朱柏庐之要言、杨椒山之遗嘱，彼固须眉足重，而此更巾幗难能。嗟乎！余与常于先生，蕊榜同登，芝颜未覩。方拟榕城叙阔，谁知蒿里长辞？孺人以移天植节，辅嗣成名，亦复息影尘寰，敛魂泉壤。哲人同穴，龙山墓草之香；淑母遗编，骥子楹书之泪。呜呼！其可哀也已，其可传也已。

### 治长事略摭存序

邑人陈萼芬

昔子产治郑，猛以济宽，宽以济猛，其迹固近严也，而孔子略迹原心，称为惠人，诚以恩威兼用，固万世救时之良法也。乃今日者，徐侯之治长，为能得之。长邑僻处海滨，民多椎鲁，而慧直之性，渐流强悍，甚至掳抢、械斗、赶书、图命之案，层见叠出，故邑素号难治。善治长者，立威为先。威立，则民鲜犯法。示之以和平，导之以礼义，而民可安，俗可阜。斯地虽百里，苟非明礼达用之员，孰能胜任而愉快者乎？徐侯下车伊始，力挽颓风。掳抢者立置重刑，械斗者亲行拿究，惩赶书，禁图命，以及捕积案之巨盗，杀越狱之悍囚，严毅之风，闻于远迩，而顽梗之徒，悚然畏缩，罔敢犯科。行之期年，风俗丕变。然使刑威是尚，而文孝失宣，不能兴利除弊，是亦汉之酷吏而已，奚足贵乎？徐侯乃留心吏治，百废俱兴。首及书院，筹增膏伙，葺治讲舍，改建奎光楼，凡以兴文教也。次及农田，浚陈塘港，疏西湖，而东湖亦勘估待行，凡以重水利也。又次及祠祀，重修五贤祠、城隍庙，旁及崇圣殿、先农坛，凡以崇祀典也。以及鼓楼、官廨、道

路、桥梁，皆择要修建。设北路之育婴堂，整城东之养济院，凡足以利人济物者靡不殚举。呜呼！盖自乾隆间安成贺公后，无有如徐侯之能举其职者矣。徐侯处事勤，诸所兴作，必躬必亲，而要皆以实心行实政，故始之望而畏之者，继皆亲而爱之。绅衿耆老，屡向大府乞留。在任四年，始量移福安，祖饯之日，攀辕卧辙，民犹有太息于挽之不留者。嗟呼！子产为古之遗爱，徐侯不几为今之惠人乎？日者，徐侯将书院、港湖碑记章程哀为一帙，邮书属芬编校。芬惟徐侯之政绩，可与贺公前后辉映，为吾邑光。然以徐侯之奋发有为，充其恪共厥职之心，异时功业，又岂可量哉！贾生有言，移风易俗，使天下回心向道，类非俗吏所能为也。卓矣哉！徐侯其拔俗者欤

### 治长事略摭存序

县令徐承禧

长乐西接闽县，东滨大海，幅员不及百里。各氏聚族以居，擅鱼盐果瓜之利。士人被服儒雅，世称海滨邹鲁，有自来矣。然其俗强不受侮，往往以小故寻干戈，加以学校之不修，水利之不讲，水旱盗贼之时作，民生日困，讼狱日滋，械斗、赶书几无虚月。当官者簿书鞅掌，惴惴焉救过之不暇。苟居其位而思尽其职，岂易易哉！光绪丙子冬，余捧檄宰其地，捕剧盗，锄豪猾，不一年而械斗、赶书之风息。年谷屡登，讼狱衰息。余与士大夫谋所以修坠举废，而陈瀛川刺史尤以吴航书院费绌为言，乃首筹书院膏伙，修学舍，改建奎光楼，继浚陈漕港，疏西湖，设北路育婴局，改造汾阳王庙桥、陈塘港桥，重修五贤祠、城隍庙、鼓楼官廨，旁及崇圣祠、文昌阁、先农坛、养济院、南城桥路。以城乡诸绅分任其事，而自总厥成。虑经费之难集也，则捐俸以倡之；虑属役之不均也，则亲身以督之。凡三易寒暑，始次第竣事。庚戌春，又



议继浚东湖，估丈既定，而占湖奸民控诸宪府，往复查勘，迁延及于初冬。余复以量移福安，亟去兹土，工弗克竟。更有南陂塘、莲柄港，亦议而不行矣。然则他役之克举也，虽曰人力，盖亦有天幸焉。抑余闻诸父老，乾隆间，贺君世骏在任九年，兴作尤巨，工费请之官帑，无纤毫累于民，其规模当可为后世法。惜也文献无征，欲问百年前经营之迹，已无能道其详矣。今勤民之力，耗民之财，所就仅此数端。若书院、港湖、育婴局、城隍庙，遶年皆有应收之费，应办之事，条议章程，详明列宪立案。而陈塘港、西湖两工，制府何公、中丞岑公且先后具疏上闻矣。其他废兴沿革之故，余与陈君各有叙述碑志，惧其久而散佚，亦犹今之视昔也。爰摭为一帙，刊附邑乘末，俾后来者参今制，酌时宜，推而广之，使百废俱兴，家富足而户诗书，礼让兴而闾阎洽，以上跻郅治，是余之私志也夫。

### 通州直隶州志序

代江苏学政林天龄撰

陈寿臧原名世英

《通州志》失修垂百二十年，同治间，梁君小曙、莫君善征相继牧兹土，延知名士纂辑、校讎，始戊辰，迄甲戌，凡七年志成。予适奉命视学江苏，按通州，莫君以序谒予。初，江苏议辑通志，大吏飭所属修郡邑志，为之权舆。各郡邑往往以费绌迁延，而通州独先葺事，吁！其难矣。予维人心风俗之厚薄，始于一乡一邑，终乃极之天下。天下有事，沃土敖民之所聚，受祸常酷，而人心风俗之敦朴，好义者常有以自全于危亡患难之中。呜乎！是岂偶然也哉？通州故泽国，引源酳渠，沃壤亩数钟其地。南通闽、粤，北接齐、鲁，商贾辐辏，鱼盐之利，木棉花布之产，甲诸省。而俗顾厚以朴，都人士多积学植品，无齷齪态。曩者粤逆蹂躏南服，自扬而苏而常，先后陷于贼。通州独晏然，不罹锋镝，其有

所恃以自全耶，抑遂可恃之而常无患耶？重瀛隔绝数万里，挟其奇巧之技，肆其怪诞不经之说，以煽惑我民，以网我市利，以窥伺我疆土，何日无之？曩者之所以自全可恃耶，抑未可恃耶？乘未敝之人心风俗培养之，摩厉之。正学盛，邪说者不得作。君子爱其礼，小人爱其土物，奇技淫巧不得至于前。稽物产之兴耗，休养生息，以裕粮糈，度形势之险要，训练规画以儆戒不虞，虽百年无患可也。今所修志，疆域增风气一目，军政区水陆为三，水陆尤详乎言之，其亦识时务之宜，而忧深思远者矣。如皋辖通州，胡安定先生讲学故里也。范文正公祠宇，富郑公屯兵处，犹有存焉者乎？观其名，慕其实，使人心感动，油然而不能自己者善教也。能吏类以征牍程会为功，而二君举事绳墨之外，彰往诏来，可不谓贤哉！予既重莫君之请，而志成于顾孝廉昆仲，孝廉于予为通家，素渊雅。是书类事贍具，体例不戾于古，无待予言，言其大者，弁于册，是固使者采风问俗区区期望之微意也。是为序。

### 弘治甲子修县志序

本县令王 涣

县可无志乎？曰不可无志也。县而无志，犹家之无谱，国之无史，天下之无图籍也。其邑制之沿革，户口之登耗，贡赋之盈缩，与夫人才风俗之盛衰，于何而纪载乎？官于斯者，欲求其故而因之更化；生于斯者，欲景其贤而资之以进修。于何而考验乎？甚矣，县之不可无志也。肆我皇明，既有《大明一统志》，而福建一省，又有《八闽通志》，然则长乐独可无志耶？长乐之为县建于唐武德之六年，迄今盖七百余岁矣。由宋历元，以入我朝，其间沿革废置不知其几，而人才风俗，独为八闽之冠，古称海滨邹鲁者是已。夫何地理图志竟无完书？岂曩昔迄今，莫有修之，抑固有修之，岁久漫灭，而不能以具存耶？是盖有由然矣。尝考之宋

元祐间进士林通作《图经》，盖略而不备。国朝永乐间纂县志，复废而不存。涣始来官，首询公私，莫有存者。乃旁搜延购，《图经》得之闽人许光，县志得之乡耆陈敬。顾其书皆抄录旧本，且多残缺，而鲁鱼亥豕之讹，又不知其几，噫，可叹也！乃者政通人协，众废就兴，顾于此可阙耶？爰谋诸寮案，乃走书币延致秋官刘君则和、邑博潘君援来总其事。复遴选邑之秀士陈良贵、时康、郑文静、陈坦辈相与考订而纂辑之。始于夏首之望，竣于仲月之晦。缮写成帙，为卷凡若干。余手阅之，喜其书之宏大广博，巨细毕备。且其叙事也，质而不华；其纪述也，信而可考。虽古之良史无以复加矣。呜乎！向之阙者，将不全乎？继今以始，邑制之孰沿孰革，户口之孰登孰耗，贡赋之孰盈孰缩，人才风俗之孰盛孰衰，一览之余，燎然无欠。后之善治而求所以更化之端，景前贤而资所以进修之术者，将不有赖于斯乎？是可尚也已。于是僉请寿之于梓，俾人人习而家藏之，则其传也不亦广且远乎？否则，后之视今，亦犹今之视昔，欲睹全书不可得也。予故捐俸钁梓，以垂不朽。后之君子，其尚心予之心，是庸述其梗概以序于首简。

本县教谕潘 援

长乐尹毅斋王公，以县志属笔于西窗刘先生，而俾援与焉。援维百里之邑，古大国地方也。鲁史之文，仲尼取而笔削之，以矜式万古。志犹史也，援何人斯，而克与此。固辞不获命，乃差日就局。凡分定类例，品第人物，一出于刘；依所分所第者，而行墨纂述，则援为多；而检阅校对，又属之庠生陈良贵辈四人也。于地理则书山川之方所，里道之远近；于食货则记户口之增耗，贡赋之盈缩；于公署、于学校则录其创置之功；于秩官、于人物亦惟据事实书，而不敢有所文饰焉。两阅月而就绪，为卷者八，为

类者一十有六，而附类之条目，又三十有八，仅可为后来纂修者之地，盖未敢为成书也。毅斋既引其端，援复僭言于后。呜呼！天下之称为名都胜邑者，不以土地饶广，而在乎人。人之所以能群超萃拔于人人中者，亦不以高官大爵，而在乎德。斯志也，若二刘之道学，高箕亩、黄汝明之忠孝，可以羽翼圣道，扶植纲常，其英风正气，直与马江同远，首石争高。我曹滥食兹土，且景仰则效之不暇，矧生斯长斯者，其可不知感激，而谓邑无人耶？援窃用此自勗，且为邑之人士告焉。

### 万历甲戌修县志序

邑人郑世威

按宋元祐间有《图经》，实邑志之始也。国朝永乐间旧志摭摭仅详。然历世既远，浸失其传，即遗编断简，予犹及见之。弘治甲子，经王侯涣修益，存逸匪经，嗣是废坠几七十年于兹。隆庆壬申，贞庵蒋侯令邑之四年也，乃复锐意纂修，先齐文学士，俾各殫其见闻，类萃辑略，属辟予营蔽总其成。余固让不获，侯乃借余出惊素，商确累日夜，期于总稽载籍，隐括体裁，要之不诡于正而后已。无何，蒋侯擢去，韬草逾年，意将终焉已矣，适怀愚韩侯莅邑，甫三月，清风懿绩，焕然用彰，予方鼓舞林樾，遽观德化之成也，顾侯辄以志事为请，余喟然曰：“甚哉，志之难也！功垂集，而唇吻频兴。今蒋侯去矣，独余肩其任，诃不难欤？惟执事图之。”侯请再三，爰哀旧章，勉加损益删润于其间，参互考订，四阅月志成，复于侯而就正焉。夫以文献无征之后，蒐猎维艰。矧污疏溷陋，力虽殫而见弗逮，非有俟于君子，欲无舛戾不可得已。然侯适今厘弊恤眚，庶务方殷，犹拳拳竣志事，用示不忘，吾知其疏观遽虑，固将推化民成俗之意，以树世风，而垂教思于无穷也。善观志者，藉是而有得焉，则择善而从，顾提在我。



稽述作，核名实，戒慎于几微存主之间，而所以淑身心，裨化理者，岂鲜浅也。夫固不敢拟古良史，将不为一邑之典刑矣乎？是庸叙诸首简，以告夫后之生斯宦斯者。

本县令蒋以忠

隆庆壬申，时予令长乐之四年，诸废坠且次第兴，独县志尚仍故简略嵒痲，观者病焉。夫吴航文献胄晋安，而小史仅录寥寥若此，奚以征故实而昭来许也？适月在鹑尾，遂简庠士五六人，会局汇编，而躬请少司寇环浦郑先生董正之。先生与余品规往籍，创树鸿裁，务俾斧藻得宜，用垂不朽。顷仅集就，余以迁秩之留都，未竟厥绩。越一期，而怀愚韩公嗣至。庠士之预修者，乘公暇申言之。维公慨耆英之难觐，思一策之易成。乃复诣司寇公求竣事焉。金谓首事实余，当有言以引其端，缄书驰示，展阅之，为卷有八，为类十有四。大都体裁严正，总括周详，纲举目张，种种具备。矧志封域、山川、经略，鉴以守土屏翰之猷远矣；志官师、食货、祀典，鉴以守官经理之术宏矣；志崇教、选举、艺文，披蕴哀华，土类其兴起矣；志景贤、旌烈、恩典，镜辙端轨，民心其向方矣。推而存往有志，古胜具在；异术有志，方外不遗。要皆迹乎故，而增其所未备；信乎今，而核其所未精。删之润之，与时宜之，章章乎邑之良乘也。即垂之千百祀，可以俟而不惑。后有作者，踵而修之，易易矣。然微司寇公懋望执盟，怀愚公雅志济美，畴克肩此重负，共襄巨典哉。余筮仕兹邑，精神注往，深幸兹志之底于成，而藉以殫厥心也。谨叙于次简，以复二公，并逾夫后之君子云。

教谕李日清

甲戌仲秋，《长乐县志》成。先是，贞庵蒋侯敦聘少司寇环浦

郑公司其事，会侯迁去，中辍者逾年。比怀愚韩侯至，复申前请，迄今始克就绪。日清叨署邑教，职当赞扬，第愧不文耳。乃司寇公谓余宜有言，焉辞？夫志岂易言哉！《周礼》诏观事有志，则史氏职之。近代郡邑记载书类称志，从古也。然作者无虑百家，顾诡于正则谬，琐察于文义之末则蔓，简则漏，有所拘慑，而执议弗竟则徇。四者随其人不蹈者鲜矣。今观斯志也，既已群稽载籍，崇信著括，然且究极乎彝训，揆量乎古今，差等乎庶职，扬摧乎人物，或正名以考实，或表节以一行。其他记事传信，辄增损前志。鉴于故，不易其宜；征于宪，未始或衍其则。断断乎罔以私夺也。夫义正则不谬，名罔浮其实则不蔓，广前人所未备则不漏，不慑则不徇，斯一邑之实录也，劝戒昭矣。尝慨乐以文献闻寓内，独掌故不全，非缺典欤？适今得贞庵侯倡之，怀愚侯成之，司寇公以硕望秉道厘正之，卒程于度，蔚为邑伟观。信今传后，盖可指掌而睹矣。文献不在兹乎？日清时偕同寮陈子邦宾、王子廷荐躬逢其盛，抑亦乐与诸人士共观厥成也。于是乎书。

### 崇禎辛巳修县志序

福建布政胡维霖

史之有志，自扶风始。今郡国志该乎书纪、列传、世家诸体，谈何容易。至以文士兼史才，自扶风外能有几人？若以令自志其邑乘，是其所以为史，即其所以为政，须本敬天勤民之意，淋漓于笔端，而以体国经野之猷，修举其废坠。古以吏治兼史才，仅得庐陵欧阳公。然《五代史》、《新唐书》，方之《晋书》，且有间焉，安敢望扶风？忆昔《禹贡》一书，如厥田下下，厥赋上上。真是痛痒切身，而其大者，乃在治水。又如《周礼》自礼乐兵农以至笙镛陶匏，纤悉毕具。而其大指乃在桑土绸缪莫敢侮，于是史非以夸采藻，原以恤民隐，维土风。吾观夏彝仲之治长乐，与其



所以志长乐，而叹下邑未始不可以王道之治治文士，与吏治史才又未始不同条而共贯也。盖长乐自正、嘉以前，士风多君子长者，其气淳庞，故科名甲子八郡，文治蒸蒸盛焉。后来海上亡命作奸，兼以征赋丛弊，民穷愁叹，风渐薄恶。彝仲至，不以己治长乐，而以长乐治长乐，又不以昔日之长乐治长乐，而以今日之长乐治长乐。按脉而调，见民间疾苦，莫急于丁粮，而以赋还田，虚粮不至累贫户。以差照丁，实丁不得逃徭役。以均比革包役，以积谷寓常平。清梅花所之军饷，申双桅船之海禁，种种可著为令。至立同善会以恤穷困，有保甲之利，无保甲之扰，此则移风易俗，又非才吏之所能为。且也拓城计百年，类晋阳之保障；水利通百里，似鄞侯之溉湖。读其治邑诸刻，窃心服之，以为经济名手。兹又出其志见示，索予序，予详阅之，曰封域，曰经略，曰官师，曰食货，曰祀典，曰崇教，曰人物，曰选举，曰存往，曰艺文，曰丛谈，概名之曰志。其体裁既典，且事核而文简古。今昔之淳漓，凄然笔下；山海之利病，灿乎掌中。盖有《豳风》之余韵，水利平成之极思焉。煌煌乎一邑之信史也哉！余承乏浙藩臬，知彝仲仙才博学，胸中具有二十一史，而识透千秋，意气如云，肝胆如雪，故吏才史才，无不称善。将来匡济世艰，润色皇猷，非他人，必彝仲也。彝仲曰：“吾所谓志者，为长乐之山川赋役风俗人心。僥得世世为长乐之民，不至为海上风波之民，是则修志意也。子言，则吾岂敢？”胡子曰：“长乐之政，布在方策，其人存，则其政举。后之官长乐者，其尚三复子兹志。”

福建按司徐世荫

余初读《禹贡》，以为此圣人治水之书耳。徐察其间，土田之肥瘠，贡赋之高下，道里远近之所经，地宜之产卉木，必书以勤民也。则凡有念民之心者，其为书不当如是耶？景泰中，诏修

《寰宇通志》，当事者欲仿宋《方輿胜览》，叶文庄曰：“是特为四六，设为志，必地理、户口不可缺，宜详之以资军国、益劝戒乃可。”议虽格不行，每阅及此，未尝不叹文庄之深识远见为不可及也。夫医者必相知其人经脉所会，荣卫所居，一寸之病，药即入之，故力不劳而身安。为治而纤微未谕，欺蒙已随之，况户口之所出，财赋之所供，事在一时，而沿之者数传未已。事变日增，法亦随立，故圣人尽心焉。但今为政者，莫不思旦夕释去之为快，奚暇念此哉？吾见其苟然而已。云间夏缓公以经世之才，烹鲜长邑，凡邑之风俗利病，如握径寸之珠，坐照千里，教化翔洽，而治以无事。于是因县志之久而修之，虽其力之暇为，而用心则固深远矣。其书大自户口、赋役、土田、陂堰、兴废、沿革之故，详哉言之，即下至一草一木，土俗之宜，亦时寓以己意，要归引之勤民，备劝戒以告后之君子。书成，余读之盖有感已。我国家财赋力役之征，比之古未有过也，犹有法外之仁。古者什一，则谓王政，今耕者所获有田，分其半计两者之入，其以上供亦无几耳。《周礼》计口为役，唐有身则有庸。今生齿日繁，当编户时，略为增汰，相当则止焉，是犹有隐丁也。自条鞭法行，杂色之费，一归维正。人徒见正供之有增，不知其无累于杂赋也，上之泽顾不厚欤！然中州西北不宁者数岁，金曰，民贫赋亟何哉？是亦奉行者之过矣。今地之所入，非加减也？役非不供也，奸民猾胥，诡计飞洒，虚悬赔贖之种种，赋逾逋而民逾病，上之人不察，卒令富与贫俱竭，上与下交困，此今日海内之一大隐忧也。吾观夏君所经划，如以田定役，则富者乐输，贫者不累。照丁匀差，则实丁匀，而虚丁得除。竖干追征，法非不便也。苦于见役之包比，乃为十甲均比之法，劳已以宽民，而赋亦早输。凡军匠僧役，无不悉心虑计长久者。且备载之于书，使后来有考焉。岂徒曰：是具故事，备文献已哉！使为令而皆能此，天下岂有事耶？吾愿后之

人永念之也。昔文庄著绩边方，每留意于兴屯、给军、募盐、饷边诸事，历陟大僚，为一时名臣之冠。夏君其有意乎？将国家实赖之，岂独余得藉手以相成也。余忝夏君同事最久，读其书，而知其用心之深远有在也，故僭为之序。

郡人曹学佺

古者诸侯辑瑞于天子，谓之会同，又名述职。夫曰同，则为车书、度量之类，固有不能异者。而列国风气地宜之别，亦有不能尽同者。惟是功令之所颁，而即为群牧之职守，罔拂乎輿情土俗之宜，而吻合于大同无外之化，此述职之由也。覲毕天子，审无异同，仍班还其所执之玉，以为来岁之示信。夫事也，诸侯述之，柱下记之，合为一代之史，散为列国之乘，所自来矣。顾瑞曰信瑞，史曰信史，则上下今古之间，犹可想见其大端，而为述作之张本，非一信焉，虽擅有三长，安所用之？然而信非一日之所致也，君子信而后劳其民焉。如志乘中之沿革、兴建、风俗、物产、礼乐、刑政、水利、边防，此种种事，非民谁任？非信莫成。然必信之己者，而后可以信诸人；必信之今者，而后可以传之后。不然，则民只见其为厉己也，而志安能以必传哉？近日县志，如《武功》、《公安》、《顺德》称佳，亦皆文人之笔，愚悉取而读之，其有不尽然者，以往事多而近事少，韵事胜而俗事略也。故因夏公彝仲之以修志见询，而谬对云：“风俗、赋税、户口、兵防，最为关切。何者？此数事而外，如山川则千古不变，沿革则昭代不刊，祀典载在令甲，人物定诸谱牒，其谁能易之？惟是风俗之不无始朴而终靡也，赋税之不无日增而愈拙也，户口之不无日诡而愈单也，兵防之不无日密而愈弛也，是皆为近事焉。近事之不能尽合于古，而长乐之不能尽同于他邑，固勿论矣。要之，非牧民者莫为之调剂。而悦欲上以副功令，下不致于拂民心，又非仗一

信焉不能以有为也。公惟信己而后民信，民信而后事集，事集而后志成。如是行之，如是载之，与夫唐虞之际，岳牧之所陈，史官之所采者，曷以异哉？虽然，彼固行者一人，载者一人，与夫《武功》诸志之以文人而记往事，不如夫以己之言，述己之事。何事非文，何今非古者之为得也。于是乎夏公之《长乐县志》为信史矣，谨序。

邑人刘沂春

《周官》太史凡有编摩，必取之外史、小史，以征其实。谓其论世之习，纪事之确，纤巨不遗，按帙如睹也。何鲁史之《春秋》仅载二百四十二年，学士宗之，史氏仿之，天下万世型而阐释之，且云为臣子不知《春秋》者，必昧忠孝之经，而君父亦懔懔于斯，方厥足无伤于视地焉。詎非以属词比事，褒诛如印，祥异不诬。叙伦必防其渐，敷政必协于优。举废修坠，洞灼风会之宜，上下实受其福。不类猛以蹴劳，萎而颓绩者乎？班、马由汉而上下周秦，世历羨为史材，彼实远逊紫阳之纲目，敢望《春秋》项背乎？吾邑之志，亦史之遗也，与郡志通。自永乐集后，至弘治而象山王父，借刘先生则和绍明之。亦越隆庆，常熟蒋父修未竣迁秩，属恭介郑公补其漏而剔其芜，较量以黍，平沈适均，传信之声，饴溢听闻。迄于今，七十五年所矣。潜之弗耀，懿之未扬，风会递转而莫为维，废坠日滋而鲜为挽。迩来夷寇交讐，殫地之毛，竭民之力，而艰于索赋。有能通变不穷，整暇而修廓之，以大畅前徽，炳昭来踵者，其几乎？我绥公夏父，云间人豪也。胸罗百万，眸炯三千。筮莅吾邑，不博赫赫声。色笑伊教，平易可近。并生之德与覆载同。侯明书识浅矣，字疇则阴雨膏黍，铸士则云汉昭章。诘奸禁暴，而隐慝大愆无遁情，并无遁迹。旌淑树表，而全瑜片璧有兼昭，随有兼收。渊陵形胜，式辟高深，徭役



匪齐，订其版而轻重布之。即军兴赋重，众咤棘手，而邑亦忘疲。盖夏父之诚求单心，小克勤而大克任，缓用振而急用舒。微彰刚柔，知靡不彻。故于政治公余，搜及邑乘。采之舆评，手裁新编。条分缕析，纲举目张，使后人于兴衰之致，利弊之原，丰歉肥瘠之歧，灾祥淳漓往复之故，一览列眉，必且惕然吏治之不宜靡，人文宜返其隆，风俗宜厚，品行宜先，户口、物力、兵赋、形胜，一一宜通其变，毋若刻舟胶柱之陋也。宛侔《春秋》之垂训，而仅如史氏之纪成书耶？余以部氓，幸观厥成，殆深有所感矣。吾邑山川苞塞，郁未尽泄，夏公疏而瀹之，心手笔舌，悉达其隐。先志而筹，借志而焕。朝华夕秀，启发生香。其以造天下万世，而先造吾邑者。仰承圣天子之特简，润色鸿猷，表章龙袞，煌煌巨制，永久为经。迩来郡邑之拜史官，试观是志，夫亦愈知治矣。谨序。

### 乾隆癸未重修长乐县志序

总督杨廷璋

邑之有志，所以纪善恶，示劝惩，俾后之人读其书，知其人忠义激烈，发愤为雄。庶吏绩民风，蒸蒸不懈，而及于古。余莅闽以来，于兹五年矣。闽，滨海地也，素称为朴陋。自国朝文化覃敷，海隅苍生，罔不喁喁向风，遵循罔教，较之两浙，亦莫能轩轻焉。长乐一邑，前揖平原，后负崇冈，沧海环其左，双江拱其右，地势雄伟，甲于闽中。民生其间，重农桑，崇朴嗇，安居乐业，不事华靡。余尝披夏君允彝之图志而壮之。后以阅兵故，亲历其境，乃益叹允彝之言为不虚也。允彝以明季名儒，出宰斯邑，仁心善政，浹人肌髓，至今俎豆名贤，称颂弗衰。其修是志也，盖参刘、郑二志而折衷之，较为完备。第百余年来，承熙累洽，俗益美，事益增，非旧志所能概。安成贺君莅斯土，有志增修，复



集闾邑之绅士而谋之。公事之暇，悉心参订，或加或减，或易名，或绘图，为纲十，为目六十有八，依门分类，犁然有当于人心。志成，属序于余，余阅之而叹曰：“安成贺君，其真有志于人心风俗者矣。夫古之所称循良者，功在一时，名施奕祀，况邑乘之作，垂之于载，未有艾也。今观贺君所经画，自户口、赋役、陂堰、土田、兴废、沿革之由，以及一草一木，上俗之宜，纤悉毕载，无一不上遵国宪，下洽民情。彝仲作于先，贺君述于后。韩子云：‘莫为之前，虽美弗彰；莫为之后，虽盛弗传。’今贺君既能修彝仲之书，自必勉为彝仲之政。他日者，黼黻皇猷，鼓吹休明，必贺君也。”余故乐为之序，以美其吏治云。

布政曹绳柱

志，统于史者也。史以载王政，志以纪封域，虽其体详略有间，其为征信之书则一也。有纂修之责者，苟不起而订定之，则其政令之沿革，风俗之淳浇，建置之废举，逾时数变，将何以昭劝戒、树风声，而立轨物也哉？福州所属十邑，长乐次于闽、侯。距会城百二十里，东枕大壑巨浸，为滨海奥区，鱼盐之利最饶。生其地者，性缓而志强，外文而内鲁，亦风气使然也。考七闽，自周秦汉已隶职方，而长邑置于唐武德中，历宋及明几千载。邑乘自刘、郑二公修后，迨明<sup>①</sup>夏缓公续辑成书，迄今又百二十年矣。编残简断，稽古无资，此孟子所谓恶害己而皆去其籍者。籍之去，弊之原也。夫人之所以肃然不敢犯者，以事有考证也。否则谤张为幻，乘间而起，其将何所究诘耶？邑令安福贺君，以名孝廉莅斯上。政成之暇，奋然以典章自任，酌前志而更定之。其大者如易经略为建置，易食货为田赋，易崇教为学校。大抵不惟其文，惟其事；不惟其事，惟其核。务使制度规模，灿然犁然，按部就班，有条不紊。志成，请序于余。余时方陈臬闽中，簿书之余，留

心披阅，而知君之敷政优，并决是书之必可传也。昔欧阳公以一代名儒，兼精史学，其于守滁也，务能公明仁恕，州民歌思至不忍舍去。魏丞相徵佐太宗定天下，丰功伟业，昭耀汗青。至于作史，则又谨严简括，兼擅三长。由此观之，君以文人缩铜墨，则泽被兆民；以循吏操丹黄，则直行三代。此之谓辞尚体要者，而非仅如沿袭旧编，粉饰一时之观听已也。虽然，余所望于贺君者，盖不止此也。方今圣天子德意覃敷，洽于阨隘，邑士人之沧肌浹髓百年矣。贺君诚自今益勤不懈，则整齐画一之规，昭兹来许，将闻风而思奋者，明备之感且永世矣，又岂特长邑一方之益哉！因书之于简端。

兴泉永道谭尚忠

缙绅之家，欲绵其世德，而继其家声，犹必追溯前谟，仰承先烈，勒家乘，以垂不朽。况一邑之疆域土田，广狭险夷；一方之土俗民风，淳漓奢俭。经纶纲纪，巨细洪纤，胥于是乎考证。顾以为不急之务，而不考鉴于盛衰得失之原，因革损益之故，是犹测景者，废其圭臬，范金合土者，弃其模式，欲其治有成绩也，难矣。长邑自唐武德中隶版图，历千余年无志，至有明中叶，刘、郑二公草创于前，夏公彝仲续成于后，迄今百二十年矣。文献厄于沧桑，载籍毁于兵燹，兼以地非通都大邑水陆要冲，吏斯土者，因循荏苒，束缚驰骤于簿书期会之间，风尘鞅掌，亦乌暇及此哉？安福贺公，以名孝廉令吴航，催科抚字之余，缘饰经术，以饬吏治。遂以南阳、颍川之长才，成龙门、扶风之大业。聚精会神，积五六年哀成斯志。壬午岁，余奉朝命来闽，与贺公叙梓谊，因得阅其邑志。喜其考核精严，义例详密，兵戎秩叙，粲若列眉，食货宾师，了如指掌，而赋役、户口，按籍可稽，蠹胥悍民，无所庸其胸臆，所谓若网在纲，有条不紊者，即此可以征公之所学矣。长

邑距会城百二十里，负山环海。风云变幻，鱼龙出没，吞天浴日之乡，鳌背鲸身之区。惊涛骇浪之所，澎湃而奔腾；化日恬风之所，涵濡而孕育。阅斯志者，不必躬履其地，目睹其形，固已游心浩渺，放眼沧溟。而况茂宰神明，留心典故，于以导扬。夫圣天子仁渐义摩之麻嘉，诸大宪教养生成之德意。声名文物于是乎盛，政教风谣于是乎起，信今传后奚疑哉？昔傅琰令山阴，绰有政声，人谓其有治谱，余即以此为公之治谱也可。是为序。

福州府张学举

《周礼》大司徒，以土会土均之法，辨十有二壤之名物，则知五方之风气。古者天子巡方向俗，集里逐方言，献之太史纂录，取副郡国。后世郡县分，于是乎郡有乘而邑有志。夫郡县之有志，犹国之有史也。方域之山川形胜，田畴庐舍，古今之沿革兴废，风俗人文，莫不分类具载，相属并陈。至如燕冰不泮，越草不零，魏风刺俭，曹风刺奢，舟车异用，冠髻异宜。笏如不能齐于一致。矧夫山溪绵邈，今昔迁湮，又往往阻于梯航，淆于桑海矣。顾欲俾览者不必涉其地，而了如指掌；不必游其郊，而较若列眉。是何以为指南之车，记里之鼓哉？考亭朱子每莅一邦，他务未遑，首取其志阅之。盖以识民情，知土俗，酌利病，镜得失也。长乐负山阻海，相传吴王夫差造战舰于此，是曰“吴航”，岭南名区也。余于乾隆戊辰三月，来宰于斯，披阅邑乘，漫漶残缺，即慨然有修纂之志。顾吏事旁午，卒卒无暇日力。甫一年，辄以内艰去邑，征文考献，竟尔缺如。迨后仕于粤东，每念首石巍峨，六平绵亘，梅花、文石之间，天风海涛，苍茫浩瀚，倏忽万状。或清谏诉，或丈地亩，往来山场海市，驱车伏轼，时指点某山脉从何来，某水源从何发。遇名胜而留题，攀残碑而考古。情事历历在目，未尝不魂梦系之。阅十五年之久，余适奉恩命来守福郡，道经吴航渡

口，父老欢迎拥舆，咸呼旧使君。而长乐升尹贺君来谒，以邑志新成，殷殷请序。余阅之，既愧曩者无暇日力为此，又喜贺君得暇日力而克为此。且其书义例严密，记载精核，于名宦人物进退之间，尤极公当，诚得史家正体，可以信诸今而传诸后世，如抒余畴曩所勃勃欲吐者。贺君贤令也，于此规其为政，即于此觐其所学。余虽旁午于吏事，安得已于一言哉！

福州府李 拔

治世何术？曰养，曰教。教养何道？曰农桑，曰水利，曰诗书礼乐。得其道则衣食足，仁让兴，熙熙雍雍，如水赴壑，不行而至。自古帝王未有外此以为治者也。近世士大夫不讲此义，簿书钱谷，苟且塞责，几于治丝而棼，去古道远矣。今我皇上建官惟贤，求治若渴。河渠水利，加以兼衔，教养兴禁，定为课最。猗欤，盛哉！至治之隆轨也。长邑僻在海隅，水泉沃衍，人物俊乂。前明如谢在杭、郑环浦辈，皆干济能文，而有节概。今长子弟聪敏多德造选，而湖塘之利未复，教育之途未广，予每为疚心焉。江右贺君，中心惻怛人也。令邑数载，修陂塘，设义学，政既举矣，乃与诸茂才裒辑县志，将付梨枣，请序于予。予惟志者，致治之权舆也。必有岂弟之实心存于中，而措诸政事，然后笔之于书，可以传世而行远。故山川井疆一，政教所张弛也；桑麻树畜一，政教所长养也；妇子俊秀一，政教所培植也；节义文章一，政教所鼓荡也。苟非实心贯注于中，徒张皇文具，摭拾旧闻，以示于人，曰志也，其与于治者几何哉？今贺君于邑中教养大政能兴举有效，盖不与俗吏为浮沉者，斯卓卓可纪矣。初贺君令长时，予守福宁郡，方率属兴水利，劝耕桑，设书院，培人才，倥偬旁午，与贺君不相闻。己卯秋，晤于会城，与语有合。予为言福宁治状甚悉，贺君韪之。未逾年，予移守福州，为属邑，予即以治宁郡者治福



州。贺君首举开渠、建学二事以应，予嘉勉之，并益以种树养蚕为各邑倡，今已三年于兹矣。各邑教养、蚕桑诸政，以次告完，而水利独以长乐为最。其修复东、西二湖与长林湖，及南陂、陈塘、十八湾斗门，利赖甚溥。而吴航生徒舍宇、廩饩，皆予行部时所心计者。安得如贺君十余辈，分布属邑，以为民兴利乎？自古有治人无治法，苟非其人，道不虚行。予与贺君志事不必皆同，而于此每若符契。贺君虽年近古稀，精神未衰，惟冀益宏远猷，无忘岂弟，以仰承夫圣天子之德意，而予前所谆谆相勸者，亦得藉手以报其成，是则所深望也夫。

#### 县令贺世骏

国家统有区宇，重熙累洽，薄海内外，悉庭悉臣。凡郡、州、县、卫，一方一隅，莫不农歌禹甸，士乐尧天。而职方所掌，如《周礼》小史、外史之属，分管珥笔以扬休美，而备见闻，此志之所由作也。世宗宪皇帝之二年，下命纂修《大清一统志》，已乃复诏天下各修省志，而《福建通志》亦上列于职方，其所以宣德化、昭治平者，允堪信今而传后矣。乾隆丙子，余自凤冈来莅吴航。礼乐刑政，一遵功令。暇则征文考献，指画一邑之风土人情，以权得失。顾旧乘所垂，非略非讹，则蠹蚀不可考。盖兴言遗事，不能无摩挲石鼓，鲁鱼亥豕之憾也。夫邑之有志，犹国之有史也。吾闻左氏取列国志作为《国语》，遗文数千，二百四十二年轶事，了如指掌。故追稗灶东里之论，而象纬昭；读召陵闾田之辞，而舆图见；考问官数典之章，而官职备。以至内政、军令、刑书、邱赋，莫不兼综而条贯。后之人得有所据，而上下今古其赖有此乎？今上御宇以来，一道同风。训诂典谟，日晶云灿，文治之盛，千载罕有。昔夏缓公当明季来官兹土，维时困于海氛，犹将上稽下考，勒为成书。矧当情晏久庆，而不代宣其文教，其何以示后？爰



取旧志而增订之。而天文之躔舍，地理之袤延，山川之形胜，城郭之修整，人文之云蒸霞蔚，物产之孳息蕃昌，与谭故实，纪遗踪，条分而缕晰之。为卷十，为目六十有八。非敢比左氏职方也，聊以资简稽，备掌故，以广先夏令尹之所未详耳。而敷政宁人，亦于是焉寄。若夫炳炳麟麟，声金振玉，垂一代之典则，焕华国之文章，则职在太史，夫岂一乡一邑所能擅其长乎？是为序。

### 同治己巳重修县志序

总督英 桂

《周礼·春官》小史掌邦国之志，外史掌四方之志，志之作由来尚已。迨班孟坚《汉书》创为十志，后之作史者因之。唐李吉甫撰《元和郡县志》，宋王存撰《元丰九域志》，于是都会郡县之属，各纪其建置、沿革、疆域、田赋、户口、关塞、险厄、人物、风俗，勒成一书。有民社之任者，按其图籍，可以知修教齐政之宜，于民生休戚利害攸关，非仅以采摭繁富，矜赅博也。我朝版图之广，超越前古，重熙累洽，丕冒无疆。世宗宪皇帝谕令疆臣纂修各省通志，前总督郝公玉麟董修《福建通志》七十八卷。如沿海岛澳诸国，关于边防扼塞，纪述尤详，足资考证焉。其后屡经续辑，日久犹未藏事。同治甲子，余持节莅闽。至丁卯，奉总制闽浙之命，爰商诸寮属，亟为续成前志，付诸劂。而长乐王令家驹以邑志适成，请为弁言。长乐距会城百二十里，负山面海，雄奥之区。观其征文考献，缕析条分，为纲十四，目百十有七。不滥不遗，堪资治理，是可嘉也。七闽僻处海隅，唐常相国袞，李邕公倚，先后振启文教，其时长材秀民，与上国等。宋南渡后，闽中理学诸贤，渊源授受，相承有绪。大儒朱子，绍伊洛之统以集其成，抑亦盛矣。乃今士习民风，渐不如古，海滨邹鲁之名，有不尽相符者。岂风会之变异欤，抑司牧者导率之未善也？

兹续志已将刊成，各郡邑道里、赋役、兵制，有今昔不同者，重为厘订。十郡二州之民，刚柔轻重，迟速异齐，开卷了然，亦可知其梗概矣。官斯土者，循览陈编，实事求是，果何以一道同风，仰体圣天子仁义渐摩涵濡群生之至意，政平讼理，跻斯民于仁寿之域，而献和亲康乐之书，于贤守令有厚望焉。岂仅为长乐一邑之幸哉！是为序。

将军文 煜

天下者，郡县之积也。凡县皆治，而郡无不治；凡郡皆治，而天下无不治。故治天下必自治郡始；治郡必自治县始。治县者，非熟悉乎一县之山川、土物、户籍、田赋、文事、武备，以及人物之盛衰，风俗之厚薄，与夫时事之迁移，法制禁令之因革损益，俯仰千百年，居今师古，因时制宜，不可以为治，此县之所以不可无志，志之所以不可不修也。长乐负山濒海，三代属扬州，秦汉曰闽，唐天宝间称长乐郡。至武德中，易新宁地于今所，始为长乐县。县旧志有四：弘治刘志、万历郑志俱佚，惟续修之夏志、贺志尚存。贺志修于乾隆二十八年，迄今百有余年矣。彭君敬轩，作宰兹土，允邑缙绅郑云友比部诸君之请，设局重修。爰就夏、贺两志，伪者正之，繁者节之，略者详之，缺者补之，断者续之，参订搜罗，不遗余力。彭君去后，王君勉斋继至，督率校刊，凡阅十一月而书成。邮示一帙，问序于余。余嘉其书旁征博采，考核精详，可以观山川、土物、户籍、田赋、文事、武备之全；而人物之盛衰，风俗之厚薄，时事之迁移，法制禁令之因革损益，靡不厘然灿然，彬彬乎其大备也。其有裨于政治者，岂浅鲜哉！因乐书数语于简端。

盐运使裕 宽

邑之有志，犹国之有史也。古者列国皆有史官掌记时事。我朝车书一统，声教四敷，海隅苍生，罔不率俾，东西南朔，咸隶版图。昔之分茅胙土者，析而为郡，为州，为县、卫，郡州县卫各有志。志者，非徒志天文之躔舍，地理之延袤，山川之形胜，建置之沿革，人文之荟萃，物产之蕃昌已也，将使官斯土者，察民情，辨土俗，酌利病，镜得失，称先则古于数千百年以前，以自附于古贤士大夫之列；又将使生斯土者，励廉耻，明激劝，溯前型，承先烈，顽廉懦立于数千百年以后，以自侔于古忠臣孝子之俦。是故孔子曰：“文武之政，布在方策，其人存，则其政举。”又曰：“夏礼吾能言之，杞不足征也；殷礼吾能言之，宋不足征也，文献不足故也！”执是说也，兴吏治，茂民风，胥于志乎是赖。长乐，古扬州域，秦汉属闽，唐天宝间称长乐郡，武德六年始建为县。其地揖平原，负崇冈，拱双江，环沧海，其人性舒而志强，其俗习勤俭有唐魏风。邑旧有志，曰刘、曰郑，历年久远，其详不可得闻。可考者，夏、贺两志而已。自贺迄今，又百余年，其间俗益美，事益增，有前志所未及纪者。而其人其事，不容湮没，表彰风化，有司之职也。邑令王君勉斋集都人士考订而修辑之。志成，问序于余。余方奉命榷盐闽疆，下车以来，八月于兹。风土民情，稍稍得其梗概，公暇辄取《福建通志》、《福州府志》，详加披阅，冀为论世知人之一助。今观是志，觉长乐一邑，天文、地理之经纬，山川、建置之源流，人文、物产之美备，靡不条分缕晰，灿若列眉，王君诚有心人哉！继自今官斯土者，睹方策之具在，以之淑身心，善政治，驯骄悍，而蒸秀髦；生斯土者，知文献之有征，以之扶名教，翼纲常，成礼俗，登仁寿，闻风兴志，发愤自雄，又安知古今人之不相及也？于是乎序。

## 知县彭光藻

国家令甲，守土之吏，典修方志，盖本古先王原地事，观方俗，辨民志，物土宜，以定贡赋，以察好恶性情，达其志，而通其欲，俾政教聿修，上下咸和也。长乐建县自唐，文物衣冠，侔于上国，宋以后图志多佚不存，存者明季之夏志、乾隆之贺志而已。历年既久，若不修辑，文献必多坠失。守土之吏，职事有关，亦一端也。光藻莅任之明年，集邑之绅士，共襄斯举，金以为然。爰于二月启局纂修，采访各有专司，矢慎矢公，以昭传信。光藻于公事之暇，几经深心商酌，不欲瞻徇而滥，亦不欲苟简而略。典章故实，必从其详，浮文长语，则从乎汰，门类时有变通，论正详加考核。七阅月而告成，都二十卷。乃雕镌未竟，而瓜代届期。适王勉斋明府接篆是邦，校刊厘订之事，赖集其成焉。夫长乐负山控海，习气风声，雄厚瑰异，伟人硕彦，应代间出。况我朝治化融洽，士乐诗书，民习勤俭，昔时劲悍好斗之风，渐仁摩义，归于纯朴；而官其地者，又能时时勤宣德意，鼓舞振兴，以臻上理。综斯志所载名宦、名臣，以及草野谣俗，方前二志，同异如何，则可以知治道矣。是役也，蔽功甚速，幸绅士合志，龟勉底成。凡在局襄事，咸列名简端。

## 知县王家驹

邑各有志，风土民情得详览周悉。特年湮代远，不无剥蚀脱略，踵而修之，守土责也。己巳岁，家驹来权邑篆，邑之绅衿请曰：“邑志当修久矣，顾绌于费。前邑侯彭敬轩君首开局倡捐。且劝且征，且校且梓，甫六阅月而瓜期届。夫善始，尤贵善终，微吾邑侯，孰克竟兹盛举乎？”家驹责无可谢，乃为之催敛鸠集。又得绅董之赞襄，民输之踊跃，迄六阅月而厥功告成。金又问序于

家驹。因慨然曰：“民无异性，而俗有异宜，欲治民不可不知俗也。方今圣天子德洽寰区，薄海同风，群黎向化。使图治者因时制宜，知所以变通之，岂一方一邑为哉？家驹不工文，亦何敢以弗文辞？”勉附数语于简端。至其事类之损益，义例之异同，敬轩言之详矣。家驹不复赘也。

## 记

### 求诲堂记

宋县令萧 竑

古之君子，莫不克己以求天下之善言，纳之以宽，思之以静，择之以正，然后行之以果。然虽所行有大小，所造有远近，而未尝用明以忽人之是非，作气以拒人之忠也。孟子曰：“子路人告之有过则喜。”孔门之能是，计非一人。孟子独称子路然者，爱其刚勇过人，而自克以从善耳。修身且然，况治人乎？夫治人者，心虽无愧，而事有未察；行虽无失，而人或见欺。不能师古训以广其智，资诸人以裨其不逮，则毫末之差，有莫大之谬，又况自贤以求胜人者乎！以予之愚，于修身未能有得，而又辱一邑之寄，恐惧修省，安敢息遑？凡退息是堂，庶几阅图籍以探圣贤之意，接寮友宾客之论以益见闻。至于匹夫匹妇，辩论之际，其言或中于理而可用，与夫悖于理而可戒，必审求之以为愚者之诲。

### 奉训大夫御史黄公祠记

真德秀

嘉定丁丑，德秀被命守温陵。至之日，延见黎老，问民间疾痛痾痒，与前守令之贤而可法者，欲考其行事而为之师，则有以永春大夫长乐黄公告者。谓其遗爱余泽在人也深，六十年而后，未



有及者。问其详，则亦不能道也。未几，乃得朱文公所为公墓志读之，其略曰：“始予试同安，闻旁邑永春有贤令尹曰黄公，公廉强介，察见微隐，吏不能欺，而民亦不忍欺。其禁令要约，大抵皆崇礼义，厚风俗，戢吏奸，恤民隐之意。泉之士大夫为予言，自故司谏江公民表为令，有惠政，民深思之，以为无能继者。今黄公节守，殆无愧江公，而吏事精察有过之者。县人生祠公，即歿而咏歌犹弗替也。”德秀莅兹土，见遗像岁久不存，祠屋亦浸就圯，乃属县大夫使新之，而求像于公之子寺丞榦，奉而祀之，以慰邦人无穷之思。呜乎！公今远矣。世之君子，得位而居民上者，苟能师公之所以治己，而推之以治人，则是亦公而已矣。窃愿与同志之士共勉焉。若夫刍狗其人，鬼魅其俗，务以法律驱而智巧胜者，岂独为公之罪人乎？德秀虽愚，亦所不忍闻也。公讳瑀，字德藻，世居长乐青山。出而为御史，有直声。旋以病补外职，恨其不大施云。

### 德成精舍记

兴化同知管温祖

长乐德成之岩，唐仲蒙林先生读书故地也。元统乙亥七月，邑宰卢阜明源曹公阔阔台，率其云初建精舍以奉时祀，仍请于有司为立书院。予尝奉省宪檄，抵其邑，公以记为请，且惠《仲蒙》、《续孟》二书。观其人虽去千载，英风劲气犹一日也。先生之志，端欲继洙、泗之后；先生之时，不幸在濂、洛之前。故其书自成一家，亦孟氏之徒也。宋欧阳文忠公掇拾遗编，屡载史馆，先生之雄文实可传矣。唐咸通间，尝擢进士，再中宏词，长乐登第自先生始，官至尚书水部郎中。知万年县时，黄巢陷长安，逼以伪禄，不屈而死。服孟氏舍生取义之说，先生之大节尤可取焉。昔先生自序其书，以扬子云自况。观《仲蒙》、《续孟》，犹太元拟

《易》也。然子云甘仕莽朝，貽笑后世，视先生之仗节死义，不污于贼，过于云远矣。宜乎翼翼新宫，济济笾豆，春秋禋祀，当与天地相为无穷也。先生讳慎思，字虔中，仲蒙子其自号云。予又嘉曹公有好贤乐善之心，寓化民成俗之意，故喜而为之书。并系以辞曰：“先生之文，首奋闽粤，先生之心，上薄日月。白刃可蹈，志不可夺。俨乎道象，犹想忠烈。筹山德成，禋祀丰洁。俾后之人，景慕前哲。”

### 题名记

明博士林 慈

建学育才，开科取士，乃前代帝王治天下致隆平之先务。当时士君子有不由此发身者，虽致位显融，终以为愧焉。皇明启运，四海一家，乃宾兴贤能者数矣。曩尔乐邑，得士为多，而半出于学校。洪武迄今，领乡荐者三十三人，登进士第者七人，通都大府有所弗能及，而坚珉未立，非缺典欤？永乐辛卯，仁和高公才来为学谕，毅然以斯文为己任。惧夫岁月既久，姓名漫晦，无以激劝将来。于是捐俸购工，立题名石于讲堂之左，将垂不朽，传之无穷，功至大也。谨按《三山志》，长乐文风之盛，萌芽于唐，呈露于宋，而大阐于我明。虽国家圣圣相承，四十余年甄陶之久，涵育之深，鼓舞之至，有以使然，其亦自昔山川扶輿清淑之气，蜿蜒磅礴，郁积至于今而大泄发也。所贵乎进士者，詎徒以获第夸一乡荣一代哉。乃其文章之纯粹，道德之光华，功业之宏伟，上以匡辅皇极，下以膏泽生灵，无愧乎古之作者，则世称长乐“海滨邹鲁”岂虚语哉？慈无似，叨成博士成均，还家会高公立石征文，然职在著述，义不得辞。喜吾党士类，领乡荐登进士第者，科不乏人，真衣冠盛事也。遂为之记，俾来者有考焉。永乐壬辰记。

## 贞寿堂记

明大学士胡 广

贞寿堂者，翰林侍讲三山陈全果之与其兄漳、泰奉其母夫人戴氏之堂也。何以曰“贞寿”？始夫人年十七归于陈氏，六年而丧其君子。长子漳，始五龄；次子泰，始三龄；而全在遗腹。夫人哀毁顿绝，誓死不易其操。备尝艰苦，以长育诸孤。今夫人年逾八秩，寿考康宁，子而有孙，孙又有子，芝兰竞秀，森满阶庭，奉觴戏彩，以乐遐龄，君子命之曰：“贞寿”，岂不宜哉！果之尝念久居京华，违离膝下，不得时时登堂随诸兄之后，方此为歉，乃求翰林待诏高廷礼绘为图，士大夫为赋诗歌，将命其子奉归以为母寿，且以达其孝敬之忧。间征予文记之。余谓人生百年，均谓之寿，然寿有荣辱，夫砥节砺行，以扬芳誉，则人孰不慕羨而荣之？若夫卑污苟贱，失其所守，虽寿过百年，谁复齿之？祇足以为辱耳。至于夫人立节于穷苦忧患之日，挺松柏之贞，皎霜雪之洁，乃以眉寿而享安乐于丰豫之时，此古之贞烈所不能得，而夫人兼有之。乡党州闾，咸以为荣。此其不曰“贞寿”而何哉？且夫人守志之时，初不计有今日，但行其所当为，而亦无所必于天，然天之报锡善类，自不能违，故无爽毫忽。假使夫人有志，而年不待，有年而福不备，则天为不可征，使人为善之心息，天之于夫人者诚厚矣。斯其有关于天理世道，俾为善者有所劝，是故斯堂之作，不可无文以传于将来。此余之所不辞而为之记。果之为禁近之臣。兹遇圣天子以孝治天下，立身扬名，以显其亲者，是在果之，有不待余言也。

## 三事堂记

明县令潘 府

盖自予少读小学，至当官之法有三事，曰清，曰慎，曰勤，爱其言简易若切身心者，必三复之。及年十七、八，业举子，为禄养计，此书久废不理。后十年，再试再屈于有司，乃归，弃举子业，尽发家藏旧书遍阅之。字字简默，然后放过。乃知三事实切身心，而《大学》所以家齐、国治、天下平者，亦不外此。自谓他日遇明主，得一试用，必求于此无愧矣。迨今登进士第，自刑曹试政令长乐，入官已四载，顾此三事，犹未能尽行之，盖可叹也！一日公暇，独坐退思堂，因念王元之尝作《待漏院记》，极言君子、小人，当待漏时所思情状大异。议者称其得体。予或偃坐一堂之上，不自深省，泛然思之，其不入小人情状者几希。乃因堂之旧规一修治之，更名“退思”曰“三事”，庶一日之余，警切身心，而初志少酬焉。予既深自感慨，又念朱子《小学》一书，自元许鲁斋敬信如神明，今天下莫不家藏人讲。而此三事，尤学者熟闻乐道之。迨事一职，或与初言渐相背戾而不自知，及接正人，闻正论，或夜气清明之际，念及三事，皆慊然有愧心。此天理之发，自有不能掩者。然予谓凡当官者，皆当大书“三事堂”榜之厅后可也。或虑清则矫世，而敌者争；慎则泥法，而贵者评；勤则多事，而下怨生。然则如之何？清不激，慎不拘，勤不扰，使人各得其情焉，庶几其无弊也。

### 不愧堂记

明知县吴 遵

余家无厚货，性有奇癖，每读书必啧啧古人贤达事。丁未举进士，戊申出宰长乐。恐家人一旦习骄侈也，乃日督家人理机杼，诸童仆灌艺蔬圃，计岁时聊可供衣食。门无杂交，囊无私钱，时退食亦欢然自怡。书其堂曰“不愧”，盖期不愧吾官，不愧吾所生云尔。然邑枕山席海，生理硗瘠，予益与民同甘苦。事惟从杀，一

不问乡大夫束脯问遗之礼，居恒靦然曰：“予兹有愧荐绅先生矣。”乃己酉冬入覲，乡大夫不以余为无礼，反赉予以礼，予三辞之。既复有赠言，予则拜而受之，曰：“仁者之贶，非予所敢辞。”行之日，冠盖缤纷，相与酹酒大江之浒，三饮而别。予复靦然曰：“予兹益有愧荐绅先生矣。”乙巳<sup>①</sup>舟行次芋原，邑之民相与争筐元黄，罗酒浆果米，稽首道周。余辞之益坚，至蒲伏不忍去。予曰：“噫！予或尔受，亦不愧良民则愧良吏已。”乃终辞之。既复溯洄挽舟而前，曰：“昔人以清白自持，尝择受一大钱，君忍不为一钱令乎？”无已掇其虾十头，果十核，谣歌数章，邑之民乃掩泣低徊而去。噫！予性多慧急，见无良人，辄色怒，怒已，虑或伤吾民，竟日不为乐，今民不以喜怒而咎余，顾追从余，辞民且不忍去，受其虾果谣章乃去，予将不重愧吾民哉？嗟夫！礼以待贤，故于大夫士不可以忘礼，礼疏则易睽；刑所以惩慝，故于敝民不能以去刑，刑数则多怨。今予实无礼，而大夫士谅之，实未能去刑，而民安之。又从而谣歌之，爱戴之，固不知其获此何由也？因书以志愧而省观焉，抑亦以表乐邑士民之厚，俟观风者采尔。

### 初雨亭记

明知县詹 莱

余莅任之仲夏，以旱忧岁，举百神，走群望。闻石鼓之渊有潜白龙，前令祷而应，于是率吏民衣冠皆素以象之，望祭于广石之浒。退憩一亭，有父老俨然进曰：“是东林禅寺也，久而圯。昔之祈灵者，未尝至于斯也。祈自吴父，始憩于是，吾等新之，以比甘棠，以无忘吴父之大德。去不及名。今侯继而来，犹吴父也，盍为我名之。”余乃喟然叹曰：“神哉，斯民之心乎！夫万物命于天：有岁而丰凶之，有雨而舒卷之，有苗而荣瘁之，有民而饱馁之。宜非吴侯之所得与也。今是之请，夫固谅吴侯之心矣。”吾闻



吴侯在职，兴学理冤，蠲逋剔蠹，明祀弛刑，庶绩修举，屡获有年。至于或然之数，无亦动威章德，而复皇皇兹此，素无召旱之愆，而急有勤民之绩。冥漠之天难测，而明畏之责已尽，虽不得雨，而无所怨，而且应焉！此以既去不忘。不委诸天，故民归天焉；不盈其德，故民崇德焉。虽然，侯之膏泽将润天下，今炫奇一勺，跨润坏土，不已狭乎？侯之泽将及四海，而乐之民归思焉，雨沛长乐，而广石独思焉，其始事在也。吾今是行，实践其迹，后来继今者，又复践其迹，使或幸而雨，皆吴侯之遗泽也，志之宜哉。归之日，雨，既二日，又雨，岁乃大熟。父老遣其才子弟陈生、刘生、林生来请，遂名之曰“初雨亭”，举号且明创也。吴侯名遵，字公路，号初泉，浙之海宁人。余同年进士，今为御史。

### 十洋街记

明知县蒋以忠

余令长乐四载矣，邑诸坠渐次兴，悉以身任，弗啻夺也。县治前十洋街，为中央孔道。迹建城，路仍故，未甃以石。其东抵兴贤坊，西入射圃，久污沍，值淫霖，泥溃深数尺，民病焉。其直南，又从斜径绕出城门。履水草中，弗堪舆，人迹鲜少。余间历其地，辄念曰：“嘻，谁责乎？是实在余。”今年春，里中民数十辈来请治道，余曰：“令念兹久矣，而值帑虚，辄逡巡止也。是若何哉？”徐召入，与纵横论址，当侵稼地，奈何？金曰：“负郭田亩斤金，即夷为大道，将列廛利贸迁，土可贵矣，侵何伤”。“虽然，余尔任无慝乎？”对曰：“乐也民闻经始，胥引领欣睹旷事，胡慝焉？”于是复博详于文学士，对无异。乃会画厥工役，余载捐俸，合士民输助，征佣僦程，延石筑污，营止于南直，东西两路，民愿自葺，听之。遂以其羨，构亭南陬，俶观游，榜曰“所憩”。引水为渠，架石梁，夹植卉木，全城胜观，民欢趋役，再阅月告成。

余稽古桥梁道路，王政先也。有司多幸速迁去，不屑任劳，而或以少未便牵于听事，且格夫乐民笃谋而务成，易使而服上；余则安与为矣。昔人云：“县治犹一家，令主人也。门途久弗治，其子弟且鳃鳃虑以告，得晏然已乎？”是举也，协众以贻永，即数百祀攸赖，余何劳之辞？又闻里老相传，“十洋成市状元来。”往马、李二先生连魁天下，实应此讖，百余年来寥寥矣。今十洋街聿新，商旅胥出，途市当再成。信斯言，士应魁必也，独便民也乎哉！街东长三百丈，直南内外长四百丈有奇，中为桥一，亭一，坊一，其费金不烦官帑云。

### 晦翁岩记

明知县蒋以忠

长乐之北有龙峰，去县治十里许。峰转西有岩，岑岵幽致，崭然出云汉之表。至其麓，巨石峭为门，折而入，峻壁危崖，松岬萝磴，突兀左右，俨然天设。西宾太常诸峰，南鉴双湖，东极沧溟之际无遗瞩，盖一邑之伟观云。里先辈刘砥者，与其弟砺，当宋乾道间，尝筑室读书其上。属晦翁朱子南游至邑，二君从讲学，留斯岩最久。其后缙绅君子并起而张之，以翁过化地，昭昭在听睹，引首咸肃然钦也，独岩胜已哉！隆庆壬申八月，余政暇一往登临，乃里人辄唤“三宝岩”，余问故，咸谓斯亭也，始内官三宝者创，故名。嘻！有是哉？龙峰以岩著，岩赖晦翁始显也，名岩顾掩翁，乃崇一内侍，其胡以训？亟命易题为“晦翁岩”，且申令于里人，毋或仍故唤，作斯岩羞。或曰：“翁名在天下，岩寓迹也，翁名镌此可乎？”余则闻之古君子达观昭旷之外，神理所解，与象俱流，即千百世后，望之可兴起，今去晦翁未论几何年，登斯岩也，睹灵境之独殊，觉群喧之就寂。想夫阐洙、泗而集儒成，不觉为之喟然兴怀。至于海天寥廓，山月孤高，又想夫“天光云影，源

头活水”之趣景，不觉为之洒然超尘虑也，意翁之风旨，或寓于斯，其犹可神会也。即苏子谓海外有形语之国，口不言而相喻以形，岩形用也，慕翁者，能以岩喻，其真有所得矣。信翁之名，当与岩并传之无穷也。又访翁在岩时，曾作“读书处”三大字勒于岩，今隐隐灭矣，乃郑司寇环浦复补书之，余为琢石刻诸门内，以见朱子之所留。而又以名此山非黄冠缙流之所得有也，是为记。

### 太平桥记

明县令蒋以忠

长乐之东门，旧有观音桥，为邑人往来要津，而芝山、六平小有洞天诸流，俱会其下。昔年淫霖暴涨，冲激崩裂，居民架以浮木，苟为济渡，木又就圯，行者病涉。余来视篆之三月，百废稍兴，邑人以桥事来告，余谓兹有司责也。前令率因循不为修举，余其焉辞？然不可以不烦吾民，归检家篋，得五金，召里中耆林舜章辈董是役，曰：“汝且以吾为倡，当必有嗣吾志者。”未几，僚佐助之，庠三师助之，邑缙绅士民竞助之，不逾月得金百十五有奇，而桥工兴焉。易木以石，更故以新，屹然隆然，坚固倍昔。桥之上，复建亭三楹，便憩行者。落成之日，稚老圉桥，余因稔于众曰：“观音乃佛家者流，桥用为号，不可以训。今易名‘太平’，以示人和时宁之意。”民拜稽首谢。是岁果海波不警，田畴再登，米斗四钱，民咸乐业，众欣欣为太平之应，相与伐石树之，曰：“桥之讖也，不可不记。”

### 三清殿祝圣道场记

明侍郎陈省邑人

皇帝恩覃率土，祝圣之地，靡所不宜。乐邑旧依三清殿，殿始于永乐间，中官郑和航海册封并海诸国，筑天妃宫酬神，以其

余材构殿，崇奉老氏，盖二百余年。风雨飘摇，栋宇倾圮，每祝圣，龙亭暴日中，雨则张盖。屡议重建，以费广辄罢。钟侯来莅，愀然谋诸邑士大夫父老，曰：“礼有大于此者乎？盍图之。”诸父老曰：“此吾邑子民所倦倦欲请于侯而未得者也。邑无释老之宫，惟兹殿在城以内南山。民祈晴祷雨，忧患疾病，辄就神叩。乡里宗族，亲戚友朋，庆慰之礼，释纷解争，合欢敦好，惟兹宫是藉。若顺民情所欲为，而官为倡，旬月就矣。且侯谋祝圣也，实为邑图，于侯何有？”侯闻之，欣然出，教卜吉鼎建，士民愿助金者听。度地量工，土木瓦石之费若干，旧可因者若干，先捐俸以倡，邑父老子弟欢欣鼓舞，奔走经营。推士之才而有行者，民之齿而有德者，董其事。鸠金三百余两，经始于戊子三月十一日，落成于是年八月初五日，堂皇巍耸，庭楹坚齐。两庑前溜，斯革斯翼，明廓奥突，先后联属。清旷通彻，委蛇幽雅。山顶之塔修而坚，傍出之门正而竦，烨然复其故迹，而恢其旧制，为长乐一伟观也。谓不可以无记，而请于陈省。省曰：“祝圣殿成矣，民之力也，侯之倡也。《易》曰：‘悦以使民，民忘其劳’，语不虚哉！夫民之从欲，如水之就下，因其势而利导之，则易为功。彼民者岂不畏劳哉？亦岂不靳费哉？劳之以其所便，则虽羸者争奔走焉；费之以其所安，则虽穷者争致力焉。此非可以勉强为也，侯固有以使之也。”侯之役也曰祝圣，以教忠也；民且曰：“吾得礼神于斯，朝暮而祷焉，侯以教敬也；亲党友朋嘻嘻而至，情联于斯，敦且睦于斯，侯以教爱也；纷解于斯，争息于斯，长者呼，幼者诺，扶携而趋，揖让而坐，温克而饮，侯以教让也。侯一举而众美皆备焉，吾侪安知劳而安知费也？”嗟乎！民易使也。上有学道之君子，下有易使之小民，侯真诚以体之，惻怛以柔之，爱民洁己。视用民之财力，有如剜肉刺肤，乃鼓之以其所欲为，役之以所不可已，故民谅其心，而趋之恐后，咸归美于上，以为侯功。悦以使民之道，类如



此矣。尝读《灵台》之诗曰：“庶民攻之，不日成之。”徒谓其与民偕乐矣。夫岂知其视民如伤，与国人交止于信者，有以潜驱而默率之哉！余故曰：“侯固有以使之也。”省从邑父老子弟之后，喜侯之役，愧不能多助，因有感于佚道使民之遗意，偶见于今日幸遇学道爱人之君子如钟侯也者，而知吾邑有易使之民也。泚笔记之。

### 小有天记

明陈 省

凡邑郊以外必有高原、茂林、名园、别墅，足备岁时游眺之所，而吾邑独阙，余于是有小有天之筑。丁丑九月落成，司寇环浦郑公至自阳夏，余乃戒仆夫，具蔬酌，先重九三日，奉公游焉。至则徜徉四顾，南望马江，东望三台，西望六平诸峰，苍翠峭崛，绮绉绣联。乃指余居在芝山之下，公自指其居在江流蜿蜒之间，忻忻如也。取酒而酌，酌半酣，穿石门，听流泉，因寻所谓小有天者，相与盘桓其中。俯仰今昔，尚论久之，恍若侍九十之老于淇澳，而闻其交傲也。夫山以境胜，境以人胜，陶之庐山，范之百原，其流峙岂异哉？平泉、金谷，鞠在草莽者，何可胜纪！余与公以古道交于今之世，而相勉为君子。邑之人登山而望，指公之居，又指余之居，而有羨于峙且流焉。则余之筑，虽无墜茨丹雘之丽，连房旋室之侈，亦庶几称吾邑之大观矣。嗟乎！余与公不知犹及见其松柏竹木之茂如昔时，为邑人庇乎？不知数世之后，吾之孙子，有增而廓之，完而美之，不忍见其废乎？又不知有如公之齿德兼懋，偕其主人如余者，游而乐之，乐而记之乎？因请公大书，公诺而题诸石曰“洞天山斗”，堂曰“探芝深处”，寓意远矣。兹筑也，余数日一至焉，而追随先辈舒啸于其上者，自公始也。



## 小有天记

明县令夏允彝

邑治之东，有楼亭翼然，荫双榕之下、枕泉流之上者，陈幼溪少司马园也。榕大可数十围，拂云凌霄，瑟瑟烟杳，常隐曦月。泉自小有天来，穿漱乱石，声沸山壑，抚石临泉，枕漱咸适，余题为“枕漱轩”，记其实也。缘泉稍北即城闾，泉咽石门中，颓激霏散，为声益殷。出门百步有庙，以祀汾阳王郭。近已堕，余新之。汾阳战功在北，未尝履闾。相传倭逼安昌，有神驱之遁，昭著灵迹，众知为王也，当不妄。由此山径渐高，泉自高注下，势愈澎湃，居民以运轮舂，碓声若桔槔，数十连注原田，幽谷为震。少司马筑寺于岩，名曰“初有洞天”。前尹郑月庵增建后宇，敞阁足栖。自洞天小折，石益壮，泉急不得流，益怒鸣。山径险侧，大石磊磊立道旁，目不给赏。由径而东为龙潭，少司马筑小室以望潭，题为“太清真境”。潭深不测，曾自悬崖叠注，激湍颓云，澎湃之音，令人神悸，遥瞻素沫飞洒，又令人心骨苍凉也。有石刻曰“小黄庭”。石之后有小室一带，今已圯，余创灵泉观于其址，祀龙神焉。或岁之不为，将以致祷，惠吾民年也。旁祠少司马，以报开山功。将择僧居之，为置钟鼓，与泉声相应。循观而上，径险夷杂出，古木大石相间峙立，以引游客之倦趾。不半里，即为“如有洞天”，如有之境萃诸山之胜。寺之门有石倚立若蟠桃，司马题为“蟠桃石”。入门有小方塘两，引泉注之，涓涓四溢不竭，八公水无以胜也。有石名“鹿屏”，盖如屏云。司马筑庵为如有庵，宪副敬貽刻石于前，记辟庵种树之始。洞天有二，曰朝阳，曰作鳞，洞天之中，可容数十人，幽邃暗密，暑月恒寒，所谓“云客宅心”者也。洞天之上为小楼，竹木交阴，枝叶拂牖。兰蕙盛时，吹风送馨。楼后有台曰觉台，可坐数人，高梧荫之，拂麈所也。出

山则老松万株，龙鳞肃肃，微风鼓之，涛响浮空，泉声为夺。大石荫松下，参差立不绝，余题曰“万松岭”，为安昌第一观可也。梅竹间出，香草绵亘，琴歌其间，足忘世矣。松径将尽，仰望高岩，方削若城，叠若层楼，疑不可阶者，即“小有洞天”也。林壑绵濛，似非人境，然虎狼之迹，素不臻此，若有神司之。循岩而行，初不见径，有断峡黝然可百丈。背峡而望，则内外两江、连山千叠，可一望收。晴旦遥睇，省城隐隐可指。江水紫带如组，外江两山合抱如门，余题曰“江山全览”，良巨观矣。峡之左，则洞天斯在，万钧巨石，若倚而下，一石承之，人穿石下，俯而得达。乃睹径通，遂跻斯山之巔。少司马构寺其上，余题曰“介全寺”。兹岩之高，为群峰最，诸泉所自发也。高而不峭，故人托焉，清而不孤，故不绝流。自余来邑，饮泉多矣，奚敢云介？自履兹山，悟余以善全，故题寺以识司马公教余也。夏子曰：“余吏安昌将三年，见群峰连云，愧不识其处。日低首几席间事，他不遑也。”偶人省城，林得山语余以闽风特燠，冬季桃烂开，当一观。余骇为欺我。得山曰：“安昌将无桃耶？”余归视衙斋，则桃已华，泫泫在余恒坐轩前，余不及睹也。小有洞天之趾，穿城而入，曲折仅四里已极其胜，余固未之闻也。门人郑畴叔来寓司马园中，余时相过从，见双榕泉石之胜，为一开心。畴叔语余洞天之奇邃，乃摄衣登焉。盖由是而往，安昌之民，赋无逋，讼无嚣，人可引为山中之侣，余亦得为斯山游客矣。虽然，“小有洞天”之胜甲安昌，非司马公剪葛荡芜，剔泉涤峰，山不显也。山显于一邑，未闻于天下，余将闻之，以报司马，山灵其许我欤？助我筑观者，为陈生所守、云翼，是为司马之贤子孙，并记。

### 松下观海记

陈省

昔孟子與谓观于海者难为水，不佞生长海滨，少小诵读，不出庭户，海无由至焉。壮而游四方，三江七泽，二淮九河，尝履涉之，所谓苍泮溟渤之区，未尝睹也。今林居矣，将耄矣，梦寐思之未已。迩年倭警频报，斥堠靡定，海滨苦之。邑父老言海东有大社、小社、松下诸巡司，其景最胜，高皇帝沿海设卫所，佐以巡司，完守御之策，欲其御倭于海，不使登岸，诸处皆要地也，思一至焉。且因以观千溪万壑之所归，以毕此生之愿。于是以万历辛丑十月二日，倩筭輿，由三溪历江田南社头，适海潮初长，银浪雪山，澎湃汹涌，如白马万匹，驰驱而至；又若素裳白鸟之士，联络奔趋，疾风劲涛，苍碧凌乱，此以潮进所见之海也，亦奇观也。由社头憩林家祠，作午趋大社，见民背海而居，水落堤露，鱼扈纵横，往来小艇，若天上之飞隼，系维巨舰，若壑中之游龙，水波云物，民家烟火，细缁交错，渔翁钓叟，聚观答问，始识所谓跋扈之喻，此以潮平所见之海，又一奇也。望松下尚廿里许，仆夫难之，予气益锐，晡而后至，则见风平浪静，一碧万顷，浴日浸天，极目无际，其闪烁旋荡，若熔金之在冶；其光明莹耀，若巨鉴之当台；其皓皓皑皑，若平披大练于广原平畴之而，此之所见，则不以潮之进退为加损之海也。均之一海，以余所见一日之景，盖三变焉。可谓尽海之观，皆平生入目所未有者，真可乐也。抑又思之，生在太平之世，幸优游以遂遨游之乐，亦安能忘国家之忧？议者谓小埕、南日两寨中间，汛守所不及之小社、大社、松下一带，礁涛汹涌，兵舰逡巡，欲将两寨糜食脆兵不会行船者，尽行汰去，添以标游船四只，选募松下一带惯海洋者，自编队伍，分泊东路，南顾松下门，北顾王母洋，随风上下，汛守防御，不使贼登岸；贼闻土著精兵，不似糜粮旧套，自将破胆寒心；不独附近居民可以安枕，即江田、垵下、三溪、坦村、古县，及迤北之村落，皆可眠食无虑矣。

## 坑田桥记

林世章

余坑田渡口，有石桥三门，创自余祖源保公，及邱仲和氏之曾祖。盖津旅耕氓称便者，百余载矣。嘉靖戊午，倭船无虑数千艘，由桥烧船登劫，桥因烬焉。自是旅咨漫，农悼涉。余当家食时，尝惻然久之。乙丑岁，予第春官归，始上其事于代巡陈公，下之县属，予有吉州之行，议竟格。余嗣历南北郡郎官，此事固沾沾不忘也。今年冬，予得请告还，棹抵桥下，睹断石颓没荒波中，问之行人，牛畜往有溺者。乃浩然叹曰：“兹非里中第一事哉？予将克期俟之矣。”度其费可二百余金，顾囊无赢俸，踌躇几日，集里长老谋焉。诸长老咸谓：“吾辈久思公归，为里中成此急务，公既以身先之，众当嗣公志者。”于是发家篋得金数十镗，畀役人为兹桥倡。众又谓吾乡故贫，即群然输于义，讵能毕工？彼日招招于桥之渚者，非渡船与？薄分其利，可以益需。里中列田之家，环桥寓土著，胥有赖于吾桥，视渡船等量所入而征之，必无嚣矣。桥下颇称要津，操舟之贾日至，以义而令若助也，畴弗劝乎？他若畚筑之役，则递雇编户，木桩之具，则估伐地产，而吾侪当事者，咸一乃心力，庶其集矣。议已，余稽首再拜曰：“幸哉！余孺子之志，诸长老克成之也，余将谗于邑大夫。”

## 湖广应山县德政碑记

内閣大学士湖广随州人宗彦

天子在宥三十有六年，岁在戊申，各直省抚、按所荐循良吏六十有四人，则应山县令与焉。上可其奏，各拟职衔，侯以资格限，仅列郡别驾。行有日矣，应之父老子弟，攀留而不可挽也，乃谋侯之善政镌诸石，以志去思。重趼百里，丐余一言以为文。余



进其长厚老成可与语者秦汝广等若干人，谗之曰：“江侯之政何若，令尔怅惘而不忍舍乎？”广等进曰：“自侯下车，良法美政种种，而是不具详，详其大者：应山虽僻处北偏，然当天中孔道，冠盖如织，邑作传邮，萧然烦费。近因潞府岁差，中贵一再至，征旧莱庄子粒。怒马鲜衣，携旗校数百人，索供应，稍不嗛意，嫚骂邑主，鱼肉厮役。侯斟酌动中机宜，不激不纵，中贵敛手相戒曰：‘是邑有贤令，毋得相犯。’民赖以安。邑俗愚，民为讼师簧鼓，虚辞欺罔，侯具秦镜，凡所剖决，数言而立折，质成者蝟集堂下，得侯一言，帖而服。邑病征科，缘吏胥馘法飞诡，神出鬼没，牢不可破。侯廉明，召郡猾胥立庭下探询，毕悉旧窳，靡不伏辜，而赋始清。至若黉宫首善之地，侯岁时修庙貌、葺堂庑，未已也，仍捐俸庀材，乘其隙，鼎建桂香台阁，子来趋事，不日而成。夫桂喷天香，而阁耸序间，则侯之所为造育子弟，而期以木天挺秀者，意更深远矣。邑势阻山，田亩不苦潦则苦曠，侯焦劳民事，躬行阡陌，专诚祈祷，往来烈日中数十里，旦暮不休。又其地接壤河北，故盗数劫掠，漏闻相与，匿山谷中，仍时窃发，流毒远近。侯密御关隘，严行捕逐，不轨之徒稍嚙，慑伏遁肆。今道不拾遗，谁之伐也？邑山多人旷，陵岩深箐，虎狼穴焉，口啸风生，荷锄者相望而奔，即膏壤亦成嶠道。侯闻之，乃矢神以苛猛自责，始潜渡而去，而农得安畔。爱民动物，彼三异何多逊焉。邑罕科目，青鸟家即印台山，榜山也，荟蔚宜治，又东郭外环河直泻，不合文曲。侯一至，闻诸缙绅士子言，以印台山亩税归之学，又造千佛寺于郭东以通之，丁未春闱雋发不爽也。夫坦易者，必疏节阔目，而少精详，英爽者，多径情震厉，而乏委婉。乃侯不姑息而慈，不督备而肃。自莅政迄今，邑士民始乐有生。而山川草木，亦若有识于侯之貌而色飞者。往夏抵邛问俗，悉侯清操异才，露章朝上，而囊纶进秩之命夕下，侯将舍我而去矣。广等傍徨，计无所施。子，



大夫词臣也。太史采风谣以献圣明，若侯善政，可暗没不扬乎。”余唯唯否否。汉史迁所传颍川渤海之治，其民皆尸而祝之，社而稷之，何修而得此乎？按迹考行，被其纯和畅休，惠爱沦浹，素所侵入者，不可诬也。余从役归，得一再覩，则见恂恂而饮人以和，乃治行踔著，殊不类其状貌者。有知侯之练达，不特为忠信仁厚之长，仅德覆尔应邑士民矣。侯讳墉，闽之长乐人，镇鲁其别号云。

### 陈烈女记

陈崇鼎

江甥邦亮之卒也，甥妇闻讣即欲以身殉。其父力劝止之曰：“儿而同死，孰若计同穴？”孺人恍然曰：“如是即少缓须臾，不为无说。”遂独处一室，趾不逾阈。三年之内，素衣练裳。族女或慕而求见，罕与通一面；间有不得辞者，亦兀坐竟日，不闻笑语。及服阙，又欲以身殉，母复劝之。孺人曰：“身将死矣，焉用劝为？矧父官川东，远隔四千余里。昔之诏儿计同穴者，欲儿之终制也。今已如期，是儿死之日也，当获死所矣，夫复奚求？”其母曰：“能如是，余何忍使若矢两髦而竟弗谅于人口也耶？”即为素车白马，更九十仪缟素以从之。至江府，拜祖先如礼已，请太姑、翁姑、伯叔、妯娌觐，罗拜亦如礼。遂往亮甥权所，恸哭哀奠亦如礼。归家，取嗣子摩顶熟视毕，则闭户自经，绝无艰难之状，亦无一毫激烈之态。呜呼！死生亦大矣，虽圣贤不免动色，孺人胡独视为日用饮食之常？即云妇之殉夫，义也，顾未覩面而归于其居，视执手成说者有间矣。服守三年，而执志如一日，此与文信公三载燕楼何异乎？抑余因之有感矣。女穷而志行显，士穷而节义见。然天下为烈女多，而烈士恒少，毋亦刚方阳明之气不乘乎廊庙之上，偏钟于闺阁之中耶？方今圣天子崇隆节烈，纶绶褒旌，

表厥宅里，女史妇传，大书特书，以风天下。则孺人虽死犹不死矣。遥遥千古，盖昭然也。余甥邦亮，得孺人亦可以称全人矣。孺人，家特卿三女，生于康熙癸亥季秋，殉于康熙癸未孟冬十六日也。

### 三溪天龙井祷雨记

知县戴永朴

长邑僻处海滨，民贫土瘠，户鲜盖藏。南北两乡共二十四都，民食所藉，有一岁再熟者，有一熟者，而高阜之地，不宜禾稻，仅种番薯，按时播种收获，仅供一岁之需。乙丑初秋，雨泽愆期，虽两熟者早稻已登，而晚禾播植尚未过半，其降来番薯望雨甚急。余承乏此土，目击秋阳之烈，待泽之殷，蒿目焦心，寝食俱废。缘与同城僚案朝夕设坛虔祷，乃云气甫合，辄为魃风吹散，忧惶不已。望后三日戊子，为闭南门，掘地筑台，效木郎神咒法。己丑得雨，自三五分至寸余不等。虽略可沾溉，而乾曠既久，实未足也。庚寅，辛卯，皜日炎风，仍复如旧。凡近水临溪之所，人力可施者，尚可少缓；若无水之地，则土皆龟坼枯槁，几不能待矣。余忝为长民长，窘不可言。或有告余曰：“八都三溪山天龙井，为古名迹，灵显异常。”余亟与僚案谋，壬辰昧爽，涓诚而往。三十五里至三溪村，由朝元观寻山觅径，蹶屣攀萝，迂回而上。绕出山顶，兀然平圻，块然大石，方广三十余丈。中有一井如瓮，蓄泉甚深，有小螭龙四足者游衍其中。余辈拜祷于上，巫者甫焚牒，随见黑云一片，起于山顶，遮蔽烈日，洒雨数点，着人衣袂，比及取水下山，骤雨一阵若送行者。当时童叟吏民不下千余人，咸额手欢笑，叹为神奇。及归途至城东五里北山上，已见首石之巔，油然云起。到坛安位，官僚、绅士、耆老，礼拜甫毕，云即四合，申刻小雨，历酉戌亥子，甘霖叠沛，约半尺许。余秉烛听雨，喜

而不寐。爰与幕友袁子商略申报上官。而益叹龙神之灵应，实有彰明较著为不可没也。由是而槁者以苏，坼者以润，已植者勃然而兴，未播者及时补种。雨珠雨玉，皆邀龙神之赐。是则龙之灵应，而实长民之大幸！曷可不记其异，以为后日祷雨之验？尤当创建神祠，以昭神贶。爰濡毫而为之记。

### 西门新街记

知县贺世骏

邑西关外数十武，即濒河，河之南即闽县界也。河北一带，地狭而人稀，店肆亦鲜，且屡为潮啮。以故，道路所经，皆逼仄泥泞弗可行。舟人于此登岸，率苦之。予每过此，歛歔者亦数矣。夫九月除道，十月成梁，此王政也。火朝覲矣，道弗可行，识者讥焉。予莅长七载，新文武两庙，纂邑乘，创书院，置膏火，筑南坝，浚陈塘港，复长林湖，又移建天后宫等事，皆勉捐廉俸以倡。而我邑人士之急公好义者，各揭囊乐助。乃见众擎易举，诸皆就绪。顾于近城要路，听吾民艰于行而弗为之，所愧多矣。爰集诸绅士耆民，相与计议，复召彼匠人，相地经营。命之斲石，以固其岸，培土以扩其基，中砌两马道，以便济舟者上下。复新设店房数十间，以资商人贸易。丈量估计，约费浩繁，而项无所出，一时人皆难之。嗣据监生陈训等金陈永远良策等事，以予捐置膏火四百两，并邑绅士公捐银百两，存质库取息，以供师生膏火，究属一时权宜，非比田房实业可垂久远。且为息亦仅得百金，若取质库所存，以资工料，将来按店收息，可得百有余金，其或工资未敷，再为设措以益之。予曰善。时即有生员陈一山兄弟，首先倡捐，而黄万夏等亦翕然从之。益信好德之心，人有同然。所患上之人未有以感之，斯不能无自而动耳。乃为据情转详，复先取廉俸钱二百十千，付匠兴工，阅三月始竣，共费制钱四百一十六

千串。邑人即以西门新街名之。自是沿河一带，向虞险窄，忽易而为四达之衢；向苦寂寥，忽转而成日中之市。问所息则较羸，计其事则可久，谓非一事而众善备耶？余邑乘告成，行将付梓，而此一役也，人心允洽，众论金同，可以惠商，可以养士，可以利行人，是不可不有以志之，俾后之人识所自来也。因援笔而为之记。

### 双节祠记

知县黄瑞鹤

山川灵淑之气，人得之为忠臣，为烈士，为贞女，为节妇，因而昭鼎乘，炳汗青，盖有天焉，非庸庸者所可冀幸万一也。长邑地踞海峤，溪山幽邃，间多奇杰。即闺闈之英，亦代不乏人。有明，如玉溪石、林二氏双节其最著矣。近华阳卓、郑二氏，一为故生员陈天保妻，一为故儒士陈天球妻，以同怀妯娌之亲，青年丧偶，孀姑弱息，相对神伤，而同心合志，集蓼茹荼。奉甘旨，勤督课，数十年如一日。前邑令张君雪舫申其事，请之于朝，建坊本里桥东，立祠于旁。崇碑丰石，嵯峨对峙，与苍松翠竹相掩映，二氏之懿徽，盖有久而弥耀者。辛未岁，予宰是邑，稔知其子若孙，孝弟力田者有之，才充学博者有之。郑氏男明经永书，与余交最深，才情颖异，博极群书，著作之富，洋洋满家。考厥所自得于母教居多。因叹闺英秀气，突出寻常，而母训婉孌，竟成于迍遭困厄之余，其长貽后嗣，莫非天欲显其志节，以播厥徽音也。岂偶然之故哉！呜呼！古来称节妇者，不曰柏舟，即曰摩笄；称贤母者，不曰和丸，即曰画荻。今之兼妇道母仪而一之者，乃得于华阳妯娌。斯其芳踪懿行，远足以嗣石、林之徽，近足以励巾幗之操。心贞金石，节比松筠，信山川灵淑所特钟者矣。因再拜勒文于祠上。

## 重修十八湾斗门碑记

知县贺世骏

王政莫先于重农，农政莫急于水利。水固天地自然之利也，然非有人事以善为调护，则利民者有时转为民病。长乐居省治之东，地属海滨，飓风间作，水利之兴，必资堤闸为保障，夫而后淡者可蓄，咸者可御，而利赖乃永。邑北乡有十八湾，在柯屿、壶井间，六乡之水盘曲汇流，而注于海。两岸塘田，不下万亩，常以咸潮进退为患。乾隆八年，横筑土堤百余丈，中建斗门二座，御咸蓄淡，视旱潦为启闭。堤则出自民力，闸则动支公项，原报修银一千二百七十八两，塘田自是乃无恙。乾隆十五、十六等年，叠遭飓风，斗门为海潮冲激，急需修复。乡之人怵然于工程之大，民力难支，呈请于前令黄君瑞鹤。吁详上宪，堤工仍出自民，斗门动项兴修，估费八百一十八两。乾隆十九年春二月，巡抚钟公讳音，据详奏请，制曰：“可”。二十年秋九月，前令黄君，领项兴工，冬十月，署令张君勤修接办而董理之。二十一年夏六月，世骏奉简命来令兹邑，斗门犹未成功，而费已告罄。骏复申详上宪，请增公项九十三两零，以补其不足，至冬十一月而上始告竣。是役也，惟我皇上不惜帑金，子惠元元，其恩膏固与海泽同流矣。而念切民瘼，殷然专奏者，巡抚钟公也；克达民隐，而毅然特详者，前令黄君也；至相继而董其成，骏与署令张君亦分其劳焉。其相济而司其事，则邑明经陈成英与柯国镇两人为力实多。夫一堤闸之修，需岁时之久，合众虑之周，而后聿观厥成，可不谓难乎？吾愿乡之人，思修复之难，竭保护之力。成功而后，时加培补，固其丕基，俾勿坏。由是海飓无能恣其厉，水泉得以大其蓄，秀实有资，陨获无虞。六乡之众，岁占大有，户庆盈宁。而念皇恩之浩荡，与宪泽之汪洋，沦浹于柯屿、壶井间者，其为利直永永勿替。



矣。工竣，六乡士民请纪成功，爰为之记，以勒诸贞珉。

### 修筑南陂记

知县贺世骏

邑南三十里，有南陂斗门，其先建自璞石，外御咸潮，内蓄三溪诸水。引而注之，由感恩、洋下至三角坝，达古县、屿头等村，溉田数万亩。考长邑滨海，山浅泉微，惟三溪之水，其南流一派，来自福清，奔涌如注。西派则发源罗山，虽颇微于南，然泉流涓涓，四时不竭，至宝塔桥合流汇于海。自璞石斗门建，乃使向之归海者，尽引而归田。雨可泄，晴可蓄，旱涝无虞，厥功巨矣。前明弘治、嘉靖等年，屡圯于潮。天启初，古县陈绅培所自晋阳归，捐金千余，筑陂于狮张、仙桥界中，乡人德之。岁久，仍为潮所决。国朝康熙甲午，邑令卫良佐请于大府，动公帑千余金，相度地势，量移稍高阜处复筑之，即今南陂也。诎不数载又圯。时一遇曠，农皆蒿目。予莅兹土，尝历其地，见其关于民生利病者甚大，力图修复，而工费浩繁，遭岁旱未遑举事。兹年际丰稔，民气和乐，爰集绅士里民商之，咸欣然受命。予因捐俸为士民倡，一时业田者愿输料，佃田者愿出力。而孝廉林大成、蒋经邦等，力董其事。相与量度经营，取材攀石，命匠兴工。筑基于旧址之后数十武，酌为定式，状若龟背。前后列九级。每级石板深长一丈三尺五寸，中建斗门，上设桥梁十有一门，设闸夫以专启闭。其址较广，其工较坚，其赏费亦较前且几倍。复于斗门岸畔建祠，以邀神庥，以供闸夫栖止，便于随时察视，其深谋远虑又较周。工既竣，咸额手称庆。而予以数年所未遑者，得藉众志以观厥成，可不谓幸欤？是役也，众擎易举，人不劳而功倍；合力并谋，赏虽费而利长。嗣是而后，宣泄得宜，大有致庆。以今视昔，其为诸村民永赖者，又当何如也。是为记。

## 修浚陈塘港记

知县贺世骏

水之利于田也，以资灌溉也。农非田无以养，田非水无以耕，一切陂塘湖埭之属，凡皆为蓄水计耳。邑二十三都有陈塘港，原系海地，唐大历间初辟，宋时邑绅陈文龙因而增修之，故港以陈塘名。阔七丈，深二丈，延袤十余里，总会七十二洋诸水，与滨涧、严湖相为吐纳，其利又不仅在能蓄，而在能泄。港之中，设斗门一座，干则闭之以润田，溢则启之以放海，而咸潮亦得藉以捍御，不致冲入内地。以故十六、十七、二十一、二十三等都及方安、大宏二里居民，咸利赖之，其功直与东、西二湖埭。第水势所趋，沙壅易集，非时为疏浚，则口就淤浅，而利弗能永，故自开港以来，留心水利者，莫不以疏浚为兢兢也。国朝前邑令吕君鸣纯、姚君之牧、姚君循义，皆先后详请开浚。岁丙子，予莅兹土，稔知长之田资于陂塘湖埭者十之九。甫下车，即遍加访察。复因公事之暇，循行郊次，得亲诣所谓陈塘港者。见夫堤岸虽存，壅淤已甚，询及里民，佥谓自修浚以来，迄今三十余载，潮壅泥淤，故道渐湮，兼之渔利之徒，砌土堆于港旁，布罾簖捕鱼虾，适为民害。一遇水潦大至，家无宁居，田被淹没者有数十村。甚至司闸之夫，凡有货物往来，私索开闸钱文，其弊百出，而莫可究诘。余备得其状，因慨然曰：“古之设港以利民也，奈何听其壅塞，竟至病民若斯乎！夫以七十二洋之水，统归一港，就令疏通无滞，狂流得以奔趋，犹惧泛滥而旁溢，况复壅遏不行，其貽害可胜道哉？”爰集数都里民兴工，先就港道量计丈尺，匀编号数。次按定里甲，查照烟户，俾食斯利者，咸竭其力。一时民皆踊跃从事，壅者疏之，浅者注之，鱼罾虾簖之土堆平之，不数月间，一复向时之旧。是役也，里人郑曾丰实为首倡，而李宸斗等各协力而共图

厥成。事既竣，复申请于余，谓往时甫议修浚，曾被豪猾阻挠，构成大讼，经详列宪，案乃定。今幸号召严明，人心帖服，猾不敢肆。但斯港宜依旧规十年一浚，请即以今日之成法，申其禁令，定其规制，俾此后得以永远遵守。余窃念兴废之理靡常，通塞之数时有，愿守斯塘者，共知港之能为泄，而后能为蓄，无忘疏浚之勤也。因援笔记之，使勒诸石。

### 南陂记

陈九鼎 邑人

长邑，一弹丸区也。负山而枕海。沿海之地，自北而南，咸潮往来，不利于稼。其依山处，所非无清泉涌发，又往往迅速入海，不能资之以利田。藉非吐纳有资，堤防有要，导引有方，欲使斥卤尽成沃壤也，难矣。贺侯莅吾长，力行善政，百废具举，尤惓惓以水利为先务。若湖若港若斗闸，圯者修之，废者复之，淤者浚之，侵占者清理之，莫不次第就举。七都有南陂，明司空培所陈公移璞石斗门所创也。障三溪之流，引灌洋下、感恩等六乡村田亩。其源远流，其流长，其为利也大而溥。惟是地势低洼，甫经修葺，而冲决又见告矣。国朝康熙三十三年，量移高阜处复建，旋又圯。阅今数十年矣，民甚苦之。侯甫下车，咨询水利，殷然思复，缘费繁而工巨，里人见浅，辄畏难而徇于便安。侯兴言及此，咨嗟叹息，觉已饥已渴之思，未尝稍释于怀。原三角地方，有土堤一道，中竖两石碇，设闸板可启可闭，堤以上田亩属南，堤以下田亩属北。岁己卯，雨泽愆期，隶南隶北诸乡，一望田畴禾苗将至枯槁，因而各挟私见，彼此相持，几纠纷胶结不可解。侯乃进众民，谕曰：“尔民何争此涓涓者为？凡举大事者，必提其要，图后功者，不惮其烦，吾为尔民计之熟矣。南陂不复，争于胡底？南陂若复，争且自息。尔民毋畏费繁，各破慳心，聚毛可以成裘；

毋虞工巨，各竭己力，一劳可以永逸。归海之水，尽引归田，尔民且取无尽，而用不竭，何争此涓涓者为？”众咸稽首，欣然受命。侯乃偕诸绅士里民，相与度形势，定事宜，业田者出资，佃田者助力。按亩任事，犖石庀材，即兴工于是岁之冬十一月。侯既风行，民斯草偃，无不踊跃趋事。侯复进民，谕曰：“财者人所共惜也，好逸恶劳者情也，卤莽报功者情也，有初鲜终者，古今同病也。尔民其毋蹈此，负吾苦心。”由是或三日一至焉，或五日一至焉。严以督之，勤以劳之，视民事直如己事，若唯恐其弗成也者，若唯恐其成之弗速也者，又若唯恐其成之速，而未可垂诸久远而无弊也者。越明年春夏之交，又适阳亢雨稀，各乡陇亩桔槔声彻昼夜，独南陂一带双涧盈盈，流泽涉涉，农民乘时布种，一望千畦，盈绿满野。是南陂之事甫半，西成之庆早占。异日者黍与与而稷翼翼，年登大有，家庆盈宁。乃益叹侯之留心水利，其泽吾长者不一而足，而南陂一举，尤其大焉者也。佃斯田，沾斯润者，建祠而勒贞珉也宜哉！鼎适设馆锦阳，备悉始末，重为吾长幸，因自不能已于言。他若规画之周慎，建置之完备，与夫善后之详审，侯俱纪之详矣，夫何赘焉？

### 重修庙学记

进士林调羹邑人

吾邑于闽为蕞尔区，而理学名臣、节义文章之彪炳史乘，唐、宋、明以来常为诸邑冠。国朝文教覃敷，涵濡乐育，吾邑虽家鲜素封，诗书弦诵之声，无大小村庄皆遍。“海滨邹鲁”，信不诬也。邑学在县治南，位丽正中，诸峰秀拱，江潮自右臂来，汇于左，潜达泮池，文明以焕，为全郡所希有。顾时代递迁，几修几废。簿书筐篋之吏，率聊且补苴，以塞目前责；求能灼知大体，以劝学兴文为己任者，什佰中未易一二觐。贺侯以江右名宿，来莅兹土，



振烦滌滞，百里区无废不举，睹庙学剥落，慨然以兴修为己任。越二年己卯，庶政举，大有书，爰咨学博萧、郭两先生共谋是举，捐廉俸以为郡人倡。会萧君调东宁，郑先生继司铎，复赞而成之。邑之动于义者，随各以其力相为助。经营规画，鸠工庀材，殿堂门庑，以次修整。仆者植之，渗者弥之，漫漶者堊之。棂星门外，旧无捍墙，侯繹以数仞，开东西二角门，崇体制也。奎光阁久圯，鼎建之，举如屹如，视昔有加。明伦堂势且就倾，易朽以良，拓狭以广，斋舍厅宇，一新其旧，资讲习而耀文明也。度度当材，受直当事，费约功恢，不逾年而巩固巍峨，焕然精彩矣。初，侯之商斯役也，众方以工浩力绵难之。侯曰：“事无难易，要在为之而已，且人择其易，则难者谁畀？”盖虽劳不惜也。今果为轮为奂，共乐厥成，侯诚智与勇兼哉。要其所嘉与我士民，不忍相安固陋，以即泐幽，则侯之仁心为质，智以开之，勇以辅之也。吾侪读圣贤书，尝未窥门墙万一，际斯举而仰瞻庙貌，其亦有怵然思，勃然奋，知所以自振拔者乎？出为名臣，入为鸿儒，駸駸乎升堂入室，胥本于此，何莫非观感我侯而兴也。侯之风励者远矣。于藏事，书此以识不忘，且愿与我邑人共勛之。

### 重修武庙并射圃记

知州郑 愈 邑人

国家之兴，敷文德而不忘武备。自我朝定鼎百余年，外攘内安，上下协和，神入胥庆。而崇德报功，典隆祀事，则是武庙直可与文庙并重，自畿辅以达郡邑，极之海滨荒徼，罔不恪遵祇奉焉。吾邑文庙建于治南，而独关帝未有专庙。至国初时，里人奉祀西塔山下射圃之中。始则迁就，继复因循，相沿日久，不知其非。岁丙子，贺侯莅兹土，甫下车，释奠后即行恭谒武庙。见门额“鬯相之圃”，愕然异之。及考旧志，乃知今之庙祀，昔之射圃



也。谋所以建立，而恐于偏废，未遑举事。越二年己卯，会东粤张公新莅右军都阃，事共商榷，并集绅士计议，意见佥同。爰鸠工庀材，大加修建。就牌楼改为头门，书以关帝庙号。前为正殿，奉神像；后为寝殿，祀关帝三代神牌。中砌甬道，旁翼以两廊。与文庙同时兴筑，而规模之巍焕，亦相为辉映。复于庙西偏，另筑观德堂，为诸生习射所，其修短与庙等。或曰射圃宜丽学宫，今竟丽武庙，可乎？然因地制宜，随时起事，理苟可以互通，事又何妨创举哉！曩者帝君既无特庙，而射圃仅存虚名，二者胥失。今经邑侯擘画，而以妥以侑，神有凭依；序宾序贤，人思揖让。一转盼间，相得有合，揆文奋武，不诚兼综条贯哉？是役也，邑侯捐俸为之倡，司阃张公相与交赞而观厥成，经营董率则右部胡公之力居多焉。工既竣，里人以愈属桑梓，命书其事，因为叙新庙之由与复圃之故，为之记，以勒于石。

### 复修长林湖记

知县贺世骏

为政之道，田功与水利相为表里。禹曰：“德惟善政，政在养民。”又曰：“予决九川距四海，浚畎浍距川。”孔子之赞禹也，亦曰：“尽力乎沟洫。”养民者，未有不以水利为兢兢。长邑滨海，地多斥卤。间有深溪大壑，匪直趋入海，即泛滥无归。其资之以利田也，或宜贮，或宜浚，或宜凿而引之，或宜障而防之，靡不藉人事以尽地力。以故，陂、塘、湖、池、斗闸、涵埭之属，所在皆有。余自承乏以来，稔知水利在长尤为急务，凡有关于田功，靡不悉心殫力，务期完善而后已。邑十九都有长林湖，为炉峰、燕石、龟山诸涧奔流环绕山趾所潴积也。堤基原阔二丈，广一丈六尺，高八尺，延袤八十余丈。湖口建设斗门，雨则潴之，旱则泄之，为江田、章坂数乡村田亩所利赖。自宋而元而明，盖数百年

于兹矣。因循日久，渐就堙塞。堤岸既坏，斗门空存，一遇积水，则水无以蓄而泛滥，适以害稼，民苦潦矣；一遇亢暘，则水无可溉，即膏腴难冀有秋，民苦旱矣。夫湖兴，而水旱皆可无虞；湖废，而水旱皆能为厉。湖之所系岂浅鲜哉！且徒使见利之辈，相与占湖为田，日侵月削，而旧制几不可问。余因公临乡，周察情形，不禁蒿目，引为已责，爰谕乡民，亟图修复。时则有邑生陈天任、陈士槐、陈贻书、陈骏声、陈正理、黄国学、谢云汉、戴振凤等，毅然当之不辞，各乡人民亦无不踊跃从事。即向之占湖为田者，亦复良心勃发，各愿铲田还湖。乃相与仿旧规，清故址，由湖至陈令津，为桥者四，为闸者八，皆长林湖外障，亦经坍塌，亟宜修葺，则江田与章坂各分司其事。不逾年，而湖与闸俱告成。诸士民复进而请曰：“湖之废百余年矣，自宋及明，屡废屡兴，辄至酿成讼端。所以人思修复而未敢遽者，惧人心弗协也。今也浮议不兴，众情悉协。吾侪小民，百年之利，一旦兴之，百年之弊，一旦除之，可不谓幸焉？愿有以记。”余曰：“贤愚各别，人情类然。恃有人焉力起而任之，持平以服之耳。但使嗣是而后，防其微，杜其渐，幸其兴也；善保而护之，惧其废也。时葺而理之，其为尔民田功所利赖者，直永求勿替矣。又何虑人情之或有弗协也哉？”乃如其请，援笔而为之记。

### 吴航书院记

知县贺世骏

古者家有塾，党有庠，术有序，国有学，萃天下才智英敏之士，以时观摩，使遵循乎礼乐诗书之途，以驯致乎仁义中正之域。其时，士咸以圣贤为心，而城阙桃达之习不作。后世教术不明，人自为师，未尝乏中行狂简之资，而误于所趋，往往流于放诞而不觉。此非独学术之忧，抑亦人心之患矣。夫化民成俗，莫善于学，

而所以正人心、立名教之防者，尤莫善于乡之义学。盖为地既近，父兄师友群萃而州处，耳目之见闻，言动之感发，又易以渐摩故也。我国家尊师重道，累洽重熙，所为领在学官，董以师儒者，至详且备。而犹恐遐陬僻壤，或局于方隅，无以副陶成乐育之选，复于各省书院，移出内帑以资膏伙。作人养士之泽，直与三代比隆。吴航素号海滨邹鲁，自紫阳过化以来，理学辈出，声明文物，至今不衰。谓非得于涵濡者深乎？乃求所谓义学，久缺焉无闻，谓非当事者之过，其责将谁诿耶？余至长之次年，即延师集士，开馆于六平山之阳。一时负笈从事者咸欣然乐赴，数年之内，文章学业，驍驍日上，且多获隼以去。惟是假馆受业，终觉暂而难继。辛巳夏，适都人士有河阳朱子祠易置塔山之请。余因思其地旷，无城市喧嚣之声；其境幽，有物外烟霞之概，遂额为“吴航书院”。更增新学舍共得三十余所，复捐金四百付质库取息，以为将来修脯之藉，邑诸绅士亦各量捐赞成之。由是书院有方，膏火有资，俾执贽来游者，亦得遂乐群之志焉。虽然，肇造伊始，规画未周，将何以使弦诵不绝，而居业者且乐教思之孔长乎？夫前事者后事之藉也，有基者可大之业也。余岂敢云创？要以引而伸之，继而长之，当必有同余志，以共追隆古之风，而共赞文明之治者。故为记之，以俟后之君子云。

### 育才堂记

董绍安邑人

县治西塔坪山，南俯马江；北峙首石，地旷而境幽，登高眺远，使人神爽意移，全邑一胜区也。旧有废寺，明弘治间，潘公府始改为南山书院，与多士讲学其中。迨后倾圮，未有议而复之者。贺侯以江右名儒，来莅兹邑。甫下车，即殷然念曰：“古者凡民俊秀，皆养之于大学，以孙其业，以收其威。《记》曰：‘蛾子

时术之’其此之谓乎？方今圣天子兴教重儒，文治駸駸日上。顺治八年，有诏立乡社学；雍正六年，令郡县设置书院教习，以昭同文之治。长邑人材，自昔称盛，而书院之建缺焉，其何以罗群英、宏教育，为国家储楨干耶？”辛巳冬，集邑绅士共谋移置塔山天后宫于西关外，就故址拓为吴航书院。中奉朱文公神位，旁以及门诸先生配，复增书室三十余间，俾通邑人士负笈而来者，得相与讲习观摩，借诸大道。是诚广作人之雅化，大有造于长邑者也。侯又念膏火乏资，无以佐肄业之需，非国家养士意也。复捐廉俸四百金为邑人倡。始则暂存质库取息，继择公地辟新街建店屋四十余间，岁收其租，以资膏火。其虑之周，而计之远，有如此。夫食其德者，不忘其报。汝阴之于宋登也，配社以奉之；浚仪之于陆云也，图形以祀之。侯以父母而兼师长之任，诸生徒沐其教而被其泽者，如日坐春风中，相与金议于书院之东，另创新宇，额曰“育才堂”，亦配社图形意也。且使后之人闻风兴感，咸得奉俎豆于千秋，而并志不忘焉。安以樗栌材，忝膺掌教之任，炙光仪者素矣，敬述其事而为之记。

### 复梅花埕记

王运昌县令

距县东北五十里，有梅花澳，福唐之一巨镇也。三面跨海，惟南则为山。旧有城，明洪武间江夏侯周德兴奉命所造，名曰梅花城。中少耕种，居民六百余户，资海利为生者，十居八九焉。乾隆甲辰春，余来莅兹土，越明年，废坠渐举，狱讼稍息。独梅花蛭埕，评讼积数十年弗得理。究厥所由，毋亦小民争利而已。余心恻之，曰：“是无以归断之不可。”因略地往观焉。稔其西南延袤一带，地尽泥埕，水冲沙压，荒废若已久者。父老指以告余曰：“此即所谓梅花埕也。潮涌则成巨浸，潮退吾梅之民共于此争蛤蚶



螺蚌之属，以给衣食，今五百余年矣。厥后外乡之豪强者，因利而夺之。”夫以天地自然之美利，私为已有，几使数百年千万人托命之原，一旦顿绝。呜呼！此何怪民之纷纷而吁诸官也。且夫民之所以得安土著，不至失所者，赖有业以世守之也。今梅民既无恒产所藉，以谋朝夕、保室家者惟此而已，若并无之，其何以堪？况复频年雀角，匍匐公庭，饱蠹胥而未有已也，不亦重可哀哉！昔人有云：“县犹一家，令则家之长。”弗能为之所，令滋愧矣。于是讯其地，得归梅花。然久废弃，民乏资重整，众请诸官，余为详究，俾官捐贖以修复，民出身以力作。种蛭苗输课，兼行编户之法，令十户立甲长一人，照甲分段给种，其或有逃亡迁徙者，互相举报，更名接种。如此，则梅民各有常业，外强不得占侵，利无所争，讼得以息，而天地自然之美利，千万人托命之原，皆可一旦而复，岂非一举而众善备耶？详上列究，各如请，乃于是岁十二月，水涸殆尽，兴工筑堤开港，以固堤基，历三阅月蒔事。所复堤，东自梅花城起，至西浪头鼻山止，积蛭地一千五十弓。南自水草洲，北至海水潮汐之处，弓数如横得十之一有奇。复造小舟二，以资往来防护者。至所费金，未动官帑，故书。

### 重修学宫碑记

陈奇铤邑人

学宫自乾隆壬午重修，已历三十载，物久必敝，此自然之理也。及今弗图可乎？抑图之以名不以实，且因以为利，罪莫甚焉。询谋僉同，不动帑而捐贖，鸠工庀材，董是事者，经画课督之。有修而非建者，为大成殿，为明伦堂，为奎光阁。风雨除，鸟鼠去，丹雘黝垩，复旧观而增轮奂焉。有因修而建者，为崇圣祠，为两房，为丹墀，为殿廷，为戟门，为桥，为坊，为宫墙，为学舍，为宾馆，为儒学大门、仪门，为中庭、甬道，为省牲所，悉故址也。



制卑狭而物朽败，舍旧图新可也。有建而不必修者，为名宦、乡贤、忠义三祠，为土地祠，为广文衙署。三祠前障高阁，形势乖矣；宾馆中踞土神，名实舛矣。官署存者陋，而废者未立，均非体也。稽诸邑志，有学地，在崇圣祠，其东画溪为界，杂于市廛。始焉赁于民，而岁牟其入，久则据为私物，且立券以相售。急白于邑侯吴公、司训刘公而复之，建为两署，并创后舍。改立三祠于堂西旧署之址，建土地祠于仪门西掖。一转移间，而侵地归，观瞻肃，神人安矣。形家欲引学前之水东注于溪，以期后此文蔚起焉，因砌石为沟以达之，此则非修而特建者也。斯举也，无华靡，无简略，无浮冗，无侵渔，计费钱五千八百四十五贯有奇。始于乾隆辛亥十月，竣于嘉庆丁巳腊月，应勒石以垂永久，谨纪其实如右。复绘图侵木，俾后之览者了若指掌焉。

### 重整吴航书院碑记

知县徐承禧

郡邑书院，育英才地也。长虽百里区，自唐迄明，代有名臣大儒，理学文章，后先辉映，至今科目之盛，常甲诸邑。而书院则自乾隆初，安成贺公草创之。嘉庆中，阳湖杨公润色之。唯历年既久，人士增多，膏火短绌。丙子冬，余甫下车，山长陈灏川刺史有心造士，首以为言。余维经费必足，教泽乃长，非岁有余利，源源不竭，安能垂永久乎？丁丑夏公暇，集绅衿议倡捐四百金，由城及乡，率董劝导，咸踊跃乐输，总计得贖约万两，谕置田产店业，收租取息，额款以充。于是重整院规，增修学舍，资讲习也；厚加膏火，倍于旧额，广裁成也；改建奎光楼，翬如翼如，象文明也。经营三载，视昔有光，一时士风翕然丕变。岁己卯，逢大比，获隽者二十余人，为开邑以来所未有。懿乎盛矣。异日名臣大儒，后先辈出，文治之隆，固将超轶前代，则尤守土者

之所厚望也夫。

### 书吴航书院碑记后

邑人陈萼芬

海邦文教之兴，甚赖良有司有以倡之也。方今闽省各列宪复仰体圣天子右文之意，先后建置正谊、致用两书院，嘉惠士林尚矣。吾邑徐侯莅政，首重兴文，议增书院膏伙，捐廉以倡，俾邑人赞成盛举。鸠货购产，详定章程，设卷局，修学舍，严考校，厚褒奖，凡以励多士者至也。故人士向风，争自濯磨。芬忝主讲，每课阅卷，无虑四、五百篇，盖都人士亦勤勤于科举之学矣。古谚云：“陈塘沙港合，举子胜莆田。”己卯秋闱，隽发甲诸邑，众方赞广励之力，而我徐侯修港适告成功，竟符是兆。从兹文治骎骎日上，将古所云：“首石鸣，大魁出”者，不更有厚望乎？爰将题捐姓名，添置产业，勒石以垂永久，而记其事于碑阴云。

### 重修城隍庙记

知县徐承禧

事神，治民，守土职也。则凡庙关典祀，皆宜时修，况城隍之神，御灾捍患，尤为民所凭依者乎？苟听其剥落，因循弗顾，则是神能庇数万户生民，咸得其所，而数万户生民，不能卫此一庙以妥神灵？呜呼，衰矣！余自丙子冬莅长以来，政渐通，废渐举。戊寅秋，乃召邑民告曰：“尔辈敬神乎？盍修庙乎？自道光庚子大修，迄今三十余载矣。剥而宜复，向以费广而辄止。今余议酌估其费，由城及乡，按户匀派，所出甚廉，集数万户之力，一反手间事济矣，尔民其愿乎？”民咸欣然愿从。爰协众志，率绅董庀材兴工。乃新寝殿，整神像，观瞻肃焉。其有撤而更造者为剧台，为酒楼，暨祠旁观音殿之钟楼、鼓楼。仆者植之，巫者饰之，基肩

固护，规抚益张。更以余贲修崇圣祠、先农坛，下及养济院。夫圣教尊而士敦学校，农事重而民力畎亩。废疾有养，令无失所。盖事神治民，无敢偏废，亦尽余职焉尔。嗟夫！庙貌显严，神威愈赫。既大修以扩其规，无小修以善其后，安能垂久远而叨永庇乎？余因复筹款购产生息，以备岁修，愿董是事者留意焉。是役也，经始于戊寅十月，告成于庚辰九月，工既竣事，而神栖载安，驱袂疹孽，岁迄大和，民又益喜，乃相与请纪颠末，以诏来者。余将受代而行矣，亦不敢违其愿也，遂援笔书之，而刻诸石。

### 重修五贤祠记

邑人陈萼芬

凡事成于众力易，成于独力难，非至勇者不能奋其独力，亦非崇正者不能用其至勇之力也。邑有五贤祠，丽东郊，祀朱文公，而黄勉斋、刘存庵、刘在轩、陈自修四先生配焉。创于前明，修于国初。后倚鹿屏，前对鳌峰。左有一泓活水，右有半亩方塘。几经修葺，不委前哲于荒烟蔓草间者，皆赖贤有司之力为规画。咸丰间，广文许、蔡、高、周四公，先后倡捐，合众力而重建，阅四年而竣工。历今二纪，风雨飘摇，日就剥落，议修者辄以众力之难合而止。适江左徐侯来权邑篆，百凡厘飭，尤亟兴文，整顿书院，筹增膏火，能造士矣；诣祠展谒，慨然以重修为己任，能崇正矣。戊寅夏，独捐廉俸，鸠工庀材，施勳垩，涂丹雘，以次修整，阅两月而祠宇焕然一新，足光祀典也。嗟夫！事无难易，亦顾力行何如耳。侯毅然兴修，不费民财，不劳群策，而功成俄顷，非至勇者乎？吾党能体此意，刻苦力学，登堂瞻拜，悠然会心，则睹兹碧沼青荷，沦漪荡漾，非即“云影天光”之趣乎？听此流泉汨汨，涤躁除烦，非即“源头活水”之机乎？由是以文公之学为学，力担道义，辅道统之正传，而维持世教，则斯祠之感发人于

无穷者，皆侯崇正之力所致也。侯名承禧，号心燕，六合人，太翁彝舟先生，以名翰林出守福宁，功德在民，著述行世。侯之克崇正学，知其家学渊源有自来也。不佞忝主吴航讲席，乐观厥成，而为之记。

### 妙远楼记

邑人石 暄

吴航古槐村，屏山带海，峦岫森立，涧壑嵌崿，葱茏如画，先君子曾筑室于故庐前数武。越二十年，余复拓地数弓，傍宅东作小楼，凌虚远望，妙景辄出，楼向阳背阴，北枕甲山，南控天池，东极流沙，海天空濛，纵横数千万里，波涛弥漫，一望无边。每当晓日初升，大若车轮，冲波涌现，晶莹旋转间，辄一瞬数寻。时届春夏，水暖风清，万花齐发，蜂声蝶影，每回翔下上于绿烟红雨之中。迤东而南，有田万顷，宿雨初霁，新翠迎人。妇馌夫耕，往来如绘，畦溪屈曲，蓑笠纵横，皆依稀可睹。迤延野绿，远混天碧。举凡爽目快心之景，无不罗列献秀于兹楼之上。炎序既更，凉风应候，丹林改色，时鸟变声，倚槛欣然，时或忘倦。夕阳乍落，万籁无声，但见平田远火，明灭林外，山碓夜舂，复与松风相间。迨秋尽冬深，霜痕满地，雪意侵棹，四顾茫茫，人迹阒寂，惟闻猿鹤之声，凄唳断绝。而海上怒涛澎湃，林谷间如相答应，欹枕听之，亦复终夜有声。噫！是楼也，地才一亩，筑近三椽，而千里异景，四时变态，一举目无不包罗并收于兹楼之上。楼虽小乎，亦云妙矣。遂掇《论衡》妙远之义，以名吾楼云。

### 游三宝岩记

邑人郑 勋

予友姜某，家枫林，去筹峰三宝岩二里许。岩为宋儒朱晦翁



避禁读书处，故亦曰晦翁岩。己丑乡闹揭晓前五六日，姜来招游岩，欣然从之。同行者邱子苏如，同姓友纪卿也。出邑东关外，天阴微雨，相顾败兴。姜曰：“此行不果，恐君后此十年，仍不获睹所谓三宝岩者。”诸友深以为然，遂以袖障首，无盖而强步。至华源，姜叩所识者之扉，一驻足焉。主人治点，食毕复行。抵枫林，时已薄暮。所涉之路，去邑城盖三十里有余也。雨弗止，衣履及发尽湿。姜固授蒙学于村祠，遂宿焉。次日淋雨大甚，祠之外一步不可行，但纵饮言笑而已。如是者两日，主客积闷而躁。越三日霁，始获游。去村未远，便睹山之腹林木葱郁，隐隐有祠宇出于其际。迨至，则古翠参天，落黄满蹊，旁多怪石，苔藓斑然，经雨滑甚，不可践。转数曲，有两石皆若绳削，峭立左右，盖所谓石门也。进则为晦翁及二刘结庐处，石镌“读书处”三字。有老梅出于石间，干枯朽，仅存十之二三，视若木片而无心，繁枝绿叶，盘托石颠，殊有生意，云是晦翁手植者，历元明迄兹已数百年，而空山岁寒，无所改易，其晦翁之灵所寄耶？折而西，为晦翁祠，祠前一僧方锄蔬，草笠短衣，肃客入。因登堂遍睹名人楹联及前贤题咏，心目迷眩，虽感触得句，而终莫敢疥诸壁。堂之后有海天山月亭，极高，石阶殆将百级。登则北望浩然，海波无垠，风帆飞走，奇观也。山风飒飒不可当，凭栏近俯，股栗而战。下则僧以斋饭进。已而姜缚竹蒸火导人白鹿洞，洞口洼然，狭仅通人，以手据石，坐而下，约丈余，稍得平地，然不可昂立，以手扞顶上石，膝而行十数武，有石卧其冲如阙，外高而内稍深，宜侧卧以进。予体肥胖不可侧，进以首及腰不能矣，前拽后推乃进。于时笑声满洞，自忘身在何所也。又数武始得立，上高十余丈，石罅一线微有天光，多蝙蝠，见火即飞避，闻磔磔声，可以知其大若箕。遍地皆矢，白如雪，即药名夜明砂者。素闻洞有晦翁书“止步”二字，二友未敢深入，故亦未之见也。俗曰晦翁来此，有



白鹿自其中賚粮出，或云伪学禁严，翁尝匿迹于中，中有路可通梅花。二说予皆笑而未信也。出则傍晚，天益晴，林鸟岩云若促人归，游者俱兴尽而返。因笔叙之，以夸示同人欲游而未得者。

### 关岳庙记

民国知事易国幹

长乐之有关庙，昉于前清康熙四十一年，邑令张植等建，在县治西南，而岳庙阙焉。民国四年三月二十五日，奉大总统明令，由政事堂礼制馆拟订关岳合祀典礼、乐谱，通行遵照。右武崇忠，义衷至当。查礼制馆原呈，京师汉寿亭侯庙，建于隋代，其前虽无可考，而自隋迄今一千三百余年，祀事修明，至明、清而益盛。自京师以逮各行省，庙貌巍峨，典礼之隆，拟之阙里。岳庙始建于鄂，在宋孝宗乾道五年，距其歿也，未及三十载。历致褒崇，从祀历代帝王庙。其庙之在于河南、浙江、江苏、湖北等处者，并由地方官春秋致祭。则是岳庙祀典虽与关庙埒，而在前清时，各行省尚未通行。长邑之无岳庙，固然其无足怪。兹奉明令合祀关、岳，而国幹适承乏斯邑。国幹，鄂人也，生长鄂王始封之邦，遭遇关、岳合祀之典，则就长邑旧有关庙葺而新之。左奉关壮缪侯，右奉岳忠武王。其东西两序，历代忠武将士附焉。不袭封号，为正其名曰关岳庙，遵时制也。窃维民国肇兴，五族共和，自宜以世界之眼光，开千秋之旷典。伏读大总统申令云：“忠武者，国基所以立，民气所以强”。如二公者，实足以代表吾族英武壮烈之精神。于以右武而崇忠烈，修合祀之典，以符禘祭之经，适得人心之所同然。且闽省逼处海疆，肩钥南天，非尚武不足以固吾圉。今巡按使许公，督飭所属，勤修武备，寓兵于农，所以申国防而作士气者，用意至为深远。则是举也，其亦有所观感而闻风兴起者欤！是又官斯土者之所跂足而望者已。

## 校 注

①“迨明”下疑漏“末”字。

②乙巳疑误待考。

# 长乐县志卷二十下

艺文录下 诗 赋 文 杂著

诗

怀直讲陈烈

宋少师文忠公陈 襄

思君苦节直艰难，四十穷经草野间。文为周衰能力救，礼遭秦祸欲重删。时无正说非杨墨，天与多才继孔颜。吾主聘贤方侧席，好将书币起东山。

军中行景炎初募兵勤王作

邑人简法陈宗傅

胡马出幽燕，风尘起北陲。天兵偶不利，王气黯然收。六龙狩沙漠，谁复为报仇？耿耿孤臣衷，长怀麦秀忧。回首望京阙，血泪相和流。安得众猛士，尽如穰苴俦。戮力共厮杀，梟取可汗头。扫清犬羊群，厘复旧神州。奇功勒燕石，芳名播千秋。

挽从子老成

宋邑人知县陈公荣

边城将星落，浩荡烟尘黄。我亦在行阵，生死未可量。涕滂感永诀，激裂摧肝肠。昔尔仗雄剑，志在清八荒。神武埒颇牧，奇计如平良。遇贼奋英果，逐杀何其强！气数乘人事，竟向锋刃僵。忠魂薄日月，耿耿万古光。虽云获死所，国耻犹未忘。便应作厉鬼，虏酋尽杀伤。

### 陈氏三忠

明通政参议赵 绂

满目胡尘宋室残，一门忠义古来难。义同元亮心思晋，忠似留侯业为韩。独立勤王虹气烈，双魂死国阵云寒。却怜未遂吞胡志，千载令人发指冠。

### 前题

明户部主事魏良佐

仗策驰驱一剑雄，持危殉难两心同。但知身世惟君父，忍使衣冠向犬戎？劲节共随星日耀，英名长与海山崇。於今奕叶翩翩盛，景仰忠贞思转浓。

### 前题

明吏部侍郎顾起元

才名卓萃冠鸿都，慷慨从军拥绣弧。试问勤王三义士，九重曾识姓名无？

### 又

前 人

背城一战死生间，不解重围誓不还。可惜弟兄同日死，千年埋骨凤凰山。

### 赠刘县簿有源

明翰林典簿高 棟

吴航寂寞山海滨，迩来桃李生阳春，长官清平佐政理，况以簿领尤宽仁。丹徒世泽余纨绔，四十高名闻帝里，一腾鸷荐会冲霄，五度鸾飞尚栖枳。此帮讼少自无为，惟侯之德能抚绥，临民不忍鞭笞苦，判笔无容人吏欺。公余时复开仙馆，坐对白云心共远，首石泉声送酒凉，南山秋色当窗晚。落日琴堂听奏弦，清风松下唱酬篇，诸公且以同坐啸，百里何妨枉大贤。乃知梅福非徒尔，自古奇才应小试，大刀操割无全牛，逸气騫腾见良驥。却笑栖迟老一邱，怀恩归德未能酬，三载愿留河内寇，百钱拟送山阴刘。

### 前 题

明邑人高 棟

凤林翰墨带天香，嘉祐儒臣被宠光。千载昭陵何事业？丝纶犹在德星堂。

### 述绩篇为邑幕黄本作

前 人

闽越镇海国，无诸开汉年。三山古雄望，郡邑纷缀联。乐土少百里，编氓居一廛。东南半巨浸，负郭无闲田。止旅日生聚，耕桑到瀛堧。乘橈结溟淤，广斥化平原。捍御列大防，临深障巨川，狂澜恣冲突，版筑随崩蹇。树艺不得施，粒食将何缘？圣禹力沟洫，元功弥八埏。伊谁补天漏，邦有大夫贤。方令实经始，赵丞能绍先。我侯复继作，事业更光前。惟昔下车来，辩理民不冤。公困莲幕静，檐树挂蒲鞭。美政归令尹，贤劳任妙年。轻身犯霜露，



匹马趋穷边。地位相阴阳，沟渠度流泉。风行黎庶集，雷布号令传。指挥南乡民，南乡皆骏奔；指挥北乡民，北乡如云屯。士农别等流，什伍相制牵，能者十夫长，智者百夫权。程功较尺度，赏罚无颇偏。百堵皆作兴，一夫敢稽延？杵声来登登，堤势走连连，坦坦如周行，桓桓如繚垣。其平有如砥，其直有如弦。外斗潮汐雄，既固亦既坚，内分疆理明，乃亩仍乃宣。告成肃旋驾，稚耄争攀辕。佚道以使民，虽劳谁见怨？辛勤在一时，惠爱留后昆。万顷雨水足，三农日力全。倾家及疆以，结耦维十千。春种已秩秩，夏苗复芊芊，秋稼载云登，冬租亦少调。仓箱千万斯，斗米三四钱，机杼声相闻，鸡犬寂不喧，路行无拾遗，室处常晏如。问此何以由？我侯使之然。虽然荷帝力，抑且戴侯天。侯位从此升，侯禄从此迁。懋绩掩前辙，蜚声塞广阡。西门与郑国，遗法差可肩，召埭与白渠，前美不得专，我欲移六平，镇之不测渊。将侯一片心，写向苍崖巅。冯夷不敢舞，偃伏蛟鼉跽。万古大堤行，因之述绩篇。

### 前 题

王 恭

君不见，召公埭、白公渠？叔敖、郑浑功最殊，年丰粒米多赢余，闽州属县沧海隅。筑海为田民力劬，炎风赤日秋草枯，漫漫斥卤连荒芜，民饥不足供王租。我公到来民复苏，鳩工筑堤备不虞，滨海、严湖水可潴，污邪瓠窳变膏腴。禾黍离离接桑榆，公田有谷兵有储。春风二月花满途，村北村南开酒炉，黄童白叟但欢娱，驯雉不惊鳩哺雏。红莲宾幕莹冰壶，玉树掩映青珊瑚，讼庭无事鞭用蒲，功归令尹名不沽。政成秣马朝天都，便当发轫青云衢，愿作霖雨沛九区，非但小邑蒙沾濡。

### 书宋陈烈授国子监说书诰后

明邑人翰林典簿王 恭

吾爱陈夫子，名高庆历中。官卑心独苦，变隐道弥通。屡荐金门刺，难羁碧水铜。七闽沾化雨，百世仰儒风。芸阁丝纶在，芹宫祀飨同。云孙怜故物，应复继其踪。

### 题林泉学圃轩

王 恭

吾家书室依林垆，日夕清晖多在庭。出户时看花屿近，卷帷唯见董山青。苍苔古木连深曲，悬萝石上孤云宿，露叶垂篱菘蕪香，水藤拂槛匏瓜熟。任是闲门客到疏，自甘萧散学犁锄，新筑小池宜抱瓮，时开高馆复携书。纷纷甲第皆粱肉，何事邱园未干禄？稚子能收苜蓿盘，家人解压葡萄绿。寂寂林扉绝四邻，角巾野杖亦容身，公门若更栽桃李，先数林泉种圃人。

### 华封卧轍为县令潘府作

明御史邑人陈景隆

万水俱朝宗，众星咸拱极。圣皇宰世履至尊，四海郊圻尽来格。吴航百里闽海边，我侯戾止今三年，三年述职循常典，鬼舄翩翩上九天。仆夫在途马在馭，行色匆匆不堪驻，老稚攀轲为苦留，后拥前遮声载路。我侯此去登天曹，吾民疴痒谁抑搔？我侯此去居奎坡，吾民疾痛谁抚摩？我侯浑比马江水，沦人肌肤浹骨髓。我侯仁似首石山，远人瞻仰近人安。愿裁短疏彻丹陛，暂借我侯还旧治，又见花封三月春，万户千门总桃李。

## 清风懿绩歌送韩侯绍入颍

明侍郎邑人郑世威

吴航自昔称乐土，平川旧辖移今所，无诸南下钥藩篱，北控梅江卧貔虎。瀛洲般若莫襟喉，双洞悠悠几百秋，六平卸落十洋市，五马横趋溯上游。首石孤标霄汉中，太常卓越筹岩东，奥区吻海龙勺结，四时佳气郁葱葱。佳气人文相感召，四灵乘旺远騫越，俯仰河山今古情，几度郎官应先后，希声仲举皆良士，次彭萧伍尤表著，王遇昭度方次云，闽洛渊源政具举。自是民淳俗太古，海滨渐被成邹鲁。圣明循吏应期兴，注厝吞犹炳章甫。江阴宗亮姑苏王，蒲陋菲苞贤誉张，齐普龙韬尚文化，横琴独坐退思堂。龙峰朱刘书院讲罢空屏嶂，天启南山振遗响，潘府建南山书院劝农观稼二亭税桑田，乡约训民崇礼让。肃庙初年杨麟与何应和，鸡犬不惊乐事多，施泽於民随久远，蔽芾棠阴世不磨。范川为记初泉雨，意气相期互轩翥，初雨亭留不愧天，排云百雉重千祀。蒋君四载仅佐治，滨泗水清惠绩久，一日攀轭辙既南，砭砭倚玉殊妍丑。满堂燕笑翻向隅，齐州二斗渺愁余。彼美人兮在远道，安得耕轅百里仍欢娱？伫看列宿光牛女，坐见祥鸾下江浒，韩侯至止民襁负，候如旱虐沛甘澍。褰帷迅扫陌上尘，颺颺轻飙物色新，麝味兰馨梅与侣，冰肌玉骨水为神。退食频怀民菜色，催科时复问幽侧，比閭款款乐瞻依，属掾萋萋共总鞮。阳春桃李开贤路，厘佞黜征市平估，雀角不喧白昼闲，殆从无需民晏堵。乘离霭濛泛原田，敷淡虔祈若帝天，歛忽翠云时掩映，东皋西崦颂丰年。渔阳麦秀古祥异，今兹大有毋乃是？宁邑穹碑系去思，吾民嘒舞歌平治。清风窸窣匝遐迹，懿绩骈填昭来许。吴航掌故邈无征，属笔任余丛喆臆。凭侯重订树世风，逗馥哀芳畴与同？白头搦管拟镂石，旋有太史书吴公。而今送侯千里别，羨侯清风与高节，懿绩在人只

一方，宁如入朝赞谏烈？入朝早为社稷臣，上佐天子下庇民，如侯素养喻于义，不使不仁加其身。谦尊而光卑不逾，浩浩乾坤皆广居，立正位兮行大道，万钟千駟直铢锱。岱阳山人狷者流，对侯语语宗伊周，他日相逢天下士，莫说吴航有旧游。

### 赠郑与聚

源涣

明本县令詹莱

荔英粲蓓蕾，松干郁森萧。苔藓卧麋鹿，筠篁戏鸛鷖。我怀邱壑想，君有鸾凤标。鸾凤非凡姿，邱壑有余饶。出门咫尺地，旷若千里遥，形影劳重寻，酬唱不成谣。积郁废朝昏，和丽成寂寥。吾闻击壤歌，可以致琼瑶。还因惠风发，天路坐闻韶。

### 赠郑中孚

世威应召

前人

平生麋鹿性，呦呦声念群。念昔南海滨，颇避肉角麟。口衔野苹草，持用叙殷勤。其雨复其雨，杲杲怨朝昕。吁嗟忽来仪，蒲轮荐元纁。税驾还复起，热中杂忧欣。

又

前人

肃肃九苞鸟，啾啾鸣朝阳。青鞵助而劬，时哉羨山梁。明良庶一德，四海应降康。昂昂胎化禽，矫翮起高翔。远辞沧溟徼，来为廷殿光，勉旃慎踟躅，时奏鸛鷖章。

### 赠林慈

王恭

麟经独抱上王畿，官锦新裁博士衣。六馆夜凉闻漏起，五门

天曙退朝归。凤凰台上吹箫迥，鸚鵡楼前见雁飞。西掖环林应不远，相逢休道故人稀。

送高廷礼<sub>棟</sub>应荐之京

明邑人中书舍人陈 登

首石峰前供帐开，山城冠盖送离杯。百壶酒尽青骢远，五两风来彩鷁催。楚国旧传徐稚隐，汉廷今重董生才。南宫未久应相见，乘此同吟到凤台。

谢郑有度<sub>亮</sub>

明状元舒 芬

门闭岚烟睡正酣，梦惊银鹿达琅函。水腥破晓双还讶，海味于今我独甘。旷世心期怜尚在，同年情谊更何堪。炎蒸底事酬知己？松竹新培曲径三。

元日出郊

明知县吴 遵

瑞烟香霭朝菁葱，岁首檐帷行县中。山川不改闽粤色，弦诵犹存邹鲁风。长江水明日晶晶，四野麦秀春融融。儿童竹马不相避，对我忻笑夸年丰。

游长乐新城报寇至镇下

傅汝舟

岛夷山寇巧相依，每岁还巢此路归。一苇镇门宵径渡，双刀城堞昼空挥。追奔未道兵家忌，遇乱方知世事非。愁至嗒然惟有睡，况当衰世故人稀。



## 刘巡抚煮追寇至壶井山下凯旋

前 人

中丞逐寇远临戎，马上能开两石弓。遂使国威扬闽外，不教民力困城中。浮人计日仍安土，怯卒乘时亦向风。罢说乱离前世事，四郊烽火接天红。

## 送郑中孚世威还闽

明礼部尚书杨 博

一宴曲江四十年，杏花同醉寺门前。曾闻江右触秦相，见说闽中卧郑虔。先帝赐环宸眷切，今皇特简圣恩偏。如何便欲还初服？海宇苍生共惘然。

## 恭题宣庙所翁画龙图

礼部尚书吴 宽

黑云作雨初收脚，似有飞龙露头角。恍然拈笔欲写之，目眩金鳞仍走却。所翁好龙非好真，真龙自为龙传神，小臣稽首不敢视。龙去鼎湖经几春。

## 题长乐李侯送行册

明邑人布政谢肇淛

兽石嵯峨倚天碧，马江晴涨潮头立。石尤风起舟不前，暂留使君行勿急。使君治行几年余，水白山青橐有书，苍生政尔需安石，父老何须辄去车。

## 送练生赴阙为其先中丞请恤

前 人

六月霜飞叫帝阍，百年遗事不堪论，孤臣分已无完卵，异代恩应到覆盆。宝鼎夜沉磷火色，玉阶春暗血书痕。乾坤雨露恩如海，送客无劳吊楚魂。

### 送练中丞遗裔归家<sub>有引</sub>

前 人

自金川门之变，练公子宁以御史大夫抗节死阙下。闾门荼毒，独有侍媵抱匝岁子匿民间得免。展转入闽，为人佣保。六世孙绮者，为新宁陈孝廉所立掌书记。万历戊戌，孝廉计偕入浙，有江右杨生应祥同舟。先一夕，梦练生持刺谒己，心异之。比入孝廉船，见书记侍侧，雅哲不群，指问何姓，答曰：“姓练。”生心动，叩之曰：“得非吾里练中丞之后乎？”绮不应，而涕泪满而。生益疑骇，穷诘之，具得其状。急以百金为赎，孝廉不受，遣绮，绮不肯行，曰：“以死殉国，入臣之恒。且九族赤矣，归将何为？”生益贤之。归家，具白当事者，以币来聘，授以衣巾，俾奉公祠，官为置田庐百亩。一时闻者莫不叹息泣下，以为天道有知云。

燕山日黑黄尘起，金川门外鼓声死，长乐宫为瓦砾场，殿廷血流成海水。御史大夫练子宁，手持三尺干雷霆，覆巢自分无完卵，一门百口归冥冥。事去人亡三百载，芦荻萧萧余故垒，长陵松柏已十围，孤臣遗骨今安在？钓龙台下今可楫，新宁城东山嵒嵒，灌园谁能识法章？佣肆犹堪存李燮。一日天回地转时，千金购出练家儿，若敖之鬼终不馁，行路闻之皆歔歔。我登钟宁山，遥望石头城，宁为孝孺死，不作陈瑛生。为君慷慨终一曲，悲风飒飒江波绿。

## 送林永光出守临安二首

明礼部尚书李维禎

高山仰止十年余，忽漫相逢岁欲除。诗社主盟惟白下，辞场独坐接黄初。清霜寒拂龙文剑，甘雨春随熊首车。明到政成闻问好，始知名士定无虚。

何年庄蹻远南征？留得牂牁表郡名。食品常珍行蒟酱，蛮歌新调间芦笙。讼庭入贖文无害，燕寝凝香政自清。坐镇诸蛮来谒款，山农相狎力刀耕。

## 前 題

叶向高

闻君出守向昆明，楚道应看叱驭行。万里烽烟迷故国，三春花鸟引前旌。地无迎送官偏好，郡有湖山梦亦清。林壑只今寥落甚，何时重结白鸥盟？

## 送陈莲湖太守迁秩

明状元文震孟

使君丰采信翩翩，彩笔纵横大历年。水国秋云生鹖首，星桥明月落帆前。讴吟声并苏台迥，惠爱恩流震泽连。民力东南凋敝尽，皂囊须早达尧天。

## 前 題

明王稚登

瓜期欲代不能攀，使者清风载石还。公事无多付流水，吏情终日对寒山。税轻商贾如归市，法简帆樯竞度关。一片丰碑如覩首，他年过客泪潺湲。

送闽进士林琼田教授吉安

明吏部尚书杨溥

经明真羨汝，画省接高论。黄甲名同第，青毡道自尊。前修安定在，先正考亭存。想到吉州日，天寒雪满门。

送郑中孚<sup>世威</sup>入蜀

明状元罗洪先

榜下逢君两鬓青，廿年去住迹迷冥。衰颜纵见应难识，犹是书生诵六经。

又

前人

无计相留抱膝吟，闲窥潭水见君心。西行不畏瞿塘险，只有当年鹤与琴。

白云亭

宋林通

白云亭构占浮图，贤尹标名意有余。闲抱石岩禅客座，影笼墨迹宪台书。玳瑁玉溜无停响，潇洒琅玕不用疏。登赏已知情放佚，飘飘应喜类相如。

又

前人

双溪会处创危亭，我爱亭成不异名。到此更谁分别派？同归终见入东瀛。清辉黛染环檐色，幽响琴传出涧声。自信竹林林上美，剪裁今已属贤明。

前 题 和前韵二首

宋袁正规

幽奇山水卒难图，亭插白云景象余。共乐灵踪还旧址，好编名字入新书。面前沧海迷三岛，林下谁人继二疏？洞里苍龙头角老，埋藏岁月意何如？

碧桃溪会创幽亭，岂是从前浪得名？静对好山闲日月，却疑尘世有蓬瀛。檐间自在烟云合，砌下长流风雨声。林坞不遮沧海阔，暂来还得眼双明。

## 前 题

宋进士徐寿朋

飞泉山脚水盈盈，溪会庭前就榜名。注目合流寻异派，爽心临眺胜登瀛。游人暗认仙原景，清耳微传玉佩声。依约白莲当日事，社中贤令有渊明。

## 临 江 馆

宋县令袁正规

巍然水曲见楼台，人指安昌邑壮哉！般若山头当户外，吴航渡口瞰江回。湖平文鹢浮空远，月满星槎泛海来。投辖不因勤粤主，为怜烟霭共徘徊。

## 望 海 亭

宋县令袁正规

沈澁亭前景最豪，委输江汉任滔滔。荡云处处千层浪，沃日重重万里涛。析木有津连地下，蓬莱堆玉插天高。飘然直欲乘槎去，世界须凭割爱刀。



前 题

宋进士陈 寿

漫指庭前柏，西来意自深。迷人终著景，达士了忘心，六叶  
传真谛，微言振道林。法门应不二，来此默追寻。

灵 峰 寺

宋县令董 渊

礧礧迷沙界，谿谿占洞天。门邻金布地，桥枕玉鸣泉。庭鹤归  
遗主，龕龙去失年。扫云嫌俗驾，题壁诧诗仙。胜景无今古，居  
人有后先。不知游者馭，谁见海为田。

胜 会 堂

宋进士徐寿朋

巧运风斤若化成，过门车马每留行。吞含气象归平陇，斗凑  
溪山到画楹。春借杏桃红照耀，晓披烟霭碧低横。使麾映日安牙  
队，依约当年细柳营。

白 云 堂

管师复

入寺层层百级梯，新堂更与白云齐。平观碧落星辰近，俯见  
红尘世界低。

九 日 亭

宋县令袁正规

峥嵘栋宇压巍峨，九日游人自在过。凤翅冈高围海国，龙鳞  
松古蘸烟萝。齐山景色知难比？彭泽风光几倍多。每上醉来开口

笑，幽香无奈菊花何。

又

前 人

不愧嘉名取次题，寓情仿佛古人齐。菊添细蕊金英重，松覆深幽盖影低。上戴星辰全咫尺，旁缠日月自东西。宜将斗酒频相属，清节从来到此迷。

又

宋进士邑人张子厚

九日亭成气象高，宰君乘兴几回过。山怜峻极凌霄汉。路爱幽深入薜萝。长恐泛杯篱菊少，不愁落帽海风多。香醪正熟芳时节，对此年年奈醉何！

又

宋进士邑人林 通

危顶裁成九日亭，蓬瀛透出海峰青。满前细菊浮樽酒，四顾凝云簇画屏。月为情多良夜至，人贪景胜醉魂醒。风流令尹江山主，此乐同民德已馨。

海 云 窟

元石道远

凿破云堆置石床，空濛一窍海天长。袈裟坐湿朝朝雨，几阅人间甲第荒。

<

紫 阳 楼

明县令王遵道

闾闾丛中耸道家，紫阳楼阁蔼烟霞。来游自是多风景，临眺  
休思感物华。谷口晴云微带雨，涧边春水尽流花。伊予得遂留题  
兴，揭素挥毫墨染鸦。

### 见山堂

明参政邑人陈毓贤

堂开山见留名古，今日开堂又见山。渔隐石田留古迹，见山  
见字喜开颜。

### 阜南楼

明知府邑人李叔玉

层楼栋宇俨翬飞，南望群峰耸翠微。风月双清诗景豁，江山  
一览画屏围。彩衣共祝萱花寿，华扁仍题棣萼辉。此日登临无限  
趣，高吟长忆谢元晖。

### 竹所居

任彦杰

君爱淇园茝，幽居数百竿。清秋风玉振，凉夜露珠团。翠色  
归书润，浓阴入座寒。七贤题品处，高兴寄云端。

### 梅轩

明知县潘 府

四十无闻向五旬，依然天地一闲身。林间黄鸟谁知已？江上  
青山鲜识人。古梅照月寒香淡，官柳笼烟暗绿新。寰海英雄多落  
魄，狂生未许浪悲春。

又

前 人

浪游江汉八千里，处处春风诗满船。日暮青山迎远道，雨余新水涨平川。终古是非三史外，半生怀抱一灯前。知心喜有梅轩月，午夜清光闽海天。

## 首 石 山 诗

明知县王 涣

巍巍高哉首石山，突然秀出群峰表，六平以下皆俯迎，双江西来自环绕。穹宇空青近可摩，沧溟浑噩遥惟渺，云际难为华岳高，眼前只觉邱陵小。乃知钟秀非偶然，鸣时端为魁元兆。我来登览问山灵，此去瀛洲路多少？须臾心旷神怡，拂拭苍崖坐芳草，掀髯喟尔发清啸，万斛尘怀尽倾倒。便欲乘风跨紫鸾，飘飘直上蓬来岛。拟探月窟蹑天根，笑看乾坤几时老。

## 芝 山 诗

明李 骐

东山六曲屏峰下，祇树深沉旧兰若，施食台前芝草香，繡经席上甘泉泻。我昔逃禅于此山，上人飞锡上方还，香床说法天花落，丈室悬灯水月闲。謁来精舍东溪里，垂帷永日闻流水，四壁烟萝雨外青，六时钟梵云中起。盍簪乘暇更登临？共爱云堂花木深，莫道空门俱是幻，片时清静即禅心。

## 小 有 天 诗

高 棟

闽关西来入紫冥，三山东走浮大瀛，回峰际海结飞翠，玉削

青天开六平。六平崢嶸何壮哉，六平芙蓉如掌开，九华五老让光彩，三峰二室争崔嵬。我疑十洲仙岛负奇胜，巨鳌别驾移蓬莱。紫微文笔左右立，龟麟太常前后揖，马江一道泻空回，鹤岭千重决云入，荣光佳气郁阗阗，鳞次参差万家邑。何年作邑此山阿？此地繁华竟若何，窈窕千门桃与李，春风百里满弦歌。吴航渡口花如雾，首石云飞带宫树，漏鼓长随般若钟，仙舟尽入瀛洲路。人物风流几废兴，江山陈迹古今情，茫茫天地四方宇，浩浩乾坤一草亭。君不见，六平山上月，昔照六平山下人，六平山色长不改，明月照人今几春？我向今人问千古，今日吴航古邹鲁。黄童聚舞皓叟歌，共道贤入宰吾土。郎官政静心自闲，爱人爱物并爱山，兴来携我二三子，登高远望穷跻攀。我生放浪在林藪，幸际明时将白首，县官有德不忍欺，帝力无为我何有？日陪鞍马纵遐观。吊古兴怀但呼酒。酒酣再拜献长谣，先祝尧天万岁寿，然后记公事业在崢嶸，名与六平之山长不朽。

### 小有天歌

明王 恭

海上群峰屹相向，六平秀出群峰上，绝巘飞泉挂薛萝，遥天落日开平嶂。华顶云归见大荒，鸿濛元气带沧桑，清辉迢递近观德，空翠依微接太常。百里人家花外静，数椽僧舍竹边凉。石林萝径行入少，药院茅亭绝纷扰，远涧秋声鹤梦寒，遥岩夜月猿声小。黉宫才子日登临，踏阁攀林契赏清，兴来挥洒兰亭笔，柿叶淋漓醉墨深。谷口骊驹动行色，送君远赴金门客，功成早赋归去来，重拂横琴苔上石。

### 龙角峰诗

明王 恭



六龙头角屹中天，鳌极翻疑出海边。颌下探珠无俗客，毫端题句有名贤。春来雨洒溪流急，秋去云开石洞连。为爱临川遗笔在，剡苔细辨不知年。

### 灵 峰 寺

明邑人参政陈毓贤

山色春浓草色低，野情诗句向僧题。虽然未解三生会，且对晴云日未西。

又

前 人

岩下疏钟向晚催，逍遥云寺饮残杯。南游古洞春光满，东望高亭海水廻。冠履喜逢三老会，袈裟新着一僧陪。天风似约清前路，快我登临此一来。

### 灵 峰 寺 歌 在十九都

蒋之奇

我来灵峰望沧海，夜半起坐望海亭，沉沉水面正阴黑，六龙衔日犹未平。须臾暘谷光气发，五色变怪不可名，洪涛汹涌九鼎沸，蛟虺伏匿鱼龙惊。金鸦腾翥若木末，烟消雾散天下明。狂风喧脰簸巨浪，犹似百面雷鼓鸣，崩腾荡沃倾五岳，鳞鬣磨碎鲸与鹏。嵒岷忽骇陵谷变，雪山千仞天际横，飘飘番舶随上下，出没仅若水上萍。忽然风霁万籁息，金斗熨贴一练平。碧波湛湛千万顷，参错岛屿如杯罍。三江五湖亦甚大，视此乃类蹄中泓。琉球佛齐日本国，隐隐微见烟林青，三山历历亦可数，突兀下有鳌头撑。惜哉秦王不到此，劳心徒欲求长生。我虽流落江海上，独此寄寓亦可矜，行当结茅练金液，以待九转灵丹成。仙飞羽化会有

日，直跨三岛梯青暝，他年故人或相问，请来访我於蓬瀛。

### 筹 峰 歌

明王 恭

海上群峰一峰别，群山向下如邱垤，云开华顶见琉球，天尽沧波带吴越。元气鸿濛湿不飞，凉霜五月袭人衣，迴飞林鸟空青外，始识筹峰天下稀。石林阴洞何冥密？万籁秋声散秋色，南涧飞泉鹤梦清，太阴积雨龙髯白，我闻仲蒙子，云卧清晖里，一旦金马门，名高此山水。忆昨仲蒙骂贼时，悠悠往事亦堪悲，支离一代忠臣义，感激千秋达士知。郎官作县先名节，独访遗踪吊前烈。载酒惟浇石上苔，回鞭不醉山中月。东山歌酒兰亭笔，疏散当年竟何益？愿君遗爱比桐乡，功名纪在筹岩石。

### 晦 翁 岩 歌

郑世威

吾闻昆仑统元气，磅礴淳腴时间值，人参其间为三才，浩然之气一而已。君不见，武夷之山高插天，九曲下注剑潭万仞渊，扶舆绮靡多奇怪，潭有飞龙山有仙。剑潭一泻倏千里，汇人马江波涛涌天起。武夷矗矗无数峰，奔进东来作南纪。卓哉千载紫阳翁，避地吴航振奇踪，四子依归杏林雨，三春歌咏舞雩风。指南夷犹倡绝学，海邦翁尔宗濂洛，参天一气薄星辰，应地无疆奠河岳。龙峰高兮天尺五，读书处兮墨迹卓今古，当年大道照容光，遮莫轻阴翳层宇。虽然消息盈虚任去留，浩然之气直与造物游，驾言从之道伊迓，请君濯足登高邱。

### 晦 翁 岩 诗

郑 宪

仙旌九日访层巅，岩上黄花散晚妍。云卷松风廻石洞，霞明  
岛日丽江天。秋来宋玉偏能赋，老去扬雄独草玄，幽赏久乖纓弁  
后，碧山回首忆他年。

又

陈国枢

宋室名贤此考槃，清明约客共弹冠。交游叠翠迷行径，卓石  
当空拥坐坛。海角自来天气肃，春深犹带晚风寒。永和胜事频虚  
度，得至能无竟日看？

### 晦翁岩读书处歌

高 棟

岩下春色深，客心自兹旷，玩奇不知遥，青山郁相向。溪声  
送行衣，空翠引闲杖，洞门倚天开，苔径缘云上，松际真境豁，石  
林争异状，稍知仙趣深，孰谓此身妄。东崖极眺听，晚色分遥望，  
双镜落澄湖，孤帆入冥涨。萧然微雨来，爽气横叠嶂。笑挥紫霞  
杯，醉和白云唱。兹赏吾道存，良游保闲放，愿割区中缘，烟霞  
许相傍。

### 晦翁岩读书处

明邑人光禄寺丞郑 宪

曲径萦危石，重岩隐小亭。谷虚风浩浩，江迴日冥冥。古树  
凋寒幕，晴峰丽晚屏。昔贤廻逸驾，千载仰仪型。

### 云 洞在十三都

邑人蒋奕芳

白云古道绕高峰，翠色山前已数重。杖屨独行随去住，袈裟

相见且从容。岩飞晓瀑千层雪，树吼秋风万壑钟。欲访将军栖隐迹，留题多被紫苔封。

## 其二

香岩窈窕俯千峰，虚洞时闻下界钟。风磴昼晴藏虎豹，雷湫春雨挟蛟龙。崖云覆草青遥断，村树环江翠几重。对此杳然忘世虑，拟随飞锡未能从。

## 归云洞

在十九都

邑人梁澄漪

天作灵峰十二奇，此中风景最相宜。龙归犹带云来湿，狮伏频瞻月上迟。禁约难疏陶令酒，推敲谁辨贾僧诗？班荆久坐情何逸，风落岩花了不知。

## 梅江谣

高棟

六月登玉京，炎蒸欺人不可行。侧闻梅江水，寒冰玉壶只如此。梅江之水千丈深，人言此水值千金，未必称人意，我独爱之清尘襟。皆山樵人造我语，相携寻幽指何许，尘心飞度象潮云，水阔天长未言苦。青眼故人如白鸥，招邀待我黄沙头。采秀探奇入灵境，上攀龙峰最高顶。龙峰绝顶窥蓬瀛，登高望远形神清，大江茫茫泻溟涨，元气浩浩无虚盈，飞涛一发雪花白，遥山数点琉球青。欹帆侧舵凌空阔，历乱中流棹歌发，居人云水弄生涯，撒网抛纶到穷发。君不见，龙峰山阳五百家，龙峰市上半鱼虾。儒生不学老农稼，青门多种故侯瓜。三尺儿童诵诗礼，向余亦指长风沙。一严兵备限荒服，百雉孤城镇海涯。孤城独戍扬威武，岛夷蛮胡窜如鼠，清秋幕府偃旌旗，白日辕门卧貔虎。如此承平百

事无，江山秋水待吾徒。诸贤倾倒平生意，琼杯绮席来相娱。我爱江山对君酌，江山笑我醉猿鹤，从来心事恋烟霞，渐老谁知愧林壑。今年向君倾绿尊，千觞不断别离魂，临歧挥手谢知己，飞心骋目瞻天门。兴为梅江谣，醉别梅江去，他年此地濯尘缨，忆得西城别君处。

### 答梅江谣

王 恭

梅江水，流浩浩，居人尽说梅江好。自从梅江筑城池，使车络绎无昏早。梅江水，深复深，行人一见怀千金。父老平生爱江水，日饮一石无贪心。青萝盘盘数峰色，凭登望见扶桑白，蜃气朝凝蛟女宫，珠光夜照天吴宅。居人生少依江皋，架屋梯岩结构牢。沙鸥不肯逢机事，江叟何尝识县曹。峨峨百雉连山郭，岛夷清宁无剽掠，将门子弟解逢迎，大姓儿郎谈礼乐。有时江上渔歌发，捩舵抽篷向空阔，踟蹰竹簍紫蟹肥，拨刺金盘素鳞活。龙门子，何处来？向予西指凤凰台，京行此别三千里，畅饮应须数百杯。谢公好为苍生起，山中猿鹤徒为尔，到日江淮有鲤鱼，尺书先寄梅江水。

### 荔枝歌

郑世威

胜画名果何处来？六都殊品闽中希，总是地灵大英特，储精生色偏绝奇。岂知今日馈送广，翻使肥甘作苦悲。春汛此离劳草草，旱疫为灾百枯槁，冤哉崇物独荣华，转输官府承奉好，晨炊无米吏拍门，东催西讨送司道。劬勩戎马漏孔多，涓流不塞成江河，鬻儿供应已云极，设复滥觞无已将若何？司道台高隔千里，那得悬知民痛痍。民痛痍，多饿殍，侧望循良少舒啸。常德之龙琰，



东莞何应和，恤管赈饥恒悄悄。镇守需采屡空回，闽落晏如无勾扰。呜乎！安得贤牧长若渠，坐令凋边皆欢娱，白叟只今称卓鲁，何如一骑笑须臾。君不见，滇中石，广南珠，何时灭？天壤俱，作俑者谁？千古万古长叹吁！

### 西石岩九老图 在二十一都

林 恕

西石岩千仞，幽含万象并，泉从银汉落，石傍紫霞生。诸老神仙侣，前身洛社英，乾坤留胜览，湖海豁闲情。白发寻行乐，红尘谢俗萦，烟霞三岛迥，风月九霄清。吟弄诗盈帙，流连酒满觥。东山携短屐，南极萃长精，松下琴三叠，花间鸟数声。春愁消碧涧，秋兴动沧溟。洗耳冰壶冷，澄心石镜明。庭虚无客到，洞暖有芝荣。玩易临流坐，看山倚杖行。意随鱼鸟静，身共水云轻，采药猿相引，濯缨鸥不惊。放怀天地窄，鼓腹泰阶平。世虑忘耕凿，生涯尽醉醒。漫寻茅岫诀，已作葛天氓。小子惭迂拙，高风仰老成。鹿门怀旧隐，蜗角愧浮名。身世邯郸枕，韶华逆旅程，愿辞霄汉路，归受圯桥盟。

### 赋适安堂题于方壶所寄画诗 在二都

陈 亮

小隐翻成大隐媒，终南捷径共蓬莱，君家草堂独潇洒，半占峰南松际开。草堂松际秋声里，四壁清晖映鸟几，卷幔朝眠日出高，野鹤孤云只如此。孤云野鹤澹忘形，赢得邱园养性灵，飞腾未应郎官宿，嘉遁犹当处士星。吟诗作画多闲放，心迹悠悠古人上，玩宇天空豁远怀，啸台夜雪闻清响。王门记室旧交情，国子先生若弟兄，清时共遂鸛鸾志，白头谁同鸥鹭盟？顾余别是沧洲客，蓬蒿相逢即相得，对酒龙门月色秋，放歌鸡屿潮头白。壶邱

仙墨思纷纷，千里神交寄树云，坐卧草堂时见画，知君不羨北山文。

### 仙人峰

明邑人按察使林 恕

鹞峰攒翠锁烟萝，绛节曾闻向此过。云峤尚留岩畔迹，洞箫犹忆月中歌。松翻翠盖蟠虬壑，水满银塘隐鹭篙。我欲骑鲸东海去，一竿长钓白鸥波。

### 游朝元观

陈 省

仙人绛节昔朝天，观号朝元驻列仙。读史诸公分太乙，科名先后故蝉联。

### 秀 峰

陈 省

昨夜探奇到上方，焚香朝拜礼空王。地多山气常飞雾，天为春寒每降霜。树里流泉侵曲径，峰头秀色护禅房。人间何处无檀越，大殿休教草色荒。

### 董 峰

前 人

董奉有奇术，炼药栖此巖。至今显灵异，仿佛来神仙。神仙我观之，散发颜少年。迎我执我手，与我茅君论。伊余有独诀，无欲寤自然。

石人峰

陈省

谷城事已遐，望夫石何有？爰此危峰奇，独立在高埠。日影照不移，溪流任飞走，旁有白云汀，闲鸥时相友。春秋几代谢，山中不渝守，所以泉石人，千秋期不朽。欲来巢云松，石耶永为偶。

破石潭

陈省

汲女蛟吞入水深，雷轰尸出见天心。相传阅历年如许，灵气犹存会作霖。

搏纱潭

前人

管窥蠡测海天难，底事投纱欲测潭？遂使潜龙惊欲起，至今烟雾出弥漫。

苏老涧

前人

时光迅望舒，灵曜疾羲御，所以耽游人，夜行秉烛炬。邈哉苏才翁，公余觅佳处，风尘不足娱，来作烟霞侣。涧谷有幽光，刻画见才谔。水决寺已颓，潭空龙亦死，独兹苏老名，千秋传不已。

龟宿山

宋县令闵希声

在昔庵居少客过，于今宏构敞烟萝。夜堂月满尘心涤，朝饌兰薰法味和。岩鸟好声时格磔，庭花芳意任婆娑。山川信美非吾

土，添得乡怀一倍多。

### 桃 源 洞

明邑人太仆卿陈文沛

路入桃源小有天，桃花流水绕平川。沙堤曩日曾行相，岩筑当年起梦贤。一径夕阳飞鸟尽，三台石阙古藤牵。扪萝欲竟烟霞际，沧海明蟾到客边。

又

前 人

一勺泉源下九天，平分芳润满晴川。青云唤过担秋客，丹嶂应高起凤贤。浴日才华经济外，濯缨心事薜萝牵。共移坐处红尘净，明月清风对酒边。

### 三 台 石

前 人

巍峰叠嶂迫穹冥，风气滃葱久孕灵。千载生贤夸骏岳，三台列石动文星。沙堤镇月双流合，瓢窟收云数竹青。甲第英才符泰运，雍容风雅步周庭。

### 石 船

前 人

八月星槎天际空，崇冈何处下艨艟？秋风不作张骞兴，陆地难为鼻老雄。欲炼云根登墨客，先梳石发觅仙踪。相逢携手登临处，万里乾坤一啸中。

豸 石

陈 省

一自雷轰豸角残，居然峰迥贵人冠。须知天意期英哲，莫负簪纓世代看。

三 溪

明邑人陈文沛

岩扉白昼掩，杖屦到来稀。精舍临三峡，花丛坐六时。话宾壶里月，拨闷局中棋。九德劳相忆，松云系梦思。

五 峰 山

广文陈国枢

五峰之秀董峰来，一曲逶迤宝殿开。牛卧山头犹未觉，龙归天上竟无回。东流不尽前朝恨，西望空悬百丈嵬。佛母留题疑信半，看看渐已扫莓苔。

朝 阳 石

前 人

名德何年遁此间？高僧为主破愁颜。道心寂静朝而暮，世路崎岖去复还。望海眼宽穷隐岛，朝阳手勒寄兹山。经今无数登临者，共坐班荆笑佞奸。

纱 帽 山

陈 省

吾家古槐上，峦嶽纷如绮，开门见悠然，兹峰独雄峙。纱帽何所云？山形迥相似。吾已谢簪纓，留以待来祀。



## 鼎 山

户科给事林正亨

祉山东嶂海门开，遥映湖头一鼎台。物象九州穷魍魎，天成五位卜盐梅。不妨蓬岛虚丹灶，为笑汾阳祀泰台。传器永存御国镇，更余王气铸卿材。

## 灵 峰 龙 龕

明高继文

名峰佳境出尘寰，大老寻真爱此山。景物胜如三岛外，乾坤长在一壶间。瑶池座满仙频会，宝刹禅空云自还。醉后陶然忘世虑，高风能有几人攀？

## 灵 峰 归 云 洞

宋县丞曹元振

石洞阴阴瑶草垂，灵师移锡致云飞。云心莫道全无着，应解从师去复归。

## 龙 东 旭 日 梅花八景

王自闻

龙台吹角五更寒，唤醒千家夜色阑。霎尔烛龙升海上，东方杲杲透长安。

## 鸡 屿 晡 霞

沧浪渺渺海门宽，独障中流既倒澜。最好彤霞迎晚照，时逢仙子撷来餐。

斗 壶 远 舶

台隍迢递枕华夷，一望天高海日卑。虽道献琛成岁事，莫教楼橹懈舟师。

棋 陇 群 樵

一枰棋局着山隈，漫说烂柯古事稀。惹得朝朝樵子采，担头挑尽白云归。

浪 台 月 影

鲸海无尘四野开，狼峰久冷百年灰。夜深月浸寒潭里，倒影共猜作镜台。

石 鼓 潮 声

生成石鼓卧山阿，万顷长江别有沓。夜半秋涛冲作响，诗人错起赋饶歌。

马 嘶 飞 雪

白石逶迤拱翠微，瓜田花发更芳菲。马蹄一踏西风猛，满地吹沙作雪飞。

虎 穴 号 风

紫崎片片插芙蓉，面对晴山爽气浓。五虎浮江留穴在，时疑风起会云龙。

贺 雨

前邑令张学举

邑西北首石山，于封内为最高，云兴辄雨。戊辰春夏继旱，祷雨于山下郭公祠，甘霖大沛。前三日，祷三溪之天龙井，焚牒已，山后即作雨势，归輿尽濡。为长民幸神颺之厚，仿白香山作贺雨诗，以纪其事。

首石岚重雨意生，首石云罨雨脚平。八月不雨愁下民，神功抑此骄阳横。天龙之井龙气并，金蛇迅掣雷车轰，倒卷南溟虚空盈，高陇下田飞流争。早禾尽苏番薯萌，占年不误良农耕。汾阳遗迹东城闾，荡扫海氛来南征，千秋庙食祀事明，谁欤议裁殊硜硜。鬃予祈祷奠两楹，立竿见影通精诚，山川有神斯效灵，致祭封内心怦怦。民食为天垂先型，黄收转瞬万宝成。夫差战舰问水滨，牙樯锦纜千花萦，金闾麋鹿游榛荆，吴航空复传佳名。数告有年不避兵，长乐之乐无与伦。巍科高掇邦人紫，首石能作隆隆声，何若时暘时雨灾沴泯，岁稔人和讼庭清？吾以长谣代其鸣。

### 县试示勉诸生

前 人

簿尘暂拂试群英，颯颯传来角艺声。残暑顿祛连日雨，新秋初放一天晴。搏鹏莫道云程远，识骏难夸老眼明。丹桂几枝杏十里，行看首石应时鸣。

壶京潮激接蓬莱，并助言泉倒笔来。作赋久闲横槊手，校文待获挾天才。涛春夜枕茶频熟，烛尽风廊漏屡催。攻苦廿年成俗吏，一逢锁院一徘徊。

闽会南来文献邦，下车早已访冠裳。振靡亟返民风古，式俗先从上气强。天爵修为争假借，人纲肩荷岂寻常？儒先真际声华选，歧路中间自付量。

文章穹妙孰为先？养气工夫透性天。史括经囊非漫尔，句奇字险总徒然。赴机猛拟千钧弩，构局精如万选钱。不独荣名预科

级，名山大业有人传。

闽学源流诗十首其九

前 人

七十子而后理学晦而不明，濂、洛、关、闽独得其宗，乃龟山崛起，负道南之目，朱子集厥大成，彬彬乎闽学称尤盛也。余官于闽，岁且久，历考遗迹，或拜其祠宇下。窃幸近其居，溯源寻流，拟古诗若干首，以识景仰之忧云。

直卿有益人，思坚而志苦。馆甥谊特肫，斯道心早许。理学有源流，汇委功良巨。病革授遗书，珍重叮咛语。传薪谨师承，糟粕在训诂。历官著循声，无过取怀与。易名固积口，勉斋自千古。

彭节妇为陈信甫妻作

县令贺世骏

绾结同心忽断时，一腔碧血有谁知？秋风飒飒凌衰草，夜月溶溶照素丝。马鬣新营先子兆，熊丸兼作藐孤师。于今兰桂腾芳远，捧得纶音报母慈。

秦节妇为陈一文妻作

沈 荃华亭人

三山多淑气，南雅接芳型。百折存孤绪，重泉慰一经。泛舟心共矢，画获事堪铭。此日溪湄畔，涓涓不忍听。

前 题

汪 琬长洲人

络秀持门户，能齐孟母芳。柏舟成苦节，萱草挺严霜。南雅先人宅，皆山处士庄。百年慈训在，遗泽迥难忘。

## 前 题

尤 侗 长洲人

络秀家原贵，陶婴节倍难。伤心题燕缕，忍死和熊丸。绰楔门旌盛，松楸战角寒。孤儿千里外，流涕望郎官。

## 前 题

宋 琬

灯前清泪忽潸潸，滴向三山《烈女篇》。江汜甫归何日悔，室家未有善为怜。百城坚守先人泽，累卵图存傍墓田。闾閻忠贞原不易，中兴南雅是凌烟。

## 前 题

张玉裁

有客从南来，授我书一帙，长跪发锦函，芳香满幽室。皎皎秦孺人，矢心凛冰蘖。当年事箕帚，贞静辞专席。夫子感沉疴，悲摧将永诀，啮指誓相从，泉台看咫尺。伤彼藐诸孤，谁为抚成立？九死良非难，承桃计安适？綦绌处穗帙，残灯照永夕。旧物怜青毡，遗遍存手泽。鸣杼间呷唔，丸熊与画荻。辛勤三十年，霜操坚金石。只今兰笥中，藏血淋漓碧。愿起怀清台，贞珉铲奇迹。

## 前 题

携李曹 溶

弃藏手泽复何如？断指存田计不疏。月冷兰房笋可辟，霜飞蕙帐荻堪书。只知一德凌冰雪，犹使双孤集令誉。宝婺至今光彻夜，好留正气贯蟾蜍。



## 挽林贞女为蔚夏仲女淑奴作

郑 愈

多病鸾分镜，千秋女史香。怀贞根至性，遗语断柔肠。截鼻真何事？完名亦有方。自怜身苇叶，白骨总归黄。

## 前 题

潘文望邑人

夫死天崩并地坼，奋袂扬眉诩壮烈，猛然径造夫婿门，投缳蹈刃多激切。亦有抗节守夫家，髣髴我特志靡他。操持甘苦经百折，空闺闻寂却纷华。何如林氏女名淑，孔雀屏开谁中目？勉斋贤裔青山黄，早把红丝双系足。黄郎弱冠壮文章，健翻凌云志激昂，才尤每被造物忌，未谐伉俪游帝乡。林女闻讣肝胆裂，玉瓶易坠簪易折，矢死丹心早自盟，未忍扬言频忍泣。强留食息向人间，夜雨秋风血泪寒，独旦望夫已化石，吞声洒竹欲成斑。失天此恨何终极，花不成春月掩色，怱怱米水漫沾牙，终向泉台成比翼。从夫本是寻常事，何必轰烈震天地？视死如归性所甘，不须激烈蹈白刃。只拚一命报夫君，病息奄奄只自焚，捐生政不戕遗体，已从地下佐修文。要知贞女一年心，柔肠暗断泪暗倾，填海枉频精卫力，招魂空托杜鹃声。殉烈守节较难易，只是闲常争血气，似兹一意彻初终，不立异处真大异。生前许字死得归，玉无微玷璧无亏，名流不着粗豪气，长为巾帼树芳徽。

## 前 题

陈九鼎邑人

从夫矢志羨从容，引决无难瞬息中。百计慰留非女志，千秋节义绍宗风。青山如见颦眉黛，银汉应添泣泪红，不泯丹诚谁识

得？化为云气薄苍穹。

### 前 题

陈逢泰邑人

桃夭方待赋，忽恸所天徂。夫面只形梦，妾心若合符。讵闻肠欲断，泪滴眼几枯。缟素归同穴，精英两不孤。

### 赠李邑侯

叶起沈邑人

文章事业竟相符，暂试江城困已苏。无数生全三疏抗，许多丁口一诚输。宦情不让秋云薄，归兴犹嫌鹤影孤。养重旁求知有日，好看名姓上麟图。

### 闻姚督台疏请迁民复回志喜

高干冈邑人

兵气全销古八闽，郑图徐绘入枫宸。九重封事曾三抗，南海灾畲得再新。天下先忧原有泪，苍生待命岂无因。裴公郭相昭前代，千载而今识老臣。

### 报许迁民复业颂姚督台章

前 人

圣世畴咨在海滨，袞衣久肃此元臣。帷闲方叔三千帟，掌运云台廿八文。养士有田垂学校，补天无阙到枫宸。喜今息马回澜后，草昧重开万井新。

### 鹤 岭

张学举

于役来何数，寒暄候已分。西风振高树，落叶趁孤云。海逼鱼盐隐，人稠牒诉纷。昏鸦归去急，前路欲成群。

### 三 溪 道 中

张学举

山抱平洋水绕田，晚禾初刈薄寒天。丰年有象吾能绘，一带村场万灶烟。

霜后山容不带岚，丹枫如火映黄柑。曾于赤日祈甘到，未得无情过石潭。天龙井灵应，今年四月祈雨辄沛。

### 游 天 王 寺

行人司郑纯礼邑人

远公精舍傍溪山，一篆炉烟晓梦间。但有投林联白社，不妨漉酒狎黄冠。徘徊云影长江静，下上鸦声古木寒。识得浮生谁共证？好将藜杖叩禅关。

### 首 石 凝 云

吴航十二景

邑令贺世骏

片石嶙峋势插天，五云开处首昂然。岚光隐隐通霄露，翠盖亭亭袅瑞烟。旗鼓分张遥点额，郎官卓立近齐肩。山鸣自昔征灵异，蕞郁还看毓后贤。

### 壶 江 泛 月

壶江潏潏漾晴波，乘月溯流趣转多。一派清辉横素练，片帆烟景接明河。楼台倒浸排晶殿，岛屿环开列彩娥。夜静风恬谁鼓棹？铿锵仿佛奏云和。

### 龙潭晓瀑

潭云潏潏覆天梯，一道湘帘挂碧溪。势猛欲翻平陆起，声高直压怒潮低。迎风飞沫疑珠落，映旭流光耀眼迷。劈断青山分翠白，茫茫贯日讶垂霓。

### 寒岩晚钟

寒岩潇洒倚郊西，傍晚钟声出古提，逸响随风环首石，洪音度水静金鸡。噌吰催却阳乌落，鞞鞞敲残玉兔低，料得禅心清似此，无劳棒喝醒沉迷。

### 五峰岚横

谁遣巨灵凿混沌？五峰矗立峙苍穹。翠微断处云根合，碧落涵来练影通。雨霁霞光浮叠岫，风高瑞色淡遥空。参差入望阴晴异，指点青青缥缈中。

### 七岩星绕

西南遥插一峰青，七窍玲珑象列星。旁侍郎官罗组绶，中涵牛斗灿云屏。三山卓笔普真诰，双涧分流走迅霆。辉媚即今饶瑞气，通知地轴隐钟灵。

### 筹峰积雪

筹峰萃泽镇方安，每到寒冬雪满峦。青嶂晓开银作榜，苍岩夜静玉翻澜。浮光渐解初阳路，叠屑犹縈旧讲坛。对景却增怀古想，白云无尽思无端。

### 龙角含烟

独角峥嵘插上台，含烟疑自海飞来。紫髯半隐千山雨，铁甲如藏万壑雷。云气迷濛难觅爪，日光璀璨但留腮。棱棱已具腾空势，会见甘霖沛九垓。

### 屏 嶂 铺 霞

列嶂如屏挂望中，流霞晚罩气熊熊。斑斓五色迷苍洞，盘郁千层拥碧穹。散绮遥连江练净，腾辉斜接日华红。溪山不数吴航胜，第一曾闻品晦翁。

### 灵 峰 迎 旭

灵峰矗矗峙东南，高出群山壮观观。赤羽离天才咫尺，丹崖就日已三竿。辉回北极星初敛，晕射丛林露尚漙。一道红光笼晓翠，分明仙掌捧金盘。

### 梅 城 弄 笛

梅花丛里斗城悬，傍水依山面面妍。长笛一声倚画阁，清音几曲入云天。兴来掩抑情何极？吹到悠扬怨亦捐。最喜月明风静候，楼中有句忆青莲。

### 御 国 归 帆

御国峨峨控海洋，廻澜作镇引归航。南连交广分蛮徼，北接温台萃井疆。云外空濛容去鹧，岛门终古任停舫。就中什袭饶珍异，半是殊方效享王。

### 南 陵 纪 事

贺世骏

兴草原予责，经营岂惮劳。有怀惭利济，无念不民膏。瞻彼



邑南坝，昔建璞石间，引泉归阡陌，障海作防闲。迨及前明时，缙绅复筑之，仙桥留旧迹，民赖以耘耔。国朝有卫令，来当湮没余，鸠工拓故址，发帑奠荒墟。诂意历年久，沧桑几变迁，屡兴还屡废，依然淥成川。下湿多忧涝，平畴乏鲜原，咸以斗门圯，桔槔不胜烦。岁当丁与戊，忧旱心如惓。村村皆蒿目，民命几难堪。余每驱车至，目击心为瘁，欲挽东海波，仓猝未能致。迂延年复年，进众谋其始，浮议尚纷纷，惟余不敢避。基则扩其旧，工惟固且坚，溪水萦如带，廻环尽涌泉，自是六村地，斥鹵皆良田。繫惟昔司牧，事事为民福，不见白公渠，至今犹尸祝。又如钱塘堤，负郭亘虹霓，廻澜作砥柱，无能害我畦。愧余远不逮，焦思凡几载，今虽幸观成，民力已云殆。睹兹水悠悠，转增我绸缪，昔日曾如此，今朝胡不留？以此怀慷慨，聊尔载歌讴。

爱日堂为陈全母作

杨荣

高堂有慈母，蚤岁失所天，茕茕抚遗孤，辛苦人共怜。孤年日已长，笃志勤简编，蜚声列科目，接武瀛洲仙。沾此禄养荣，彩服何翩跹，芝兰与玉树，满眼罗曾元。爱日有余欢，丝竹喧绮筵。悠哉桑榆暮，永矣乐长年。

前题

曾荣

鹤发慈颜禄养优，贤郎文采动瀛洲。遥传仙母供桃实，又报诗人咏《柏舟》。爱日金尊娱暮景，承家玉树照清秋。不须更问瑶池事，已是人间第一流。

## 前 题

金幼孜

白璧易为玷，寡居少完节，宛宛令母仪，娟娟抱幽洁。二十失所天，中道遭舛讎，秉心靡他适，誓语弗回折。高堂何巍巍？翠柏凌霜雪，遐龄介眉寿，暮景耀黄发。有子足侍养，有孙足娱悦，堂前彩衣舞，堂上旨甘列。懿德及乡间，清风敦闾闾，载诵《柏舟》诗，永言播贞烈。

## 前 题

明侍讲学士沈 度

阿母期颐鹤发新，贞心堪拟孟柯亲。乔松偃蹇风霜暮，萱草涵濡雨露春。封诰定看颁彩凤，阶庭今见出祥麟。百年节操同金石，余庆绵绵启后人。

## 前 题

明侍讲学士李时勉

一自归名阀，多言肃令仪。鸳衾空有梦，鸾镜忽含悲。容鬓应谁惜？坚贞只自持。矢志当皎日，不愧《柏舟》诗。清霜凌峻节，白发际明时。林笋寒犹出，堂萱晚更宜。莱衣荣玉阙，仙果进瑶池。潘岳还能赋，唯应献寿卮。

## 前 题

明给事中陈敬宗

天道岂云远？福善良有征。孰谓贤且良，而不臻寿龄？秉德谅柔素，履行完以贞，婉婉闺门中，令善难具名。神相庆弥集，齿稚颜逾頽，华发坐北堂，春言和且平。瑶水谅匪遐，永矣乐长生。

## 书杨都督梦斗忠烈

夏允彝

腥风吹沙抔毒雾，中原杀气生愁暮，三宫驾挟蒙胡尘，北望穹庐心伤仆。当时犹余将相才，楚囚对泣胡为哉？杨公统镇维扬土，虏骑骄凌城崔嵬。公独身当数百战，忠勇协力詎能变？巨蛇蜿蜒淮水倾，明堂星暗摇荒殿。金牌铁勒走如飞，贼锋焱撼天狼箭，危败不辱臣所当，长江涛怒忠魂溅。至今英烈三百年，上与日月耀苍天，魂兮应同屈胥游，我来守土为公传。村祠岁岁永歌荐，波流鱼舞悲管弦。回叹贼臣名湮灭，苍宏血碧生重泉。

郑节妇 为李铮妻作

明知县夏允彝

自分鸾枕浥珠痕，碧岭青霞何处存？不谓灵犀金案寂，宁知彩凤玉泉温？苍津有翼能填海，聚窟无枝号返魂。只得孤城终夜月，荒荒千古照君门。

郑节妇行 为陈拱辰妻作

前 人

孤雁失其雄，衔羽不敢呻，修干拂寒霜，是君百年身。辟尘来西疆，馥郁清我襟，照月沉水珠，是君百年心。肃肃素帟凉，宛宛轻云变，挟刃难独生，是君诀时面。蒺藜蔽匡床，当处泪成雨，虽处不如汝，是君诀时语。策马向东南，白皙扬清姿，回头顾阿母，是君襁中儿。日月忽已老，不知光景迁，幽处终高堂，示尔兰闾贤。

陈节妇 为逢荣妻作

前 人

君不见，霜中松，叶寒枝冷挺高峰；君不见，阶上兰，风靡芳气来无端。垂柳春禽鸣旦暮，蕊落花飞空掷度。麝烟不暖重锦衾，此时闺阁正伤心。独有郑妇贞金石，专心一意只如昔。皎皎月明高树颠，黯黯日向空庭夕，纱窗影暗镜台尘，自此流光愁不释。仰视黄鹄双翱翔，沉吟苦恨无羽翼，攀帷欲逝从夫君，顾叹婴雏复惋惜。人间伉俪各安然，尔独何为罹此厄？白发零落归山阿，寒柯风悲墓草碧。狐号兔走人踪灭，清风流照夜无致。

郑节妇 为陈奇旭妻作

前 人

重帙白发见贞姝，心是青霜秋水余。为报金闺怨孤帐，好移明月照寒襦。

妯娌双节 为吴国和妻陈氏、吴国泰妻张氏作

前 人

接叶芳阶怨落英，鹄飞黯黯各伤情。舟移独剑还秋水，匣守双珠可夜明。庾岭新枝分蕊色，荆门澄汉入江清。何时天语从容下？报尔金闺有共旌。

王节妇 为陈维扬妻作

前 人

璇闺亶幽姿，惠心淑且闲，轻云扶素质，严霜照清颜。结缡甫及笄，信誓矢河山，鸣梭露纤指，宝花铄髻鬟。愿为双黄鹄，霄汉同翱翔，何图单其翼，绮年丧所天。悲风来空房，荒草芜庭前，

隐痛昧昏旦，终朝哀涕涟。拮据能食力，破灶无沉烟，勉慰高堂心，甘旨微劳宣。脱簪营元室，同穴固所便。灼灼园中花，冬春丑复妍，翳翳冬日雪，飘飘积岁年。惟此贞亮节，兰玉并芳坚。耆齿终有涯，所垂在遗编。劈耳及断发，对此惭克全。

郑节妇为陈应济妻作

前 人

淑媛伤螿赋《柏舟》，幽闺萧索泪盈眸。披帙肠断脂痕冷，拂镜颜摧瑟韵愁。效顺蒸尝捐楚佩，承欢菽水典吴钩。管彤熠耀垂芳姓，节孝兼传古罕俦。

林烈妇为陈登妻作

前 人

颯彼鸣雁，集於中林，有雌有雄，亦附其翻。群飞相呼，其音喑喑。颯彼鸣雁，集於苞桑，爰飞爰止，而颯而颯。出林求食，投彼粟场。有雄邕邕，飞鸣出谷。有雌绥绥，岑居遵伏。彼飞孔群，我居伊独。终风暴矣，零雨其漫，维彼雄雁，三日不还。彼雌求匹，忧思杳杳，有鸟告我，宛死河干。人亦有言，维我实劳。生虞投罗，死虞饲鸠。何俾尔鞠，翼折羽瞧。愿言求尔，复尔故巢。求伊云何？于隰于原。复之伊何？曰荷而蹇。有求无复，哀哉难言。芒芒遁魂，悠悠故里，何坠之峦，何溲之湫。欲即尔居，远终莫致。瞻仰昊天，宁不遘死。

陈节妇为李宜可妻作

前 人

贤媛生芳族，温淑异凡姿，执节待伯鸾，静好谐桐丝。高堂有舅姑，莪莪待糗醢，织纴奉甘旨，寒燠得所剂。良人好游学，贾



钗供斧资，奄忽伤离鹤，只羽鸣高枝。素帙恒惨淡，痛绝情难持，  
援琴操黄鹄，中夜同哀嘶。曜灵何短促，荏苒历岁时，霜鬓叹飞蓬，  
坚贞及暮迟，苦节同陶荀，千载获声施。

### 颂贺相皋邑侯德政

前 人

巍峨瞻首石，淑气满雉桑，吴航花作县，南山郁苍苍。我侯  
鉴水英，蕊榜擅名场，烹鲜试瘠邑，经济根文章。八载励冰蘖，抚  
字劳海疆，郊原问疾苦，不避暑与霜。朗然秦镜悬，剪棘兰自芳。  
民依先水利，百室盈仓箱，滨洳禾郁郁，南陂水汤汤。焕然新圣  
域，式廓旧宫墙。延儒广厦屋，割俸资书囊，劝课分藜火，考艺  
亲丹黄。文治浚清浦，文运日以昌。锁闾频校士，骥足尽腾骧，狄  
门桃李满，邺架玳瑁装。百年邑无史，前事弛不张。侯具班马识，  
苦心重参详。天禄富奇字，龙威出秘藏，爱憎弗之恤，要使公道  
彰。从兹文献炳，百世垂纲常。侯本璠瑜质，清音发琳琅，侯本  
济川才，闽海渡慈航。安成山峯嶂，章贡水汪洋，緬维贤侯风，永  
以被吾长。

### 前 题

林调燮

长邑挥弦地，南来解阜风。务农敦政本，课士擅宗工。文武  
宫墙峻，春秋享祀隆，量才呈玉尺，作史倒书筒。湖浚膏常渥，陂  
成利靡穷。士民均戴德，岷石纪肤功。

### 贺相皋夫子

林振采

帝咨良宰莅吴航，政迹长垂邑乘光。学校教思辉泮藻，陂湖

遗泽在甘棠。两朝人物钟彝重，百里溪山翰墨香。幸附门墙邀一第，归来犹自愧荒庄。

虞廷三考报循良，卓异今看擢上方。北阙承恩新捧绶，南陔孝养慰焚黄。千家拥道攀辕切，十月跻堂献寿忙。应识圣朝多雨露，鉴湖春色属知章。

### 题掖和堂笔训为陈时夏妻作

江苏巡抚梁章钜

吾家桑梓地，江田溯乡井。余先世亦家江田，由江田入省。德邻陈氏宗，累叶书香永。族彦推常于，师门业同请，壮岁赋鹿鸣，我仲宴同领。余兄弟皆与常于同受业于孟乡贤师先，仲兄又与秋榜同年。因详内助贤，举案相箴警，经史罗心胸，脂粉气全屏，淑德佐修齐，幽闲更贞静。和鸣二十年，分飞忽悲哽，良人志未酬，空房月已冷。惓惓继述心，课子一灯影。貽谷笔鸿篇，获徽流光罔，巾幗中须眉，大义日星炳。令我展读之，寸心倍耿耿。旧雨感山邱，秋风怅暮景。愿言告佳儿，承先惟自省。

### 前 题

官太傅谥文忠林则徐

漫天风雪一灯青，检点遗编见典型。柳下盖棺谁作诔？机前画荻有传经。父书能读慈魂慰，母训长留信史馨。墓草故山霜露冷，应嗟予季尚飘零。时孺人季嗣宗华，留滞青门，捧笔训来谒寓邸。

### 前 题

光禄寺卿杨庆琛

下笔千秋著闾仪，大家才德两兼之。合教咏絮铭椒辈，帘幕春风拜女师。

频年茹蓼有谁知？帷月机灯血泪时，今日克承弓冶志，九原  
随唱笑开眉。

### 前 题

建宁举人张际亮字亨甫

同心甘载肃牛衣，风雨无情冷夕晖。天上玉楼高唱罢，人间  
画荻已流徽。

吉光义括十三经，字里行间尽典型。呜咽不堪多病日，倚奩  
把笔影伶俜。

百年一瞬可怜虫，惟有斯文寿世雄。谁似东征推作手？龙山  
争拜大家风。

青衫黄叶一灯初，展卷潜然泪满祛。我亦鲜民同弱息，十年  
风树泣皋鱼。

林茂树妻陈氏题词 姑目盲，氏同夫以舌舐姑目，

历三年，姑目复明。详通志《贤淑传》

林调梅

天眼未曾合，姑目能使开，匪惟舌是瘁，直贯以灵台。矧有  
同心人，至孝天所哀，绝胜金鐺刮，一扫银海埃。姑目后可瞑，妇  
心今未灰。寄语人间世，何天不可回？

又

王 溱

两目虽盲视不忘，子贤妇孝舌皆香。事亲只办虔诚在，绝胜  
金鐺刮眼方。

又

赵 新

姑丧其明，妇心敢安？姑明顿豁，妇力几殫。至诚感神，大孝不匮，彤管千秋，徽音靡坠。

将去忠州赋诗为别

陈春瀛原名春涛

粉墨登场鬓已斑，强支老病学邯郸。一行作吏非吾志，两字亲民愧此官。太息时艰同调少，渐更世事愜心难。生平处处惟求拙，都作催科下考看。

其 二

南宾古郡俯江湄，上接巴渝下万夔。自昔山城本篮笋，只今天堑孰藩篱？估航利尽嗷人布，僻壤风行景教碑。要辑邦交靖民气，长官煞也费维持。

其 三

可怜贴括困英雄，明诏煌煌许变通。先为《周髀》启门径，还将《齐语》傅童蒙。鹅湖弦诵闻风起，鹿野苹笙馈粢丰。更乳婴儿五百道，不防一举俸钱空。书院改课天算，学堂专肄英文，而后乡绍鹅书院膏火不敷，因捐廉倡导，集款甚巨，宾兴、育婴亦同时均有资助，受代之日，囊钱一空，亦快事也。

其 四

民怀吏畏病无能，多谢邦人万口腾。一气相通鸡伏卵，孤松无缝蠹僵冰。鞫囚愧对恒饥色，省过时如入定僧。试问瓣香何处

是？四贤阁上半龕灯。州署后四贤阁，不知何时废毁，瀛斥私钱葺之。别于阁后添筑三楹，为休息之所，名曰内讼斋。

### 游 龙 泉 寺

邑人郑 勋

闻客话龙泉，言游劳梦想，高秋风日晴，偶挈良朋往。沙行喧作声，山气澹弥爽，幽阒不可名，万虑澄俯仰。古刹虽就荒，胜地自闲敞，樵牧憩门前，谈笑成三两。僧去犹未归，闲云锁方丈，佛体无完全，山钟断清响。隔院且扣扉，花木惬心赏。老嫗解持斋，幽居亦舒畅。以此视吾人，劳逸判天壤。身世感苍凉，何年释绊鞅？临去仍徘徊，此外皆尘网。

### 卧 牛 石

前 人

秦皇鞭不行，老聃骑不去。待向石田耕，且卧云深处。

### 回 顾 虎

前 人

虽具庞然形，终抱块然质。却解听经来，有此回头日。

### 仙 冠 石

前 人

风坠仙人冠，千载化为石。骑鹤或来寻，仙头犹未白。

### 井 中 石 柱

前 人

材大难为用，既浮还复沉。空山风雨夜，时作老龙吟。



## 出米佛

前人

顽石成慈悲，出米既万斛。知否贫书生，荒斋犹划粥？

游水云洞和江田副贡陈尹孚

县令刘敦华

少本无宦情，交游昔所期，日游山水窟，笠屐尽相知。移官莅边县，绕县山翠围，极南邱壑胜，岚气引游思。迨访高贤躅，风流想见之。苍苍水云洞，苔藓秽荒基，疏泉激清响，鼓吹来君诗。君诗多寄慨，奇气胸中弥，倦言招我游，慰我渴与饥。古人俱陈迹，俯仰感今斯。凉风八九月，黄花挹露滋。好践寻山约，行随采药师，洞天二十六，选胜清秋宜。君携谢眺句，我慕陶潜辞，漫托题崖兴，任为俗子讥。

山翠南来势倍奇，龙蛇蜿蜒入云驰。天工别自开邱壑，洞石嵯岈位置宜。

自笑樗材莫擅奇，一官匏系效驱驰。廿年久与故山别，猿鹤三声惹怨宜。

## 赋

## 吴航赋

陈省

按：陈省尚有《江田》、《古槐》两赋，旧志以其词繁，难尽载，只载吴航一赋，以备文献。然两赋虽未及见，而富丽博雅，盖可想而知。

客自古槐归，告主人曰：“古槐山川形胜，洵如足下所详矣。然足下非生于古槐，而迁于吴航者乎？昔人歌绵之什矣，其辞曰：

‘民之初生，自土沮漆，歌有声矣。’其辞曰：‘作邑于丰，宅是镐京。’古槐者，固贵宗之沮漆也，吴航者，其贵宗之丰镐乎？且古槐为都鄙，吴航为邑治，详此遗彼，巩亦未备”。主人避席而言曰：“昔人赋三都，则締思十稔，赋两京，则十年乃成。予以衰老之龄，愧张、左之英，不量力而赋古槐，乘闻见以集并，虽不娴于辞，亦已惫予精，安能复执吴航之役，组绘以饫吾子之听？虽然，古槐，吾祖宗之渊源在焉，吴航，先司马之精神寄焉，敢不略陈其大观，而粗叙其一二？忆自肃皇之乙卯，岛夷煽祸于沧溟，先司马因氛侵而避地，余奉杖屨以入城。越己未而寇复至，人议徙而走郡，先司马虑先去之为民望，力殒身而独奋。躬乘城，立睥睨，散金钱，出醪糒，士夫于是同心，卒伍为之尽瘁。倭奴倏尔宵逃，金汤屹然雄视。使先司马而常在新宁，兹城几何而不坠？于航为有功，岂一家之为备？然仍僦居以栖迟，阅数岁而始考卜，结茆橐于东门，即今所居之敝屋。坐三台与芝山，亦南向于鳌麓。蕃椒条而丛芝兰，循肇基而聚族。余徼天幸于此中，驰君命于王国，既挂冠于夏门，奉甘旨于家食。每从故老而采风，纵观山川而省域。凡邑中有创造，覃捐资以助力。既补弊而鼎新，或复古而举废。以此建置之原由，风土之大势，可指掌而俱陈，不循轶而悉计。请以应子之咨諏，敢顾芜言之匪丽。”遂溯上元<sup>唐年号之初</sup>，实置兹邑之秋，由新宁而移此，据海国之上流。自武德有长乐之号，又旧呼曰吴航头。或传夫差于此而略地，<sup>旧志</sup>。或传夫差于此而造舟。<sup>新志</sup>。经史虽所不载，相传夫岂无由？元和既省<sup>元和三年，省长乐入福唐县。而再建，五年复置。</sup>天福更名<sup>晋天福间，伪闽改闽县为长乐为安昌。而旋易。次年复名长乐。</sup>宋、元凭乎旧称，皇明亦因夙昔。以其山岳，于后则六平之山，乃邑之主，连三台带首石，三台在六平左，右则首石。并巍峨而比尊，引两翼而为辅。于前则衔六鳌，瞰五马，岫岳芬苒，丰蔚广野。恍几案兮可凭，更逶迤兮高下。于左则芝山之秀，隐隐

东偏，含雉堞而蔓衍，接六平而勾连。于右则南山翠嶂，钵盂相倚，钵盂山名。阴树郁其蓊葱，浮屠屹乎高峙。又有金鸡、龟息、俱山名，在县北十里。金斗、龙台，俱山名。或崑嶙衍郁礧之脉，或屹岫起闾阖之隈，或外列都邑之保障，六平、首石俱在城外之北，六鳌、五马在城外之南，金鸡、龟息在城外之北，龙台在城外之西北，或内拱井里之奇观。芝房菌蠢其上，南山、芝山皆产芝。玉液洞出其间。于是川渎则有观音、资圣、观音溪在县东、资圣溪在县北。铁炉、九溪，俱在东门外。发源诸山之上，分注崑崙之涯。循垠隳以渚澹，激魄鬼以澌漪。有自北而入港，资圣。有经东而充潮。接滢漾兮西溉，进枝岐兮南漂。铁炉、九溪。道洄沿而衍派，势洄潏而通桥。观音溪通太平、水宁二桥入江。六平山水通下梢桥达水关入港。资圣溪通资圣、阜民桥，会下梢桥。铁炉由新桥达普照桥。乃衙里、杨、俱在西隅。又在射圃内。之井，太史、在县西金斗山下，太史周元饮此。新、在城隍庙下。又在县东二里。之泉。胥山川之余润，均民食之所关。又有河头、以下皆浦名。柿浦、官庄，以及厚德、天王，五浦在城外之西南。乃溉田之别浦，亦溜海而汪洋。其城郭则创于弘治之三载，知县潘府创。辟于嘉靖之中年。嘉靖癸丑，巡抚王忬、巡按赵孔昭请城长乐，遂发帑金万三千余缗，檄知县詹莱董其役。创则开四门东六平，西双江，南十洋，北首石。以出入，辟则加平政于西偏。西南门曰平政。又肇锡以嘉名，东曰镇海，西曰清江，南曰阳春，北曰拱极。皆令尹詹莱之亲镌。洎己未之被倭，视三晨而不鬪，倭攻城三日。故先君之死守，令保障之依然。嗣是而后，规制愈全。造敌台以爬远，知县戴时塑造。浚沟洫以漾旋。迄年久而就圯，发公帑直指刘公应龙。而肇修。予助金以陈永寿名助金四百余两，与舍地，舍近城田广三丈，纵七十余丈。亦桑梓之是谋。注于风雨者复完，凹于淤斥者再起。既增于上，又固乎趾。障隧轍轍，重轍緌之，关扃加其缜密，谯櫓壮其雄视。涂以皙饰，尤资观美。跨山麓若玉虬，连崖隳如素绮。又避犷猴以司扃钥。守城民壮二百六十名，总甲四名。聚军容，求方略，蓄盾藏礧，利铍铄。虽升平而飭备，场演武于南郊。聚民兵而阅练，排鱼鸟而鸣铙。近

海上之多警，益省卒之悍赴，苞桑弥以巩固，风雨无从漂摇。以其经纪，则邑治之署，负六平而为基，峻堂廉以出治。映山光于庭阶，入水声于厅事。库有国赋、军籍之藏，架阁库藏钱粮辔镫，库藏房藏军籍黄册。仓有际留、预备俱仓名。之异。又有义仓、东平、西平，总之皆西荒之利。义仓，大令彭哲与建，东平、西平，大令卢龙云建，予捐百石入义仓。借南山以呼嵩，祝圣道场，在南山三清殿。于县南而作泮。南山之祝圣场，向荒草之历乱。泮宫之明伦堂，亦陲陟而颓漫。予佐邑侯以经营，故极一时之壮观。猗乡贤与名宦，原并祠于胶库，缘先司马之入祀，万历辛卯，先司马入祀乡贤祠。余捐资并二祠而建宫墙。又有鬻相之圃，以观士德；在南山塔下。学租之田，以为士资。御史有巡行之台，在县治东。藩臬有居停之司。布政司在县治东，按察司在县治西。铺舍通往来之役，原在县西，大令彭哲与移於县后。公馆为行旅之依。在察院西，今改东平仓。若夫街衢，则东、西及北、十洋、城隍，俱街名。胥夷坦而弥迤，通广运之都庄。里闹纷其对出，轨躅合于周行。以上皆城内之街。河南城外之西。边江流之路，岭口城外之东。通南北之乡。其巷则后坂、大园、东贤、府埕、五通、金厝、上下太平；有太平上巷，太平下巷。湖井、以上俱县东巷。杨井，以井得名；巷内有井。上巷、在西隅之上。下巷、在西隅之下。上下殊程；高隍、衙里、绿衣以上俱县西巷。连闾，夷涂曲术，支派纵横。自崇期而分出，取歧旁以为途。尚轮囷兮难数，总东西兮两隅。县治内有东、西两隅，总六图。其桥则下槽、在县治东。永济、在县东儒学前。资圣、阜民，俱在县后。跨溪济涉，通渠控滨；太平有观音之呼，太平桥在县东，旧观音寺，今改察院，桥俗呼观音，大令蒋以忠饬太平桥于碑焉。南阳出朱明之闾；南阳桥在南门外。阳春、驯雉，建自予身，拱鳌东出，三桥并新；驯雉亦名踞鳌，与阳春皆南达鳌山，拱鳌东达鳌山，皆予自建。坞前、县治西。以上俱城外。柿浦、城外西。金斗水通，新桥、普照，俱在城外东。九溪攸同；迎春城外东，大令蒋以忠竖迎春桥碑。以迓青阳，永宁旧名潘公。在县城外西南半里，旧名奎桥，又云庵头桥。弘治辛亥知县潘府重造，改名潘公桥，隆庆六年，知县蒋以忠建亭於此，改



名永宁。己未倭来，断桥阻之，予重造皇华驻节亭。其坊显扬科第，则状元与状元而对峙，县治东状元坊，为永乐壬辰状元马铎立。县治西状元坊，为戊戌状元李骐立。榜眼在县治前，为予元从祖水乐丙戌科讳全立。并进士在十洋街，为正统乙丑进士李叔玉立，嗣毁。以峥嵘。九德在县治西。见同榜之盛，九德坊，正德丁丑进士陈良珍、郑宪、陈文沛、郑源涣、陈毓贤、庄维春、陈嘉谋、林公黼、戴玉成立。登瀛在城外西，即马江亭。表吾邑之英。登瀛坊，知县潘府建，列皇明以来科第，后屡建屡毁，隆庆三年，知县蒋以忠重建，万历二十八年，知县卢龙云重建，褒崇硕彦，则都宪、为副都御史谢士元立。绣衣、为御史陈言立。忠谏、为林公黼立。以上俱县治东，忠谏在察院前。尚书。在县治西。工部尚书林廷选立。正学因乎紫阳，在县治东察院前。大令卢龙云改激扬以正学。文化竖于郊墟。在东门外，为林坦、林埏、林堂、林章立。睹卓楔而仰止，景先哲之步趋。兴贤在县治东，今毁。期贤豪之并奋，崇正在东门文公祠前座。冀正道之弗渝。十洋在十洋街之中，蒋以忠建，累代名卿。迺于南际仁泽，十洋仁泽坊口市，相沿已久，十洋市，国初因三宝太监使海造舟於此，人众成市，马、李二状元兴焉，故瀛云：“十洋成市状元来。”今惟集於仁泽之衢。大令钟万禄竖额以诱之，冀鼎甲再见，竟不成。须文运之隆盛，占佳赞之有孚。彼列肆之苞罗，均水陆之珍错。无齧窳以相欺，不射利而高索。以其祠宇，内则有城隍之庙，在县治东。临通路，瞰清溪，面资圣溪。朱门璽宇，饌窳崇阶。伏腊充斥，灵琐祈禳，感慰民怀。余既修葺于前岁，令充拓与众偕。功于有邦者宜报，典则令甲乎可稽。汾阳庙名，水关门外。之祀令公，实为社于予里。己未倭奴来寇而攻城，青蚨由庙飞出若糠粃。倭奴见皆着红之神兵，由是销魂夺魄而撤垒。有司春秋享祀以报功，余亦增卓楔于前址。若高隍在县治西隅。与祠山，在十洋街之东南。悉明神之所止，俱降厘于生灵，故血食而不已。外则有文公之祠，考亭居于上方，四贤黄榦、陈拈、刘砥、刘砺。列於两旁。考亭昔游乎此地，四贤相从以翱翔。邑人貌像而立祠，年既久而朽磨堪伤。像已坏于风雨，屋将倾乎栋梁。予频过而心恻，三值贤侯，遂毅然而担当。郊原拥翠乎瓠瓠，烟霞隐耀乎桴枋。堂鼎新



乎崇正，阁高驻乎文昌。予亦竭蹶而效力，冀斯文之兴起腾踏而飞黄。大令彭哲与、郁文周、卢龙云相继捐资架构，因遂以落成，余亦捐助焉。其寺观，内则有天妃元宫，在西隅南山之阳。三清绀殿。在天妃宫之左，予捐百余金助建。浮屠屹于峰头，天妃宫后有南山塔，旧有寺今废。苍翠绕其四面。外则有天王之寺，旧罗列乎诸景，今倾圯而尽失，寺内旧有烟罗亭、望江亭、清心亭、乐寿台、松石峰、枕流轩，今俱废。僧构堂面焚修，隆庆四年，僧重建经堂小轩二座，予匾其额曰“天王斗刹”。近建山门，大令李奇珍助资，余亦共成其胜。名尚仍乎昔日。迤东有关王庙，资实予弟皂之所出。其登眺之所，北则有首石之顶，六平之巔，伏崆峒于目上，揽溟涨于胸前。降而下也，则有小有洞天，如有别墅。小有为予习静之小庵，如有乃儿供予之乐所。南则有予鳌山小圃，鳌顶飞楼，拟舫之轩，今废。栖隐之巢。绸牖户若蜗角，结茅茨以临流。虽未能比胜於辟疆，亦庶几逸老之菟裘。又不敢肩泌衡以专独乐，亦尝飭青衣以迓来游。其间阊则麈尾扑地，槐栢簇云。夹溪傍山，栉次鳞纷。启荒拓架，比屋连甍。剥庐之户缒猎，剧驂之尘丛骈。亦有高门当衢向，术阙拥冠裳。街联巨室，陈则有藩篱、土库，派别祖同。大园与大厝异族，国佐与新局殊宗。梅亭、上巷头、宗玉、宿菌、打银、水窟，亦名为陈。街乾、利边、墙下、连江、均是吾庐之郑。下郑、下董、上巷，靴桶，共结亢宗之盟。去声音孟。更有杨井，并为同姓。明堂、崎下、子长、铺司、虽共姓氏，实别宗枝。高厝之游，龙门高瑜甫生五子，末子景和，洪武初，赘邑东游子定女。越三世，高惟用景泰七年贡，充国学上舍生，遥授承事郎归。谱载性秉纯良，处事宽厚，为虞生时聘之祖。陈厝之柯，始因出赘，久而遂讹。仙路之李，上下之李，国元之王，虎厝之王，务西桥之王。俗呼桥王。俱盛称乎世胄，尚缉续乎书香。济济冠盖之里，郁郁文献之乡。又有迁自鹤岭，迁自湖南，迁自壶井。既胥宇之孔臧，而阙阅之遂永。先君子以迄兹，亦五世乎相延。虽不敢与昔时王、谢之家伯仲，亦庶几今日陈、郑之族后先。其下乡之路，东有石岳、岭名，达十一都、十二都、十九都、二十

都等乡。北山，岭名，达九都、十都等乡。北有鹤岭，达十三都、十四都、十五都、十六都、十七都等乡。南有龙门。岭名，达二都、三都、四都、五都等乡。躡培楼兮穿翳荟，过膏壤兮揽平原。遐阡迤陌兮坛漫，廻溪峻湍兮腾喧。或临高嶮而飞瀑界道，或俯重溟而崩浪涌奔。瓊竇祥集于仙窟，鸡犬声闻于平村。禽鱼果木之产四出，麻絮丝纆之物交蕃。其江浒之津，则有河南、埠头在河南街。新渡、二津俱往会城，俱予为舟以渡。连江马头，在县西，登瀛坊竖其上。乃吴航之旧址，古吴航头即其地。为济涉之必由。江之港曰上下，隔半野而分流。二港中隔半野山，由东而上曰上港，由西而下曰下港，上港则迎潮而出大江，下港则溯汐而出大江，俗呼上下洞。总会合乎马江，由上港则趁潮直行过马江，由下港则於港口待潮而过马江。广溟潏而四周。马头江有四达之路，东达闽安镇出大海，西由鳌头江往福州，南由西峡江往兴泉下路，北往连江。中有石兮若马，潮既回兮始浮。颺颺起而浪涌，势匍匐而喧逐。篙师揆舵而稍舛，飞舸触石而难迴。亦有中流而洪飈四发，遂致压桅而沉覆莫持。肆马江之云险，质以此之为危。倘操舟之维良，亦往来之甚夷。以其人物，则山岳之所毓，名川之所生。人大唐而肇迹，羨卓云河南人，乾宁四年及第。之儒英。赋有《未明求衣》之号，诗有《驾幸》《问善》之名。云及第作《未明求衣赋》，《驾在华州诗》，《问善如扣钟诗》。崔若愚下槽桥人，用荐举为县丞，之试邑丞，施祐东隅人，用荐举为户曹。之赞地卿，既诸科所荐举，自才卓而誉横。陈转县南人，梁开平中任潭州判官。之举于五代，判州务于潭城。又有继于此者，伟哉有宋之诸贤也。西有欧阳回，邑西人，端拱元年进士。东有王彬，邑东人，淳化三年进士。联一时之盛馥，均九列之贵臣。回官太常卿，彬官太常少卿。祖挈家於高丽，彬祖挈家奔高丽，彬负笈於成均。彬以外国生宾贡入大学。遂登第而通显，与陈良而为伦。赵冢宰赵以大字用甫，居邑东芝岩，以宗子登嘉定十年进士，官吏部尚书兼侍读。之宦绩，始发轫於吾闽。初知漳州、邵武军，奏日食于枢府，嘉熙初为枢密副都承旨，会日食，要在修德以弭之，抒忠谏而谆谆。疏定储之祖训，时国本未立，编类仁宗、高宗两朝定储本末具载诸臣谏疏，及举行次第以进，虑国本而毕陈。稽往

迹而兴慕，虽千古而如新。陈毅为大园之鼻祖，致常、致一，尤陈氏之亢宗。致一发所未发，于揆昌之同榜。百嘉应父干城之愿，生平凶盗，没出神兵，赐庙号乎忠通。嘉子千期，期子子椿，称名儒而号良牧。子诚与西山讲邹鲁之学，子愚知营道有廉吏之风。陈容之被挤於贾似道也，节于凜然风生，而二子象贤，猗欤盛哉，真匹谢庭之琼矣。陈毅，字子中，宋治平进士，历御史，愤青苗之弊，赞郑侠上《流民图》，五迁知贺州，创下榕桥。致常性至孝，父歿，结庐墓侧，累征孝廉不起，尝曰：“弟致一倘为吾皇施德惠，儿百嘉倘为吾皇树干城，吾愿毕矣。”百嘉破金师，平凶盗，死出神兵平峒寇，士民上闻，宝庆二年，敕赐忠通庙。致一子百揆、百昌同榜进士，千期为百嘉之子，师五峰，世称名儒。子椿为百嘉之孙，成进士，知英德府，号良牧。子诚官朝议大夫，赐紫金鱼袋，与真西山讲学。子愚知营道县，清操自励，卒官，囊无一钱，真西山周其归榘。陈容字公榘，端平二年进士，官至朝散大夫，为人耿挺不阿，贾似道常欲招置幕下，容辄卑侮之，出知兴化军。《图经》以宋代邑人物第一。号所翁，善画龙，世称所翁龙。子梦凤，字以仁，淳祐十年进士，官至福建都监。次子梦发，字以道，宝祐元年进士，官隆兴府通判。陈文惠名合，字维善，东隅人，淳祐四年进士。德祐中拜翰林学士，园子祭酒，工部尚书，同金枢密院事，敕谕、制册皆出其手，侂冑咸服其能，官终宣奉大夫，资政殿学士，谥文惠。之代焕丝纶也，文章灿然服众，而兄弟继美，合兄刚翁，字维嘉，宝祐元年进士，官至判院南剑州。弟谊，字维道，嘉熙四年进士，上疏养亲，授新班教授。庶几匹休，不愧河东之凤矣。陈子冲县东人，淳祐十年进士。虽登甲第，未见施为。欧阳荣县西文行坊人。累举不第。绍圣四年，因献板桥之利，赐特奏名，官太子中书。谓之特奏者，宋制举进士第，累科不中，阙贡籍已经十五举以上终场者，赐出身，谓之特奏名。以别於正奏名进士也。以建言而荷宠，陈谦厚字叔宾，河南铺人，淳熙十一年特奏。从特奏而出身。维彼邹异，字仕奇，邑中寺中坊人。行迈等夷，事亲顺志，庐墓永悲。天有甘露芝草之应，乡有经明行修之推。应元祐三年举明经行修。宾贤、文行，千古名驰，有司改其里口宾贤，坊曰文行。维天地之位既定，而太和之气以填。我太祖之兴也，明诗书於归马之后，肆懿德于櫜弓之年。开科则陈洽祖字伯礼，岭口人，洪武三年庚戌开科举人，官长洲知县。为之首，荐辟则李聪西隅人，洪武三年，以

明经荐任山西金事。擅其先。若叶允吉、西隅人，洪武四年儒士中式，授博罗县主簿。陈震、字敬修，西隅人，洪武二十年举人，官金华府教授。陈讷、字士默，东隅人，陈震同年，官德庆州知州。陈京，字叔谅，河南铺人，洪武二十六年举人，官国子监助教。或栖鸾凤于枳棘，或咏棠阴于专城，或传经于宝婺，或作人于周京。若林谷祥、吴航头人，洪武四年，以儒士荐任番禺县知县。陈宏道、西隅人，洪武十八年，以儒士荐任汤阴县知县。国佐之祖。郑焞，东隅人，洪武三十一年，以明经荐任翰林简讨。或为侍从之清臣，或为噢咻之循吏，或仿佛吴公之治平，或追踪鲁恭之卓异。即老人若郑伯高，东隅人，洪武二十四年以老人荐，任松江府知府。亦千里而为师帅。盖国初荐辟，科目并行，故英雄豪杰四出。概自文皇以来，而贤人踵武才品，当日齐高事业更仆难数。陈昌、字叔能，西隅人，由岁贡永乐九年应天礼魁第二名，官西安县教谕。土库陈鸿渐之祖。鸿渐嘉靖甲子诗魁第二名，祖孙济美。李珂，西隅人，永乐十九年贡，官贵溪县教谕。则以学谕终。池鲸、字景大，东隅人，永乐三年举人，官乐县训导。王锡，岭口人，永乐二十三年贡，官电白训导。则以司训止。刘应、字顺叔，西隅人，永乐十二年举人。郑澥、字德新，西隅人，永乐十八年举人，明堂下之祖。郑云西隅人，永乐二年贡。相比。均未任。林烜岭口人，永乐九年贡，赵府纪善。一官，相赵遂已。曹贤登第，字叔善，永乐十三年进士，官太常博士，阶惟博士。艳陈灏字季周，县西人，永乐丁酉领乡荐，官终陕西按察使，新局陈容之后。之荣陟于观察也，其一时之具美乎？冠惠文而貂珥寒心。灏为交趾道监察御史，疏劾中官奸贪置于法。总外台而豪强敛趾。灏在陕西尤以锄强剔蠹称。彼君子兮，不素餐兮，殆谓是欤？高不仕若郑文霖，字汝众，号耽犁子，邑西永宁坊人，应辟不仕。所著有《耽犁》卷，练子宁为之赋，崎下郑之祖。禄千钟而弗顾。此尧舜之巢由，夏商之卞务。有令子霖子万奎，字孔明，西隅人，宣德四年举人，官广州教授。以泄潜，遂翱翔于贤路。李孟玉、东隅人，永乐二十一年举人，官申府教授。新路李之祖。李叔玉孟玉之弟。宣德十年进士，官户部主事，员外郎，惠州府知府。之兄弟继起，郑锡文、字禹范，西隅人，弘治癸丑年进士，官广西右布政使。利边之祖。郑源涣字与聚，锡文子。正德十二年进士，官刑部主事，员外郎。谏武宗南巡，廷杖，降



运同，管高州府同知事，与先司马同僚。擢桂林府，拂衣归。之父子齐名。孟玉曳裾，有贾傅之憾；叔玉工诗，希李白之声。叔玉博学，有《梅庵集》、《梅花百咏》。锡文遭逆挡而节砺，拜南京监察御史，时逆瑾窃柄，台諫皆其私人，文引病乞归。瑾衔不附已，遂夺其官。瑾诛，起云南佥事。御寮属而法明，为云南佥事时，武弁姜奎与景东守洪陶有隙，构兵拒命，文去兵卫涉其庭，责以大义不少贷焉。清风劲节，千古如生。源涣触天威于方炽，武宗南巡，涣与邑人林公黼、陈谈疏谏，廷杖，念同志于既亡，创甚，仍匍匐为林公黼治丧。格君信友，视考有光。陈良珍字畴之，东隅人。正德十二年进士，官南京户部主事、员外郎。潘冀之祖。以高第而为郎，郑舜治字师锡，西隅人。正德十四年经魁。明堂下祖。以高魁而不寿。陈瑄、字孔璧，西隅人，宣德四年举人，官宁府长史，进阶朝列大夫，上卷头之祖。王棠字希白，东隅人。成化七年，以儒士中式，德府长史。作相于宗藩。陈希孟、字养浩，西隅人。正统三年举人，丹徒县知县。陈德成字敬夫，西隅人。天顺六年举人，官罗田县知县。河南打银之祖。为政于百里。陈澧西隅人，景泰六年贡，官楚府伴读。历官于王邦，陈仍西隅人，例贡，官济宁州学正。司教于济水。正谕则郑则隐。东隅人。嘉靖间任陈州学正。陈昊、字孟高，西隅人。宣德元年举人，官郟城县教谕。陈敦、字则礼，东隅人。宣德十年举人，官定海县教谕。陈漩、字叔源，西隅人。正统三年举人，官等郡县教谕。王德、字志明，西隅人。景泰四年举人，官盐山县教谕。王恩泽、字以惠，东隅人。王德同年，武缘县教谕，是为磨王之祖。陈赞、字日襄，东隅人，弘治十七年举人，官海阳县教谕。陈景淮、字景清，西隅人，正德五年举人，官长清县教谕。柯文宠、西隅人。嘉靖年贡生，阳江教谕。王景大、西隅人，成化元年贡，官乳源县教谕，虎厓之祖。王浴沂。岭口人。贡，官上虞县教谕。训导则林章、字德之，岭口人。以儒士成化十六年中式，官常州府学训导。李时举、东隅人。成化五年贡，官归善县训导。郑孟进、西隅人。成化七年贡，官归善县训导。陈洪，西隅人。成化九年贡，官开化县训导。林埴、林塘、岭口人。弘治六年同贡，官太仓州训导，塘由府学。陈公盛、西隅人。贡，官蒲州训导。陈宗礼、东隅人。贡，官顺德县训导。陈时雨、西隅人。弘治十二年贡，官英德县训导。王文诚、王文诰、西隅人。兄弟俱任训导。林仁山。岭口人。万历二年贡，任训导，赞政则



陈洙、西隅人。宣德二年贡，官宁都县尉。田滋、东隅人。天顺元年贡，南京经历。谢坤甫。东隅人。弘治二年贡，官思城州吏目。为郎则高惟用、东隅人。景泰七年贡，官承事郎。陈文明。西隅人。成化三年贡，养亲，恩授从仕郎。彼李锦、西隅人。正统六年贡。张仕祺、西隅人。正统十四年贡。郑庚、西隅人。弘治十年贡，未仕卒。下董之祖。郑珩，西隅人。例贡，行则无考，宦则未成。凡兹诸君，或淆玉石，或恋林泉，或限资格，或靳天年。肃庙中兴，多士彬彬。李怀静字守中，号平山，东隅人。嘉靖四年举人，官香山县令。之烹鲜于香山，陈朝庆字孝卿，号梅亭，东隅人。嘉靖元年举人，官安仁县令。之制锦于安仁，均能摭其所学，胥得宜乎民人。美诸郑之济济，绍世业于振振。英发若锡麒，字维祯，号于郊，西隅人。嘉靖甲午举人，乙未进士，安庆推官升韶州、严州同知。杨井之祖。少年科第，仅丞韶郡而佐严津，亡乃锋芒之未偃。练达若锡澄，字惟志，号竹庄，西隅人。嘉靖七年举人，官舞阳县令。下郑。宜驾千里，乃令花县而遽沉沦，似亦耽元之为屯。源洁西隅人。嘉靖四十二年贡。街乾。之老于学究也，荐明经而不仕，孙子守其庭训，苍穹锡以遐龄。岂啻于彼者，而丰于此乎？源彬字与官，号梅冈，西隅人。嘉靖己酉举人，癸丑进士，寿州开州知州，南京户部郎中。街乾。之刺乎寿开也，擢南户而返棹，惠爱渥乎两州，声名留于粉署。岂其才无穷，而年有尽者乎？源洽字与熙，号六岩，西隅人。嘉靖戊午举人，官孝丰、泷水县尹。连江。为余之同年，性资盖得之刚直，所至剩著乎声称，宦途不免于倾仄，竟莫罄其经纶，遂优游以家食，事继母而孝极夔夔，友诸弟而囊无私植。郑恒懋为方伯之曾孙，少称颖邵，长尤卓犖，强记博闻，克绍家学，竟阻数奇，点额者数，仅司训于崇庠，实未售之荆璞。陈惟举字直夫，号六溪，东隅人。嘉靖丁未进士，江西副使，广东参政。大园之祖。令花封钱塘知县则抚字心劳，居粉署户部主事、员外、郎中。则度支政举。充养遼之敷施，浩乎莫御。壮保障于藩臬也，煦日严霜，并行有序。使其尚跻旣而陟华，事业孰得而侣焉？而今其已矣。陈鸿渐字顺羽，号下逸，陈昌之孙。嘉靖甲子经魁，官肇庆府知府，以病告请。土库。令博罗则六事并修，佐羊城则四知自矢。

香山澳之劳烈，增秩赐紫。驰五马于信安也，获上治民咸擅其美。使其不急流而勇退，勋业固有未已焉！而今且尚壮也。陈梦雷字有震，号后溪，东隅人。以儒士中嘉靖癸卯科举人，永康知县，建水知州，官止琼州府同知，荣府长史。大厝。者，其谨厚长者乎？馱历州邑，而在有泽濡，佐琼九载，而家无余需。耀不酬劳，竟拂衣于劳传之途，似董天人之俯首江都焉。陈安字勉夫，号一松，西隅人。嘉靖乙卯举人，官衡山县尹。七巷头。者，其肮脏君子乎？三典文衡，而髦士尽获，一令衡山，而黔黎夷悻。与世相违，竟脱屣于鸣琴之席，宛陶渊明之归来彭泽焉。阮琳字孟珂，号见石，西隅人。嘉靖辛酉举人，历官知县，琼州、湖洲通判。之操割高苑，绰有猷为，值凋瘵之盘错，催科抚字之兼支，倅琼而保邑城，归田而乐栖迟。此其义命自安者也。李廷谟字敬禹，号宗泗，西隅人。万历十三年举人，知天河县。下李。之绶绥天河，赈恤孤弱。既刻意于彰善，尤究心于瘴恶，刚直不容于时，甘林泉而独乐。此其襟期磊落者也。李钺字守和，东隅人，太学生。新道下。为李兆林字子璞。万历十三年举人。之父，身入成均，子荐天府。身负壮志而屈于簿，君子抱长才而铄其修羽。林用宾与儿立，同入黉宫，状貌魁梧，绰有蕴藉。绛帐屡满生徒，青云尚阻长驾。屈光泽似渊潜，伫风雷之变化。陈一夔屹屹修业，数战文场，壮鲲鹏万里之志，短曹刘十仞之墙。吁俊上国，席剩琳琅。共祝轅于今日，行振铎于大方。林德、字有本，号壶江，壶井人。嘉靖丙辰进士，官荆府长史。陈复升、字以见，号见庵，鹤上人。林德同年，官海南副使。李国珍，字应选，号梅麓，湖南人。嘉靖戊午举人，官广西太平知府。初固不产于吴航，今乔迁乎梓里，敢并叙其大端，见多贤之萃止。林德初宰邑高安，抗嬖相之恣睢分宜。拒抚臣之索贿，刚柔迭用，而不屈不阿，比丞郡，值景藩之新村，德安。逢御史之修郅。调广东提举，御史劾闽人指公为党。处置得宜景藩扈从。而无偏无陂，甘陆沉而毫无悔，吊湘江自广东提举升荆府长史。而气益豪。因母病而辞禄，长饮醇而含和。年几卫武而即世，德既隆而福多。陈复升之宦辙，久驰驱于粤东。增郡郭而民舍安堵，自潮李升南曹，擢

守五羊，值山海盗起，当事者议增外廓，度撤民居百数十间，公访海埔地没于故窠苑池者，因塘依域，因池依沟，包民居于廓内。饬戎政而鲸岛一空，为广东兵备，值朱良宝作乱，率诸将犁穴歼之殆尽。悉保厘之硕划，实障海之宏功。劳未酬而身退，由谗口之害公。李国珍与余同听乎鹿鸣，璞不售而就选，自越滇而发轫，初谕金华，升李曲塘，亦多历乎粤甸。凌江、南雄丞。雷阳雷州丞。之仁雨犹沾，桂林、象郡守广西太平。之清风已遍。荣金绯而归田，诚卷舒之俱善。李仕黼原名悍，以字行，李廷谏之父。之饱学，甘谷井以殁身，不陨获而自适。其族兄曰时康，曾作教于滋阳，西隅人，正德十二年贡，官滋阳县学教谕。行为法于乡邻。德足术而敬附，亦无愧于荐绅。愚父子虽已叙于古槐，爰徼幸于此乡。某甘弃于亩畝，浚偃蹇于清漳。视诸贤以深恶，敢韦曲之能望乎？尚看吾邑之多士，簇翩翩乎球琅。或续金貂之世业，或起白屋而翱翔。为桢榦于王国，广邹鲁于一方。追懿行于往昔，历可畏之名贤。第俎豆之所祀。则不能以概延。惟郑锡文之与李仕黼，曰生于吴航之廛。其他俨然而血食，悉在野而翩联。因贤祠之附此学宫也，敬叙姓名而缀焉。彼出处之颠末，则尚待于他编。唐有林慎思，字虔中，大宏里人。官水部郎中，不屈黄巢而死。宋有林安上，字民瞻，慎思八世孙，屿头人，官直龙图阁，广东路经略使，因劾丞相汪伯彦、黄潜善致仕。陈宋霖、字元滂，岱边人。官秘书监，与朱文公讲学。陈栢字自修，宋霖之孙，受业朱文公之门。之祖孙并入，刘砥字履之，方安里人。与弟砺同举童子科，同受业文公之门。刘砺之兄弟比隆。郑子尚、未考。蔡通、无考。陈如晦、字日照，沙堤人。官教授，与黄榦俱为真西山所知，所著有《论语问答》及讲义文集。高应松、字箕亩，屿头人。元兵至临安，挟宋降，应松不肯草降表，元兵自涌金门入，举朝奔窜，从官留者九人，应松其一也。官端明殿学士，金书枢密院事，从瀛国公至燕，绝粒不语，七日卒。陈俞、籍长乐，寓闽县。官太常博士，文学德行。张翀，字蜚卿，官朝奉郎，左司郎中。文学廉能。元有欧阳侁，字以大，十四都人。寓居著述。明有陈祖、字富文，十三都人。任新繁县县丞，有异政，终光山县知县。林谷显、十四都人。儒士，解元，官沔阳州知州。朱显、字汉奎，有文学。谢士

元、字仲仁，官副都御史。有宦绩。黄熙、字汝明，青山下人。官南京吏部郎中。有孝行。陈德隆、字世美，十三都人。官浦江、上海、新建、曹县教谕。得士心。林公黼、字质夫，仙山人。正德己卯年谏武宗南巡，廷杖卒。陈文沛、字维德，六都人。官陕西行太仆寺卿，有能政。高望、字德滋，龙门后澳人。官安仁知县。有廉政。陈夔、陈豫章、十三都人。官潮州通判。郑世威、字仲孚，二都阳夏人。刑部侍郎，居乡清介。林世章、字尚闾，四都坑田人，官南京工部郎中。孝友恬静。谢廷袞，杰之父，官琼山县教谕。吾家则仲完、名完、以字行，江田人。官左春坊右赞善。仲进、字伯康，江田人。官江山知县。以德化民，以勘灾伤忤曾被逮，卒于京，棹归，经江山，其民哀思，留衣冠葬於邑。全、字果之，江田人。及第第二名，修《四书五经性理大全》，书成，升侍讲，署翰林院事。耀、布衣。精元学。时霖曾祖。懋观字孔质，江田人。官兵科给事中，终庐州府知府。居家以孝闻，历官所至有遗爱。隽，字以奇，江田人。官奉新知县，户部主事。既冠裳之不替，亦世德之益裕。先司马之好修业，已详于前赋。其邑令自吾生以前不可知矣，采列传而申之，自吾生而后有可仰矣，因所见而陈之。王想之从兄审知而来也，以大夫而摄邑政，其唐时之楚楚者。降此而宋，勤劳兴利，则有李茸，传称其昼夜勤政，兢兢不懈。濒海沙京、屿头，田患鹵斥，教民筑堤防御，遂成沃壤。励精敷化，则有吴仲举。传称其賑贫民，杜私谒，清操凛然。闵希声之惠教常敷，传称其勤政惠民，虽古称循良，何以加焉。方次彭字公述，兴化人。之卓异屡叙。传称其历六县皆有治绩，宰长乐作兴土类，爰育元黎。究心水利若萧竑，传称其究心水利，根治十七都、二十四都诸湖侵地。祷雨辄应若徐世英。传称其不尚威严，不事谄阿，尝旱祷雨辄应，人以为德政所感。伍择之字元宾，汀州宁化人。不阿上以残民下，传称其初出宰长乐，时诸司暴酷相矜，辄兴大狱，乃蹙然曰：“以残忍附上官，非我志也。”遂弃官归。袁正规字道辅，陵阳人。由文雅而致太平。传称其约己裕民，兴利除害，暇则论文赋诗，有古循吏风。陈可大字齐贤，兴化仙游人。之经划，传称其捐俸大修陂塘。吴一鸣字伯大。之精明，传称其緝获劫盗。一讯而服。王、名遇，字子述，漳州龙溪人。方名翥，字次云。兴化莆田人。之德教，则父兄师友之明效也。王遇，传称其父羽仪，贤而有文章，遇受业朱熹、吕祖谦、张栻之门，



与陈淳、黄榦、廖德明相厚善。令长乐，悉以所学施之政事。方翥，传称其为宣义郎威武军节度推官，方元采之孙，从兄略，官广东转运使。元采与二程讲学，翥既有家传，又师事朱子，而与林光朝、施廷光、陆子静、陈昭度为友，其为政可知已。陈昭度仙游人。之规随，亦明道讲学之功推也。传称其少有高行，长即明道讲学，方翥为秘书省正字时，昭度每款礼之，授长乐县令，为政一遵方翥成轨，民多德之。吾明邱宗亮直隶江阴人，洪武中任。之修举废坠，传称其缮修文庙，建山川社稷坛场。兴举众废，罔有成功。王遵道直隶苏州人。之加志胶庠。传称其专务以德化民，尤崇学政，立射圃。及应召入京，民为攀轂卧辙。詹奎章，江西人，与王遵道永乐间任。齐普山东人，宣德间任。以廉明练达显，奎章，传称其庄以莅民，明以烛奸，廉以律己，吏畏其明，民怀其惠。齐普，传称其明达治体，躬行以率民，民服其化。龙韬，曲江人。正德间任。黄琬丰城人。以清净谨严扬。龙韬，传称其平易得民，公余退食，则静坐省愆。汪政祁门人。则吏畏民怀，传称其忠信明决，属摅屏迹，莫敢有舞文者。尤有惠政及民，民常怀之。罗叙江西吉水人。以上俱系成化间任。则政平赋均。传称其平政宰民，宣邕风化，兴百废，均赋役，恪守官箴。潘府上虞人。弘治初任，则借乐宣化，传称其平易近民，对百姓如妻子，每芳辰佳节，辄缓游郊外，与民借乐。尝作桥于河之浒，以渡行人，改南山寺为书院，暇则群髦士讲学其中，建观稼亭、观农亭，改邑内诸佛宫为乡约堂，遵行朱子损益蓝田《吕氏乡约》，以正风俗。钟绍东莞人。则表扬咨询。传称其清谨勤约，始终一节，尤重风教，境内有孝义廉节者，必核请表扬之，士习民风，为之丕变。龙琰常德人，正德间任。爱民于内使征求之日，传称其持己端庄，敷政宽平。时镇守徽郡行邑，屡有需索，琰重扰民，辄峻拒之。杨麒字仁甫，上饶人。遗思于去邑十年之余。传称其宽洪长者，政尚安平，劳心抚字，救疾恤饥。在县末期，以制去任，民若失怙恃。十年余，麒弟麟判泉州，道经县治，百姓遮留，问麒安否，至有泣下者。汪瑄婺源人。上疏以蠲租，传称其政尚简易，不事炫饰。时夏旱秋潦，饥馑荐臻，瑄与郡守汪文盛具疏以闻，诏蠲是年田租，民为之歌曰：“天降殃，岁卒荒，不有二汪，谁立我伥？”何应和字景阳，东莞人。视民若抚孤。传称其位任不挈妻孥，官舍制寂，赈饥简讼，境内晏如。周急持危，铲豪屏税，岂繫赤子视民，亦直以慈亲况已。俞、名介，余姚人。进士。吴名遵，字公路，号初泉，海宁人。嘉靖丁未进士。之为令，躬丰采之得睹。詹、名莱，号范川，常山人。嘉靖丁未进士。杨、名汝辅，南昌人。丙辰进士。戴、名时望，临川人。举人。刘名禹龙，



三水人。举人。兮接踵，周、名冕，临川人。举人。以上俱嘉靖间任。蒋、名以忠，字伯孝，号贞庵，常熟人。隆庆戊辰进士。韩、名绍，号怀愚，湖州人。隆庆辛未进士。与蒋以忠俱隆庆间任。孙名濂，号健吾。举人，广东人。兮联轮。陈、名奇谋，号海楼，嘉善人。甲戌进士。薛、名继茂，号盛庵，云南人。癸未进士。钟、名万禄，号赞字，清远人。丙戌进士。彭、名哲与，号晦虚，番禺人。己丑进士。郁、名文周，字文叔，号暨湖。举人，南直隶江阴人。卢，名龙云，字少从，号起淇，南海人。癸未进士。迄今统比清于尘甑，一赞绪于鸣琴。欲游扬而难遍，敬拔尤而横襟。吴遵者，充寺田以给士，时有观音、岩泉二废寺田若干亩，豪右将攘之，遵悉取以充学校，为肄业膏油费。改远仓以便民，县赋徭输二百石于万安仓，民艰远馈，遵申请改长乐仓，靖诬戍以扶善，邑高允实诘并戎籍，遵为解脱。蠲积负以怜贫。马江诸渡税，积逋千余缗，贫莫能输，遵尽蠲之。实心实政，盖有相资而成矣。詹菜者，临簿书而处决如流。风裁英果，应事如流。旷胞与而形骸若释，暇则尽脱畦畛，登眺赋诗，洒然不为俗累。造城垣而经划多方，时浙东岛夷陆梁，巡抚王忬檄城长乐，菜遂以身任之。多方经划，俾费不及民，民亦乐于趋事。城成，菜旋改任。寇亦奄至，自乙卯迄癸亥，每春烽警无虚日，民有所恃以为归者，菜之功也。正法纪而奸暴屏迹。明法心，申命令，期于取暴诘奸。该博文雅，又为循良余绪矣。菜博学雄文，尤邃于歌行。蒋以忠者，于免赎金，却商征，见其节；罢该催，浚滨涧，湖名。见其仁；修射圃，复学田，见其爱士；营坊桥，坊衢，桥梁，多所营砌。兴社学，见其经纶。其惠绩之匪屯者乎？韩绍者，清而持正秉公，慈而字孤恤困。教普而青衿乐从，法行而赭衣不怨。视疾苦若痍瘵之在躬，瞩幽隐如照烛而符券。其才识之并远者乎？孙濂者，以堪舆而自负，恒平易以近民。王官之转，公道未伸。陈奇谋者，敬彻乎表里，治本乎真纯。抚字而民怀若母，廉介而吏儆如神。蠲税捐费，辟港通津。辟陈塘港。政难以一善述，绩未可更仆陈。钟万禄者，英明爽朗，威不废恩，廉以生明。催科有法，期奉公而先利下；听断惟公，不倾法而亦原情。筑防而斥卤可耕，步祷而甘澍如倾。镌大魁于首石，冀文运之弥亨；树卓楔于十洋，期叶讖

之祯祥。乃祝圣殿之鼎建，尤忠爱之所彰。彭哲与者，练达镇重，心质于仁，粤当甲午之岁，适值饥馑之辰。谷价腾踊，与金珠共珍。每百斤七钱零。道瑾如麻，触目怆神。不逞效尤而剽掠，三尺弁髦而弗遵。侯发廩以平粿，携粮而遍均。历穷乡与僻谷，布霜雪之阳春。仅置罟于大憝，大开网于疲民。乡约之行，尤本忱恂，贤祠义仓，轮奂鼎新。惠不止于民艰，恩尤覃于士类。合而言之，钟有刚中之柔，彭称仁者之勇，皆不愧乎循良，宜均荷兮殊宠。钟乃以调简而行，彭乃以量移而去，业尚俟究竟，岂忠勤兮未偿。河九曲而通海，鹏暂息而高翔。郁文周者，存心兢业，敷政慈祥。始下车而葺正祠，捐已资二十处，贖缓四十，构文公祠。躬步祷以活稿秧。力疾乳哺单赤，课士鉴别驷黄。褪躬若雪，执法如霜。凡署中之所需，半取给於家囊。歼放火之剧盗，赈阻饥之羸羸，乃以勤劳致瘁，未终其政，犹幸马氏之多良也。卢龙云者，性执词寡，妙染工诗，历官久初令马平，继令邯郸，复任临朐。而轻车熟路，行吾志而操刃委蛇。崇贤、亦修五贤祠、立教、建仓，建东平、西平二仓。乃以清勤致谪，尚看卞玉之竟知也。其佐史则赵允、张文可、朱褒、明丞。陈之邵、赵文孙、宋簿。刘有源、明簿。陈维德、宋尉。黄本、熊廷用，明尉，倭至保城，民全其生，水溢筑堤，民享其利。功烈可纪者，难以更仆，此其大者。均以卑秩而树德，诚于仕籍乎为难。彼赵文孙之称宋室孤忠，闽南硕儒，尤其砥柱狂澜者也。其官师则孙大雅、廖正、潘援、刘洙润、郭岱、陈文灿、明谕。余珙、胡大韶、郭翰，明训。均陶融乎士类，咸不愧于师模。而刘洙润之讲学正己，识士尘埃，尤某之最荷其勤渠也者。其合祀于名宦祠，则李葺、闵希声、吴仲举、萧竑、徐世英、袁正规、吴一鸣、吕复、邱宗亮、王遵道、潘府、龙韬、何应和、吴遵、詹莱、蒋以忠、郁文周、张文可、朱褒、陈之邵、刘有源、黄本、熊廷用、孙大雅、廖正、余珙、陈文灿，生有功德，祀而迎之。登彼堂兮，盖不觉见公于羹也。其别祠于鬻

相之圃，则韩绍、陈奇谋、钟万禄、彭哲与，畏垒思深，祠以祝之。瞻彼鸿兮，复何时遵余之陆也。夫道洽政治，民所以泽汝坟，化行地所由称。故范围曲成之政达，遂山川文物之胜增。赋吴航而及贤令与明师者，见吾邑之名所由兴也。若乃夭乔由条，魁瑰蕃庑。楸楠杞梓之成林，荔圆枣梨之丽土，禾黍苳麻之植近郊，纤鳞莲草之濯池浦。产雷同于古槐，名不必于再数尔。其孳尾希革，毛毡毳毛，其形犴獮，其生孔多，间虽飞于郭内，实则巢于崇阿。鰮魮蜃蛤，两鲈乘鲑。犴獮一罗，种类辐凑，虽入市于日中，实从鮫人而得购。非所出而不谈，惧吾言之刺谬。乃其风俗，则户诗书而人咕咩，家孝弟而农刈铎。官税竭蹶以输，贍生耨舌耕笔。有无相通，患难相恤。婚姻死丧，邻保共为拮据；岁时伏腊，征召殷勤欢昵。兢兢六谕，无敢放逸。容隐罪愆，包荒过失。间有辞讼之子，遵教化而归宁一。彬彬乎邹鲁之邦，雍雍乎礼义之质。昔通德门为郑元而称，君子乡为王烈而述。若长乐之淳风，实嘉名之堪匹。惟不类之惭余，靡片长之足述，顾占籍乎大方，愧王谢之芳秩。勉好修于余年，期不逾乎穀律。客曰：“昔人赋西京，则尽长安之地。赋东京，则极洛中之疆。英辞蔓衍，鸿藻辉煌，奇虽远而毕述，胜纵僻而悉详。吴航虽小哉，犹有都鄙廿四，南北二乡。有干霄之京峙，有极地之波洋。何足下乃踟蹰于邑屋之中，束缚于附郭之场？”主人曰：“否否！子独不见听钧天之奏者乎？铿镗缥缈，足以充寥廓，然归而击土鼓，亦有真乐也。又不见食前方丈者乎？金炊玉饌，足以耀富贵，然退而嚼黍粟，亦有真味也。缅彼二京，国华绮句，掷地则作金声，濡毫则翔烟雾，恶不佞兮何人，敢邯郸之能步？第彼所尚者雕组也，博而不必其实；不佞所主者，稽核也实，而不务于饰博。则驰心于广肆，实则宜搜乎至极。一人也，而必详其颠末；一事也，而必条其因由；一山也，而列名其峰岫；一水也，而遥析其支流。不披图而可指，即一诵

而在眸。故第及乎邑里，不暇遍乎遐陬。尚有志于他咏，冀境内而尽收。若以此于昔人之典则，良抱愧而怀羞。”于是客曰：“乃今而后，知班张之赋期于讽谏，不靡丽无以饫耳。足下之赋。期于传信，非敛华则至溢美。班张之辞，譬红紫春花，艳冶夺目。足下之辞，譬苍翠松篁，天然文理。是诚小人也谬腾说而轻誉，匪足之警效，几蒙瞶以歿齿。倘善言而尚再，敬倾耳而长跽。”

### 梅花山水赋

王自闻

闽海之滨，吴航以北，石陇平原，棋山别麓。阜邱崎岭而岩嶙，陈塘匾港而濺滴。沼渣泐滂而盘纾，文石槎牙而岸岑。盱筹岩之崑岷，眺浪台之碨错；摘上林之春花，纳下庄之秋谷。九龙蜿蜒，五虎驯伏。琅琦蔚然朝赩，壶江莹尔夜月。石鼓喧阗，金鸡啾喔。屿砥中流，沱分鼎足。南墅南汶之交流，上塘下塘之遥瞩。金斗淘沙而鹅黄，石牛沉滃而鸭绿。横抚磁江，直瞻御国。泛则森茫外洋，泊则神融内濮。潮至则厓隳溃澹，汐迴则天泉汨瀾。泝宝坑而挹斗壶，凿紫崎而留丹壑。前敷之琴高神栖，后草之真人尸祝。至于三门水郭，百雉金城，实明太祖之创设，而江夏侯之经营。陟巖恍升阶之城级，叠甍犹挂壁之灯檠。辕门所莅，巫塞是屏。元武挺其杰阁，宝光耸其华楹。临水玉麟衍瑞，湄洲铁马效灵。武安需于振耀，文昌揭于中兴。乐廩储敖仓余粟，丽譙销麈岛氛祲。列十二台隍于泮路，比什伍简教于阅亭。协戍师干，糝弓棚矢，待潮楼櫓，鸣角披旌。木舶通天朝之岁事，袞衣驰中山之主庭。春秋两汛，允宜冰兢。先时则运沙蒔草，分更则击馘提铃。龙峰日旭，鬼谷云蒸。东调羹鼎，南展鹏程。侍中艳丽，登降峥嵘。四境之内，既庶且宁。有明农而疆以，有学圃而砥聃。有屠酤而什一，有粢面而奇贏。有茅纜鲙腥而鬻贩，有石杠罍罍而



鲜腥。细而揭缉扞箱，手屣百袋；大而石槌竖镰，鼠网围罾。沪海为业，一是治生。兼之家耽文物之胜，户播弦诵之声。楚楚冠盖，彬彬青衿。厥木惟乔，梅花是名。首丹桂玉兰而馥郁，群苍榕翠竹而葱菁。悦顾名而思义，其合人物而向荣也耶？时夫和风鼓畅也，山红与江篱共芳，鸕鹚齐碣雉并啜。爰居依渚而栖迟，春锄随波而下上。游人踏莎而行歌，舟子鸣榔而荡漾。融融景明，神怡心旷。霎尔颶风震荡也，鹤鸰潜形，鳧鹭遁掌。卷走石之飞沙，撼排空之浊浪。击大矶而辘轳冰湍，涨后坞而淤漫滂沱。行客吹帽而束衣，渔父罢纶而归舫。霁哉风色，令人悲壮。若夫水陆之产，孔有孔嘉。断葱翦韭，拔薤食瓜。虽东西之各本，均青门之足夸。玉质滋土膏以盘结，黄精衍胡种以繁华。垂玉筋，剖青钱，中原采而弥伙；纫葫芦，悬春杵，樛木累而尤蓂。川芎、园蓼、花椒、山柰、绛薯、白芋、紫姜、彤苏，薏苡含珠于原野，芭蕉分绿于窗纱。野核则粘乳、刺珠、荆棘、狗菱、桃粉、咸瑚、萆薹、酒管，药材则山药、金樱、南星、香附、葛根、商陆、薄荷、山查。蔬茹而蕻苕，蒹菰、赤根、菁芥、杓匙、苦蕒、蔓菁、盖蓝，则资生于马稠、北寮，塘塍负廓。果实而桃、李、梨、柿、杨梅、枇杷、龙眼、荔枝、香柑、橄榄，则取给于金墩、洋里，肩负力家。岑巔有紫菜，磴上有石花。苔构、地蓂，铺于荒垄；榘菰、木耳，茁于枯槎。它如钓绳、鹿角、鹅肠、鸡胶，无胫而至，辐辏交加。载有蚌绿藏瑶柱，立距石头，收墨贼花卮而螺蛳，青锁而管蠃。蜃则沉渊窟以成房，蚌则附澜滩以着粒。覆帽裂裳而垂涎，傍眼珠胎而碧血。时见淡菜、丁香，亦闻覆罩、龟脚。螺有头髻，黄亦尾滑。或花在背，或米在穴，或薄肤而衔泥，或寄生于别室。乌者为蜃，白者为蛤。浮斑斓而车，沉璀璨而涩。螂蛄而深窝，蛤蜊而偏狭。居瓦垆而缕冰钿，函花封而表黄甲。利渔人以夜光，喜施蛛之臧舌。彼数公子，拥剑无肠，两螯斫雪，满壳含黄。腌则



入何胤糟罐，鲜则佐毕卓酒觞。花而冲锋未锐，红而拨棹高扬。是皆蝟蚌、郭索之族，实维元冬、金甲最良。啖炉驳而矫其虎，数金钱而毛其芒。莎马、螃蟹并醢，芦禽、鸳鸯斯张。其名曰虾，蒲篮搏取。玻璃白，胭脂紫，黄朗殊称，卢箕并侣。嗔目跃于沙泥，巨擘溺于洲渚。大者合欢，小者浸卤。曾闻珍珠已献于陶唐，谁谓长须亦信于刺史？水母借以辅行，懒妇犹然多子。更羨蝟实芬香之酱，鲇为纯洁之钩。虾枯、鹤顶、水蠓、龙头，投泥而跳，匿窖而鳅，田虱与石鳞相为搅扰，土笋与金扁各适沉浮。俱侑鸣豚鹅鸭，不时燕会绸缪。爰有嘉鱼，洵美且都。寄素书之鲤，和齑脍之鲈。银梭尖啄而鲟，鳃尺平唇而鳊。鲟则鳞文绽锦，鳊则星点联珠。清润者鳊，肥甘者鳊。松有青黄，而色可辨，竹与银抹，而义自居。黄梅于黄瓜不类，白带于浮带亦殊。鳊有异形，其大者为船、为牛、为水探、为砭片，而小为黄、为花、为鼻、为燕、为鳊，肋可析而银缕。鳖有多种，其大者为青、为糊、为帽、为桐、为鸟翼、为长檐、为犁头、为螭鲤、为龙凤、为猫头，而小为双髻、为尖尾，翅皆漫而金丝。白力、黄山，掩豆而足，土甲、春子，每食无余。鞋底比越，瓠其口，铁其肤。称小子，号大姑。准身似蛇味旨，状头临冻膏腴。青鳊风之作脯，涂龙炮之为酥。土鲈、金鲈，体干稍敌。黄蜡、斗底，肉骨相符。曰马、曰虎、曰豚、曰猪，编车重难钩石，海鳅大越舳舻。刺鲑画脐，祇充眙鸣，蛾松赤蠃，讵入膳资？毋论鲈、鲟、鳊、鳊之杂遝，鳊、鳊、鳊、鳊之参差。即白雀、青鳞，以及鼈鼓、豆青，螭蚯与小娘、龙女，而至车钱、海螭、沙梭，皆鱼群丑，难以悉数矣。迨夫春暮，其至以时，彤髻磔口，脂尾丰颐。鳞比次而熠耀，皮润泽而凝脂。岂多骨之足恨，惟烹饪之适宜。盖风物倍美，亦山海称奇也欤哉！辞曰：“有人异兮探奇迹，望蓬莱兮叩石室，指扶桑兮啾啾凤鸣，跨溟渤兮屹屹鳌极。燃犀兮水怪愁，书草兮山妖泣。冯夷屏息兮江

妃婆娑，灵胥怀柔兮阳侯辟易。采神芝于峭壁兮，掇异草于悬崖，渺六合于一坯兮，等沧桑于嘘吸。愿言海波不扬兮，越裳重译，光岳凝醇兮，文明洞辟。豨鯢化以挹秋涛兮，耸春桃以鼓鬣；骑箕尾而沛甘霖兮，利济川之舟楫。”

### 梅花雪洞赋

前人

余夏日昼倦，据梧而瞑，梦游一大宇，闯户履庭，扱城入室，有榜其额曰“雪洞”。间白驹绝隙，游蒙轻盈。清凉幽敞，虚白精品。莹光蒸日，皓色凝神。以为雪邪，火乌焰炽，雪奚宜至？谓非雪邪，珪辉玉粹，可意摄气。少进而前，见一道人恹恹然中华阳之中，衣鹤氅之衣，正襟默坐，顾余而嬉。余揖而请曰：“未云何雪，不山何洞？曰雪曰洞，曷取而云？”道人曰：“非雪之雪，其为雪也温融，不洞之洞，其为洞也深通。此上帝所以与我会众理之宅，宰万物之君。故精一湛寂，毋染尘氛，非子之清真韵宇，飘然不群，未能探斯门而窥此乾坤。肆兹雪洞，维予之宫。雪洞之趣，维予之同。曷不谢世虑之纷纶，恒与我而相从？洞空中之扁钥，玩八荒之鸿濛。乐爽垲以漫衍，寄太宇而长终。”余遽然而寤，亦未卜其占之何居也。越伏日苦暑，徙其读书处于梅仓之别所，适见地位微凉，窗壁清穆，神游觐遇，宛然在目。是夕之寝，假寐间，忽见昨之道人顾余曰：“畴昔之入室而揖予者，非子也耶？余所谓维子同者，非兹所也耶？子今于兹也，不徒怡形神，杜尘绪，且寥廓大观，炉锤渣滓。植节义于岁寒，漫游于气海。摧濯磨之灵光，俾共刮乎旧污。无阂元同，旷然物与。则程门雪、白鹿洞，不必问在何处也。”余俄而觉，遂以雪洞名兹所。因起吹藜，索笔而赋。

## 吴航书院赋

陈昌蚤

天开绣壤，地萃人文，育英孕秀，揆藻扬芬。稽北拱星躔，野分牛女；绍南来道范，心契邱坟。新宁之古风茂穆，吴航之佳气氤氲。宵雅肆三，欣检瑶函宝箴；大昕鼓再，欢聆泮壁鼙鼙。匪问难析疑，诂得豁然有会？惟乐群敬业，乃能广所未闻。于是江右儒宗，南州先觉；殚经营，周计较，辟讲堂，广学校。座距六屏之麓，取象震离；室毗三圣之傍，追踪忠孝。浦流文洽，顿生马水波澜；檐下双江，淘尽龙津泥淖。轟轟乎复榭迴旋，隆隆乎重檐笼罩。光祀诸贤，敬敷五教。振木铎而广甄陶，悬金鉴而程则效。首石芳崩，瑞钟蕊榜之魁，鳌岭嵯峨，采蔚骚坛之豹。境宏敞而且邃幽，地巖嶮而非硤礲。广积曹仓，列开酉窖。懿夫简延名宿，培植梗楠，教思遍布，化泽旁覃。友教四方，大启马融绛帐；从师千里，远来李固书僮。薪传原于宣圣，阐理本乎晦庵。弦歌锵金石之声，如闻韶奏；讲论抒纵横之议，若听麈谈。天根频蹶，月窟恒探。奇搜孔壁，葩彩《周南》。洞凛一王笔削，周稽三礼渊涵。百家廿史，鸿宝秘函。业孜孜以鍤钻，良术有四；心兢兢而乾惕，大节惟三。尔其缮性极之学，表德充之符。孔思周情，各砥砺于行业；陶分禹寸，竞敦黜于德隅。拓开万古心胸，光风霁月；超越一堂智勇，沂水舞雩。槐荫着风，摇黄晃千章缥轴；柳阴经雨，润绿凝多土袍襦。望月楼前，卓午书声倾耳；阳春桥畔，通宵灯影横衢。课督宛同白鹿，精勤宁减鹄湖。扶大雅之轮，尤方弗屈；培斯文之脉，随处皆敷。乃若手握玉衡，叱程纛彩，理尚清纯，词洞真宰，刊落尘氛，剔爬蓓蕾。遵先民之懿规，汰俗艳之凡猥。冲恬渊博，贾茂董醇；灏瀚汪洋，韩潮苏海。由是鼎新革故，返朴还淳。诚意正心，几踵考亭之武；型仁讲让，宁殊

泗水之滨。廿四都图，乐承芳躅；十三街巷，敬羨德邻。仰宫墙兮巍峻，企品地兮岫嶙。合抱良材，允树朝中楨干；连城华宝，适成席上瑶珍。跼跼济济，侃侃闾闾。麟麟炳炳，郁郁彬彬。乃思芳徽之丕振，岂非陶铸之有真也哉！矧届时调玉烛，祚重金瓠。乐正司徒，育英才於庠序；太常宗伯，隆嘉礼于兗邹。桐翠高冈，飞凤翔翔；苹蕃绿野，鸣鹿呦呦。思皇奋兴于翰苑，誉髦抗志于皇州。继往开来，业由陶淑；羽经翼传，功赖罗搜。乃从而歌曰：“邑中神君称召杜，简命煌煌守兹土，既富且穀开艺圃。花封百里登春台，轩乎舞兮鼙乎鼓；倒篋翻笥招生徒，人材鳞集沾化雨；沾化雨兮进隆古，风教裔皇兮媿隆东鲁。”

## 文

### 长乐纪盛文

林琼蕤

八闽首郡，九邑亚都。地接鼓旗，星分牛女。南北划为两界，东西别以二隅。曰原丰、曰安昌、曰新宁、曰吴航，千余载之嘉名递易；为善政、为昌化、为二难、为芳桂，廿四都之绣壤相连。枕闽、侯而带玉融，拟鲁、邹而称文献。其在城壑，金汤控百雉之雄；亦有山川，龙虎据一方之胜。谯櫓峻其瞻视，关扃谨其卫防。藏有军国之需，仓有积储之富。十三巷底，巷巷旧家声；十六桥头，桥桥新气色。开上洋之市，坊竖街逶；还浣浦之珠，水通泮壁。府署堂廡，拓三台以为基；学社市廛，辟五门而式廓。九溪环其外，四明宅其中，六鳌驾其前，首石拥其后。双江倒峡，镇水口之长虹；孤塔凌霄，擎云间之巨栋。初有上通小有，北溟下汇南溟。郁郁芝冈，屏何翠也；悠悠马渚，泽之长欵。跨金斗之冈，金鸡宛如唱晓；击龙门之浪，龙台允矣朝天。陈塘趋东海以



归王，筹岳峙西涯而托月。灵峰芳巖，上窟天池；御国峻嶒，俯临松址。崎江涌千层之雪浪，点缀梅花；磁澳开万顷之海门，崢嶸龙角。云母矶连王母，紫微峰映翠微。沉闽王之禁石于洪涛，鮫人藉以作室；结夫人之高髻于绝顶，娥女仿其新妆。当阳观前，溪山第一；龙泉寺外，林壑无双。萃秀气于稜官，雁峰点头若触；标羽仪於王国，鸿岫展翅如飞。福水每戏魁龙，丹山时来威凤。沙京簇锦，蹑云梯而摘仙桃；壶井流琼，启石门以伐鼉鼓。朱晦翁读书处，二刘开讲易之堂；伸蒙子德成岩，片瓦盖精忠之魄。台名乐寿，想仁知之性情；岩曰星躔，知郎官之朗照。狮盘白石，鳌起黄岑。龙潭之瀑浩如，牛垄之山卓尔。沙布金波之色，大小社连；渠飘玉沼之香，东西湖广。雁度蟹虾岫畔，鹤鸣宝玉溪阴。五马彩云横，七岩明月举。莲峰孤挺，岂少莲仙；桂石双标，雅多桂客。江、坑、罗、竹，四田之阡陌交通；石岳、岱、蕉，三岭之蚕丛更险。斯固开六平之佳气，敞百里之雄图者也。天子重边陲，简良吏。成城詹父，名莱。众志攸同，致命吕公，名复。尺环自靖。吴、名遵。陈、名昭度。杨、名麒。郑，名尚友。一琴之化日何舒；李、名茸。闵、名希声。方、名翥。潘，名府。两袖之清风自爽。杜母悲思於岷石，厥惟龙、名韬，郁、名文周。萧、名玆。韩，名绍。召父留荫于甘棠，爰有伍、名泽之。何、名应和。王、名遵道。蒋，名以忠。上皆本县令。至若张、名文可。朱名襄，诸佐，寄兴哦松；胡、名大韶，训导。廖名正，教谕。数师，嗣音振铎。黄、名本，邑典史。熊、名廷用，邑典史。刘、名有源，邑主簿。郭、名岱，教谕。孙、名大雅，教谕。赵、名文孙，邑主簿。汪、名濂，邑主簿。余，名珙，训导。善政犹存，余风未远。惟作人同于槭朴，斯雅化蔚为菁莪。理学则林慎思著续孟之书，黄勉斋定丧祭之礼。季兹也，元滂也，如晦也，自修也，陈姓群探正学之宗；嘉誉也，世南也，砥、砺也，子玠也，刘氏共阐考亭之奥。叔权、张洽，渊源亲接于紫阳；申之、自诚，正座同分子白鹿。乃知乐邑，不减



武夷；若彼先儒，何殊濂洛。名臣则林士仁也，陈德隆也，鱣堂雨润，马帐风清。既为己而为人，亦不倦而不厌。郑锡文德被西粤，若李廷谟、谢肇淛、陈大漉诸公，孰无可饮之和？谢廷瑞威震南琼，若陈经甫、林承训、蒋恪箴数辈，总无可犯之色。陈祖斩蛇迹叶矣，陈良谪戍远迁矣，而既死民葬衣冠。奋笔立裁冗秩者，则陈仲进、陈仲完有焉。陈景隆养善壅谗矣，陈文沛锄强起弱矣，乃招降而贼以附。决策而倭以平者，则林延选、石磐有焉。抗世家者，林山、林德也，而陈维裕、陈季周不与匹休乎？恤民隐者，陈赞、陈谈也，而林宗显、谢廷柱宁庸多让乎？平寇拒金时，则有若陈毓贤、陈伯震；筑城护国时，则有若林枏、陈联芳。高廷忠却馈而返金，尚已，其他张翀、陈潭、周行、陈让，匪廉以律己，即婉以拒人，谓非洁清之选欤？林裕阳卧巢而服盗，著已，其他陈茂观、林恕、郑岳、王有恬，匪履险而能安，即居常而虑变，谓非勇知之英欤？叶时敏特疏养亲，赵以夫上书定储，郑世威裕民减税，谢士元裹创帅兵，黄文政雪三十六冤，黄德藻賑数千万户，陈日华遏绝淫祀，陈公储傲制诡随。观察南京，李丕显贤声大著；乞休北阙，王益祥壮志弥彰。金纳五千，陈讷谟之收浒樵；檄飞三日，陈应春之绝滇妖。掩骼心劳，林世章泽及枯骨；运漕冰解，谢汉甫诚格皇天。大法小廉，进思退补，洵王家之楨干，圣世之琼瑶也。其在忠烈，则寸舌可割，孤忠难屈者，林虔中也；生除凶暴，死出神兵者，陈伯嘉也；斩使以抗元，从子克绳其武者，陈文龙也；赴江而殉国，家人共殒其生者，杨梦斗也。黄孔铸之就义，一笑而亡也；林公黼之抗言，累杖而毙也。殆所谓虽死之日，犹生之年者耶？其在节概，怀芳落落，不亲通显之故人者，其郑宪乎？廷杖奄奄，尚殡无归之朋友者，其郑源涣乎？发贵人之黄白，拂袖而归者，其陈安乎？痛奄寺之擅权，挂冠以去者，其陈崇德乎？此则难进而易退，彼亦辞热以就凉云。大

抵庭献必本家修，作忠断推克孝。林巨卿之与邹异，庐墓洒甘露之祥矣；陈宗傅之及老成，兄弟死元兵之战矣；范御则击登闻而救父矣；陈昌晋则减己算以延亲矣。夫庸行克敦，虽悃悃自饶藻采；惟彝伦攸叙，期修辞益寿名山。请由孝德之余，而数艺林之最。卓云之有《求衣赋》、《扣钟诗》也；郑洙之能驾曹、王，压元、白也；陈有声之倡上高词赋也；郭隍之有《春秋传论》也；林通之有《县图经》也；郑定之有《淡斋集》也；陈亮之有《陈搏传》也；陈玉之有《居幽歌》也；高淮之有《竹所吟》也；陈登之有《石田稿》也；王恭之有《白云樵唱》、《草泽狂歌》、《凤台清啸》也；高棟之有《玩宇文原》、《唐诗品汇》、《拾遗》、《正声》也。其流之光，其积之裕焉耳。以选举显者，开科以来，对于廷者三百八十有二。明经而外，举于乡者三百五十而余。自元及明，六士鹿鸣首选；延祐四年，陈浩；至正二十三年，林文寿；洪武辛亥，林谷显；洪武癸酉，林赐；永乐丁酉，李马；正统戊午，林侨，俱乡科第一人。由明溯宋，七人胪唱先声。绍兴壬戌，陈诚之；淳熙戊戌，姚颖；嘉定戊辰，郑自诚；宝祐癸丑，姚勉；咸淳戊辰，陈文龙；永乐辛卯，马铎；戊戌，李骐。俱廷试第一人。至于寄籍占鳌头，尚有可指；林霆，本学教谕之子，宣德庚戌状元。归宗踞龙首，亦未补遗。姚谏，本县令子，随父至任，嘉靖癸未状元，应十洋成市之兆。韩敬，本县令子，生署中，万历庚戌状元。一门三举三翰林，江田独钟其盛；七世二元十进士，姚坑克世其家。林升、陈德隆，培五桂而并秀；陈、郑、庄、林、戴，庆九德以同坊。天下大魁，马、李二人相望；闽邦首唱，赐、侨两世联登。父子俱尚书，陈瑞载生长祚，春秋联解状，李马改为李骐。彬彬乎玉谢之家，济济然簪纓之望。以隐逸重者，刘世昭号慧观翁，郑文霖号耽犁子，林清号阜林梅隐，林敏号瓢所元冥。陈奎甫寄远志于蓝桥，陈汉臣辞南安之教谕。林绍不拜丹诏，发清响于林泉；欧阳侁兀坐青毡，详五经之旨要。岂其烟霞痼疾，曷以轩冕泥涂？以乡行称者，李长孙一川兴利，郑

伯遼六叶同居。严光田宅俱捐，四时均沾其润；林鷗夫妻同舍，二湖长沛其膏。林通则倡学输金，董岩则毁家贖族。一乡之善，千古为昭。以技艺鸣者，林良箴琴书兼妙，张士达龙虎如生。郑孔济术擅岐黄，数年前之死生早决；林景时独工山水，一泼墨而流峙宛然。林宏显开笔底之梅花，仿佛暗香浮动；刘孟升学廿年之篆籀，分明蝌蚪纵横。所翁之龙，点睛真能致雨；叔弼之雁，插翅便可入云。是皆绘水有声，绘火能热，虽为小道，必有可观也。顾丈夫之不朽有三，而女子之所从惟一。石氏一吁殒命，林氏三跃身亡。申屠氏杀方六之首以扫坟，牲以人代；林尾姐葬董峰之巅以瞩远，死望郎回。彭氏悬像席前，纸上呼卿如对饮；董氏拾巢囊下，空中飞鹊若为炊？叶氏室几焚，木翻克火；翁氏刃既顿，指有余锋。前义姑，后义姑，星井玉溪互映；石节妇，林节妇，婺光婺女联辉。陈姓曾有二难，姊妹居然伯仲；吴门蹇遭两寡，妯娌恰似夷齐。伸大义于蛾眉，勤芳名于蠹简，良可惜也，诎不荣哉！若乃吾与之徒，间亦各行其意。或利他而利自，抑说佞而说空。董奉医仙，庭游一虎；百丈大智，钵托双龙。题石石自开，李头陀独参上乘之法；驱雷雷即震，陈灵通曾读异人之书。极之物产之蕃，具见海疆之富。松横幽壑，竹绕平村。荔枝以龙眼为奴，首推胜画；橄榄与青梅并苦，自觉回甘。兰有独占素心，远超众蕙；菊则紫袍金袖，尤殿群芳。杜鹃枝上杜鹃啼，蝴蝶花间蝴蝶舞。金莺百舌，声啾乔林，翡翠金鸥，彩翻碧浪。白头翁不分老少，素衣女不辨雌雄。车蛤出沙中，西施之舌半吐；蛎房附石上，太真之乳何甜。似此山海之珍，缙黄之属，飘然游方之外，蠢然处物之间。聊信笔而类书，非名邦所倚重者矣。盖尝综而计之：间阎鳞次，环水附山，甲第云屯，腾蛟起凤。烟墩塘寨，严四境之提防；邱墓祠坛，绵千年之樽俎。田畴交错，江浦濛濛。清淑之气所凝，贤哲之生为盛。或立榜、游之雪，探月窟而躐天根；或

闻曾、闵之风，温冬衾而清夏枕。或经略优一时之保障，或韬铃裕万里之长城。或叠产凤毛，丝纶世掌；或群飞雁序，金玉连镳。或人在镜中，独精藻鉴；或吏行冰上，不受苞苴。或授命则折槛之朱云，或仗节则牧羊之苏武。或效一官而必敬，或膺五聘以犹辞。或潇洒如米颠，或豪侠如剧孟。甚者姿含冰玉，操拟松筠。五夜梭寒，一丸和苦。孰非此方之秀，应运而兴者乎？慨自海寇跳梁，因之边疆重徙。兵燹洊至，万井无烟；虎豹肆威，千乡俱旷。怅飘蓬之靡定，思采菖以无依。幸圣主加意编氓，使羈人尽归故里。雁集安宅，粉榆乐醉饱之天；燕恋旧巢，邱壑寻钓游之地。耕田凿井，鼓腹歌衢；服贾牵车，沿途唱晚。扶桑迎旭日，屢楼海市千端；越峴起扶摇，云路鹏程万里。桑麻鸡犬，留淳古之风；礼乐诗书，润太平之色。琼蕤駉駉下乘，栲栳散材。生长宗邦，览江山之重秀；搜罗往事，快风物之日新。忆射策于皇都，敢云友尽天下？景前徽于梓里，窃愿尚论古人。谨拔夏志之尤，谬嗣幼溪之赋。此其大略，庶几窥吾邑之一斑；假我数年，当更志国朝之全盛。

### 景贤堂释奠文

陈寿臧原名世英

闽水利自晋守严公凿东、西湖始，西湖利尤巨。去西湖二里许曰南湖，浚于唐刺史王公。后东、南湮，西湖仅存。闽王辟之，广十余里。王位专，不与诸贤齿。赵忠定浚湖，朱子喜创见，然开端者已有曹、程、蔡，特业未竟耳。终宋世，祀四人。湖不治则淤，久则陆。距忠定三百年，传者闕如。而万历朝，徐、江、陈、熊、李五人继治，何其盛也。志固有详略欤？我朝康熙、乾隆间，湖四修，志八人皆督抚，事统于尊尔。八人潘为最，今之忠定哉！喀其寮，前则若姚，若二金，若梅，后则福与徐也。今距潘公修



志又百年，无继起者。福、徐时近足征，否皆佚矣。道光朝，林公浚湖，时尤近。农民不知溢与字，有直呼名者，曰某活我。祀凡二十人，宦十有九，绅一，功德在民同也。且六合大矣，吾闽特岐海，西湖又其一隅耳。何地无利，何地无兴利者，荒烟蔓草间，昔祠今废，当复何限，是景贤堂其嚆矢也。诸贤俎豆向缺，如乾隆十三年葺开化寺，议祀未果。古者渊泽井泉，皆列祀典，故水居八蜡之一，然则功在斯士，例以先啬先稷，其敢废欤？矧书院为全湖毓秀之地耶？堂在院左偏，甲戌十二月落成，世英谨作释奠文，其辞曰：

八闽灵皋，背山面水。大小铜盘，会城西峙。众流汇趋，蓄泄曷恃？于显神功，在湖之洩。自东自西，太康肇起。柳桥迤南，沿迎仙里，淦渠三湖，堤连堰累。东南湮淤，浸及西汜。嘉祐、熙宁，相继浚理。功集大成，忠定畴比。建复澄澜，徐公济美。万历同朝，江、陈、熊、李，万口为碑，到今曷已。圣代官贤，闽疆乐只。二百年来，湖四修矣。亦越林公，痼瘵桑梓。二十名贤，后先同揆。堕泓一渠，疑若鲜尔。载颂载颺，敷陈大旨。负郭民田，万家生齿。溢泄索钟，水柜实倚。狸互鱼虾，日中成市。山耕水渔，于于戾止。岩疆设险，深沟高垒。固我金汤，濠通表里。堪舆家言，形胜在此。南离郁攸，燎原向迤。阳侯与驱，涵濡广被。西兑金方，璧奎尺咫。金与水合，孕灵多士。伟哉神功，生荣没祀。凡民乐成，难与虑始。估费万金，劳役千指。殫精湖工，非常所拟。仁以宅衷，智以经纪，勇以决几，义以任使。湖山苍苍，湖水滂滂。遗爱在民，荣逾青史。濯我樽罍，陈我笱簋。合乐升歌，在水中沚。神之格思，燕喜多祉。报我丰穰，绥我福履。于万斯年，鉴兹盛轨。

杂著



## 跋刘世南行状

朱 熹

长乐刘砥及其弟砺，相与来学，累年于兹。更历变故，志尚愈坚。察其居家孝友，交朋友信实，临事谨畏，不敢畔绳墨，知其教习之有自也。一日，出友人赵君昌父所状其先府君行事一通，因以铭墓为请。余读其文，考其事，有以信余所知之不谬矣。然余久以疾病，忧畏不能文。比年以来，所辞且数十家。以故虽知刘君之贤，而不能有以少答二生之意，独识其后而归之。后之君子，尚有以识此心也。虽然，二生勉旃，尊闻行知，而有以卒就其德业，则所以显扬其亲者，于是为大。铭之有无，初不足为轻重也。庆元己未四月乙酉日。

## 彰德篇

明县令孙 濂

余承乏吴航，汲欲兴贤举孝，以励世风。顾积行君子，壅于上闻。适乡贤裔耆彦林志暨李绅等，金以董庠生岩义田实状上，余骇而喜之。近以公务出，访风景，观民俗，与客陟棋山之巔，苍郁高奇，文人义士之产有自来矣。乃命驾其乡，谛视义田滨沙湖，饶沃厚粒，啧啧良久。客作而叹曰：“美哉！右族孝义之区，其国家元气之培乎？自古难之。”余曰：“田以义名，必至义不物者。赈不匮之惠家，而义则惠流寰区。悉由良心扩之，求诸天下不易易也。夫士居则以义自许，及离蔬释轿，倏然忘之，求田问舍，为子孙谋者比比，视族人之疴痒疾痛若秦越，噫！于风教何裨？董生才中人以上产也，顾仁爱天植，梦寐文正之风。神游苏汴，目击其盛。一旦遂捐腴田，创簿书，偕贤子侄仿故事，如婚姻丧葬弗能举者给之，耕读者资之，祭祀燕享修葺公家咸赖之。董氏得

以衍诗礼、引门绪于弥昌者，皆有所贻。此无所为而为，非所谓诚心君子耶？”龔宪臬诸公，屡行旌奖，余兹特请于督学宗师王，高其行谊，锡扁冠裳，于以扬光宠，鼓芳风，而上争濯磨者，有所助也。客请余文，余曰：“请于荐绅乡先生。”客曰：“荐绅尚闻达，文之弗敢。”余曰：“请于士。”客曰：“士有厚资者，察锱铢，文之弗敢。”噫！先生绍文正，安得若钱君者文哉！余释褐试政创见喜谈之，因文以自感，亦以风吴航云。

### 祭高笈亩大参文

宋周贇全

呜呼哀哉！公人中龙，而歿于夷，国家之事，而止于斯。呜呼哀哉！平生正气，配义与道，作为文章，可盘可诰。玉堂金马，鸱阁黄扉，晚岂不达，时事已非。扈从三宫，风尘万里，主亦忘身，公岂爱死？魂乎归来，哀哀江南，孰知腹愤，有视不舍。先民有言，处死实难，公死于忠，义命所安。悠悠穹壤，万形皆毙，不澌灭者，文章节义。人难其一，公独兼二，孰起九原，共论斯事？公方往矣，我心孔悲，岂直悲公，国家之思。呜呼哀哉！

### 抄略翁烈妇祭文 为陈向茂妻作

夏允彝

荐君簪其未几，伤妾帷之空御。孺人凭木悲号，引刃勇诀。自谓可以就灵舁而共载，指泉原以为期矣。姑且惊焉，前步急夺。虽未从乎夫君，谅已见原乎生我。即使媿承姑命，矢志终身，岂不生与礼宗齐称，歿与贞义等溢哉！然而孺人之志，则以为义而生，孰如义而死。遂乃伺间隐发，竟彼前志。举刀疾刳、深入肤里，贞魂未离，缠绵七日，益以手指，然后断决，引大义而从容，忍至楚而含笑。呜呼孺人，可谓烈矣！

释馐对有小叙

明姚希孟

明府莲湖陈公，三载报最，同事者旅贺矣。而希孟私惊未写也。昨岁母氏惠徽旌典，下旄式间，聿睹厥成，且殷勤慰藉，希孟有知己之感焉。爰掇拾輿诵，作释馐对。

辰巳之岁，飞蝗四起，昭渚以西，禾穰馐如翦。至姑胥回翔不下，薨逝而去之。或集于茅菅，状如雉经歼焉。日在柳昏火中，雨泽霁期，禱于群望，浹旬而甘霖澍，乃亦有秋。或馐于野者，乐其藪藪也。依其土问曰：“兹岁之告成，虫之不为灾，山川鬼神之灵与？繫我邦君大夫实有异政，馨闻上天，以芘我烝民与？”其农夫释馐而对曰：“吾何知中寿，吾既老于农矣，昨输租自公，周游闾闾中，驱呼辟人，隐身视之，朱幡骊驾，赫然若神也，询之，则吾守公陈侯。”有语于巷者曰：“惟吾守公，人而神者也。微公则螟螣害稼，而旱魃乘之为虐。且微公则害不止螟螣，而人皆为魃”议于校又然。流传自荐绅先生之口，则又然。吾听而无征也。归而质之西邻，西邻方鬻子以饱雀鼠，而拊膺恸曰：“恨不见我守公。”又质之东家，东家之橐不知所自徙矣，家人环向而思吁公如吁天也。因相与臚指守公治状，言某某事惠顾悻独，而悻独更生也。某某事力捍疆御，使摇手莫可谁何。村社既集，酒后呜呜，野人不识避忌，各列所闻。或曰公之律己如贞婺，冰雪皎然。或言其字氓如抚赤子于笊箪之上，哺糜而复授之饧也。村之教授者，颇习于掌故，以为吴有名刺史三，今守公具美焉。所食惟吴水如攸简，较吴儿而先，示人不可测如邵，扫地焚香而坐，如应物也。方旱蝗之将萌也，吏民用故事请一诣雩宗，视巫尪为戏。守公搏颡叩大神，顾乎其至也，黝衣革带，颜色称其服。羸老扶杖往观，望之泣下，谓守公精于祭禱。乌知其坐春申堂披决案牍，轻重虑囚，

庭无冤狱，苞苴若扫，风清弊肃，则守公之祷久矣。今方为一郡表率，他年牧九州，或表率天下。请用螟螣及早魃为例，凡锐喙决吻，攫衿援噬之类，而傅翼飞者，毋近吾四履，煽灸手之威，焚林竭泽而不顾。其滌滌者，期与三日更始。夫山川鬼神，惟奉若宁，侯如下陬焉。有不若于令者，神戮之，视茅菅间物矣。若曰是神之力也，则名山大川，明神明祀，何国蔑有？而水旱凶灾，所在见告，夫妇相跽，藉饱鸟鸢而薶蝼蚁。不者，亦鸟兽窜耳。今载筐及筥，使喷然获饱也，繄惟我公！何以报我公？则惟有公堂无疆之颂。

### 建鼓楼文

明林隲邑人

七闽列县五十区，形胜盛钟乎长乐；百里居民千万户，观瞻总属乎丽谯。公署巍峨，山川耸秀。面塔峰而负首石，午道迎折桂之人；控鹤岭而襟龙门，恩波浸登瀛之客。琼宫琳馆，殿阁翬飞；锦缆牙樯，舳舻鱼贯。固遐搜而莫罄，将旁览而难穷。当圣朝访落之时，属政府维新之日。詹侯承流宣化，德允符於鲁恭；单尹崇德尚贤，才肯让于斯立？陋门墙之制度，新栋宇之规模。爰集掾曹，载询黎庶。既协谋而叶吉，乃捐俸而分资。考牒按图，斲材著石。工愿呈其技巧，民靡惮于劬劳。谷旦于差，皋门有伉。旁开两观，上建层楼。金璧相辉，映河阳之桃李；鼓钟递奏，杂单父之弦歌。坐观一邑江山，独占四时风月。田夫野老，知举首而咨嗟；墨客儒生，愿投章而献颂。尚翼乾坤清泰，海宇靖安。官显吏循，仰皇明之有庆；民康物阜，乐覆载之无私。

### 邑侯李君去思碑铭

明布政谢肇淛邑人

闽藩之于吾长乐，盖冯翊三辅云，史所称缓性志强，外文而内鲁，断断然海澨阨里矣。其地东枕大壑，巨浸稽天，铤而走险，即沮洳余沫，皆为逋逃藪，欲操三尺索之，不得也。故令吾邑者，视弹丸黑子率易之；而法有所穷，又率盱衡难之。要以邑非难易也，令自为难易焉。束湿者蔑恩，欢虞者寡实，鹜者犷，而攫者痹。抚后虐仇，斯民犹直道而行，则大较可睹已。自邑之得李侯也，民始犹望其色，退然若有以自下者，曰：“侯长者也。蒿目而忧吾民之饥且溺也。”既而示其令，颯然若画一。曰：“侯神君也！察而娴于理，不可干以私。”又既而习其政，信若四时无私若天地，则又曰：“侯洵父母也。吾侪日衣日食，庸知为谁之力。”曩岁骄阳扇虐，都鄙告浸，侯露盖眵湿中，口籍而手拊循之，发陈粟赈其乏，而蠲其宿逋，民未尝有菜色也。村氓以输税入廓，望令若神明，震慑股弁。侯人人劳苦，命自输自緘入棧中。赋长不得干没，吏不得横索，伍伯不得谁何。民有事陈牒，侯匡坐而听，不直者褫其衣辱之，不帅则摘之，又不帅则赭其衣为城旦舂。不闻有钩金束矢之罚。民晓然知令旨，勿敢复讼。诸博士弟子，乘间执经函丈，互质所疑，侯湛然应之，无不人人厌其欲。形容筋骨之外，所赏拔皆知名士。士之相先继冠天下者二，奏名南宫者九。迩时，习浸痲，而不急功令，战多北，侯心弗善也。为之新黉宫之制，捐月俸数十缗，度地鸠材，百堵俱作。环桥内舍，翼如翠飞。士洗然易观矣！日者，较艺之役，斋心而吁之，持衡而甲乙之，不内豪有力者一刺。比贤书上府，輿情大洽。盖自侯之来，民终其身无识皂者，皂终其役无识村落者，村落终岁无闻夜犬吠者。大狙武断，革心伏匿，无敢诤张为幻者；青青子衿，无闻追呼及不见礼貌而反唇相稽者。劳苦而功高矣。天子急上如渴，发尺一诏，下郡国，征诸循良可肩巨任，而侯裒然举首。暂假司马以需后命。于是邑之人聚族而称曰：“夫侯哺我者也，教诲我者也，在



三之义，侯实兼之矣。‘赤子方裸，夺之乳则号；童蒙在髻，失之傅则佚’。侯朝去而民夕惴惴焉，愿偕诸父老执其轍，万一得请如寇河内故事，则吾侪命卒之日也。”止之者曰：“侯社稷臣也，其不薄百里而屈驷衰之足，以生聚教训之，上之赐吾邑侈矣。一官七载，积薪是惧，主计者将以侯为栋，俟合抱而后并力举之。矧兹辽烽告警，滇氛未靖，中外所倚畀高贤大良，若川之有楫，不能旦夕濡滞，而二三子何睹其细乎？无已，请以七尺之石，竖一家言，使诵者企德，瞻者起敬，以自附于甘棠勿翦之义也。”于是，荐绅先生暨诸士庶，众谋僉同。而介茂才陈韶凤、陈韶征等以修辞属不佞，不佞盖难言之矣。在昔倭夷内讧，民无生色，崇墉保障，以肉白骨，则詹侯擅其烈；迨夫赋政蠹极，盗贼蜂起，新布令甲，以出水火，则蒋侯殫其思；至今穷发老羸，在在尸祝之，迨我侯而三矣。第昔也因其所难而难之，则草创较易；今也狃于所易而易之，则更辙滋难。故侯之功深于詹，而其苦心倍于蒋，此侯所未尝自言，而人所未及知侯者也。抑不佞又闻之天下之事，未有不克于难而败于易者。今之上高拱而下将迎。庶绩已坠，边衅渐动，言之者循故事，而行之者无实政。相与于于然泄泄然，若燕雀之处堂，无他，易之也。侯行矣，任滋崇则难滋甚。天下虽大，固一邑之积也，四海且拭目以观矣。贞珉不毁，请征余言为券。再拜稽首而铭，铭曰：穆穆我侯，克明其德，美且都矣。百里弹丸，如雉斯哺，口卒瘁矣。犬足生鼈，日出而作，入而庐矣。木叶绸缪，茹文饮化，茁枯株矣。光天海宇，汝乃底绩，帝曰俞矣。四牡骍骍，山川云远，畏简书矣。蔽芾甘棠，公归不复，黔首趋矣。首石苍苍，东海茫茫，仰且濡矣。石永不泐，言永不磨，德音俱矣。

### 嘉会堂铭

陈德隆

铭曰：吾陈世居玉溪之傍，前哲燕翼，肯构肯堂。厥名“嘉会”，义重典常。岁时宴飨，仪节孔彰。戚疏俱来，大小咸聚。欢然有恩，秩然有序。献酬交错，礼仪卒度。亲朋萃止，亦复如是。族尊闾闾，时出戒言：“农耕士读，各有攸存。克勤克俭，毋惰毋昏。祖宪是式，祖训是遵。天衷民彝，截然一定。父慈子孝，兄爱弟敬，夫和妻柔，姑顺妇听。克循斯礼，兹会乃嘉。少有悖戾，其如礼何？”顾我翼翼，佩服戒训。淳淳兹铭，用告来胤。

### 潮汐说

陈省

余筑“拟舫轩”於溪桥侧，六月登稼时，则坐卧啸咏于其上，以避暑而观刈。轩瞰潮，昼夜水声入耳，顾识浪情沕纷披，壅阏无能，豁然川上之趣。第于潮之往返，按候而稽，刻痕而验，无凡微爽。然皆庸夫稚子所能知，而消长巨细移易之机，狙于成说，如余襄公《山海经》，程伊川《潮汐论》，与夫邵尧夫《喘息说》，终莫得其所以然。于是展转数日，取诸书论水者读之，又取历书日月星辰之行而参互之，然后涣然不疑，以为其理如是，亦不出乎庸夫稚子之所知。至其所以然，则又化机之妙，真如符契，虽圣智亦莫能损益也。天地间，惟阴阳二气。气有盈虚，自微而著。张子厚曰：“太虚不能无气。”又曰：“昼夜者，天之一息乎？寒暑者，天之昼夜乎？”虚不可见，而见于气。气不可见，而见于昼夜寒暑。识天地之气者，无如张子矣。故观潮汐则知阴阳，观潮汐之消长，则知阴阳之盈虚。程子曰：“海潮日出则水涸，月出则潮复生。”此谓水涸于日出者，非谓水偏于日出之候也。邵子曰：

“海潮者，天地之喘息也。应月者，从其类也。”亦谓朔后三日而潮壮，仲秋月明而潮倍，非谓水偏属乎月也。余襄公曰：“月临卯酉，则潮涨乎东西。月临子午，则潮平乎南北。”此谓东西南北潮有巨细，非谓潮有东西南北之辨也。总之三说相通，而邵子之说更精。天地大呼吸，气有浮沉，则水有潮汐。谓其应月者，气盈朔虚，百刻代变，此其已然之节度也。分至启闭，晦朔弦望，皆因日月之行而定，岂特潮汐哉！气有盈虚，日月之行有迟速。则日出而涸，月出而生，潮于寅则汐于申，潮于巳则汐于亥。或涨东西，或平南北。仲春月落而汐微，仲秋月明而潮倍，皆其盈虚期刻不得不然，此死数也，可得与知也。明天地喘息，识阴阳盈虚者，活数也。惟知历者能明之。程子谓邵尧夫治历，立差法。谓于阴阳交感之际溯之，遂不差。潮汐之论，盖与历法相应。邵子独见以为天地喘息，即阴阳阖辟，验于海水之潮汐。喘则升，息则降。其消长、刻候、平涨、方所，则亦因日月之气盈朔虚以为进退。故尝论曰：“生长收藏，天地四时之大呼吸也；海水潮汐，天地昼夜之小呼吸也。以一岁论，自一阳之复，以至于大暑，自一阴之始，以至于大寒；以一昼夜论，阳生于子，而极于巳，阴生于午，而极于亥。此阴阳消长之大分也。阳主其盈，验于日；阴主其减，验于月。周天三百六十五度四分度之一，日其行不及天一度，月不及十三度有奇。渐远于日，故潮汐之期浸移。日后六刻三分刻之一，一潮汐而再至，故一晦朔而再周。以故有朔望春秋之异候，东西南北之殊涨，阴阳消长之不同，而潮之盛衰去来因之。然而，相去六时以为一定之呼吸，未尝变也。故程子、余襄公与邵子之言相为表里，皆不能易也。要之天地变化有至一者，有至不一者。至一谓神，不一谓化。太虚之中，何所不有？浮而上者阳之清，降而下者阴之浊。万品流行，山川融结，风雨露雷之变化，与夫糟粕煨烬，宁有一物离阴阳消息乎？此心灵明之内，

万物皆备，亦天地也。血气之周流，耳目手足之视听持行，皮毛骨肉之附丽，喜怒哀乐之酬应，宁有一毫离阴阳消息乎？仰观俯察，因有感于潮汐之水，时盛时衰，时盈时涸，为太虚中一物，而刻画期候，不爽毫厘。吾混然中处，得太虚之灵明，而不能考消息之故，察盈虚之理，顺寂感之常，纷纭思虑，聒聒耳目，躁妄手足之运动，奄奄然于血气皮毛之疾痛痿痹，而犹称之为喘息之人也，亦何与潮汐之情状，而犹托于詹詹言云。

### 过吴航书院书事

谢 瑾 邑人

常袞作闽观察，见人多椎鲁，家鲜读书，乃发官缗，设立学校，命州县广布庠序，经营规制，凡所构五十余房，千二百余室，擢秀良於学中，延名师以教之。于是人争自濯磨诵习者，不下数万人。吾邑自贺侯振兴文教，相阴阳于塔山之下，既建吴航书院，复捐廉俸四百金存质库取息以充膏火，嗣又虑质库非久远之图，就邑西关外隙地，新辟店房四十余间，年按店收息，为膏火资。余过书院讲堂，见窗舍棋布，虽漏下五鼓，而子夜书声，若出金石，藜灯莹莹，光芒四映，因不禁忻然有邹鲁之感焉。夫常袞用之全闽，而全闽之儒术用兴，我贤侯用之一邑，而一邑之文风永振。古今来，大用大效，小用小效，信哉。贤侯善政多矣，偶书其事，亦足为主持教化者示之程云，时癸未季夏五日也。

### 文庙告成颂并序

教谕郑殿佐

昔鲁泮修而史克作颂，晋雍启而王虞摛词，凡以美学校兴，而教化行也。贺侯来宰是邦，锐意振作，百废具举。而推广我圣天子右文雅化，倡邑绅士合力经营，修整学宫，重

建奎阁，堂庑斋舍，焕然一新，佐滥竽司铎，亦得与观阙成，可不谓幸焉。聊撰俚语以颂，并以勤勉邑诸生观感兴起，无负贤父母振兴文教之至意云。

维兹长邑，代毓名流，泮宫璧水，芹藻香浮。岁久剥落，邇佚前休，莅兹土者，因循是偷。贺侯戾止，慨然兴修。捐资率作，周爰咨諏。兴废举坠，夫谁与俦？往仍简陋，今焕文明，往但补葺，今实新营。华其轮奂，高其闲闼，充牣美富，室邃堂宏，车书礼乐，聿观厥成。文治以洽，文运以开，六平、首石，嶺翠巍崔，有鸣必应，叠占元魁。符讖在昔，重卜将来，多士济济，咸沐栽培。维侯之绩，于山有恢。

### 邑侯贺相皋德政颂并序

陈永书

盖闻子弟田畴，郑国进公孙之颂；衮衣章甫，鲁人兴尼父之歌。宰百里提封，岂曰烹鲜小技？奠一方绣壤，端资制锦鸿才。恭惟相皋邑侯，江右名家，安成彥士。袭当世儒宗之遗业，代累青缙；标四明词客之清规，韵流黄绢。弱龄游泮水，旋颁廩饩于黉宫；壮岁捷巍科，遂振休声于仕版。既优繁剧，更擅治平。始玉融而继怀恩，醴政羨牛刀之试；由德政而迁永定，弦歌留棠荫之思。岁在丙子，篆绶吴航。瞻言四境，每多鸛鹤之形；历览七乡，不少荆榛之地。而公相其利弊，以次兴除；审厥秀顽，递申勤董。筑陂塘，开港浦，三农无旱潦之虞；捐膏火，辟讲堂，多士若风云之萃。庙祠并建，千余年礼典维新；志乘增修，百二载幽微必阐。以至城池衙署，重振前基；道路桥梁，聿恢旧制。广搜俊彦于文场，三拔英才于棘院。安昌桃李，尽入公门；闽海珊瑚，胥罗铁网。平情折狱，廿四都服敬畏神；洁已爱民，千万户歌



功颂德。书草茅下士，樗栎散材，夙深御李之怀，幸遂瞻韩之愿。猥留志馆，属与纂修。蒙抚字者八年，如睹祥云化日；奉光仪者四载，久披弄月清风。不揣鄙俚，聊申诚悃。

颂曰：“我侯质媲西江月，烛照寒潭清且彻，高悬金镜让澄明，不淬玉壶同皎洁。万象一轮含，印川探理窟。我侯气若西山云，嘘来郁郁复纷纷，出岫无心偏纪瑞，凌霄有象且成文。为霖施海峤，苍赤仰神君。我侯化比西山雨，飞度衡庐越旗鼓，河阳春满发花丛，首石风来盈斥卤。润物悄无声，沐膏咸鼓舞。我侯泽沛西江水，襟洞东注润千里，澜翻桂棹达迷津，浪涌桃花腾化鲤。涸鲋沐汪波，康歌盈乐只。

### 吴航辨

训导范光表

邦国风土之有别号，旧矣。或以山川，或以名物，或以迹以事。长邑之为吴航，则事也。旧说以为吴王夫差造舟于此，窃疑之。《山海经》云：“闽在海中，有山曰闽中山，故后人以福建为闽。”《汉书》：“夏少康封庶子无余于会稽，二十传为勾践。”夫差与越同时，闽在会稽之南，吴固未尝跨越而有之。又周成王封熊绎于荆山，五世熊渠得众心伐庸，杨越至于鄂，立少子执疵为章越王后。自濮如蛮为七种，谓之七闽，亦不闻属于吴。考是二者，吴王夫差似不应于此有造舟之事矣。夫事之在境外者，史必书之。稽《吴越春秋》及丛书，亦未有见。后汉吴孙权据有江东，尽瓯越之地，南连闽粤，极于交趾，建国自立，前后四传。《吴书·江表传》：“孙休三年，以会稽南郡为建安郡。”建安郡者，即后之改为晋安，为闽州，为长乐郡者也。凤凰三年，吴孙皓遣送会稽太守郭诞作船建安，后又责侍中张浩赴建安作船，惜当年未以山川实其地，然传与会稽录甚明，而闽他郡志无载建安作船之事。长

邑独号吴航，意吴之作船或在于此。长邑之取号，当亦不能他属也。《礼》入国问俗，师其意，偶辩及此。言无关于重轻，事匪系于失得，聊以资谈证云尔。夫时迁代久，文献难稽，独吴航事已哉！

## 前 题

县令卢择元蔗香

长乐古新宁县，在十二都。唐上元元年，移县治于六平吴航头，相传吴王夫差曾造舟于此，因名吴航。呜呼！是名也，乌可训哉？夫夫差所造之舟，为游舫欤？则荒淫之渐也；为战舰欤？则争杀之阶也。地以是名，保无有盘游无度，与好勇斗狠为吾民之莠者。古之人诃不为风俗忧，而以是名侈欤？长乐在周为七闽地，附于越。越虽与吴近，而闽地固未为吴有也。越行成于吴，勾践方栖于会稽之上，越地亦未全入于吴也。彼夫差者，必不能越越人之都邑至二千余里之远而来长造舟。且吴既得志于越，遂勤中原艾陵之战，有事于齐，黄池之盟，争长于晋。已得之越，且弃不有，亦何暇略地至闽之海滨耶？或又以为三国吴孙皓时，尝遣送会稽太守郭诞作船建安，又责侍中张浩赴建安作船。建安唐改为长乐，长乐号吴航，或由于此。然三国时之建安郡，唐时之长乐郡，具统闽中地，非必今之长乐县地也。况孙皓慢游傲虐，甚于夫差，其作船事尤无足取。余窃仰观天文，俯察地理，而知吴航之名，其取义别有在也。盖长属扬州，其分野为星纪。《宋史·天文志》云：“天市垣二十二星，东西藩各列十一星。其东南垣第六星曰吴越，为星纪之次。”《元史·历志》云：“斗四度三十六分六十六秒取入吴越，分为星纪之次。”此吴所由名，与其邑西引江流，东接溪水，曰南河，曰新渡，曰连江，曰马头，环城借以为固，而潮汐往来，舟航四达。殆古所称扬帆挂席，驰马逐龙者。航

之名詎不以此？余来斯邑，方将与士民崇廉朴，兴礼让，跻一方于仁寿，追三代之敦庞，使四境之内，永无奢靡邪侈及鬻凌争竞之事，用以仰副我国家黜华崇实化暴安良之至意。旧说附会，皆不足信也。因不揣固陋，而为之辩。

### 送游礪田侍御归田文

朱士彦

《传》有之，见有礼于其君者，事之如孝子之于父母也。士彦年六七岁，读稗官，观演杂剧，见所谓忠贞之行者，辄泣下不能自禁。少长能窥史，于古名臣嘉言懿行，爱之慕之，谓当吾世而有此人。则北面事之矣。其后闻有所谓三君子者，心向往之一如古人然。其时年稚弱，足迹不出里门，无由亲炙其人也。今年幸得第授馆职，知前辈有彤鹵先生者，可以上比古人而不愧于三君子者矣。急欲一见之，值先生已陈情乞归养，乃争走送先生，且言曰：“先生闽人也，去士彦居数千里，其素行无由得知，而先生之官谏垣，能尽其职，则天下莫不知。先生在谏官未久，又未尝以草示人，其建白固无由得而知，而天子谓其疏仿魏徵十渐，则天下莫不知夫君亲一也，畏道者非忠臣，遂得为孝子乎？绝裾者非孝子，遂得为忠臣乎？先生既受天子之深恩，思以身报。而仰体孝治天下之意，亟归养其亲，不敢亏为子之谊也。先生虽归，必不以私恩忘公谊，盖洗腆上寿之时，乃心无不在乎阙下也。古人谓求忠臣于孝子之门，于先生见之矣。”

## 长乐县志卷二十一

### 列传一 名宦

天下惟县令为亲民之官。县令贤，则一县治；县令尽贤，则天下皆治。故欲治天下者，必先慎选县令。长乐建县始于唐，自宋、元及明、清，计千有余年，历任不知凡几。求其视民事如己事，不愧贤父母之称者，屈指终居少数。然正惟其少也，尤不可不志。后之君子流览遗篇，详稽治法，犹有甘棠遗爱之思焉。至丞、尉、教官、营员，皆分佐县令以治事者也，克称厥职，例得备书。传名宦。

#### 唐

殷尧藩 秀水人。元和九年进士。从李翱长沙幕府，后为长乐令，有治绩，擢侍御史。（乾隆贺志）

#### 宋

李 葺 太平兴国间为县令。尝言：“守令为民师，帅脱有秕政厉民，使和气未洽，灾眚不销，咎将谁诿？”遂昼夜勤政，兢兢不懈。濒海沙京、屿头田患鹵斥，教民筑堤防御，遂成沃壤。祀名宦祠。（乾隆贺志）

吴仲举 皇祐间宰邑。赈贫民，杜私谒，清操凛然。尝作惜阴轩于县署，又作弦歌亭。其勤政敷化，意概可见。祀名宦祠。（乾隆贺志）

闵希声 皇祐末令邑。劝课有方，催科不扰，抑强植弱，周贫苏惫。即其勤政惠民，虽古称循良何以加焉。祀名宦祠。（乾隆贺志）

方次静 志作彭。字公述，兴化人。皇祐初第进士。历六县，皆有治绩。嘉祐间宰长乐。作兴土类，爱育元黎。铨曹课最，擢知梅州。后以老乞归，赐五品服，致仕。（乾隆贺志）

萧 竑 熙宁中宰邑。下车即询民瘼，周爰若弗及。振举百废，尤究心水利，根括十七都、二十四都诸湖侵地。斗门石上有古篆记。祀名宦祠。（乾隆贺志）

徐世英 继萧竑为令。以清慎著闻。不尚威严，而民自化；不事媮阿，而名益彰。尝岁旱祷雨辄应，人以为德政所感。祀名宦祠。（乾隆贺志）

伍择之 字元宾，汀州宁化人。太常博士通判饶州伍祐之子也。博学有器识。皇祐进士。初调南丰簿，擢秘书监。元祐初，出宰长乐。时诸司暴酷相矜，辄兴大狱，乃蹙然曰：“以残忍附上官，非我志也。”遂弃官归。（乾隆贺志）

袁正规 字道辅，陵阳人。元祐三年来任邑令。约己裕民，皆有足称。兴利除害，惟恐不及。暇则论文赋诗，绰有古儒吏风。尝于县治东二里，凿义泉以济行旅，又兴水利浚港以溉民田，人名其港曰袁公港，正规不有其功，易名为元祐港。祀名宦祠。（乾隆贺志）

陈可大 字齐贤，兴化仙游人。父汝器，喜积善，有飞钱之异，祝曰：“愿一子大吾门，足矣，奚以钱为？”可大，政和中登进士。调漳州工曹兼右推辨，折冤狱，人服其明。绍兴间，改知长乐。捐俸大修陂塘，民为立碑，记其功德。又镌石名其津曰陈令津。后擢知肇庆府。去任之日，惟衣衾书籍而已。官终朝请大夫。（乾隆贺志）



吴一鸣 字伯大。绍兴五年进士。初官佐贰，用漕帅康维新荐，令长乐。革势家，寄庄田，勤督运。时有盗劫卢尚书家，获所遗刀，悉召示铁工，廉知为泉州巨贾之从人，亟以计获之，一讯而服。祀名宦祠。（贺志）

王 遇 字子述，一作子合。号东渊，漳州龙溪人。父羽仪，贤而有文章。遇受业朱熹、吕祖谦、张栻之门，与陈淳、黄榦、廖德明相厚善。登乾道二年进士，调令长乐，悉以所学施之政事。教抚黔黎，使知礼让。所著有《论孟讲议》、《西汉博议》。仕终左司郎中。（乾隆贺志）

方 翥 字次云，号西轩，莆田人。宣义郎威武军节度推官方元案之孙。从兄略，官广东转运使。储书千二百笥，谓翥曰：“次云不出户十年，当移吾书人肝膈矣。”翥既第，不涉仕途，十八年尽读之。淳熙间，由藤州教授迁长乐县令。庄以莅民，诚以应物。常以致知慎独教学者。元案与二程讲学，翥既有家传，又师事朱子，而与林光朝、施廷光、陆子静、陈昭度为友。其为政可知也。（乾隆贺志）

陈昭度 仙游人，少有高行，长即明道讲学。与林光朝相友善。方翥为秘书省正字时，昭度每钦礼之。绍熙间，第进士，授长乐县令。为政一遵方翥成轨，民多德之。（乾隆贺志）

## 元

吕 复 初为江西行省左右司都事，与广东金事获独步丁同寓福州，后复调摄邑事。明兵下福州，复谓步丁曰：“吾世食君禄，当死报国。”遂引绳自经，获独步丁亦投井死。祀名宦祠。（同治彰志）

丁德孙 字惟一，浙江鄞县人。至正间莅任。崇学校，简词讼，去后见思。

## 明

邱宗亮 直隶江阴人。洪武十二年知县事。勤政爱民，务存宽厚。丽土之民，各获其愿。尝缮修文庙，建山川社稷坛场，兴举众废，绰有成功。祀名宦祠。（乾隆贺志）

王遵道 直隶苏州人。永乐中宰邑。专务以德化民。省刑薄敛，兴废举坠。尤崇学政，立射圃，贤声振起。及应召入京，民为攀辕卧辙。祀名宦祠。（乾隆贺志）

詹奎章 江西人。永乐中，由监生任知县。政平讼理，境内清平。庄以莅民，明以烛奸，廉以律己。吏畏其明，民怀其惠。（乾隆贺志）

齐普 山东人。宽裕博雅。事亲以孝闻。宣德间，由选人任知县。明达治礼，躬行以率民，民服其化。（乾隆贺志）

龙韬 曲江人。正统间任知县。平易得民。尝建退思堂于县署，公余退食，则静坐省愆。又尝修城隍庙暨山川、社稷、邑厉等坛。治绩尤著。祀名宦祠。（乾隆贺志）

黄琬 丰城人。成化初，由举人任知县。为政严谨，门无私谒。听讼，吏不能欺。济贫，恤孤，筑塘坂，修道路，凡利于民者必先之。莅任四年，卒於官。（乾隆贺志）

汪正 祁门人。成化间由进士任知县。忠信明决。属掾屏迹，莫敢有舞文者。尤有惠政及民，民常怀之。（乾隆贺志）

罗叙 吉水人。成化间知县事。平政宰民，宣协风教。尝值岁旱，祷雨即应。治邑七年，兴百废，均赋役。恪守官箴，始终如一。（乾隆贺志）

潘府 字孔修，号南山，上虞人。弘治三年，以进士知县事。尝以三事自守然：清不激，慎不拘，勤不扰。尤平易近民，对百姓如妻子，每芳辰佳节，辄缓游郊外，与民借乐。有求歌咏，欣然应之。尝作桥于河之浒，以渡行人。改南山寺为书院，暇则与髦士讲学其中。建观稼亭、劝农亭，改邑内诸佛宫为乡约堂。遵

行朱子损益蓝田《吕氏乡约》，以正风俗。时以循良称之。官至太常卿。祀名宦祠。（乾隆贺志）

钟 绍 字大韶，东莞人。由进士初知崇安，以才堪烦剧，更任。清谨勤约，始终一节。尤重风教，境内有孝义廉节者，必核请表扬之，士习民风为之丕变。邑人称颂久而不衰。（乾隆贺志）

龙 琰 常德人。正德十年，由进士任知县。持己端庄，敷政宽平。时镇守檄郡行邑，屡有需采，琰重扰民，辄峻拒之。（乾隆贺志）

杨 麒 字仁甫，号四泉，上饶人。嘉靖元年，由进士任知县。未及期，以制归。麒宽洪长者，政尚安平。民有弗类者，必谕令改悔，故民亦鲜丽于法。尤劳心抚字，救疾膏，恤饥寒。虽施泽未久，而一旦去任，民若失怙恃。越十年余，麒之弟麟判泉州，道经县治，百姓遮留，问麒安否，至有泣下者。仕至工部尚书。（乾隆贺志）

汪 瑄 字谐甫，婺源人。嘉靖三年，以进士任知县。性惠慈，政尚简易，不事炫饰，而民安之。四年，夏旱秋潦，饥谨荐臻。瑄多方赈恤，复躬控大府，丐为发仓。郡守汪文盛因与瑄具疏以闻，诏蠲是年田租。民为之歌曰：“天降殃，岁卒荒，不有二汪，谁立我僵？”（乾隆贺志）

曾 铤 字子重，江都人。以才自豪。嘉靖八年成进士，授本县令。莅官严明，夙弊多所厘革。征为御史，巡按辽东，平乱卒于蛮儿等，擢大理丞，迁右佥都御史，巡抚山东。俺答数入内地，铤筑临清外城。进副都，改抚山西，寇不犯边。进兵部侍郎，巡抚如故。嗣以原官督陕西三边军务，屡歼寇兵，累赐银币，增俸一级。疏论河套条八议，又上方略十八事，帝始倚赖之。后严嵩欲倾夏言，并潜铤，阴令仇鸾于狱中草疏，诬铤克军饷，掩败不奏，坐斩。隆庆初，给事中辛自修、御史王好问讼其冤。赠兵

部尚书，谥“襄愍”。（乾隆贺志）

何应和 字景阳，号大溪，东莞人。由举人嘉靖十七年来令邑。莅任不挈妻孥，官舍阒然。时岁稔民饥，躬控缓征，发仓赈贷焉。南北乡耕获异齐，里胥以时辄更休暇，不以税办妨民事。民或讹造大辟，辄款款谕归，俾熟筹之。无已，然后逮鞠，久而民信，遂无嚣讼者，闾落晏如，不见勾捕之扰。编徭役必手自品第，属掾无所售其奸。暇则课僮仆治畦，蔬素自给。出则携糗以从，若寒士然。他若周急扶危，铲豪屏秕，有难尽述。岂繁赤子视民，亦直以慈亲况已耳。六年擢通判，寻转知州，致仕。（乾隆贺志）

吴遵 字公路，号初泉，海宁人。嘉靖丁未进士，授长乐县知县。廉勤通敏。为政务兴利除弊，育才宣化。县有废寺二，曰观音、岩泉，寺田若干亩，豪右将攘之，遵悉取以充学校，为肄业膏烛费，诸士德之，像祀于射圃之寝堂。县赋例输三百石子万安仓，民艰远馈，遵为申请得改福清仓，民便焉。马江诸渡税，积逋千余缗，久之，贫莫能输，遵请蠲之，其人树碑于江浒以颂德。邑有高允实者，诬并戎籍，遵廉得其状，力为解脱，其家绘像以祀。赴召之日，耄稚泣送于途。后拜监察御史，迁太仆寺少卿。（乾隆贺志）

詹莱 号范川，常山人。博学雄文，尤邃于歌行，绰有汉、魏之风，嘉靖丁未进士。下车，即明法令，申教戒，期于戢暴洁奸。其风裁英果，应事如流。暇则尽脱畦畛，登眺赋诗，洒然不为俗累。时浙东岛夷陆梁，巡抚御史王忬檄城长乐，遂以身任之。多方经划，俾费不及民，民亦乐于趋事。城成，莱旋改任，寇亦奄至。自乙卯迄癸亥，每春汛，烽警无虚日，民有所恃以为归者，莱之功也。官至湖广僉事。（乾隆贺志）

蒋以忠 字伯孝，号贞庵，常熟人。性沉颖，精研博采，为文清新婉雅，超然于笔墨蹊径之外。隆庆戊辰进士。来令邑，首

罢里胥诸繁费，免赎金。去税入之耗，却商佞征。复滨涧湖、射圃学田。城内外坊衢桥梁多所营砌，以至公馆、社学、养济院，百废俱兴。又创竖干之法，定福清仓常直。编里役尤公。惠绩久远，民不能忘云。（乾隆贺志）

韩绍 号怀愚，湖州府归安人。由隆庆辛未进士来任。自蒋贞庵行后，邑鲜善治。公至，廉节自励，催科以时，剖讼明恕，吏胥罔敢舞文，僚属遵法自守。邑人翕然称之。适岁霖雨，绍虔祷雨息，邑以有年。擢给事中。子敬，庚戌会、状两元，即邑署所生也。（乾隆贺志）

郁文周 字文叔，江阴人。万历中知县事。存心爱人，操履耿介，缓征恤寡，诘盗惩奸，修水利，兴学校，士民戴之。以疾去，卒于家。（乾隆贺志）

李奇珍 号四可，浙江嘉善人。万历辛丑进士。下车即禁公买，凡用物适准民值。编审里役，秉公无徇。邑向多窃盗，虽行刺配，辄逃归，奇珍为久锢之法以困之，盗为绝迹。训文飭武，文风丕变，武备一新。时有议凿岭柄港者，奇珍为禁止，所全甚巨。遇旱步祷，甘霖立至。册封使者至，一遵成法，导之出海，民不为扰。清直恬淡，性尤神敏，所见入终身不忘，去邑既久，遇邑民必遥识其名。在邑剖断如神，民怀吏慑。擢居兵垣，官至太常少卿，即隐居不出。子弟俱贤者，循政之报也。（乾隆贺志）

郑尚友 号月庵，浙江杭州人。崇祯辛未进士。博学好道，悃悃无华。治邑惟慎惟执，朝夕皇皇，不自暇逸。建五贤祠、崇正书院以训士，清复滨涧湖以惠民。移小社巡司于大祉。遇旱步祷，民以有年。惩盗用久锢之法，盗咸屏踪。册封使者，有所苛索，力以故事争，不令扰民。扶弱锄强，四境肃然。擢工部主事。旋病歿，萧然壁立。知县夏允彝请祀之学宫，云：“硕学宏才，设诚致行。视国如家，爱民若子。执三尺之法，岳峙难摇；怀一介之操，



冰清莫染”。咸实录也。(乾隆贺志)

**夏允彝** 字彝仲，号缓公。嘉善籍，华亭人。幼颖悟，长文学，为几社巨手。崇祯丁丑成进士，次年知本县事。始终七载，诸弊悉除，百废俱兴。民戴如父母，钦若神明。岁旱，祷雨立应。四时考课，上下游士子咸就正焉，一时文风丕振。公余修纂邑乘，皆手自编辑，一秉至公，遂成信史。福藩时，擢为吏部主事，晋礼部员外郎，长之士庶如失怙恃，为立生祠。南京失守，公与兄之子旭、子完淳举家投淮。经济文章萃公一身，而忠义孝友又萃公一门也。长祀公于名宦祠，华亭亦祀公兄弟父子于忠义祠。(乾隆贺志)

### 清

**吕鸣纯** 扬州人。进士。顺治初知本县事。时兵燹后，百务未兴。鸣纯修废举坠，劝学兴文，尤善评文。所识拔如陈书、李靖、黄有树、林千里、梁大木等皆知名士。又捐修文庙、学宫、射圃。至今诵之。(乾隆贺志)

**李岱生** 号千岩，高密人。顺治戊戌进士。康熙初知本县事。洁己爱民。时值迁界，应迁入户恐有粮无地，半逃散。岱生莅任三日，即力请大府豁浮赋，广招徕。再三陈请，备写困苦情状，读者皆流涕，竟停格不行。官满受代去，泣送者凡数千人。(乾隆贺志)

**傅宸楹** 高密人。博学能文。以进士任本县。分闈所得，多知名士。时诏下清丈田亩，宸楹星轺露处，逐区详定亩数，精明勤慎，吏胥无敢扰者。以劳致疾，卒于官。民为立像祀之。(乾隆贺志)

**杨儒臣** 号又东，江南青浦人。以荫生授官本县。清廉风雅，善诗能书，尤工水墨。下车即兴起文学，儒风丕振。闽、侯、长、福四学，弟子员额各十五，至是并增至二十，春、秋闈获隽者累

累，皆杨鼓舞之力也。

卫良佐 号鹤洲，钟祥人。嗜学工文。康熙间举于乡。五十二年补邑令。性朴直，不事修饰，及莅事，详明当理。崇儒士，兴文教。尤留心水利，开文洽浦，砌莲花堰，修南陂，诸废俱举，至今民食其利。邑有齐圣王庙，愚民崇奉若狂，佐撤毁，改为义学，祠朱子，众服其守正也。论曰：“公在，邑人多称其慤，观于兴利举废，重道崇儒，其慤也，其贤也。汲长孺可以慤少之哉？”（同治彭志）

胡宗文 金溪人。举人。雍正五年权知县事。吏治精明。六年荒旱，宗文请于大府，赦粮六千余金，民德之。后擢本省粮驿道。（乾隆贺志）

杨方江 山东长山人。进士。居心仁厚，廉洁恤民。本邑食盐向系听民贩鬻，肩负日以千数，嗣奉撤归官，方江悉心措理，公私利赖。不久解组去。民至今思之。（乾隆贺志）

戴永朴 乌程人。举人。勤敏果断，重士爱民。县东文洽浦潮水直入泮池，为邑中水利所关，久经淤塞，永朴慨然捐俸，率先开浚，士民亦踊跃劝工，筑砌成堤。滨涧湖年久被侵，永朴亲巡视，达大府得旨豁除浮粮，还湖开浚，画界立碑，永除积弊，灌溉民田七万余亩。立祠祀焉。（乾隆贺志）

廖兴镇 衡阳人。乾隆三年，以名孝廉知县事。居心仁厚，爱重斯文。省刑缓征，所施多善政。尝修林忠烈伸蒙祠，浚龙湾港，创造桥闸。莅任未久去。士民思之。（同治彭志）

黄瑞鹤 号来远，西充人。乾隆十四年，以进士来知县事。重厚和平，廉洁自好。待士以礼，爱民如子，至不忍急切催科，重迫百姓。去官日，宦囊萧然，士民醵金赠之。迄今童谣犹曰：“黄鹤再来天有眼。”盖百余年未泯云。（同治彭志）

贺世骏 字拔伦，号相皋，江西安福人。雍正己酉举于乡。乾隆己巳以嵯务入闽。报满后，历任德化、永定，所至有政声。丙

子调长乐。政平讼理，百废俱兴。砌南坝，修陈塘港，清厘东西二湖及长林、桃坑等湖。又增修文武圣庙，复射圃。设义学，移建书院，置膏火费，公余聚诸生讲论。邑乘年久未修，延邑人林调燮、郑愈、陈九鼎等襄其事，而亲笔削之。甲申行取入都，邑人士各献诗以荣其行，名曰《百里同音》，盖纪实云。论曰：“公家居为孝廉，二十载不事躁进。尝曰：‘读圣贤书，处不为伪儒，出不为俗吏，乃不虚所学耳。’及为政，果践所言。然则，为儒者，为循吏，公一身兼之，顾非讲求有素哉？”（同治彭志）

**李 鐸** 号星庚，浙江余杭举人。嘉庆五年任。廉明英果，摘发如神。有蠹役某，素不法，闻鐸至，即深自敛迹，每日在仪门下，见人进谒，必向前恳恩曰：“为某说好话，今已改行，不复梗盛治矣。”听讼勤而治狱恕，凡有巨案，从不株连，民德之。性喜造士，有知人鉴。观风首取郑孚诚，正士也，月给米炭，终任不衰。三次校士，案首皆得人，董鸾、陈玉铭、王登三是也。莅任五年，调台湾，卒于官。邑人士皆思慕焉。（彭志）

**杨清轮** 号漪园，阳湖名进士。嘉庆十二年任。以造士兴文为急务。重修书院，广增膏火，聘名宿李学莲作之师，择正士郑蔚然董其事。每公余即诣讲堂，与多士谈经史、论文章，间或削墨引绳。邑人士德之，祠诸书院，以媿贺公焉。在任前后凡十三年，清不刻而慈不懦，恩威并用，风俗以醇。尝三卸县事，其去也，民思之；其回也，民喜之。曰：“我老爹又来也。”宦久，识土音，闻之殊喜。擢南台海防，升汀州府。以在长乐时洋案失察，部议归。年届古稀，犹主讲席者十余年。

**褚 登** 号宣台，靖江人。由庶常改知县。以道光十五年署县事。爱民重士，除暴安良。邑十四都之杜母岭为来往要冲，无赖子聚集其间，肆抢掠，设拿人馆，行人苦之。登阴戒壮丁，夤夜擒其党，火其庐，北乡以靖。又有昆石某者，素不法，号煞神，

为一方害，登设法擒之，而南乡以靖。甫半年去，众跻堂为之寿，并醖金赈之。盖自杨公以后，称贤令尹者，首指屈焉。（同治彭志）

崔蓬瀛 字松如，安徽婺源人。以名孝廉部选长乐知县。甫下车，即以人心风俗为己任。有奸民毒毙其子，以命诬族人，蓬瀛详慎推验，识破其奸，律以反坐。邑俗，妇人殉夫，必择日筑高台，悬赤绳其上，妇冠服登台，向四面作播谷状，戚族环拜，扶投环以殉，积习相沿已久。有西隅某氏夫死，孤又夭，氏欲殉亡，筑台行有日矣。蓬瀛闻之，召夫家亲属喻以理，著无令氏缢。众有难色，蓬瀛凛然曰：“矫激之行，有干厉禁，氏若为谅自经，当以见死不救罪尔等。”众惧而事止。蓬瀛莅长者五，多善政，其终去也，士民绘图歌诗送之。名曰《攀辕集》。

彭光藻 字敬轩，湖南武陵贡生。先任福州海防同知，同治七年间权县事。丰裁严峻，人不敢干以私。摘奸发伏，出人意表，吏胥惮之，至有自经者。邑承前令姑息之弊，乡民愍不畏法，携人械斗习以为常；光藻捕其魁，置之法，俗为之变。听讼必坐堂皇，数言间两造各折服而去。有无赖子犯窃，逮至堂下，不施鞭朴，但谕令改过，资以治生；遣去后，其人卒不复蹈前辙。县志久芜缺，礼江西杨希闵、邑人黄见三、陈赞采辑而论纂之，甫蒞事，以代去。

徐承禧 字心燕，江宁六合监生。光绪二年权县事。有干济才。县陈塘港、东西湖，资以溉田者二百余村。道、咸以来，水道日缩，旁成沃壤可稼穡，乡民攘而艺之，因以构讼。承禧慨然曰：“水利不修，狱讼繁兴，此有司之过也。”躬诣履勘，以陈塘港迂曲易淤塞，于是相形势购民田而改浚之。工竣，继修西湖，其被侵为田者，悉清复之，并规划善后事宜，以绝争端。东湖已克日鳩工矣，旋卸篆。位官五载，百废俱兴。凡筹款增吴航书院膏伙，修各庙宇，置祭享田业，靡不悉心经划，期于民不扰而事举。



濒行，犹以东湖未浚为憾。士民怀其德而祠祀之。

邹舒宇 江西人。光绪八年，以拔贡知县事。洁己爱民，勤求治理。有巨族纠抢案，舒宇严厉缉捕，痛绳以法，阖邑肃然，无赖者为之敛迹。遇案牍，必细心讯鞠，务得其情，吏胥不能上下其手。素好士，尤矜恤寒峻。鹤上陈鸿慈，舌耕糊口，贫病交加，舒宇赠以金，俾资朝夕，士林德之。旋升署延平府知府，以病归。

陈受颐 号尺珊，浙江鄞县人。以庶吉士改知县。光绪十四年令长乐。前官某语之曰：“邑俗犷悍，号难治，非严刑不足以示威。”受颐蹙然曰：“天下岂有不可化之民哉？所患者诚未至耳。”自是一意噢咻，以宁静宽仁为主。延见里老，询民疾苦，利弊悉与兴除，民欢乐称便。寻卸事，士民议赴省攀留，受颐闻而止之，曰：“官之去留，权操自上，非尔等所得干。”两次分校乡闾，称得士。后升永春州知州。

樊明逵 号敏斋，湖北人。光绪二十三年，以监生知县事。勤恤民隐，谳狱务得其情。讼之难决者，则密探舆论，而曲直之。乡有掳人，必躬诣按治，以故，胥吏无所售其奸，而浇风衰止。英国商船以触礁飘沉邑牛角山下，估售美商，美商代理人吴某，指该处附近某某村居民捞匿货物，诉于领事，索赔偿数不贖。大吏符县查追，并檄员会办。明逵会同委员，携吴某诣乡，按户搜索，无据，吴意沮，而患令之不左右之也。明逵窥吴狡狴，恐其复唆领事交涉，乃留吴署中而优待之，遣急足禀请通商局，迅咨该领事销案，事以得息。逾年，移知福清县。去之日，送者遮道。

以上知县。

### 宋

陈维德 字徽之，兴化莆田人，左仆射陈靖之孙也。天禧四年任本县尉。邻邑有斗而服毒死者，狱成，檄维德覆验。维德以计察其诬，白之。时年十九，吏民初以年少易之，至是乃大服。庆



历间，举能吏，治广南，除知雷州，官至虞部员外郎。（乾隆贺志）

陈之邵 同郡侯官人。操履方平，博学好问，尤长于诗。绍圣四年，以通经硕儒，登何昌言榜进士。佐县奉宪持廉，端己惠下。尝治水利有功于民。仕终朝奉大夫、宗正少卿。祀名宦祠。（乾隆贺志）

诸葛悦 淳熙中任长乐簿。时前丞相史浩帅闽部，不轻以狱讼畀属吏。雅闻悦贤，辄委事，悦以理平决，不规大府意为是非，丞相益相知。延幕中，幕中故盛宾游，唯悦一话一言无裨益不出口。浩自喜晚得士，礼与己敌。将荐之朝，而悦死矣。著有《易经语注》。（同治彭志）

赵文孙 字道鸣，初名必绛，宋宗室商王之九世孙也。自绍兴移蹕，属籍南外宗正寺，遂为晋江人。咸淳丁卯，以登极恩赐出身，除长乐县主簿。后宋亡，遂不仕。易名文孙，避处郡庠，不接流俗，专以训诲讲解为事。其文章识论渊懿浩博，为闽南硕儒。（乾隆贺志）

## 明

赵允 字执中，广东潮阳人。洪武二十年以通经干济荐授本县丞。佐政数年，汰奸弊，去苛娆，为民兴利，治绩焕然可观。十一都海塘崩陷，咸潮病稼，允设法修筑，民至今怀之。（乾隆贺志）

张文可 永乐中为县丞。耿介负直气，是非曲直无所挠屈。既莅任，宽恤以子民，明决以革奸。时大尹王遵道博学谨礼，雅重儒先，文可与之同志，尝捐俸共立乡贤祠。士民贤之。祀名宦祠。（乾隆贺志）

刘有源 永乐中任主簿。勤政而不取于民，温和好士，人雅慕之。翰林典籍高棅赠诗云：“长官清平佐政理，况以簿领尤宽仁。”时以棅之言为然。祀名宦祠。（乾隆贺志）

黄本 字维成，吴川人。永乐初任典史。赞政有声，惠利及民。时十一都至十四都海堤崩陷，本悉力修筑四千余丈。增设旄山塘斗门，通捍潮水。翰林典籍高棅作《述绩篇》以纪其事。祀名宦祠。（乾隆贺志）

朱褒 浙之青田人。温和耽书，动不渝则。成化间，以国子生任县丞。廉洁有声。诸所注措，悉合时宜。尝禁夺，止役务，使财阜民殷，人以贤佐贰称之。祀名宦祠。（乾隆贺志）

熊廷用 府志作廷相。丰城人。嘉靖己未，为长乐典史。时倭寇猖厥，逼县城，廷用登陴守御，开门纵老幼悉纳之，存活数千命。修筑滨涧湖，民受其利。约己下士，为督学使者所鉴知。非世之局于刀笔者。（乾隆贺志）

以上丞、簿、尉、典史。

## 明

孙大雅 直隶江阴人。永乐间任教谕。敦厚博雅，简默凝重，表里如一。为学必以躬行实践为先，不屑屑于章句。诱引后学，不厌不倦，被其教者，多克有成。祀名宦祠。（乾隆贺志）

廖正 广东潮州人。成化间任教谕。敦诗书而崇礼义，薄声利而重名节。其文学德行，无愧师表云。祀名宦祠。（乾隆贺志）

余珙 饶平人。弘治初由举人任训导。操行不苟，尝以冠、昏、丧、祭四礼率生徒讲习于社学，人咸悦服。祀名宦祠。（乾隆贺志）

潘援 浙江景宁人。弘治十三年，以举人署教谕事。器识完粹，经学精研。均视诸生，绝不为厚薄低昂之态。覩其丰仪，聆其议论者，乐于亲近，如在春风和气中。人以为有胡苏湖之风。（乾隆贺志）

郭岱 号逵山，番禺人。嘉靖三十八年，以举人署教谕。温厚雅饬，居常恂恂如也，人莫窥其喜怒。对士子色笑可亲。往为

师者，视通显侧陋之子，复然别矣，岱独待之如一。例赠言费必取诸生金为之，岱曰：“赚金于众以为己惠，吾不为也。”擢峰县知县。（乾隆贺志）

胡大韶 永康人。嘉靖年任训导。为人正直刚方，循循善诱。贫士以束修进，辄却之，且捐俸资给焉。处县令尤以礼自绳。未老，致仕归。（贺志）

郭翰 顺德人。嘉靖癸丑任训导。言呐呐不出口，温和醇厚盎然可掬。居官三年，未尝失色，诸生咸亲仰之。致仕归。（乾隆贺志）

陈文灿 号茂村，南陵人。万历间任教谕，以清操闻。祀名宦祠。（乾隆贺志）

### 清

陈梦麟 漳州人。任闽清学博。康熙三十六年，署本县教谕。甫下车，见学宫颓圯，遂毅然力任，捐宦囊为诸生倡。阖邑闻风兴感，莫不踊跃赞助。三阅月，文庙并两庑、明伦堂、名宦祠、乡贤祠、文昌阁皆渐次就绪，聿观厥成。从此文风丕振，梦麟之力为多。（乾隆贺志）

陆登选 甌宁人。举人。性沉静，学纯粹。康熙三十七年，任本学教谕。因见学宫修理未竣，复倡捐修。立学规，勤督课。好与诸生谈论经史，亶亶不倦。每月课艺，立为评品，汲引后进，造就者多。阖邑称颂。（贺志）

廖溶 龙岩人。举人。沉默简重，持身廉洁，学有渊源。雍正八年，为本学教谕。日与诸生谈论，绝不及阿堵事，惟以经史督课后进。莅任未久，以疾卒于官。诸生咸痛惜焉。（乾隆贺志）

谢大锡 号蔗田。龙岩州举人。道光元年，任本学训导。工楷法，善评文。甫下车，即倡议建奎光阁，以象文明；浚文治浦，以通文运。邑人士仰其品学，公请在明伦堂主讲席，及门济济，如

坐春风，固百余年所仅有也。不数月，以无疾逝，门人哀感，为之发丧。且私祀焉。同治八年，崇祀洽浦报功祠。（同治彭志）

许遂元 原名秉衡，号健甫。瓯宁廩贡生。以道光三十年署教谕。积学能文，好行善事。适五贤祠圯，金词请帑，寝不行，元独慨然捐百金为邑人倡，并与训导蔡公捐造乐器。祠成祀焉。善书法，尤长隶书，人争宝之。（同治彭志）

蔡承祐 号顺甫，龙溪举人。以道光己酉任训导。性平易，善属文。谒庙见一敌仅存，捐廉俸造乐器。设虞业，补僧生，嗷嗷厥声，环桥观听，前此所未闻也。诸生颂以扁曰：“鼓舞作新”。嗣以重建五贤祠，与许公同祀焉。（同治彭志）

以上学官。

### 清

游崇功 字仲嘉，漳浦人。康熙五十一年，为长福营右军守备，分防长乐。恤兵爱民，操行不苟，县滨海有磁澳，为贼艘出没之区，崇功廉得其状，以兵二百伏仙峡塘要口，复率兵捕之。贼弃舟窜，伏发，擒十七人，获其舟，自是岛澳肃然。五十二年夏，县水灾，民艰食，崇功悯焉，躬之会城，见巡抚觉罗满保，请发粟平泉，许之，即遣往罗源转粟回县，济民食，邑人始安。满保以为能，寻迁海坛镇右营游击，调台湾水师游击。六十年夏四月，台湾土贼朱一贵作乱，崇功突围卫击，中枪坠马死，时年六十。及台平，朝廷赐葬祭，旌难坊，荫一子金阙。墓在长乐九都利充里。旧志事实多脱略，兹参《蓝鹿州集》更正。

以上武职。

## 长乐县志卷二十二

### 列传二 儒林

儒津梁乎汉宋，学权輿乎程朱。旧志载：吾长复之、唯室，为伊川之再传；勉斋、二刘，绍紫阳之真脉。盖季甫以后，海滨崛起，邹鲁如闻矣。夫渊源既征深厚，则派演乃益真醇。无共出而分门，才矜孔、贾；岂同经而异注，家署郑、王。圣道之辅卫也，经学之羽仪也。惟继绪代不乏人，亦去圣远而实近矣。传儒林。

#### 宋

陈烈字季慈，阳夏人。少读书，苦不能记。一日读《孟子》“学问之道无他，求其放心而已。”忽悟曰：“心未放，何以读为？”闭门静坐百余日，以求放心。后遂一览无遗。居亲丧，水浆不入口五日。及老，哀慕如孩提。尝梦痛哭其母于中庭，觉而大恸至旦，其孝出于天性也。平居端饬，遵古礼，御童仆如对宾客。乡里人敬之，冠、婚、丧、祭，请而后行；每训子弟，必举烈言行以为式。从学者，常数百人。与侯官陈襄、郑穆、周希孟称四先生，语在襄传。庆历初，预乡荐，黜于礼部，遂不复践场屋。一日，襄勉之求仕，对曰：“烈不幸父母早丧，幼而不知养，长而能知，父母则亡矣，烈惟是没身无意于世；使烈一日得富贵尊荣，无见父母，不足以为乐也。”至和间，天章阁待制曹颖叔知福州，荐于朝，授试校书郎，充本州州学教授，烈固辞。嘉祐三年，翰林



学士欧阳修上言：“烈清节茂行，非惟一方学者之所师，致以朝廷，必有裨补。近闻命以官秩，使教于乡，其礼甚薄，未足以称励贤旌德之举。”除安州司户参军，召为国子监直讲，皆不拜。方辞避间，福建提刑王陶奏：“烈以妻林氏疫病瘦丑，遣归其家，十年不视，为林所讼，乞夺所受恩。”司马光时知谏院，率同列争，曰：“臣素不识烈。窃惟国家常患上无名检，故臣僚举烈以厉风俗。烈平生操守诚实，虽有迂阔不合中道，犹为守节之士，当保而全之。若夫妇不相谐，则听之离绝，毋使节行之士为横辱所挫”。陶说遂不行。叶梦得《石林燕语》云：“烈行怪多伪。蔡君谟母死，烈往吊，匍匐而进，人问之，烈曰：‘此《诗》所谓凡民有丧，匍匐救之者也。’后为妻讼其不睦事，为监司所按，诏置狱劾治。司马温公上疏救之，曰：‘烈既尝为近臣所推，必无甚过。若遽摧辱，恐阻伤处上之气。’然亦竟坐罪。”按：烈孤介不合于俗，所传吊君谟母事，必是恶烈者造谤之辞，烈为一时名贤所推重，岂可谓行怪多伪？妻讼，竟以司马光之言而解，未尝坐罪，梦得语盖不足据。熙宁二年，襄除侍御史知杂，举烈自代，不从。后数年，襄在经筵复上状，言：“烈心仁气刚，才智卓越。学圣人之言而践其行，稽先王之法而适于时。博通群经，尤明典礼。其为文章，渊源浩博，肆笔而成，求之宿儒，未有其比。庆历初，以乡贡试于礼部，罢归田里，安贫力学，积四十年，著书数万言。仁宗尝因近臣及本部监司论荐，累降召命，辞而不至，世以为洁身独行之士，是非知烈者也。烈自以身载圣贤之道，不为苟进。伏望陛下以礼特聘，赐对清问，必有以上称尊贤重德之举。”元祐元年，福建提刑喻陟复上烈行谊。诏以“烈名在仕版，自仁祖尝以学官命之，而栖迟不起，宜从其所尚，特授宣德郎致仕。”监司言：“烈虽老犹健，请加任使。”明年落致仕，仍充本州教授。烈不获已，乃就职，不受廩俸。乡里问遗悉却之。家租有余，则推以济贫乏。卒年七十有八。按：烈祖世明，父元善，邑之沙堤人。烈居二都阳夏，遗址犹存。元丰间，孝子高宗信以里人陈烈荐，及有现存石碑，勒“江山第一”四大字，亦称里人直讲陈烈书，则烈为邑人无疑矣。后徙居于侯官之郎官巷，故

诸志俱作候官人。(乾隆贺志, 参道光通志)

陈宋霖 字元零, 一字元滂, 岱边人。绍兴五年进士。令同安, 适朱子为簿, 日与讲明经义, 朱子称其能躬行实践。后迁秘书监, 书问往来不绝。祀乡贤。孙栢, 自有传。(乾隆贺志)

陈 侁 字后之。旧志作复之。元符三年进士。授江州德安县主簿。侁素与陈瓘友善。瓘在谏省, 有所弹劾, 多侁所裨益。崇宁中, 蔡京当国, 以恶瓘故, 并欲害侁。会江州易守, 京以侁名付之, 守伺察无所得。檄侁按田湖口县, 还以旱告, 守即劾侁受成胥吏, 失赋税。奏上, 遇雨赦, 京犹清旨勒停。久之, 调和州司户。州有狱不应死, 守欲杀之, 侁抱牒与辩良久, 守怒以辞气相加, 侁色平言庄, 徐理前语, 率得平反而退。同列有唁者。侁曰: “历阳太守叱司户, 何预我哉? 苟杀不辜, 不以天下易吾介也。”岁满, 迁建康军节度推官。父丧, 服除, 监在京河南炭场凡五年, 率漏未尽十刻出莅局, 午而归。尝语人曰: “吾为禄仕, 敢不尽职? 然居今, 惟此官为易塞责尔。”用荐者改宣教郎, 充洪州录事。州吏何爽为奸利, 前后数守, 爽惟摘纸尾请书判, 侁发其奸, 付司理, 自此一府竦然承听。宣和三年, 代且至, 以疾卒于官, 年五十有三。侁明于兴衰治乱大势, 当建中靖国初, 朝廷更张政事, 侁移书侍郎邹浩, 略言: “天下事元祐引而西北, 绍圣引而东南, 今复引而为元祐矣。仆之私忧, 将恐有甚于绍圣者。”后党锢起, 如侁言。既歿, 许景衡、杨时言: “国家失此人, 可痛惜。”其为名流推重如此。子长方、少方。(同治彭志, 参道光通志)

陈长方 字齐之。绍兴八年进士。江阴军学教授。以母为吴中林氏, 遂居吴中。从王信伯游。隐居步里, 终日闭户, 研穷经史, 以教学者。其说: 主直指以开人心, 使学者归于自得。所著书曰《步里客谈》、《尚书传》、《春秋传》、《礼记传》、《两汉论》、《唐论》、《上蔡语论辩》, 学者称为唯室先生。信伯门下士以先生

为首。《上蔡语录》多佛语，先生读之，知其为江表民语，凡若干条。当时有抄上蔡表民语合为一帙者，遂并以为上蔡之书，而人莫之知也。弟少方，字闻之，亦从信伯游，时称王门二陈。孝宗朝，仕至东宫讲官。（参《宋儒学案》）。案唯室先生《步里客谈》，明季尚有其书，今访求不得矣。全谢山尝录其一二于学案，今记于此。其一曰：“太史公有侠气，故于赵奢、穰苴、仪、秦、刺客等作传，更得手。以未尝窥圣贤门户，故五帝、三王、孔孟纪传，虽补缀事迹，亦未尽善。”其二曰：“喻子才道，王侍郎刚中语云：‘文字使人击节叹赏，不如使人肃然起敬。’”此虽寥寥数语，亦尝窥知全鼎也。”（同治彭志）

**陈 栻** 字自修，宋霖孙。庆元二年特奏名。受业于朱子。尝自谓善利之间虽知所决择，而正行恶声之念，或潜萌而不自觉。先觉之微言奥旨虽间有契，而不能浹洽于心意之间，朱子以切问近思称之。祀乡贤。（乾隆贺志）

**黄 杲** 字升卿，瑀长子。瑀见《名臣传》。才气超越，喜读书。尝与弟东、榘受业于朱子。绍兴庚戌进士。官至提刑司检法。（同治彭志）

**黄 东** 字仁卿，瑀次子。天姿警敏。简默迟讷，如不能言。从朱子学。尝论《春秋》讲贯之旨，朱子答曰：“所示《春秋》大旨甚善。此经当以类例相通，然亦先须随事观理，反复涵泳，令胸次开豁，义理贯通，方有意味。”又曰：“此非独是读书法，亦仁卿分上变化气质底道理也。”后以荫授吉州万安县。丁内艰，起知抚州乐安县。至抚一日，卒于郡学官舍。贫不能殓，教授刘坝为遍走僚属，告而矜之。时知东名者，虽非雅好，亦以币贖，乃举其柩归。弟榘为之志其墓。（同治彭志）

**黄 榘** 字直卿，瑀四子。瑀没，榘往见临江刘清之，清之奇其才，谓曰：“子乃运到器，时学非所以处子也，”令从朱子授业。榘归白母，值大雪，即日行。既至，朱子他出。榘留客邸，卧起一榻，不解衣者三月。比见朱子，励学达曙，夜不解带。朱子语人曰：“直卿志坚思苦，与之处甚有益。”以女妻之。宁宗即位，

朱子遣榘奉表行在，补将仕郎。丁母忧，庐墓，学者从之讲学于墓庐者甚众。及朱子编《礼书》，丧、祭二编，独以属榘。病革，遣榘深衣及所著书，曰：“吾道之托在此，吾无憾矣。”朱子卒，榘持心丧三年。调监嘉兴府石门酒库。开禧初，湖北安抚使吴猎将赴镇，访以兵事，榘曰：“闻议者欲为大举深入之谋，果尔必败。此何时而可进取哉？”猎雅敬榘，辟监激赏酒库，兼准备差遣官，寻为抚州临川令，改知临江军新淦县。邑多乡宦，旧时豪横难制，榘痛绳以法，俗为一变。擢监尚书六部门，未上差，通判安丰军，寻知汉阳军。按：榘知汉阳军，年已六十三。见文集《复刘师文宝学书》。汉阳当吴、蜀往来之冲，与武昌相唇齿，每金兵南下，武昌官民日夜望汉阳烽火为安否。郡故无城郭，民贫兵寡，仕者惮来其地，阙员殆半。榘视事未兼旬，校阅卒伍，召募壮勇，修军政，严守具，上下始有固志。值岁饥，荒政具举，旁郡饥民襁至，惠抚均一，民大感悦。即郡治后凤棲山为屋，馆四方士，立周、程、游、朱四先生祠。寻以常平使者姻党引嫌，丐祠，主管武夷冲祐观。《宋史》本传作以病丐祠。案文集《与李侍郎梦闻书》中有：“兴国赵守持本路仓节，赵娶晦庵之孙女，于榘以姻党之亲，委有防嫌，乞异祠禄”云云。则非因病丐祠也。然再知安庆府书云：“俸安丰则得罪于太守，守汉阳则得罪于监司。”恐又不尽为引嫌去矣。未几，起安庆府。至则金人破光山，边警狎至，民情震恐。榘奏请城安庆，不俟报兴工，分城为十二料，先自筑一料，计共工费若干，然后委官吏，寓公、士入分料主之，悉准其一料之费，计田出役，力均费省。番休递代，整有成法，每五鼓坐堂上，授濠寨官以一日成算，然后治事。暇则会僚佐讲究边防利病。后二年，金人破黄州沙窝诸关，淮东、西皆震，独安庆屹然安堵。继而霖潦余月，大水暴至，以城故得无虞。士民喜相谓曰：“生我者黄父也。”制置使李珣辟为参议官，再辞不就。既而朝命改知和州，令先赴珣稟议。《宋史》本传云：“朝命与徐侨两易和州”。案文集《复杨志仁书》云：“二



月敌攻浮光，令往黄州守御。已而敌势颇炽，又令往光州督战。既而历阳徐守求去，遂令两易。”历阳，即和州也。本传不言黄州守御及光州督战事。附此以备考。先是，榦遗珪书，略言：“南北大势有深可虑者。绍兴议和，但不能取中原耳。今日议和，且并江南而弃之。战既不可，和又不可。以彼之愤激，当吾之偷惰，此非上下一意，警策奋励，使长淮屹然有可恃之势，未见其可也。”复言：“今日之计，莫若用两淮之人，食两淮之粟，守两淮之地，然当先明保伍，保伍既明，则为之立寨、蓄马、制军器以资其用。不过累月，军政可成。且淮民遭丙寅厄后，闻金人还汴，莫不狼顾胁息，有弃田庐、挈妻子渡江之意。其间勇悍者，且将伺变窃发。若不早为之图，则两淮日见荒墟，卒有警急，攘臂而起矣。”至是，珪将视师维扬，邀榦偕行。榦复为珪划御敌计，珪皆不能用。其时幕府多轻儻士，将裨离心，诸司长史张宴无虚日。榦知不足与共事，归自维扬，力辞和州之命。且复谏珪曰：“残金君臣上下，日夜经营，必欲得吾两淮而后已。虽以岁币为名，而实不在乎岁币也。去岁五月休兵之后，使吾早夜竭力以固吾圉，何至今春三边冲突，如入无人之境，岂可不深鉴耶？浮光敌退已两月，安丰敌退已一月，盱眙敌退亦已两旬，边备之弛，又甚于前。窃意千乘言旋，必将痛自咎责，日与僚属讨论条划，审思而力行之，以为后图；今归已五日矣，但闻请总领运使至玉麟堂赏牡丹、用妓乐而已。尚书以法从之尊，当四路之寄，敌国交侵，内宇骚动，主上食不甘味，听朝不怡，尚书岂得不朝夕忧惧，而乃如是之迂缓暇乐耶？今浮光之报又至矣。金欲以十六县之众侵五关，且以一县五千人为率，当有八万人，吾之守关不过五、六百人，则关之不可守决矣。五关失守，则蕲、黄必不保；蕲、黄不保，则江南危。尚书闻此已数日，乃不闻有所施行，何耶？宜调武定五、六千人分屯固始光山，以捍其深入；调蕲、黄民兵以守五关，仍檄湖北帅臣协同守御，庶乎可以无忧。苟



为还朝之计，而虑不及此，非所以望尚书也。”厥后光、蘄、黄继失，果如榘言。已而榘入庐山，访李燔、李宓，相与盘旋玉渊三峡间，俯仰朱子所游旧迹。讲乾坤二卦于白鹿书院，南北之士皆集。未几召赴行在奏事，除大理寺丞，不拜。初，榘入荆、湖幕府，奔走诸关，豪杰往往愿依榘后。倅安丰，守汉阳、安庆，声闻益著，长淮军民翕然心向。在位者，虑榘入见必直言边事，以悟上心，群起挤之，遂罢。榘既归里，编礼著书，日不暇给。弟子纵游者日盛，质疑请益如朱子在时。俄命知潮州，辞。主管亳州明道宫，逾月致仕，卒。后数年赠朝奉郎，与一子下州文学，追谥文肃。学者称勉斋先生。清雍正二年，从祀孔子庙庭。所著有《经解文集》行世。（乾隆贺志，参道光通志。）旧志云：“按瑯子杲、东、榘，诸志俱作闽县人。考《黄氏家谱》及《勉斋先生文集》，瑯世居青山，后寓闽县，子孙有籍焉者，故云。”今特正之。

刘嘉誉 字德称，一名冈，方安里人，貽孙八代孙也。尝受业延平李侗之门。官乐昌县卫。子世南，孙砥、砺，曾孙子玠。（乾隆旧志）

刘世南 字景虞，嘉誉子。少承家学，长从林之奇游，与吕祖谦相厚。秉礼蹈义，乡党敬之。官吉州司理参军。（乾隆贺志，参道光通志）

刘砥 字履之，号存庵，世南子。六岁日诵千言。览忠孝大节，辄激愤感慨。十岁通九经传记，能缀词赋。乾道二年，与弟砺同登童子科。尝读释老书，叹曰：“此不足习。”乃治举子业。又叹曰：“此不宜专习。”闻朱子得濂洛之传，率其弟砺师事焉。朱子嘉其志笃学敏，授以大极图，充然有得。朱子晚修《礼书》，砥预编次。以时方攻道学，遂无复仕进意。蔡元定、黄榘与之相友善，因颜其读书之室曰“龙峰岩”。卒年四十五。著有《玉朝礼》、《论语、孟子解》。为文醇雅宏博，诗不加琢磨而能达其意。（乾隆贺志，参道光通志）

刘 砺 字用之，号在轩，砥弟。幼颖悟，孝弟。中童子科。后与兄砥同受学于朱子。朱子尝曰：“履之兄弟却差胜，若更加功，或可望耳。”与黄榦最友善。朱子《答陈才卿书》曰：“《礼书》得直卿、用之，渐可整顿。”又曰：“二刘到此，并手料理，方有汗青之日。”及禁伪学，志尚愈笃。蔡元定编置道州，砺与兄独冒时禁，厚馈之，卒年四十七，与兄砥同祀于乡。（乾隆贺志，参道光通志）

刘子玠 字君锡，号立斋，砥子。幼孤，育于外家。长从勉斋学，非贤士不交，非义理书不读。尝戒子弟曰：“行好事，作好人，足矣，饶求名利，非吾志也。”平居退让，若无所有，及其见义必为，则有人所难能者。尝逊田百亩与诸子侄，以成母志。年四十八卒。（乾隆贺志）

张 洽 字元德，十一都福州里人。嘉泰二年进士。少颖异，从朱子学，自六经传注以下，皆究其指归。尝取《管子》“思之思之，又重思之。思之不通，鬼神将通。”之语，以为穷理之要。朱子嘉其笃志，尝谓黄榦曰：“所望以永斯道之传，如二、三君者，不数人也。”授松滋尉时，湖右经界弊甚，洽请行推排法，令民自实其土地疆界、产业之数投于匱，筹核而次第之，吏奸无所匿。改袁州司理参军，有盗黠甚，讯莫能决，会有兄弟讼财者，洽谕之曰：“冒法以求胜，孰与守分以全爱乎？”讼者感悟。盗闻之，自伏。寻知永新县。湖南鬻寇作乱，与县接壤，民大恐。洽单车往镇定之，寇竟不至。通判池州，有张德修误蹴人死，狱吏诬以故杀，会岁大旱，祷弗应，洽白持刑为辩冤，复白守宽催科，以召和气，雨随注。以病请祠，主管建昌仙都观。袁甫提点江东刑狱，招主白鹿书院，洽曰：“是先师之迹，其可辞乎？”至则选好学之上，日与讲说。凡养士之田，没于豪右者，复之。端平初，除秘书郎，迁著作佐郎，待以说书，洽固辞，遂除直秘阁，主管建康崇禧观。以疾乞致仕。卒赠直宝章阁，谥文宪。洽少以主敬为学，

故以“主一”名斋。平居不异恒人，至义所当为，则勇不可夺。居闲不言朝廷，及闻灾异变故，辄颦蹙不乐；一君子进用，士大夫直言得失，则喜见颜色。著有《春秋集注》、《春秋集传》、《左氏蒙求》、《续通鉴长编事略》、《地理沿革表》行世。（乾隆贺志）

郑申之 字唯任，号湖波，福湖人。乾道五年进士。官国子监助教。朱子避伪学禁来邑时，申之从之游。教授于乡，及门甚众，立文行忠信四斋以处之。朱子匾其所居楼曰：“聚远”。（乾隆贺志，参道光通志）

姜大中 字叔权，枫林人。以布衣从学于朱子。尝以识察此心为致知之切近问，朱子曰：“所谓识之，非徒欲识此心之精灵知觉也，乃欲识此心义理精微耳。欲识其义理之精微，固当以穷至天下之理为期。至于久熟而贯通，则不待一一穷之。而天下之理固已无一毫之不尽矣。”叔权服膺此言。学者称枫林先生。（同治彭志）

陈梦良 字与叔，桃坑人。朱子避伪学禁，主其家，因从受业。朱子甚重之，题圣经于其书室中。学者称乌门先生。后室圯坏，里人就其地立祠，祀朱子，先生配焉。（同治彭志）

陈如晦 字日昭，号六湖，沙堤人。幼嗜学，贯串经史。从勉斋游。尝读《西山真氏夜气箴》，作曰：“须见得冬为四时之夜，夜乃一日之冬，便是自家向晦入息处；又见得造化发育之妙，便是自家事物周旋处。于此敬义夹持，动静交养，则两得之矣。”遂次其韵为《生意箴》，西山见之，亟加称赏。一时耆德巨公，乐于为交。毅齐郑性之、严斋赵师恕，先后延讲于鳌峰精舍；邑令吴一鸣，延讲于学宫。晚以赵汝腾荐充经筵，不果。授本州教授，卒。著有《论语问答》及《讲义文集》。祀乡贤。（乾隆贺志）

李 晦 字随甫，□□人。勉斋尝贻之书，曰：“一去乡者十五年，投老归来，每兴索居之叹。承示《论语》疑义，用心甚苦，

所谓空谷足音也。”其后，先生遂学于勉斋。（同治彭志）

### 元

郭 隲 字德基。世以明经显，号“书橱郭家”。父正子，宋绍定五年进士，教授廉州，著《春秋传论》。治《春秋》者多师之，称存斋先生。隲少孤，母林氏力贫以教。长通六经，尤深于《易》，治《易》者，复师郭氏《易》。咸淳中，补太学生。宋亡，居乡讲学。至元中，郡举遗逸，授泉山书院山长，迁兴化教授，改吴江州教授，代还。大德九年，方议筑精舍于六平山，是冬，屋四偏所植梅忽槁，隲见之微笑，遂不果筑。明年春，再调兴化。未行，卒。学者私谥纯德先生。隲志尚高洁，登山临水，雅歌投壶，宾僕无虚日。酒酣作文，下笔不少休。每一篇出，闽上争相传写，效其体，然未尝少自矜炫。人有一善，称之不置，故人乐出其下。所至三郡，上相贺以为得师。翰林学士承旨程钜夫为闽海廉访使时，雅敬隲，及隲卒，志其墓曰：“先生谈经，明白统贯，不刻凿以为异。其为人，疏通慷慨，谨简易直。为子为父，孝而慈。与人交，弥久而孚益，远而不可忘。”人以为确论。诗文亦和平沉深。有《梅西集》二十卷行世。子履，由太子太傅府长史出知靖州。（乾隆贺志，参道光通志）

敖继公 字君善。研穷经史，尤长于《礼》。以《仪礼》郑康成旧注未备，取贾公彦疏及先儒说补其阙，附以己见，名曰：《集说》。大德中，寓乌程，筑一小楼，冬不炉，夏不扇。吴下学者多从之游。初仕定成尉，以父任当补京官，让与其弟。浙西平章事高彦敬荐为信州教授，寻擢进士，对策忤时，遂不仕。（乾隆贺志，参道光通志）

欧阳侁 字以大，号道江，十四都人。初举进士，不第，隐居著述。亲歿，不用浮屠提身。动循礼法，学者师焉。时偕兰田陈有霖行乡约，里人称欧阳先生。著有《四书释疑》、《五经旨



要》、《性理字辨》、《格物启蒙》、《忠孝大训》、《女学幼范》等书。及卒，门人王竖为营墓葬，祀乡贤。子潮，举莆田教谕。通五经，称五经先生。（乾隆贺志）

### 清

谢震 榜名在震，字甸侯，寄籍侯官。乾隆己酉举于乡，顺昌教谕。重气谊，笃好汉学，通地理。有志用世，而不遇于时。年四十六卒。有《礼案》二卷，精核胜敖氏，闽上之能言《礼》者也。亦工诗，有《樱桃轩诗集》二卷。（道光通志）

陈庚焕 字道由，号惕园，古县人。高祖骧，字叔举，其父被累入狱，骧匍匐往，请以身代。事解，奉亲避居九仙山下。能诗，与兄隰。从许友修平远台诗社。著有《中轩蓊游》二集。庚焕少好学，父峰勸之曰：“秀才不知时务，授以官，如暮夜徒行，岂非俗学之误耶？”故庚焕自天文、地理、乐律、兵法、水利、河防及农桑、方技之书无不读，尝撷录其可行者。既从蔡容游，又与谢金銮交，所学益务实践。亲病，尝药涤秽不少懈，濒危，以减算吁于神。居丧，蔬食，不入内。待群从有恩。养寡姐于家。公产有盗卖者，族人将诉官，庚焕急捐己产充公，事赖以解。生平不言人过。于经传传记多所考正。前贤事迹，有未彰者，为之补传。宋李纲墓在侯官，明钱肃乐墓在福清，许天锡墓在闽县，皆为鸠赆修葺。拾遗金于道，守还之。嘉庆元年，郡县议举孝廉方正，辞。后知县又议举实学，未终丧，不应。以岁贡生终。年六十四。所著书有《童子摭谈》、《庄岳谈》、《闽学源流说》、《气禀说》、《问学赘说》、《二十二史图》、《惕园初稿、外稿》、《诗稿漫存》、《师门瓣香录》、《尊闻录》、《于麓塾谈》、《崇德同心录》凡若干种。道光六年，祀郡邑乡贤祠。（同治彭志，参道光通志）

谢章铤 字枚如，先世本浙江上虞人，宋末，名星者知玉融州，遭乱，侨居平潭东岚村，明初由海山入江田，为长乐人。曾



祖世南，祖蕢，父鹏年，俱县学生。章铤生而孱弱多病，年十一始就傅。尝于故箧得其曾祖所著《蒙养讲义》四种，读之，知有宋儒性理之学，益博览载籍。聚书日多，浸淫而为词章。遇名篇俊句，辄录副。既而好考据家言，每得一书，则庐其首尾大要识之，因有《我见备忘之录》。年十九，补弟子员。时天下多事，慨然有建树之志。读《通鉴》、列史与古今经世诸书，而为经济之学。道光己酉中副车，同治甲子领乡荐，由中书舍人第光绪丁丑进士。顾年垂老，无复仕宦志矣。初章铤家有生产，间骤落，遂囊笔游四方。尝依刘家谋教谕于宁德，称莫逆交。迄家谋卒，数十年言之，犹掩涕不忘。咸丰初年，主讲漳州丹霞、芝山两书院。时粤寇方张，章铤慨念时事，作《东南兵事策》，其略云：“天下皆苦无财而不足于用也，吾则曰节用；天下皆苦无兵而不足于战守也，吾则曰减兵。夫养万兵而不得一兵之用，何如养数千兵而得万兵之用乎？”又曰：“为将之道，自与兵同甘苦始；与兵同甘苦，自不爱钱始。”钱塘吴观礼见而赏之曰：“使当时大吏能用君言，何待于募勇也。”同治丙寅，游山西，佐学使校阅试卷。由溧阳彭湘获交黄岗邓琛，为之题其母《机声灯影课读图》。至京过谏草堂，怀建宁张际亮，堂在松筠庵左，晋江陈庆镛劾三大臣疏，出际亮手，盖在堂起草也，故章铤特眷眷焉。己巳，至陕西，就兵备道同郡赵新之聘。贫甚，适布政使林寿图亦同郡人，雅重儒学，言章铤于巡抚刘蓉。蓉方欲觅人揆文介母寿，亟以属章铤。旋延主同州及丰州讲席，礼待甚厚。是年偕寿图游华山，明年春复与主事王轩同游，有《华山后游记》。既将入都，关中诸生相聚设饯于衢尊阁，绘图为纪。复为人招游玉泉院，至青柯枰而止。于是章铤之足迹三及华岳矣。濒行，出乡人谢金銮所著《教谕语》视道员吕耀斗，耀斗为授梓人。遂至都，未几旋闽，重主漳州讲席。丁丑通籍后，至江西主白鹿洞书院，历匡庐诸胜。将归，门生洪嘉

与请为学大指，语之曰：“学择汉宋之要。”人以狂狷为。归发南昌，道出崇安，探武夷岩，穷其幽奥，遂归。掌致用堂教，凡十六年，所成就弟子甚多。年八十四卒。章铤性厚而气肃，平居未尝一日晏起，虽盛暑严寒，必整衣端坐，无倦惰之容。遇先人忌日，必涕泣不已，至衰老犹然。手置书数万卷，丹黄黜勘，终身不辍。与人交，肝胆轮困，于取与辞受之际尤严。饥驱垂老，有所知贵人欲为之地，笑谢弗受也。生平论学旨要，具撰示及门三篇。其首篇略曰：“天下之不治，由于吏治之不修。夫吏治，非刻薄寡恩之为也，亦不容急功而好名也，要在能通天下之情而已矣。然其立法，则自吾身始。有一私不染之操，方有万物在抱之心。吾见今之为吏者，大抵立身无法，持家无法，因而治民无法。民不治，官亦不保。丧名失身，为世诟病者，比比也。古之人视家若国，盖凛凛有限制，而不敢徇焉；又视国若家，盖恳恳有恩义，而不敢外焉。家人畏之若严君，百姓爱之若慈父，而吏治乃可言矣。而州县独与民亲，其治也，得名最易；其不治也，受祸亦最烈。即以近事征之，粤西之乱也，由知县之纳匪赂；四川之乱也，由知县之虐厘税；贵州铜仁之乱也，由知县之加征收。卒之身残家破，祸延数省。而六合之温绍元，天津之谢子澄，不过一县令耳，乃能以一隅抗贼氛，控制江淮，保障神京，生为名臣，死而庙祀。然则州县亦在乎人之为之而已。”其次篇略曰：“学道者持身涉世，求合于道而已矣。高明沉潜，性情所近。学术各有所偏至。无论陆与朱不同，程、张与周、邵果尽同乎？无论姚江与诸儒不同，白沙、定山与崇仁、河东果尽同乎？要其表里如一，而皆无愧于圣贤。后世之谈理学者，内省不能无憾，于学派争之则其力。奉一先生之片言为依归，初无由博返约之功，其于吾道，果有合乎？未敢知也。嗟呼！古之人万里从师，千里访友，百里借书，当其小心低首重席之下，即其得意昂头九霄之外。呜乎！其有以哉！其

有以哉！故曰：‘泰山不让土壤，乃能成其高；河海不择细流，乃能成其大。’”其三篇略曰：“夫子之文章，可得而闻也。后世若扬雄，若王通，揣摩章句，以阳虎为圣人，而赫然大名尚及于千古。况夫挈吾心以纳于经，充满渐渍之，其性情既与经合，而其文章有不油然光、醞然味、粹然气哉？昌黎之文深于《经》者，其碑似书，其铭似诗，其志传尤精于史例，其杂文则出入于孟、荀与《礼》。由韩推而上之，其道可不悖于圣贤。即使不能成家，亦不至冗滥猥陋，不可为训。而子长、相如、班、张、崔、蔡之流，皆可执韩以定其离合。盖由经达史之义也。且夫古之雄于文者，于经皆有所著述。今之所存，韩则有《论语解》，柳则有《非国语》，欧阳则有《诗本义》，苏则有《易传》、《书传》。元、明以来之文家，其学《经》殆苟焉耳！故高者仅能成章，而于世道人心，无所发明；下者彪炳于外，其中如五石之瓠，枵然无济于用也。盖求文于文，不求文于经也。子曰：‘修辞立其诚。’又曰：‘辞达而已矣。’不诚者，性情不能固其体也；不达者，经史不能佐其用也。故能治经，治史。治性情以为文，则其人必光明英隽无俗行，其行文，亦必高远渊深无鄙语。”卒后，郡人思其教泽，附祀于祥符沈公祠。所著已刻者：《赌棋山庄文集》九卷，《诗集》十四卷，《酒边词》四卷，《围炉琐忆》、《藤阴客赘》各一卷，《稗贩杂录》四卷，《说文闽音通》二卷，《词话》十卷，《课余偶录》四卷，《续录》四卷。其《赌棋山庄余集》五卷，《毛诗、尚书、左氏传注疏》，《毛本阮本考异》二卷，未刻，藏子家。

## 长乐县志卷二十三

### 列传三 名臣

龚、王之绩，不能并论于陈、周；廉、郭之才，不得共称于马、宋。非仅限于制，亦其度之相悬远也。贺氏志人物，举凡建一事，泽一方，与夫一官一吏之克称其职者，悉列于《名臣》一传，其弊似近于混。彭氏则择其定大计，知大体。气度风节超越寻常者，列为《名臣》。余则分列各传，体格严，分际当矣。兹仍取法彭氏，其或不遗不滥欤？传名臣。

#### 唐

林慎思 字虔中，御史升第五子。与诸兄读书筹岩，筮得蒙灵之观罪，遂自号伸蒙子，咸通十年，第进士，复中宏词科。赐其乡曰“芳桂”，里曰“大宏”。由秘书省校书郎权尚书水部郎中。乾符中，群盗蜂起，百姓流殍。僖宗日与宦者燕嬉，慎思与莆田余镐累疏切谏，不纳。出为万年令。广平元年，黄巢陷长安，慎思领兵出战，力不支，欲自刭，贼执之，逼降。慎思踞床大骂，北面稽首，遂遇害。年三十七。著有《续孟子》二卷、《伸蒙子》三卷。友人周岷置慎思母与妻子及所著书南旋。（乾隆贺志，参道光通志）

#### 宋

陆 愷 字疆仲。祖虞，庆历二年诸科试，中方略，为三班奉职，四转至左侍禁，历官河中府及建州、南剑州、汀州、邵武

军五巡检。以母居京师，就监顺成仓，后出为泉州兵马监押。父长宾，由蔡州司理累迁大理寺丞。愷自元丰末入太学，元符三年登进士第，调庐州司法。郡守龚原待以殊礼。已而侍御史彭汝霖、祭酒白时中同荐试学官，檄至，愷曰：“吾困科举二十余年，晚得一官，朝廷不吾知，欲使之裹饭复入场屋，吾不能也。”卒辞不就。秩满，荐迁通仕郎。给事中刘正夫兼领外诸司，辟愷管勾文字。值子涣调官济南，怜其少，欲与之近，乞监密州板桥镇。镇濒海，商舶至，多异国珍货，奸吏习为奸欺、渔取，愷丝毫不黷。以外诸司赏典转奉议郎，复以八宝恩转承议郎，逾年，御史中丞石公弼辟为检法官。吴执中为御史中丞，复以文学荐，除太府寺丞，明年迁司农寺丞。时正夫为中书侍郎，荐士三人，以愷称首。赐对称旨，擢司勋员外郎。车驾幸尚书省，转朝散郎，迁光禄少卿。正夫既相，除宗正少卿，诏修玉牒，愷纂辑徽宗临御以来政事之大者为一书，上之。转朝奉大夫。会太常少卿缺员，宰执以愷名启拟，命下数日，侍御史张朴进对论事毕，徽宗忽谓朴曰：“朕用陆愷，奉常识其人否？”朴对：“愷老于儒学，有士望。”徽宗深然之，转朝散大夫。磨勘，转朝请大夫，乞补外，除直徽猷阁，知均州关，决庶务无巨细剧易，皆亲之，吏敛手不敢为非。俗素惰农，不知灌溉之利，愷出郊劝相，民始尽力，岁遂大稔。尝旱祷龙祠，三日不雨，愷对神自咎，未旋车大雨。邻郡飞蝗，蔽地千里，过均境，辄弗下。父老候愷出迎拜，以手加额，曰：“微公德化所格，民其殍矣。”襄、邓大饥，仰粟于均，郡人请闭籩。愷曰：“今天下一家，非秦、晋比，奚此疆彼界之异？”转输相属于道。三舍法罢，上不知所归。愷聚生徒，择属吏之有学行者为之师，讲肄课试，悉视成均，郡人争献腴田，以资其费。愷复於暇日往临，谕以纲常大义。士民编其治绩，为《均阳乐》十章。宣和六年，受代到阙，除知泉州，未行而卒。年六十有五。践更省事殆十年，同



进者袞袞登禁从愷回翔，不出故列，无淹滞之叹。尝谓人曰：“吾学古，入官期以报国利民，顾天下事非辅相大臣不得行，非谏官御史不得言，非侍从之臣不得与国论，今久处朝行，无一毫补，殊非素志。吾老矣，得一郡为朝廷布宣德意，惠养小民，其可也。”遂抗章力请。既得郡，治有成绩，如其言。（道光通志）按县旧志《选举》注云：“愷，县西隅河南人。府志误入侯官。”

陆 蕴 字敦信。登绍圣四年进士第。为太学春秋博士。经废员省，改会要所检阅文字。大观中，改太常少卿。坐议原庙不合，黜知赣州瑞金县。政和初，召还，复前官，累迁大司成，擢御史中丞。引门下侍郎余深亲嫌，白列。徽宗曰：“相避之法，防有司不能尽公尔，侍从吾所信任，岂得下同庶僚？”不许。蕴尝奏：“御笔一日数下，而前后相违，非所以重命令。辅相大臣、宦官、戚里赐第，营筑纵撤民居；县官市材于民而不予直；贵游子弟以从官领闲局，奉朝请，为员猥多，无益于事；又赐予过制，中外用度，多下赋入数；幸私室、乖尊卑之分，亦非臣下之福。”其言皆中时病。宰相蔡京恶之。会盛章以宣和殿学士提举崇福宫，寻许朔望入朝，蕴上疏力谏其非正，为京所挤。遂除龙图待制，知福州，改建州，加显谟阁直学士。引疾，提举鸿庆宫。已而二浙用兵，旁郡皆缮治守备，蕴闻命就道，使者劾为避事，夺职。稍复集英殿修撰，卒。弟藻，藻字敦礼，登崇宁二年进士。大观中，累迁给事中。宣和初，由列曹侍郎出知泉州，召除显谟阁直学士，寻知福州。靖康中，坐事夺职。建炎初，复徽猷阁待制，提举西京嵩山崇福宫。（道光通志）按通志，蕴、藻均作侯官人。县旧志《选举》有藻名，而无蕴名。注云：“藻，西隅河南人。”府志误入侯官。详考雍正通志，绍圣四年选举，载蕴为陆宣子，崇宁二年选举，亦载藻为陆宣子。可知藻、蕴二人系同胞兄弟也。既属同胞，断无异籍之理。且查邑之西隅河南，至今尚有陆姓者，则旧志所载，不为无因。而所以独缺蕴名者，或当时载笔之遗漏欤？兹因并收之。

林安上 字民瞻，号归愚，慎思八世孙。屿头人。大观四年

释褐。历官国子博士，江东路监察御史，吏部考功员外郎，左史起居郎，秘阁修撰，福建路兵马铃辖安抚使，直龙图阁亳州明道官，广东路经略使。因劾丞相汪伯彦、黄潜善误国，不听，遂致仕。卒祀乡贤。（乾隆贺志）

黄 瑀 字德藻，青山下人。少刻苦为学，家贫鬻曲于市，辄挟书自随。登绍兴八年进士。补饶州司户参军。提点铸钱官欲市冶工余粮，以规利强瑀，高其估，瑀不可，则怒，欲中以法，求瑀罪无所得，乃反欲荐之，瑀又谢不受。岁旱，州守洪皓檄视属县民田当免租者，瑀请免之什九，而行他县者以什一告，皓以为疑；既而皓使视诸县，独瑀所行县民无流徙。皓善瑀所为而荐之，调湖北转运司，主管帐司。改知永春县，迁两浙转运司下办公事。有献鬻公田之策者，转运使檄瑀视之。瑀历诸郡，稔知多寡轻重不均之弊，极言其不便。且曰：“公田岁入若干，而畜牧刍稿取具焉。今一旦鬻之，计其获不过数岁之入，自后能无横敛乎？”贵将杨存中请地广宫，实规为观游以奉权幸，瑀复被檄往视，还曰：“薶卒虽众，度地若干亩而足，今所请地，且数倍，是坏民田庐冢墓而为存中结欢于一幸臣也。”卒皆罢之。权知秀州华亭县，值大饥，白常平使者发廩以赈。使者曰：“当俟奏报。”瑀曰：“民命在朝夕，苟可以生之，虽重得罪不悔。”退即发常平廩赈之，全活万计。吏部侍郎汪应辰、侍御史汪澈交章荐瑀才，除御史台检法官。未几，擢监察御史。会以病，在告。殿中侍御史杜莘老素与瑀以节义相励，一日，来问疾，连呼不应，乃大声曰：“吾今日击去王继先矣。”瑀矍然起坐曰：“君能任职，吾不病矣。”探枕中片纸示之，所疏继先罪状甚悉，盖稿已具而未上者。居无何，莘老以论宦者张去为不报，求去。瑀就与别，喟然太息曰：“君厚自爱，吾亦从此逝矣。”即日上疏请外，除江南东路提点刑狱，徙转运副使，视事旬日，改知漳州。丐祠，主管台州崇道观。乾道二年卒，年

六十。瑀性刚介，未尝降色辞以希荐宠。生平清苦自励，非人所堪。然处兄弟族姻，周贫、赈乏必竭其力。卒之日，家无余财。祀郡乡贤祠。子杲，东，榘，均见《儒林》传。（乾隆贺志，参道光通志）

郑丙字少融。绍兴十五年第进士。充建州教授，累转国子监主簿。孝宗即位，诏求直言。丙上从谏、远佞、勤政、用人、裕民、练兵六事。隆兴元年，迁监察御史。明年，出提点荆湖北路刑狱，改提举湖南常平茶盐。乾道元年，宜章峒贼李金陷郴州，焚桂阳军，郴与衡州密迹，提刑及常平俱置司在衡，而提刑托行部以避贼锋。丙独督州将治城，训兵，召世忠峒首领李昂霄率丁壮御贼，请发鄂渚军协讨，遂平之。寻引疾，丐祠主管台州崇道观。三年，起为成都府总运判官。宣抚使虞允文集四路寮属议事，器丙特甚，暨还朝，力荐丙可用。六年五月，召除礼部员外郎。时陈俊卿与允文为左右相，高选诸王邸讲读官。丙直讲庆王府，与芮煜、李彦颖、刘焯并命，上论荣之。未几，复提点广东刑狱，移广西路。归正官沙世坚素武勇，坐赃决配静江部，有剧贼未获，丙谕世坚立功赎过，世坚献渠魁以献，丙奏复其官。其后，世坚遂平李接，破蒙光渐，世以丙为知人善任也。徙福建路转运副使。淳熙中，擢秘书少监。驾幸秘书省，面赐金紫服，明日进秘书监。未逾旬，兼擢中书舍人。六年轮对，奏请置四川、襄汉、江淮三大帅，择曾任二府有文武威望者各当一面。复列上五弊：一曰取土之弊，代笔传义公行，富人以贿得科第；二曰养兵之弊，冒名寄籍，阙额不补，懦弱不汰，一有草窃，辄动御前之军；三曰理财之弊，以横敛、预借、重折、苛政为能；四曰刑狱之弊，故纵大辟，淹留奏案；五曰荐举之弊，非权要请托，则谬举亲旧。孝宗览奏嘉纳，榜选德殿御屏之上，真拜中书舍人。七年，除吏部侍郎，仍兼外制。八年，转中大夫，兼给事中。丙感知遇。益亶亶论事。巨室裴良显诉其兄良珣死有冤状，事下临安府。良珣，东

官春坊林龟年婿也。语连龟年，临安尹不敢治，诏送大理。朝士有为龟年地者，令运使先审，责良显不实反坐，乃施行。因驳奏，语且曰：“愿少存国法，为子孙万世计。”竟送大理。前户部尚书韩彦古以曾觐援有起废意，丙极口诋之曰：“是人仰累圣德。”大臣憾丙激切，摭二事指为卖直，欲出之，孝宗不听。他日丙入谢，孝宗谕曰：“朕自喜给舍得人。”数月，进权吏部尚书，同修国史，寻兼侍读。丙取陆贽《奏议》切时者反覆开陈。进司马光《五规》、范祖禹《帝学》以资乙览。转大中大夫，正除吏部尚书。丙谓所亲曰：“范镇六十三致仕，吾已迟一年矣。”上章请去。十年二月，除龙图阁学士，知建宁府，移知绍兴府，兼浙东安抚使。以臧否郡守后时，降中大夫。孝宗锐意更治，手批访丙，欲通差官民户。丙奏通差害多，旧时著令里正专掌盗贼烟火，比来邑官责以应办，至于破产，若以免役钱募耆长，供他役则善矣。从之。臣僚言两浙东西四路和买不均之弊，送户部给舍等官详议。丙与转运副使邱霁议立亩头均科法。诏下两浙施行，民以为便。未几请祠，提举江州太平兴国宫。皇城逻卒诬丙载官米万斛而去，转运使遣其属核实，无之。孝宗语宰执曰：“使郑丙有是，则今日无人可信矣。”秩满，再提举隆兴府玉隆万寿宫，转通奉大夫，起知泉州。丙治泉如治越，或劝从宽，丙曰：“惟有德者能以宽服民。吾固非用猛者，然嫉恶有素，岂以晚节丧所守哉？”光宗登极，进端明殿学士。丙应诏上封事数千言，以谨始为戒。绍熙四年致仕。明年卒，年七十有四。赠金紫光禄大夫，后赠特进，谥简肃。丙和易近人。及立朝论事，气节凜然。在铨部抑侥幸，惩奸欺，无敢干以私者。生平留意人才，所荐萧燧、胡晋臣、罗点，后俱至二府。余如李焘之博洽，刘国瑞之清正，唐仲友之学问，林栗、林枹、郑湜之刚方，丙皆援引不少置。惟与朱熹不合，尝奏“近世士大夫有所谓道学者，欺世盗名，不宜信用。”意实指熹而言。盖



丙雅厚仲友，而仲友知台州，为熹所劾故也。《宋史》丙本传云：“监察御史陈贾奏：‘道学之徒，假名以济其伪，乞摈斥勿用道学之目。’丙倡贾和，其后为庆元学禁，善类被厄，内罪为多。”案内立朝事迹，伟然可传。熹作《石壑墓志》云：“诏举材堪刺举者，吏部尚书郑丙以君对。”又作《张右司墓志》云：“刑狱使者郑公丙。阅其决事故牍，叹曰：‘此判不可移，端如南山矣。’其为名流所推服如此。”据此，熹固推丙为名流。而壑墓志作于淳祐九年十二月，在丙劾熹之后，尤为不没人善之公。《宋史》乃以门户之见，尽没其实，非公论也。子颐孙，奉议郎，通判辰州。龄孙，承奉郎，监潭州南狱庙。（道光通志）

何 万 字一之，登隆兴元年进士。淳熙三年，迁著作左郎。会参政龚茂良欲核户部岁拨总领司浮额，知万守正不阿，奏遣之。万劾淮东总领钱良臣侵盗大军钱粮累数十万，茂良上其事，语在《茂良传》。明年迁著作郎，未两月，茂良被谪，万竟坐茂良党，罢归。十二年起为右司郎中。上言“本朝自淳化后已号极治，仁宗深虑风俗易奢，景祐初，诏天下士庶之家，非品官毋得起门屋；非宫室寺观，毋得采绘，器用毋用纯金及表里用朱；非三品以上及宗室戚里家，毋得用金棱及玳瑁器；非命妇毋得金为首饰及真珠装缀，凡有床褥之类，毋得用纯锦绣；民间毋得乘檐子，其用兜子者异无过四人；非五品以上，毋得乘闹装银鞍。违者物主、工匠以违制论。请令礼部开具名件，严立禁戢。始自中都，以至四方，则用度有制，民力自宽。”诏“如所议施行。”未几出知漳州，尝请滴漆高登罪籍，追复原官，有司格弗下。（道光通志）

陈伯震 府志作伯霖。字震之，襄八世孙。由侯官徙居长乐。绍兴进士，泰州知州。累官广东经略使，龙图阁学士。嘉定中奉命使金，以数言折服强敌，人称其不辱君命。（乾隆贺志）

郑性之 字信之，初名自诚，号毅斋，后避理宗潜邸旧名，遂以字行。初受学于建阳朱子，朱子询其字，叹曰：“好大名大字。”性之由是自励，朱子奇之。登嘉定元年进士第一人。《宋史》本传作嘉定四年误。授承事郎。历签书奉国军节度判官。郡守王介以性之抡魁，



不责以吏事。性之曰：“吾岂敢以幕府为蓬庐乎？”益尽瘁奉公。六年三月召对，以崇圣学、教太子为先；次论人君所以立国者，在人才，人才所以能立人之国，在气节；三论楮币、边事、军政。除秘书省正字。八年正月，迁秘书郎，转对，首言：“去岁遣使，通国哗然，以为非便，朝廷以军政未修，一旦绝币，兵连祸结，甚于行李玉帛之费；然国人之论未尝欲朝廷用兵，但愿陛下勿忘国仇耳。完颜氏救亡不暇，岂复敢与我敌？此天启我自治之时，奈何一切排抑，遂使议者疑朝廷特借生事之戒，以盖其畏怯之心。臣尝论今日之忧，不在于亡金，而在于蒙古与中原崛起之群盗。臣谓当择二三大帅，边陲之事，悉以付之，规模一定，行之必能成功。且边守数易，不可者三，而送迎之费不与焉。淮甸功守之具，非三五年经理不能就，一不可也；纵能就，而代非其人，则弃其前功，二不可也；其人既不为久计，数日待迁，委其责于后人，三不可也。边郡不过数十城，以天下之大，岂无数十辈忘身殉国自奋功名之士，诚能精选而久任之，将见祐、预、昆、遂之流接踵而出矣。”九年，兼权尚右郎官。乞补外官，知袁州。十一年，召人奏事。性之言：“国有政事，谋之大臣，参之执政，既相与可否矣。苟有未至，则侍臣得以献替，台谏得以论列。理之所在，何嫌异同？今侍从、台谏间有忠愤不能自己者，立中伤之，此非国家之福”。十二年，召除侍左郎官，转对，言：“淮东忠义，虽曰区处得宜，然主客之势不宜偏重。淮西关隘，经理颇见次第，然奏请率多掉格。请假以事权，生其智勇。自蜀得重帅，朝廷信任不疑，仰见陛下将将之道。然闻其每有申请一切顺从，昔郭于仪拟除州县官一人，不报，或谓宰臣不知事体，子仪曰：“自兵兴以来，姑息武将，求得欲从。今某除吏不行，是朝廷不以武臣见待也。”岂非今日待蜀帅之法乎？复言：“祖宗用法宽厚，惟于赃吏独严。近者贪风复煽，苞苴公行。昔威王烹阿、封墨，而齐国大

治。杨绾当朝，减声乐、省驺从、撤第舍者有之，转移在君相尔。”十三年，兼国史院编修官，俄除将作监。时东宫虚位，中外皇皇，性之乞早定大计，且以立长为言，宁宗嘉纳。十六年，除右文殿修撰，知赣州。赣卒以姑息煽乱，提刑纵勿捕。性之曰：“赣守以兵铃系衙讨贼，吾职也。岂敢以其责诿监司？”设方略，讨平之。理宗即位。除集英殿修撰，知隆兴府。宝庆三年，迁宝章阁待制，升江西安抚使，仍旧任。以劳得晕疾，丐祠。绍定六年，进敷文阁待制，起知建宁府。端平元年，拜吏部侍郎，入对，言：“陛下大开言路，以通壅蔽。然言者多，则易於取厌；言之激，则难于乐受。若少有厌倦，动于词色，则谗陷乘间，或不自知矣。”时荆襄图上八陵，性之奏：“朝陵之使不可已，中原之机不可失。然自开禧用兵误国，嘉定仅仅自守。既不能制亡金垂绝之命，何以遏强寇方张之势？臣谓急宜守卫三边，为绸缪牖户之计；绥怀遗黎，示中原经略之渐。”擢左谏议大夫兼侍读，上殿言：“近观赵范、赵葵及全子才奏疏、书牋，议论蜂生，气吞强敌。臣退而深思，终不得其说。今范改图易谋，不胶旧议，而葵气愈锐，其谋亦愈决。昔勾践生聚教训十年，而后平吴；诸葛亮闭关绝栈二十一年，而后出师。葵帅淮东，甫及数月，而欲建恢复之功，古人何难葵何易耶？”复言：“范镇谓：‘备契丹，当宽河东北之民，备灵夏，当宽关陕之民。’臣亦谓：‘今日欲经理中原，当宽江淮之民。’彼之困于余买，困于工役，困于夫运者，沿边郡县官吏诛求殆尽矣。愿陛下下沛然之诏，以先臣镇之论，风厉沿边帅守。稍宽科条，为国家爱惜根本。天下幸甚。”是夏六月，除端明殿学士，二年，同知枢密院事，三年，拜参知政事。明堂礼成，以雷雨作，待罪。左右相郑清之、乔行简并册免。御笔勉留性之，命兼同知枢密院事，力辞不允。淮东总领吴渊诣阙奏事，为监察御史唐璘所论，理宗欲留渊；性之密言以为不可，璘反疑性之庇之。遂劾性之“宽而

无制，儒而多私”。璘素出性之门下，自改秩入台，皆为所擢。疏入，朝论大骇，性之从容奏曰：“璘本孤直，所言深中臣病。”终不复辩。后璘补外，与入语及性之。辄曰：“郑公雅量，吾未尝不自悔轻发也。”嘉熙元年，除资政殿大学士，知绍兴府，浙东按抚使，辞不拜，提举临安府洞霄宫。久之，加观文殿学士，致仕。宝佑三年卒，年八十有四。赠少傅，谥文定。性之所至，为民去害就利，务崇化厚俗。立朝秉正，无所附丽。李宗勉每见性之论事，必曰：“生平但以公为宽和长厚人，今亲见乃如此深切也。”与人交，终始无间。莆田陈均，客性之门凡三十年，著书多资其力。子德起，嘉定十六年进士，历太常寺郊社令，知兴化军，乞祠便养。终朝散大夫。管华州云台观卒。按：《一统志》作闽清人，通志作侯官人。及考十都龙泉山云梯石上，勒“云梯”二大字，称里人郑性之书。其坟茔在八都阮山，实系邑之十都人。《一统志》殊误。通志盖就其所迁而书之耳。（乾隆贺志，参道光通志）

张 翀 字蜚卿。官左司郎中，以文学廉能称。（乾隆贺志）

赵以夫 字用甫，号虚斋。《通志》作历斋。居邑东芝岩，勋国公德钧八世孙也。父彦括，乾道五年进士，官终尚书郎。以夫少孤，苦学，用父荫授绍兴府诸暨县尉。嘉定十年，正奏，调江陵府监利县令。邑通淮广，奸民多盗贩鬻马以资敌。以夫设方略掩擒，获马百匹，献于府，荐知建昌军南丰县。丐归，主管西外睦宗院。绍定二年，盗起汀、邵，安抚使王居安檄兼参议。会诏起陈焯知南剑州，继为福建招捕使，焯奏委以夫通判州事，兼主管招捕司机宜文字，知邵武军。寻乞祠，主管武夷山冲佑观。六年冬，起知漳州，除提举江南西路常平盐茶公事。楮法初变，廷议民间市贱楮，输纳为亏，官令别纳补亏钱，以夫抗疏曰：“昔输一千，今增五百，是令不信也；输于民者有补纳，出于官者无贴支，是名不正也。”理宗大悟，可其奏。以夫复著《原弊》、《救弊》二

论上之。其后出十八界，收十六界，卒如以夫策。除左曹郎官，兼权枢密院，检详诸房文字。入对，条备边十策。迁左司郎中兼提领安边所。京城火，求直言，以夫极论致火之由，乞改葬故王，以弭天谴。俄以太府少卿兼左司，改直焕章阁，枢密副都承旨。力言光州危急，宜合淮东、京湖二阆兵，速援之，众未以为然，果失守。嘉熙元年十一月，历官预言季冬日食，将既。以夫上言：“臣尝考《春秋》与历代志、纪，日食为咎，大要在修德政以弭之。夫日食犹古所有之异也。然日与金、木、水、火四星，俱躔于斗，食将既，则四星俱见，日中见斗，此则古所无之异也。斗分属吴，祸福有归。望陛下亟侧身修行，则太阳当为之不亏。宗社事重，可不念哉！”二年，升右文殿修撰，枢密都承旨。值鄞卒作乱，除沿海制置副使，兼知庆元府。先是，制臣陈咳去后，乡宦赵善湘摄阆事，散帑库市恩，卒愈骄，大噪，善湘惧，遁入山中。以夫单车入城，具礼招善湘还。是时仓庾匱乏，以夫令糴白米散军粮，而自食其残腐者。监军赵瀆夫挟善湘势，擅斩禁卒，众怒，将为变。以夫素得诸校心，夜以谋告，以夫械其入付鄞令赵时诂讯之，尽得姓名，令缓漏筹，密召水军入城掩捕，皆获之，梟首三十余人，它置勿问。比晓，善湘等始觉，咸大叹服。淳祐元年，召权刑部侍郎，俄落权，除正职。以夫每对，必言国本。录嘉祐、绍兴建储始末以进，复荐赵汝腾、刘克庄、汤巾、黄自然、郑逢辰、杨栋、宋慈、包恢、许致祥、姚希，得理宗嘉纳。除宝章阁待制，沿江制置使，江东安抚使，兼知建康府行宫留守，和州无为军，安庆府屯田使。以夫至镇，以御赐金帛颁将士；筑寨、造船、缮甲，为战守计。蒙古兵围和州，以夫檄诸郡往援，夜潜师劫寨，蒙古兵败走。以夫料敌必报忿，预增无为戍，伏舟师於杨林，蒙古兵果至，诸将夹攻，大败之。复遣偏师援仪真，躬督水军，巡江至采石、裕溪而还。事闻，御札褒奖，召权刑部尚书。引对缉熙殿，



时大旱，江湖俱涸，以夫言：“汤以六事自责，陛下自省此六事有耶无耶？名曰去奸，而纳逆言，进奇玩；名曰崇俭，而建龙翔祠；感生，苞苴宫室，自若也；谗夫女谒如故也；忠直次第引去；嬖幸出入交通。天怒民困，职此之由。”理宗悚然。俄兼侍读，修玉牒。有旨令以所著《易通》进讲，改礼部尚书，迁吏部尚书，兼侍讲玉牒史职。复历陈“政、宣间弊事，由大臣有奉承，无匡救所致。”丞相郑清之诉于理宗曰：“侍从以臣方京黼，臣当避位。”理宗不得已除以夫端明殿学士，改知西外宗正事。宝祐四年，以疾告老。进光禄大夫资政殿学士，致仕。卒年六十有八。赠开府仪同三司。以夫素好士，士常满门，晚稍稍引去。惟同郡曾震受死生之托，记以夫言行纤悉不遗。莆人郑与言受以夫《易》学，为以夫服缌，诔甚哀，后策名归，犹迂道哭其墓。谈者以曾比任安，郑方侯芭云。（乾隆贺志，参道光通志）

潘 枋 字廷坚，初名公筠，避理宗嫌名，改今名。祖子仪，邵武军户曹。父钧伯，荣州助教。枋幼有隼才，读书五行并下。六岁以能诗闻。端平二年策进士，问“所以凝天命固人心者”，枋对曰：“陛下承休上帝，归德匹夫，何异为入子孙，身荷父母劬劳之赐，乃指豪奴悍婢为恩私之地，欲父母无怒，不可得也。”复言：“陛下手足之爱，生荣死哀，反不得视士庶人，此如一门之内，骨肉之间，未能亲睦，是以僮仆疾视，邻里生侮。宜厚东海之恩，裂淮南之土，以致人和。”时对者数百人，廷坚语最直，擢第三人。嘉熙元年五月，行都大火。上书者咸诉济王冤状，殿中侍御史蒋峴遂劾起居舍人方大琮、正字王迈、编修刘克庄鼓煽异论，并斥枋前对策语涉不顺，请皆论以汉法，理宗置枋不问，既而改宣教郎，除太学正，出通判潭州。会日食求言，枋应诏上封事，略言曰：“熙宁初元日食，诏郡县掩骼，著为令，故壬一坏浅土，其为暴骸亦大矣。臣尝悲夫流俗之论。辛卯、丁酉之火，皆谓故王为



之，此何异左氏之诬申生也。夫以无所逃而待烹之申生，而忍以晋畀秦哉？故王得罪于权臣，有之矣，于陛下无间言也，必不效尤伯有以忧陛下，请以王礼改葬。”又移书丞相游似曰：“天下事当论是非，不当论难易。枋既以身许吾君，不敢爱其死而变其说。公以为非耶，不敢以为公累；以为是耶，愿君毋病其难。”似心善其言，方将收用，而枋卒。年四十三。《齐东野语》云：“潘枋为福建帅司机宜文字，日醉骑黄犊，歌《离骚》于市。尝约同社友醺饮于南雪亭梅花下。衣皆白，既而尽去宽衣，脱帽呼啸，酒酣客散，则衣间各浓墨大书一诗于上矣。众皆不能堪。居无何，复置酒瀑泉下，行令曰：‘有能以瀑泉灌顶而吟不绝口者，众拜之。’廷坚被酒豪甚，脱巾髻髻裸立流泉之中，高唱《濯缨》章，众谬为惊叹，罗拜以为不可及。日举诗禅问答以困之，潘气略不慑，应对如流，然寒气深入经络间矣。归即卧病以殁。”按：《宋史》本传不言枋为福建帅司机宜文字，其入画卷，不知何时，约当在除太学正之前。《齐东野语》所载瀑泉灌顶事，有无不可考，然其卒则在潭州，而不在福建也。墓志可证。枋跌宕不羁。为文未尝起草，脱笔墨蹊径，而尤长于乐府。初赴省试时，峴得其卷，出夸刘克庄曰：“吾为闾取一佳士，君可酌酒贺。”问其姓名，则潘枋也，后峴擢台端，希旨论枋，枋遂流落补外，峴晚年殊自悔之。著有诗集古乐府。祀郡乡贤祠。（乾隆贺志，参道光通志）

陈春 官监察御史，右正言。以端直严重称于时。（乾隆贺志）

## 明

陈艮 字从时。洪武中以明经荐，授吏部主事。永乐初营建北京，与同官萧仪切谏，忤旨下诏狱。仪死，艮谪交趾。寻复官，遣阅辽东兵，陈军中弊政四事，为当事者所忌，出为严州通判。舟行，有巨蛇随之，艮曰：“是必有妇人冤者。”到官讯囚，得妇人冤状，立释之，人以为神。（乾隆贺志，参道光通志）

陈仲完 名完，以字行，江田人。洪武甲子举人，授延平府训导。永乐初，用修撰王褒荐，征为翰林院编修。二年，诏简东

官官，擢左春访赞善。奉命修《永乐大典》。仲完与物无竞，而论事无所回挠。尝有诏，汰在京冗官，时邹济长春坊，畏缩称疾，次当仲完，即奋笔书某当留，某当汰，众服其明决，被汰者亦愧服。侍仁宗于东宫，尝问其所长，对曰：“臣无所长，但职任所为者，未敢苟有退避。”仁宗甚重之。奉命授皇孙经，启迪尤多。历官二十年不迁，怡然自得。及仁宗即位，仲完前一年卒矣，杨士奇为传惜之。有《简斋迂稿》。祀乡贤祠。（乾隆贺志，参道光通志）

吴实 字仲美，龙门人。本姓林，慎思裔孙也。永乐辛卯进士。授御史。立朝敢言，不避权贵，时称为吴铁面。处州民因坑冶挟仇蔓狱，实奉命往按，微服廉访，出辜者百五十人。奉天殿灾，应诏陈六事曰：“惜民力，节财用，重爵赏，慎刑罚，择贤才，严考课。”皆切时弊。迁广西按察僉事，致仕。卒年九十二。著有《朴斋集》。（乾隆贺志，参道光通志）

马铎 字彦声，一字梅岩，岭前人。幼异常儿。稍长，受《礼记》于郑宣。为文援笔辄就。永乐壬辰，赐进士第一，授翰林修撰。成祖两幸北京，皆留侍监国。屡顾侍臣杨士奇曰：“马铎可谓质实无伪者矣。”春秋释奠先师，朝制用翰林国子官四人分献，翰林献位在左，后有易之者，及铎行事，卒辨而复之。卒于官。铎为人耿介伉直，临事侃侃无所顾避。自奉俭薄，遇人危急必济之。有一弟，笃爱之，弟死既葬，铎顾其子听曰：“他日葬我必于此，吾兄弟生死不违也。”其居据山林之胜，名曰梅岩，遂以为号。其卒也，士奇谏之，又志其墓。祀乡贤。（乾隆贺志，参道光通志）按：传内郑宣，通志作王宣。

李骐 字德良，沙京人。父长孙传见《乡行》。骐永乐丁酉乡试第一。戊戌举会试及廷试，复第一。初名马，牖唱日，帝亲书“其”字于旁，遂名骐。授翰林修撰，赐银带朝服，中外以为荣。骐事父母极孝，奉继母尤谨。遭疾方愈，值成祖晏驾，即出

哭临，或劝其慎疾，则曰：“吾受厚恩，不能他有所裨益，如不获一哭于几筵以罄臣子之情，抱恨无及。”明年，继母讣至，扶疾奔丧，抵家越月卒。大学士杨文敏深器之，惜其不永年，为志其墓。祀于乡。（乾隆贺志，参道光通志）

陈 灏 字季周，府志作继周。县西人。永乐丁酉举人。初训导松阳，改封川，擢交阯道监察御史，疏劾中官奸贪置于法。以佾事督学山西，转陕西按察使，致仕。初，灏为教官时，同郡严烜荐之。及灏为御史，克举其职，世以烜为知人。（弘治刘志）

黄文正 字子正，古槐人。永乐甲辰进士。选南京监察御史。刚果有为。尝巡按凤阳，辨平民黄毛头等三十六人冤。后迁广西按察司佾事，守雁门关，号令严明，军士畏服。代州一方恃以为安。年虽老，而气节不渝，威凛侧目，而羌夷畏威。为一时贤执法云。（乾隆贺志）

李 森 字叔严，沙京人。正统七年进士。授南京刑部主事。决囚平允。有指挥使王某庶子，赂当路廷臣及太监王振，谋夺嫡。事下，森力持不可。庶夜赂以金三百，森暴诸朝。侍郎齐某恣权阴娶绣女，得其状，具奏以闻。英宗北狩，贻书尚书王直、给事中程信，曰：“太子幼冲，未能践祚，邸王年长，宜定大计以安人心。”王、程言于朝，从之。英宗还京，千户龚遂荣寓书学士高谷，言奉迎礼当从厚，主上当避位恳辞而后受。都御史王文、内阁陈循恶之，奏遂荣非分妄言，下狱。森以书谏曰：“彼武夫尚知此礼，况吾辈乎？何可以非分妄言箝人之口？”不听。景泰三年，废皇太子为沂王，立皇子见济为太子。森闻，草疏驰传，欲以死争，且极诋陈循、高谷等。詹事府丞李侃见之大惊，使人疾还其奏。森叹曰：“南城之锢，已昧子臧之节，易储之举，益肆殄臂之谋。吾不复处朝廷上矣。”遂恚愤成疾，卒于官。同舍郎为具棺衾，理后事。成化二年，森子明经持公状谒韩军门雍，雍曰：“嗟乎！此雍

故同年士李森也。雍亲见其行事，岂不然哉？”于是论次其事。撮其大略如此。（同治彭志）

郑序字志礼，福湖人。正统壬戌进士。授刑部主事，历兵部郎中，湖广左参议。时列郡岁侵，荆、襄盗起，督赋严急。序宽简如平时，曰：“宁我得罪，不忍吾民颠沛也。”巡抚言序非理剧才，牒吏部更任，序遂乞休。居家三十余年，年九十卒。（乾隆贺志，参道光通志）

谢士元字仲仁，一字约庵，江田人。景泰甲戌进士。授户部主事，督通州仓，陈四弊，为尚书年富所契。监仓中官不利其为，欲中伤之。繁群胥吏，使织其罪，竟无所得。天顺七年，擢建昌知府。始视事，讼者怀牒满郡庭，士元立发数奸。其一方出券，士元叱曰：“伪也，券今式，而所讼乃二十年事。”民惊服，讼为衰止。郡军将多庇盗，士元以他事持，军将皆股栗，奸无所伏。郭内外十里，至不拾遗。乃大兴教化，劝励风俗，新学宫，聚书万卷，储礼乐器，扩射圃，暇日则临视督课，按射礼习行之。作敦化、表忠、劝学图诗，梓布村市。有兄弟讼田者，取图诗晓譬，遂感泣相让。岁再饥，再发粟，既尽，则捐俸为倡，富民争开廩延余。大理寺卿夏时正方巡江西，上其治状，获旌。秩满，民乞留，进从三品俸，治府事如故。以忧去，服阕，起知广信府。永丰有已闭银矿，处州盗聚数千人强发之。士元勒兵趋剿，贼阳遁，留二三人作为饵，逻者见而射之，士元亟止不及，伏四起，士元伤左股，血流洞靴，裹创力战，获其魁，塞矿穴而还。擢四川左参政，分守川东。夔州东乡多劫盗，士元立城戍，擒捕数百。建始人豪夺相仇杀，诉牒无虚月，士元径往缚数魁，土人大戒。进右布政使。弘治元年，就擢右副都御史，巡抚其地，土官大小娃者，将煽乱，士元托行边，驰诣其地，贼恐，献羊豕道左，士元徐慰遣之。岁大侵，流民趋就食，士元为广室十余区糜之，药病葬死，



归给符饩，全活者数万。明年坐事下狱。事白，遂致仕。元天性孝友，以余俸市田宅，与兄弟共之。一门同爨，食指数百，兄弟子女婚嫁费皆出己，门庭肃雍，士大夫尚其家法。子廷柱，字邦用。弘治己未进士，授大理评事。鞫狱精明。历官湖广按察司佥事，平反有声。隔境之民，皆越质成。卒年九十六。廷柱为人谦恭朴素，善属文，有典则，诗亦庄重，能继其家声。孙宽，字严夫，一字凤崖。为人简朴力学，谨密无浮慕。正德丙子领乡荐，授浙江泰顺令。宽和保民，政声大著。调象山，未几，丁内艰。起补鄞县，为政一如泰顺。后数年，挂冠归，有司罕见其面。屡举郡邑大宾，寿至九十有五。优游松菊者四十余年。著有《约庵稿》及《咏古诗》四卷。卒赐祭葬。祀于乡。（乾隆贺志，参道光通志）

陈维裕 字饶初，江田人。天顺庚辰进士。官监察御史。屡纠大臣，风裁凜然。时曹吉祥、石亨恃复辟功，横行不法，惟裕抗疏劾之，几为所危。其文行尤著。寻丁内艰。卒以孝称。（乾隆贺志，参雍正通志）

陈景隆 字如初，一字畏庵，江田人。成化乙未进士。令武康，改德清。中官奉使倚势横索，景隆正色拒之，曰：“吾官可去，剥民媚人，吾不为也。”擢监察御史，弹劾无所避，人目为真御史。奉敕江西清戎，及磨刷山东等处卷牍，政肃民怀。寻升山东佥事。制归，卒。生平奉职以诚，处家以义。闾里称为宽洪长者。其廉洁之操，始终不贰。（弘治刘志，参雍正通志）

林廷选 字舜举，竹田人。先世赘于樊，从其姓。成化辛丑进士。授苏州府推官，每于死狱求生。属县有邓珙者，累年讦讼，株连百数人，勘官数辈不能决。王恕为巡抚，命廷选讯鞫，得情列状上报，恕讶其速，亲复于庭，无不款服，大加奖叹，常熟桑怿作赋纪之。弘治五年，擢御史。明年，上疏得复姓。巡按广西，属夷寇犯平乐府，讨平之。劾罢不职武臣及贪墨郡守数人。还朝



考最。九年，迁浙江佥事，转副使。十八年，迁广东按察使。广俗健讼，前官多阿比文致其辜，廷选平法处之，人无冤告者。正德四年，升江西右布政，明年转浙江左布政，寻迁南京大理寺卿，晋都察院右都御史，总督两广军务，兼理巡抚。上思州，旧为土官所治，中更流官，尝不靖，六年，夷目黄镗等聚众攻州，欲夺印。廷选发兵捕镗，下浔州狱。已越狱复叛，复捕获之。八年，广西盗李天宝等作乱，又讨平之。廷选督两广五年，习知地方险易，土酋顺逆，夷獠巢穴远近，故连岁用兵，仓卒应变，悬合机宜。然倦倦以嗜杀为戒，抚而复业者甚多。五疏乞休，俱温旨慰留。旋擢南京工部尚书，复再疏乞休，许之。家居十余年，杜门自守，奉身清约。卒，赠太子少保。（乾隆贺志，参道光通志）

陈崇德 字季广，江田人。成化辛丑进士。授清江知县，征南京御史。同官杨茂元以直谏忤旨，祸且不测，崇德抗疏救之。擢广西副使，后备右江道，讨平柳州、庆远壮寇。迁左参政，右江分守道，进江西右布政使。以刘瑾乱政，贿赂旁午，引年归。（乾隆贺志，参道光通志）

郑锡文 字禹范，一字艾庵，西隅人。弘治癸丑进士。授义乌知县。县西有绣川湖，《舆书》作秀湖。久而淤浅，锡文募民浚治，周回筑堤，修石闸以时启闭，积所浚土，树松其上。民因名曰：“郑公墩”。征南御史，以忤刘瑾夺官。瑾诛，起云南佥事。土官治兵相攻，单车往谕，咸服罪。累迁江西右布政。历官三十余年，苦节不渝。子源涣，字与聚，正德丁丑进士，官刑部主事。偕邑人林公黼、陈谈疏谏南巡，被廷杖。公黼死，源涣亦创甚，犹匍匐为治丧，士论黷之。官终建昌知府，父子均祀于乡。（乾隆贺志，参道光通志）

陈文试 字道衡，十三都人。大父俞，字彦景，宣德元年举人，任无锡知县。文试以弘治丙辰进士，授临川令。首除豪猾，政

声大著。擢监察御史。时孝宗励精为治，乐闻谏言，文试上陈敬天、修学十二事，多见采行。他所举劾，咸允时论。（乾隆贺志）

林公黼 字质夫，一字石峰，仙山人。父节，成化七年举人，岐府伴读。公黼少力学，精通博贯。丧父母，三年蔬粥，不入内第。正德丁丑进士，授大理评事。详刑谨细，不以一字苟喜怒。十四年三月，帝将南巡，中外危疑，廷臣交章谏，帝怒，责先谏者跪外庭，待五日罪，止来者无敢谏。诸奸又日以危言恫喝，闻者皆惴惴。公黼夜草疏，闻暗中泣叹声，不顾。疏上，帝怒加甚，命锁项械手足暴日中五日，复系诏狱，待后命。黄巩与语，叹曰：“吾取友偏矣，乃近遗质夫。”越四日，杖于狱，又越五日，杖阙下，臀无完肤，流血渍街砌。舁出，与行人李绍贤同时死。年四十四。殡于同年刑部郎郑源涣舍。源涣亦被杖，力疾为治丧事。京师人无不哀者。世宗立，赠太常丞，赐祭。录子逢春入太学。福王时追谥忠恪。逢春授光禄署丞，历九江通判，升署正，终荣府长史。所至称廉能。以养母告归。（乾隆贺志，参道光通志）

陈毓贤 字则英，一字横川，江田人。正德丁丑进士。历工部郎中。嘉靖三年，命浚漕渠，毓贤疏请于宝应高邮湖堤建闸十座，以杀水势。略言：“宝应汜光湖，往来粮船入湖三十余里，湖堤旧基俱土石筑成，高湖面不过三尺许，堤西湖势高，堤东田势下，惟赖一堤障水面已。且西有天长、六合、泗洲诸处，地多高陡，一遇积雨，即时弥漫。加以黄河水涨，又由淮口横奔，不时冲决。非惟漕运有妨，而宝应、盐城、兴化、通泰诸州县，民田淹没，饥荒随至，此江北第一患。惟于高邮堤迤东修筑越河，庶可免风波之患。”擢陕西布政司左参议，分守关西道，增筑平凉夹城。岁饥，请留京折多方赈贷。转山西按察司副使，兵备冀北道。流民啸聚山谷，为寇向导，毓贤招抚之，悉解散。代王左右欲于冀北凿河溉庄田，毓贤不可，赂以金，正色拒之。迁广西左参政。

适右江壮瑶结思田土兵倡乱，诸道会剿屡僨，毓贤怀以恩信，寇卒平。督抚方荐之，未上，卒。（乾隆贺志，参道光通志）

郑宪 字有度，号磁江，仙崎人。兄庆，字有章，嘉靖八年进士，历官滁州知州，工部员外郎、郎中，广东参议。宪性颖悟，端和纯粹，有黄叔度风。正德丁丑进士。授刑部主事，为大司寇刘玉雍正通志作玉濂所知，令看详诸司奏牍。丁内外艰，不入私室者六年。服阙，在告积十四年，犹以主事谒选，其秉礼恬退，类如此。先，与礼部主事方献夫相友善，及宪起复，方以议礼骤致通显，秉铨衡矣。相随邸舍，一揖而出，不与叙款。方衔之，遂移核稽违，待报。逾年仍补刑部。盖宪抗节履道，虽偃蹇濡滞，弗恤也。终光禄寺丞。卒祀乡贤。（乾隆贺志）

陈文沛 字维德，六都人，先姓林。正德丁丑进士。授工部主事，历郎中。正德末，有建议修苏松水利者，进李充嗣工部尚书兼领之。未几，世宗嗣位，遣文沛及颜如玮佐。充嗣开白茅港，起常熟县东仓至双庙一万七千三百九十二丈；又于白茅上流浚尚湖、昆承、阳县各湖为港、为泾、为溇者凡十有九处。沛日暴露风日中，故役夫用命。又疏吴淞江，六阅月而讫工。海溢，圯海盐塘，命文沛督修，筑天阙诸塘。旧制，石多纵少横，文沛使纵横交错，南抵宋庄，通新旧堤一千三百丈。劳勩数月，未尝受有司馈饷。又督边储，皆有功，诏增俸，出知抚州府，调苏州，所至治最。擢山东按察司副使，迁陕西行太仆卿。文沛刚介有执，杨一清、胡世宁、李承勋皆荐其可用。吏部尚书汪铤以私憾挤之，遂罢。家居二十余年。子时范，字敷畴。嘉靖辛丑进士。清约端慎，有父风。授户部主事，迁刑部郎中。出知夔州府，蜀人以三殿采木大困，为之蠲豁，存活数千家。迁云南按察使，历左右布政使，藩帑积羨金五千，以充大比费，余贮藏中，一无所取。父子同祀于乡。（乾隆贺志，参道光通志）

陈谈字允默，一字鹤峰，德隆三子。德隆见《循良》陈让传。正德戊辰进士。官刑部郎中，奉命虑囚，权贵人以私请，且胁之，谈曰：“国宪可教耶？”请者恧沮。己卯，武宗将南巡，谈偕同官苦谏，被杖濒死。出为兖州知府，至则振穷惩暴。以病乞归，道卒。祀忠义祠。子豪，字志兴，一字肖鹤。嘉靖壬辰进士。授新昌新昌有三，未知何属。知县，以卓异，召拜御史。谏复河套，亦被杖。出备兵外藩，以病岁禄，为饷粥济民。所著诗文，为时所诵。（乾隆贺志，参道光通志）

陈省字孔震，一字幼溪，十二都古槐人。父大漫，传见《循良》。省才高，负重名。嘉靖己未，连举进士，授金华推官，讞狱多所平反。东阳饥民掠富人谷，几为乱，省摄邑事，安辑之。义乌矿盗猖獗，省檄谕而解。秩满当征，时严嵩为政，诸征者以贿入，或微讽之，省曰：“吾廉吏，可以贿得官耶？”嵩败，诸征者皆报罢，省乃得御史。奉命按山海关，疏请罢管粮通判，以部郎督饷，贵督抚大臣校阅边卒，多寡强弱以程将领功罪，皆见施行。又劾盗饷者置之法，督臣不能庇，边政大饬。役竣，再奉命按湖广。世宗起承天，不忘旧封，尝奉太后梓宫葬显陵，骚然繁费。会承天水溢，睿陵垣倾，遂决意南巡，命工部张守直、太监袁亨等往督工，而手自画宫殿诸图，计费且亿万，缇骑侦督，相属于道。是时帝春秋高，储宫未定，中外皇皇，首辅徐阶讽诤百端，莫能得，日夜祈死而已。省疏适至，言“楚水为患，下民死亡流离，困苦万状，不宜更困以大役。又伊洛之墟，洪水衡注，陵谷变迁，道路阻梗，齐、鲁、吴会，矿徒、白莲教随在窃发，洞庭蕲、黄、郟、漳间，盗贼布散辰、沅，苗、夷、瑶、壮耽耽伺隙，若乘舆一发，祸衅丛生，边患乘之，将何以支？”帝览之心动，谓御史言是，遂罢。阶叹曰：“是所谓一言回天也。”先是，守直欲尽撤承天殿宇，省争之力，守直忿然曰：“上若请违命所由，吾不能庇。”省曰：



“某自甘斧钺，决不累公。”至是守直感泣，曰：“微公，吾得罪天下万世矣。”其年，世宗崩，穆宗即位，省劾尚书霍冀与梓人徐某，以兴作阿先帝意，靡天下财力，当治。诏罢冀，籍没徐。承天守备太监张方多占民田为皇庄，省劾奏之，以庄田归有司，省横斂十三万金。又劾大和山守备太监吕祥七罪，诏征祥还，并罢守备官。初，辽王宪焯，以奉道为世宗所宠，赐号清微忠教真人，予金印。至是省劾宪焯诸不法事，诏夺真人印。荆世子常冷，所为多不法，楚人苦之，省暴其罪，与宪焯并幽高墙报命。复出按广西，劾巨珰王本。寻引疾归。起督京畿学政，擢大理少卿，晋金都御史，提督操江。盗效我兵楼橹旗帜，往来江上不能辨。省令兵为帜六，按时更易，自相识别，大集舟师捕盗，无得脱者。泾县巨侠董代以符讖妖术惑众，势甚张，省驰一骑缚之，余党皆散。召人协理院事，帝问辅臣：“往闻毛伯温贤，信否？”张居正对曰：“今有省可匹伯温。”因述按楚事。他日，帝罢朝，问左右：“适有台臣奏事，容仪甚都，岂即陈省耶？”庶吉士宋儒，倾险士也，欲倾同年生熊敦朴，乃自为疏劾居正，持示吏部侍郎王篆，曰：“此敦朴所为。”篆以语居正，居正大怒，省为敦朴称枉。遂自请外任，以右副都御史巡抚陕西，仍调操江。未上，为篆所劾，听勘。万历九年，再起，巡抚湖广。诸宦官道楚者，多以谒陵为名，走江陵起居居正父，省疏禁之。又请苏京运，蠲积逋，省协济，清库藏，并驿传，恤灾伤，惩积猾，裁文武冗员，凡二十八余疏，皆楚中大利病也。五开卫邻贵州，戍卒与苗蛮杂处，彼此相煽惑，大豪胡国瑞假乡约胁众逐守备，火其居，诱苗夷与共反，省讨平之。进兵部右侍郎，兼右金都御史。及居正歿，言者以省为居正所用，又巡抚其乡，遂纠省。罢归。道武夷接笋峰，遂筑室其间，名曰：“云窝”，日与诸生讲学论文，悠然自乐。后家值大水，延、建民溺死数万，浮尸蔽江下，省方舟数十艘，收而埋之。学宫水反射，



形家谓宜导水为九曲，而其地皆腴田，省慨捐之。又立义田，以贍族人，婚、嫁、丧、葬皆有助，亲旧以贫乏告者，一无所拒。子所立，初名长濬，万历丙子举人，历淮安同知，擢永平知府。雅尚经术，集诸生较文艺，终日不倦。灤漆水涨，障城筑砖堤，栽莲芰，以资民利。官终副使。夏允彝论云：“肃宗初幸楚，所至供御为竭，且行殿灾，几不测，晚年将再驾，举朝惶惧，无敢争，公疏阴讽上，文贞推明之，具揭以进。上乙其揭中语曰：‘狡逆之徒，倘或窃发，此非寻常事。’乃特辍行，嗟乎！自燕至楚，不至绎骚者，孰非蒙公之泽？而不久升遐，得免苍梧之恨，功又何如也。一疏回天，已足不朽，安得以见知权相，苛此伟人乎。”（乾隆贺志，参道光通志）

郑世威 字中孚，阳夏人。嘉靖己丑进士。适台省乏员，选诸新进士中，众趋赴。世威曰：“才脱章句，躐司耳目，毋论躁，且虞旷也。”竟不往。授户部主事，监通州仓。一日忽心动，疏乞南徙以便养。未得旨，而丁父忧。服阕。补刑部，迁员外郎，恤刑陕西，出死囚九十六人。时已擢广西佥事，当事得陕爰书，喜其持平，改注广东，迁江西。大学士夏言家居，抚、按及藩、臬诣第修谒，率由掖门进，世威呼阍者语之曰：“相国诚尊，然奈何使邦大夫踳踳旁趋？还吾刺去耳！”阍者错愕，辟中门，乃入。巡抚汪元锡偕言诣上清宫，以祝厘为名，诸官皆从，世威视祝辞相国祈子耳，语其僚曰：“吾侪非相国私昵，胡为乎来？”拂衣出。比焚篆，强世威署名，不应，言恚。未几转浙江布政司参议，适言还朝，道杭州，遽人来告，台院诸司已驾出城，世威以职务辞，言愈憾，令巡按御史杨九华论罢之。九华廉世威无他疵，置勿论。言复令掌铨者中以大计，徐阶为吏部侍郎，阴庇之。嘉靖二十六年夏，倭寇宁、台，巡盐御史鄢懋卿壬人也，希言指劾世威失律，诏巡抚逮问，会言败，得已。临海中津桥增盐额，岁以数千计，世威议削商籍，以所增税与民，台州人尸祝。转江西副使。会严嵩柄国，族党暴害甚于言，副使熊楫，嵩戚也，抑买废寺田千亩，世

威估平直，鬻田赈饥民，楫持嵩书属之，不听。会入覲，绝一切馈遗。丰城知县韩弼、安福知县黄履新、新城知县陈温皆以强项忤豪权，注下下考，世威以次申辨，言所枉状，得移中上。事竣归，益议馈遗之禁，谓：“罚醵所储谷，备水旱及非常，今肺石而征之，筐篚而靡之，是奸国法也。取盈于公廩而尾闾于权门，是夺民救也。境内卒有数千里之灾，一旦欲储三月粮，救千万人之命，奚可得乎？”议寝不行。江西一署提学，两监试事，得贤最盛，而谭纶为著云。迁四川参政，念嵩父子终螫已，致仕归，教授生徒。著《四书答问》、《诗经答问》共十卷。林一骐、邱问礼、陈仕进、郑岳等皆其门人。嵩败，中外交荐，起南京右通政。隆庆元年，召为左佥都御史，转右副都御史，迁南京吏部右侍郎，改北刑部。进《举真儒崇正学以隆圣治》疏，内举薛瑄、陈献章应从祀，论王守仁不应从祀。时张居正为政，厉威权，以属礼颐使九卿，世威叹曰：“吾方壮时，忤贵溪、分宜，几陷虎口，今老矣，安能以仅免之身，便辟新贵人前哉？”遂谢病归。世威通籍数十年，朝野参半，对大僚，临下吏，与农民处，一本于至诚。其学一以濂洛为宗，取六籍及先儒语录，其精者独证于心。以侍郎家居，环堵萧然，躬课耕作。客遇诸田间，曰：“为我报主人翁。”世威诺而入，须臾衣冠肃客，即向持刺人也。万历二年，修县志。卒年八十二，赠刑部尚书，谥恭介。祀于乡。子应晓，字昌升，通志作昌叔，初号退省，改号孺环。性耿介，凡辞受取与，必衷诸义，亲朋不敢干以私。为诸生时，学使毁紫阳，以阳明学倡士，颁其书于晓，晓谢不领，曰：“此吾父总宪时所论驳，欲罢其祀者，吾岂敢背之？”相国李廷机每语人曰：“吾见郑公，如不见麟而见趾也。”以荫历太常典簿，出为南宁通判。奉檄督盐运于广东，其法如官市率，用母钱三万八千余两车子钱，佐广西费，应晓兑价用原封识，不名一钱。提举某曰：“旧例督运官私市盐附船偿往来费，郑

公自裹饭来乎？”后飓风大作，没盐运，直三千金，往按船人及押官等所私市，几二千金，犹缺千金，应晓为众祈免，得报可。应晓笑曰：“若如旧例，能使众听我偿乎？”擢桂林同知，以劳瘁得手颤疾，致仕归。卒年七十二。著有《辟佛论》、《主敬说》、《儒窟集》、《识字万一》、《云涵集》诸篇。府志论曰：“曩德清许公孚，远来抚闽，孜孜阐‘止修’宗旨，尝聚士大夫，竟日而谈，余时过里门，听之于心无当也。越数月，丰城李公材以滇事戍闽，许公复邀诸荐绅谒李公，广‘止修’之论，余愧不敏，谢不赴。然闻其言，宏肆而辩，诸荐绅亦虚而往、虚而归耳。盖当世庙初，海内于‘致良知’一说，奉为正印，其后属厌，别揭‘止修’之目，若超‘致良知’而上之，抑何多歧也？良知，良能，孟子对举并言，要以亲亲之仁，敬长之义，达之天下，则良能庸可废乎？若谓致即为能，是孟子与显而言之，王文成偏而晦之矣。至于‘止修’，宁出知能之外？曾子明‘知止’，而引文王之‘敬止’者，以立伦极，夫子言修身，而必曰以道，言修道，而必曰以仁，道为达道，仁为达德。不虑之知，不学之能，止于焉择，修于焉先，圣贤之言，同条共贯，可谓至明至尽，共察共由者矣。今晓晓曰：‘致良知’也，‘止修’也。奚异于止行潦而概江河，窃容光而尽日月哉？郑恭介之辟文成，大有功于圣学，顾其时拾良知之唾余者，并列崇靡，争欲申其师说，恭介之言，譬孤凤鸣于众巢，难以和矣。第学者得是说而存之，俾正学昭明，则彼立户分曹，强而为异者，必不攻而自破也。（乾隆贺志，参道光通志）

陈玉字汝良，一字龙峰，沙京人。嘉靖辛丑进士，为刑部主事。南海庞尚鹏贫贱时，聘尚书王吉女，既而吉悔婚，女矢志不二，吉愤致尚鹏罪，玉曰：“杀人以媚人，吾不为也。”力明其冤。后尚鹏巡抚福建，为玉建生祠云。玉长于诗，时严嵩当国，亦能诗，玉论诗与嵩合，嵩欲交欢之，适职方郎王尚学忤嵩，欲中以大辟，玉与同官袁福征、林大章力持之，尚学得减戍。杨继盛下狱，玉赋《幽居歌》以伤之，寻出为饶州知府，多善政。罢归。玉恂恂言不出口，而文如泉涌不竭。其诗冲淡和雅，与王世贞、李攀龙殊调。而世贞作又五子诗，玉居其一。子江，以太学生选光禄寺监事，迁高安县丞，以刘基尝官此，作景刘堂。矢志清白，六年如一日，上官屡旌其能。署县事，政声益著，以解输

至京，疏减虚税四千缗，民德之。擢兴国州同。在太学，尝率同列十七人，伏阙疏嵩罪，声誉不愧其父。夏允彝论云：“当七子之兴，自标甚高，而分宜负垢秽声，宜其不与合也。然闻分宜貌殊好士，杨忠愍初入都，分宜延之，款语移时，杨几为动，既出行数里，乃忽奋鞭自策曰：“以其馥语，移我铁肠，继盛非人哉！”遂疏纠之。非忠愍，谁不中其甘饵者？公既以诗称与之合，以力救职方，伤忠愍之幽系，尤与大忤，集枯不集菀，古人所难也。闻公子江曾率大学生十七人伏阙，疏分宜罪，虽不得请，谈者率引其舌不收。其事不甚著，然吴敢两宗伯常言之。当不虚称是父子矣。（乾隆贺志，参道光通志）

石 磐 字民渐，古槐人。嘉靖丙午举人。知临淮县，审编里甲，流亡复业。有吏部子过邑，家奴索夫役，破仪门，磐笞之，系子狱。镇守太监令伏谒，磐不听，遣人来呵责，磐亦笞之。沛以西河决，磐力主筑白马堤，堤成，人呼为石公堤，尸祝焉。擢职方主事，条边事甚悉，尚书翟冀奇之。两广倭乱，磐为广东按察僉事，行至肇庆，倭陷双鱼所，雷廉大震，磐躬督将士出战，复双鱼，斩首千五百，生擒四百人，追余贼于牛牯墩、富林、铁场，悉平之。擢布政司参议。督府欲多叙功，磐不可，忤督府意，罢归。著《菊径漫谈》十四卷。卒祀于乡。（乾隆贺志，参道光通志）

陈联芳 字以成，一字青田。年十一补诸生，嘉靖丙辰进士。授金华推官，以廉平著声。选监察御史，巡按宣大，值西北有警，檄边帅饬备，敌不得入。既而通州告警，上防守五事，世宗嘉纳。再按广东。会城与岛渚为邻，先是，海贼剽掠，总督吴桂芳扑灭之，以货物云屯城外，议建外城，民有屋庐被撤者，作蜚语，版筑几寝，联芳力赞成之。工甫毕，而海寇曾一本突至，向之怨谤者乃德之，因与桂芳并祀。还朝，劾怙权中官王本及锦衣黄锦，京师肃然。四十一年，命偕同官凌儒监顺天乡试，议两京应监生与生员一例弥封，不另编号，取中之数，仍如旧额，满三十五名则止。联芳又言，重后场以罗实学，令两京同考官阅卷，不必书各房名目，主考止以文字去取，每以考官为额数，分房为次第，礼



部议复，允行之。隆庆元年，请停刑，起废言官，谏罢建翔凤殿，皆见采纳。吏部尚书杨博掌京察吏科，给事中胡应嘉劾其挟私庇乡曲。应嘉先尝劾高拱，拱修隙，属博重罪之，言路大哗。联芳及给事中辛自修力争，乃调应嘉建宁推官。张居正生辰，百僚趋贺恐后，联芳出游僧寺，若弗闻者。擢太仆少卿，转光禄卿，历南京太常寺卿，致仕。卒，赐祭葬。联芳廉洁自持，奉身俭约，布袍敝帻，终身若寒士。歿后，子孙至不能举火。祀于乡。夏允彝论云：“当江陵之时，才能趋时者，俱暴贵。即公之族，多以此显，唯公独见厄。公之所以为公乎？”（乾隆贺志，参道光通志）

谢汝韶 字其盛，江田人。嘉靖戊午举人。谒选，得钱塘教谕。上书台使，请行条鞭法，编缙数千言。条鞭法，实汝韶倡之。擢武义知县，禁侵牟，汰浮冗，均践更，核赋役，胥吏无能弄文者。调知安仁县，时条鞭法始通行海内，他令长率持两端，安仁锐意行之。奸人李寿刻章印，伪书两御史符，从留都驰安仁，亭传骚然，汝韶烛其符伪，置之法。余干令治亡状，山民数千，啸聚箐岫，谋攻郡邑，巡抚召汝韶问方略。汝韶侦寇所出入，请锐卒分六道袭之，贼不及备，禽其渠，戮之，余党平。迁承天府同知，承天滨汉沔，多盗，汝韶得其党，使为间谍，盗自惊疑，悉散。守显陵蒋指挥占没民田，或讼之，汝韶缚其奴，下之狱。张格者，当阳大贾也，自附张居正近属，时持县令短长，令诉汝韶，竟论如法。襄水溢，民在沮洳中，汝韶拯活数万人，呼为谢父。抚按、监司，靡不重汝韶，事不办者，率以属之。荐为湖北副使，而吏部中谗言，乃迁吉府长史。吉王得汝韶甚喜，居正以丧归，诸藩有致数千金贖者，汝韶持不可，导王用常礼修唁。居正怒，嗾监司赵思成崎龇之。故事，王傅以客礼见监司，思成欲抑令如属吏，曰：“郡国等耳，傅奈何不率礼？”汝韶笑曰：“王傅之膝，可易屈耶？”遂自免，王慰留至涕下。汝韶曰：“臣去，国体全，所



得多矣，且毋令诸邸言蒲伏监司自吉长史始，以遗王羞。”遂归。兀坐一室，凝尘满席。著有《碎金集》、《天池存稿》。子肇瀚，自有传。（乾隆贺志，参道光通志）

谢肇瀚 字在杭。万历壬辰进士。湖州推官，改东昌，历南京刑部主事，兵部郎中，补北工部屯田司。值旱，疏冗费诸弊数千言，略言：“不忍以闾阎有限之膏脂，付诸阍竖狙佞之手。”语甚恺切，神宗优旨答之。视河张秋，作《北河纪略》，俱载河流源委，及历代治河利病，曰：“吾以尽河之变也。”福王之国，舟千二百有奇，肇瀚操小艇前驱。缮浚多方，水道无阻，众以不哗。出为云南参政，迁广西右布政。安氏乱，邻境告警，肇瀚置官增戍，缮备益兵，及增盐引，急宗禄，抑土司，服瑶壮，铸钱，征商，具有实划。常言：“从来吏治之坏，无如今日。大抵官不留意政事，一切付之胥曹，而胥曹之所奉行者，不过以往之旧牍，历年之成规，不敢分毫逾越；而上之人既以是责下，下之人亦不得不以故事虚文应之，一有不应，则上之胥曹又乘隙而绳以法矣。以故郡县之吏，宵旦竭蹶，惟日不足，而吏治卒以不振者，职此之由也。”又言：“国家立法太严，如户部官不许苏、松、江、浙人为之，以其地赋税多，恐飞诡为奸也。然弊孔蠹窦，皆由吏胥，堂司官迁转不常，何知之有？今户部十三司，吏胥皆绍兴人，可谓目察秋毫，而不见其睫者矣。”肇瀚好读书，于学无所不窥。为文丰腴轩举。诗靓深婉丽，时罕其伦，蚤年即传布江左，大都率循古法，而中有特造孤诣，体无不备，变无不尽，蓄藻于建安，希躅于少陵，泛驾于长庆，既美才情，尤深寄兴。是时诗道向衰，以肇瀚为砥柱云。夏允彝论曰：“世言文人寡实效，公起海隅，与海内能文家屠纬真、李本宁、袁实公诸公相颉颃，可谓豪于文矣。历仕殊久，行事无可疵也，何言文能累政？余以吏故，遂阙于文，岂政又足累文欤？才盈则溢，匱则拙，无相累也，相资则深。”（乾隆贺志，参道光通志）

陈洙 字伯训，一字一水，江田人。祖时宪，弘治癸丑进士。官湖广佥事，抗珰而死。父铤，举人，为南安丞。洙生而颖敏，年十二籍学。嘉靖壬戌成进士。以户部郎出知襄阳府，筑堤赈饥，活民甚众。时辽王狱炽，同官承风旨，争为锻炼，洙默然。寻迁云南按察使副使，领提学道，兼权本使，黔国公械其民，死无算，洙呼吏破其械，释八十余人。巡抚邹某愤滇多乱，置重典者五百人，洙察其冤，旦夕将决，洙夜叩辕以官力争，乃免。寻罢归。久之，王锡爵、申时行当国，特起广西参政，迁云南按察使，浙江、湖广布政使，入为光禄卿。致仕归，僦屋而居。族人同时显者六七人，车盖赫奕，惟洙最贫。曾孙希友，传别见。（乾隆贺志，参道光通志）

陈应春 字汝梅，罗田人。嘉靖壬戌进士。令东阳，多惠政。擢户部主事，扈从穆宗谒园陵，万骑如云，应春视刍粟，部署立办，迄终事，无哗者。大司徒马恭敏深器之。榷关浔阳，创立规制。大狙不得羸缩其手。出为云南佥事，历广东、西副使、参政，山东左布政。卒。应春官粤西，有平寇功。其在云南也，儒生杨霁讼其室人凭于妖，应春檄城隍神驱之，三日妖遂绝，火其祠。滇人御史李元阳为纪其事。（乾隆贺志）

林世章 初名庆，以字行，后更字尚闇，坑田人。嘉靖乙丑进士。授吉安教谕，葺白鹭书院以居弟子。迁国子博士，转南京工部主事，历都水郎中，榷关仪真，平价惩弊，立短载法，瘞浮尸，置义冢，商民德焉。寻请告归。世章有至性，幼知让产于兄，平生语无缘饰，于世味一无嗜好，以义方教子弟。叶向高言：“长乐以清修著者，林世章与郑世威为最云。”子裕阳，自有传。（乾隆贺志，参道光通志）

郑岳 字永翰，号兼山，龙阳人。祖七都华墩。隆庆戊辰进士。授华亭令。华为天下壮邑，岳谨箠箠，清讼狱，息萑苻，飭学宫，

循治称最。时相高拱修郟徐文贞，当事者多以傅会为能，而岳独否。擢谏垣，论列侃侃，大阉张进廷辱言官，岳疏纠之，夺一岁俸，遂外徙。连艰内外，孺泣尽孝。补粤东兵备，蠲烦苛、问疾苦。山寇猝入程乡，劫其令，岳划策诱戮其魁，余丑遂散。河源城圯，岳为徙故城，发庾赈之。以谗归，萧然自得，居乡以和，约身以俭。起参滇南政，坚卧不起。夏允彝论曰：“余幼闻诸父老，方新郑相，修郟徐文贞也，当事者相傅会，致器讼蜩起，所讼诸大家，无论虚实，悉指为徐氏。新郑去，事解，当事者率解绶去。嗟呼！郑公不徇势，亦足以峻擢，视彼属得失何如哉？吾乡先辈有言：‘岂真有造吾华，其为朝廷扶植纪纲非浅鲜矣。’”（乾隆贺志）

陈长祚 字以玠，一字培所，古槐人。父瑞，两广总督，晋大司马，常代巡吴中，以多善政，再请留一年，盖异数也。后以抚楚，优擢，遂为长乐甲族焉。长祚登隆庆辛未进士，以泌阳令擢兵部郎，管武库，清核积羨十五万有奇，立为岁察之法。后以方伯备兵榆林，习夷虏情，操纵得宜，边塞晏然。官至工部尚书。时熹宗两皇子继薨，疏请合葬，省帑金数万。郎中万璟弹魏忠贤，廷杖垂毙，长祚抚之痛，诸珰侧目，因请归。生平无崖岸。捐筑斗门以溉南亩，里人至今感之。兄长进，举人，官同知。弟长勉，户部郎中，孙翔，进士，官中书，闯贼陷京，恸哭南旋；睿，岁贡，不仕。夏允彝论云：“陈氏之族，甲闽中矣。公与幼溪司马，官最达。幼溪豁达，多大略，其归也，穷山川之乐。公宽然长者，居乡，杜门不问外事。其致略殊，其重于朝野则均，鼻州之序曰：‘是能重族姓，非以族姓重者也。’知言哉！”卒祀于乡。（乾隆贺志）

谢杰 字汉甫，江田人。幼警敏，博学能古文词。登万历甲戌进士。除行人，册封琉球，却其馈，其使入谢，仍以馈致，杰言于朝，返之。琉球入为立却金亭。擢光禄寺丞，历两京太常少卿。南京岁祀懿文太子，以祠祭官代。杰言：“祝版署御名，而使贱者将事，于礼为褻。请如哀冲、庄敬二太子例，遣列侯。”帝是之，乃用南京五府金书，著为令。累迁顺天府尹，平徭均税。以

右副都御史巡抚南赣，清四弊，陈三策，以汰兵之冒者，军民安堵。属吏被荐者以贿，谢杰曰：“贿而后荐，干戈之盗；荐而后贿，衣冠之盗。”人以为名言。进南京刑部右侍郎。二十五年春，陈十规疏，言：“前此两宫，色养维一，今则定省久旷，庆贺亦疏。孝安太后发引，并不亲送；前此太庙时享，皆躬亲，今则皆遣代；前此经筵临御，圣学日勤，今则讲官徒设，讲席久虚；前此披星视朝，今则高拱深宫，累年不出；前此岁旱步祷郊坛，今则圜丘大报，久缺斋居，宸宫告灾，亦忘修省；前此四方旱涝多发帑金，今则采矿榷税，中使迭出；前此用财有节，今则岁进月输，而江西之磁，江南之纻，西蜀之扇，关中之絨，率取逾额；前此乐闻说言，今则封事甫陈，严纶随降，但经废弃，永不赐环；前此抚恤宗室，恩义有加，今则楚藩被讦，中珰旋出，以市井奸宄，间骨肉懿亲；前此官盛任使，职无旷官，今则大僚屡虚，庶官不补。是陛下孝亲、勤政、尊祖、好学、敬天、爱民、节用、听言、亲亲、贤贤，皆不克如初矣。”不报。召为刑部左侍郎，擢户部尚书。督仓场，时四方遇灾，率请改折，杰请岁运必三百万以上方许议折。从之。三十二年，漕运愆期，杰忧形于色，蚤夜焚香祝天。是冬，运河冰独不合，漕艘仍如期集，朝野异之。一日暴卒，赠太子少保，遣官护丧，赐祭葬，祀于乡。所著《白云天灵》、《北窗吟稿》行于世。子汝烈，旧志作杰侄。以贡生授南平训导，擢始兴知县，守正不阿。权珰欲采矿其邑，汝烈杖而遣之，旋弃官归。（采通志、府志）

林裕阳 字永光，世章叔子。万历丙子举人，授蒲州学正，转令连山。连山本穷壤，大珰以矿税扰诸邑，裕阳力争，得减大半。擢永宁知州，永宁与连州皆杂处夷獠。裕阳每贻故人书，但言：“居职勉自树立，初不知为蛮烟瘴雨乡也。”进柳州府同知，人为南户部郎中，管浦口屯田，以耗米益正支，军民大悦。出知临安



府，土舍盗贼为梗，裕阳以计擒其魁，余皆款服。李玉、李凤父子纠沅州贼入近郊，杀营卒，裕阳檄土舍沙源追贼于倘佃，俱就戮。兵备副使欲尽贼根株，裕阳曰：“某请以抚为剿。”即命骑抵贼巢，作简明歌，令耆老译谕，劳以牛酒，令归耕，皆罗拜。晚宿贼庐，酣寝达旦，贼跪进食，食已，又之一巢。三日而遍，皆就抚。或问：“何以知沙源能办贼？贼既败，方恨我，何以知不害公，且就抚？”曰：“此易知耳。我兵积弱，非土舍不能成功。沙源往日征南，功格于吏，吾能直之，故为我尽力。首恶既诛，余党丧胆，蹙之则负固，抚之则方庆得生，故来也。”广南酋依绍周新袭位，头目欲立其弟绍阳，贿当道，将许之矣，裕阳不可，竟复绍周，四邻帖然。寻乞归，而奢崇明、安邦彦难作，拔用沙源，累著战功，人服其鉴。卒祀於乡。夏允彝论云：“林公父子之歿也，郑少司寇环浦，叶相国文忠、董少司空见龙、官詹黄东崖，或志其墓，或为之传。其并祀学官也，陈少司马幼溪、林给谏楚石、谢司农绎梅皆序其事以传。数公咸巨人长者，非妄称人者也。两公得此，虽由其子孙贤，不益足以睹两公哉？”（乾隆贺志，参道光通志）

马思理 字达生，一字还初，五都人。天启壬戌进士。知乌程县，县赋故重，胥吏积蠹其中。思理创立清单，俾里甲自注纳数，不施鞭笞而课不负。民俗以人命相讦，一经官检，其家立碎。思理约法，先讯后检，讯得诬者，立罪之，讦风始衰。邑中士大夫以文艺来质，礼之客馆，赏奇析疑，终日不厌。有所干请，则正色拒之。其所拔识如凌义渠、温璜，皆忠节士也。遇水旱，为民零祷，必芒鞋去盖，或盛夏暴烈日中。请折请振，尤恳恻动人，上官鉴其诚，曰：“马君所请，何可同他令耶？”在县两值俭岁，输额至七分以上，即止不征。居五年，以考最内召，乡民扶老携稚，自郡至吴江界八十里间，牵袂环蹕，献卮酒，思理勉为举觞，众泣，思理亦泣。入京擢兵科给事中。崇祯元年，命巡视太仓，清钱粮数十万计。又巡皇城。是时流寇渐炽，思理疏言：“川陕间，



无处不报流贼。夫民穷为盗，兵逃亦为盗，初未及百耳，不及时剿除，遂蚁聚以千万计。臣愚以为剿盗在剿于初起，诚急救兵部核盗起地方，酌量立限，或三月，或五月，能如限剿除者，即授不次之擢；其有再违经年者，实置之法。彼如死于法，毋宁死于贼，有不为陛下捕贼安民，臣不信也。”帝方英明，特简思理核边镇兵马，时度支不足，而节镇司阍外者，多冒费乾没，粮匿马空，动形支绌，骄卒猾弁，朋比作奸。思理熟九边形势，以简练为主，所条三十八议，汰金钱三十余万。历工科左右给事中。巡草厂，适巨珰张彝宪总理工户二部钱粮，自尚书以下，尽接以属官礼，思理独不为屈，触珰怒，以草场失火，下刑部狱，落职。未几，起尚宝少卿，晋太仆少卿，转右通政。以太学生涂仲吉疏救黄道周，并下思理狱，谪戍，久之释归。邑大饥，力请当事发赈，全活无算。又条陈官盐及差役之害，便民省役，邑人建祠祀之。流寇陷京师，福王立南京，起通政未赴。唐王称号，再起故官，寻迁礼部侍郎，进尚书。鲁王监国绍兴，以嫌忌互诛使臣，思理私谓所知曰：“光武果至宜阳，盆子不当食均输耶？鲁国审能屏蔽东南，何故不许为窦融钱璆也？吾当见而解之。”请于唐王，奉命至浙，抵绍兴，清兵至，鲁王遁入海。及鲁王入闽，推思理及熊汝霖入阁。尝荐钱肃范入史馆，以纪起居。鲁王败，思理不食，卒。按：《南纪略》及钱秉铨《明季录》、《台湾记事》、《三藩小录》俱云：“思理与曹学铨，俱自缢。”李世熊《马母寿序》称：“为唐王使浙后，鲁王弃浙、从入舟山，报命无期，遂殉节。”《明书》称：“以国难蹈海死。”《节义录》称：“鲁王入闽，遁后，思理扈从弗及，以微疾卒于舟次。”考《节义录》及全祖望撰《钱肃乐碑》，思理于鲁王入闽，实授闽衙，则其死，在王入闽以后。县志称鲁王败，不食死，与时事相合，从之。鲁王谥曰忠宣。清乾隆四十一年，赐谥节愍。祀于乡。著有《玉尺山房诗选》。（乾隆贺志，参道光通志）

刘沂春 字泗哲，一字鲁庵，潭头人。崇祯甲戌进士。知乌程县。前令马思理，政教优粹，沂春与同乡，益实心出治。士民

谓设县以来，惟马、刘二君，不愧民父母。迁刑部主事。会行人熊开元忤政府下狱勘问，沂春持平不少徇，政府胁以利害，不为动。有旨以徇纵覆讞，沂春仍执前议不变。疏言：“公道在人心，臣读何书，守何法，而敢欺君父耶？”寻罢归。福王时，起工部主事。唐王时，又起布政司参议，进太常寺卿。唐王败，遁迹不出。鲁王入闽，钱肃乐荐之为副都御史，贻书曰：“时平则高洗耳，世乱则乐褰裳。司徒女子犹知君父，东海妇人尚解奋兴。嗟呼！君等忍负斯言？”沂春乃就道。寻进吏部左侍郎。鲁王败，沂春屏居出云岩中，当事罕识其面。以拂郁丧明。时郑芝龙父子纷扰，见有书阁部刘府者，即麾兵去之。方安一里，咸保全焉。著有《琉洞集》二十卷、《出云岩集》十卷。年八十余，卒于侯官之凤冈。祀本县乡贤。同邑诸生石魁，字名海，亦以节终。（乾隆贺志，参道光通志）

### 清

高龙光 字世谷，一字紫虹。父士选，见《循良传》。龙光顺治丁酉举人，己亥进士。授浙江台州府推官，治狱不避权贵。以例裁补广东茂名知县。除奸宄，兴学校，救荒恤贫，诸事修举，民为建亭立碑。擢户部主事，迁员外郎。康熙十七年，典试山东，所拔皆知名士。擢郎中，出为江南镇江知府，属邑利弊，悉为兴除。又置救生船十，捐田以备修费，民为立生祠。旋督学山西，期满，补陕西凉庄道，擢布政使。檄甫到，卒。龙光之副主考山东也，得孙勳卷，谓主试翁叔元曰：“此名解元也。”叔元以已得人辞，龙光曰：“若不可，姑置为来科榜首。”及来科，果举第一。（乾隆贺志，参道光通志）

陈书 字特卿，一字苇庵，漳港人。八岁丧父，事母以孝闻。好读书，为文自成一家。康熙辛酉举人，授湖广安仁知县。甫下车，适有祀南岳差，革往例以苏百姓。捐千金访苗俗之诈术者，

按治之，刁风以息。九阅月，丁内艰归，士民有送至闽界者，莅官浅而感人深若此。服阙，补四川通江知县，减茶税，革重耗，详免加赋。壬午、乙酉分校，俱称得人。在任八年，务德化，不事刑威。擢刑部广东司主事，迁浙江道监察御史，法司会讞多平反。壬辰会场内监试，风清弊绝。巡视中城奸宄，访治殆尽。掌登闻院，历掌江南四道事，常出独见，所有条奏，多称旨。在台数载，赐御制御纂经书《佩文韵府》等集。丙申，假归葬亲，丁酉复命。卒京邸。祀楚、蜀名宦，本县乡贤祠。（乾隆贺志，参道光通志）

郑任钥 字惟启，一字鱼门。父章，字子宪，二十都人。以进士授山西万全知县，有善政。任钥，其仲子也，寄籍侯官。康熙乙酉，以五经首举于乡，丙戌成进士。由庶常荐历侍讲。在京邸与李光地、孙嘉淦倡明理学，引掖后进。五十三年，典试江西，五十九年，视学江南，风清弊绝，所拔皆知名士，福建巡抚潘公思渠其一也。世庙在潜邸稔其名，雍正元年，擢湖南布政使，调湖北。设木柜示阖属军民，直言得失，条陈利弊，馈遗不戒而绝。擢巡抚以前，所访利弊，次第施行。修江汉书院，割俸钱以旌文行优者。嘉鱼等二十七州县水灾，任钥立请蠲赈，预以养廉千金倡之，全活无算。权湖广总督，讨湖南逆贼谢录正等，密授机宜，逆党立平。召入掌副都御史，旋往江南查仓谷，民赖之，建祠祀焉。寻被议回籍，卒于杭州。著有《乐善述略》、《自治要纂》、《朱子或问小注》、《古文正宗》、《莱州诗集》。子念盥，雍正甲辰举人；念荣，乾隆庚午举人，武平教谕，迁邵武府教授。（乾隆贺志，参道光通志）

吴文涣 字观侯，一字剑虹，父士宏，见《节概传》。康熙甲午，文涣以五经举于乡，辛丑进士，殿试第二人，授编修。天性孝友，以亲未葬，及长兄九如终于诸生，每念之泣下。乞假归，家居十载，无宦情，与兄弟犹子辈日评论诗古文辞。雍正四年补原

官。十年，典试陕西，称得士。改刑部员外郎，谳狱多平反。迁礼部精膳司郎中，除湖广道监察御史，皆有声。翰林院落成，赐宴瀛台，预赋柏梁体诗，又和御制七律八首，称旨。年未六十，谢病归，卒于家。文涣居台谏，刚正不挠。归日键户不妄接一人。旧庐狭隘，四壁萧然，处之晏如。诗豪爽近苏、陆，建宁郑方坤采入诗抄。（乾隆贺志，参道光通志）

陈化龙 字丰有，一字剑城，古槐人，省居。乾隆壬辰进士，授兵部主事，兼职方司马馆监督。时有甘肃逆回之役，军士取马于馆，化龙预为部署，众以无哗。转员外郎，改御史，监察江西，巡视东城，擢刑科掌印给事中。有指挥某，倚势溺职，特疏参，论如法。奉命稽查兴平、储济诸仓漕，综核维谨，后大臣纠劾积弊，赔累者甚多，化龙独无与。在掖垣二十年，奏事不激不随。旋引年归，当事聘主鳌峰书院讲席，奖才隽，重实学，非公事片刺不人公门。有年家子某来督闽学，欲物色化龙诸子，力却之。巡抚李殿图语学政赵佑曰：“吾阅人多矣，未有守礼自重如陈山长者。”其见矜式如是。卒年七十七。祀鳌峰名师祠。著有《归山吟诗草》。子为汉，字道霖，嘉庆戊午举人，候选教谕；金汉，字道滨，一字袖石，乾隆乙卯举人。皆有文名。金汉历任宁德、凤山、安溪教谕，直隶行唐知县，调平谷，所至守“清慎勤”三字弗谖。尤工诗，著《西行诗帙》、《海外近作》等编。（同治彭志）

梁上国 字斯仪，一字九山，江田人。父剑华，字天池，郡诸生，以耆宿教授里中，垂五十年，门下上多成伟器。剑华生五子，长上宝，邑诸生；次赞图；三上泰；四即上国。赞图初名上治，字翼斋，与上国同举乾隆戊子乡荐，咸安宫教习，以知县用。呈改教职，补宁化县教谕，善课士。值大水，佐县赈抚，多所全活。上泰字岱岩，乾隆乙酉乡荐，选贵州余庆知县，有循声。上国、赞图、上泰，同为太傅朱珪所赏识，入读书社。上国，乾隆



乙未成进士，选庶吉士，习国书，散馆改除，相国于敏中惜其才，请仍留庶吉士学习。旋丁母忧。服阕，以父疾乞养，复丁外艰。五十五年，再散馆，授编修，分校乡、会试。转御史给事中，历奉天府府丞，兼提督学政。嘉庆十二年，迁詹事府少詹事，累擢至太常寺卿。上国通经，知时事，凡当世之急务，乡里之利病，无不旁求博访。居官多所建白，其陈奏本省事宜，尤详明剴切。闽南奸民结党通兵役，号天地会，蔓延他郡，肆抄掠，有司匿不闻。上国从乡人访得其实，疏请飭大吏密察掩捕，获其渠，余党解散，一方赖以安。台湾噶玛兰地方，居淡水厅之北，艋舺之东，三貂山之南，屡为洋匪蔡牵、朱溃所覬覦。淡水同知徐梦麟始议开垦，知台湾府杨廷理继之，而大吏惮于举行，议屡格。上国乃疏曰：“噶玛兰地势平旷，北、西、南三面皆山，惟东面临海，海口有洲屿蔽之，其北隅有港曰乌石港，南隅有港曰苏耨港，两港之船，可自为出入，不必与台郡相闻。其间田土丰饶，居民不少。其水有三溪分流，中大溪为南北之界。其北境，由乌石港入者，自北而南，有头围、二围、三围、四围、五围，近年又增六围左右，小围无数，皆居民所建筑，以自保固者。六围南九里至大溪。逾溪即其南境，南境较大于北境，而垦田筑围尚少。近北之溪洲，筑小围四。迤南二十里有大围，名罗东社，皆内地人民占居者。南北之地，可由乌石苏耨直入，是以贼屡窥伺，欲得其地为负隅计。夫其地未入于版图，其人遂域于化外，万一不能自守，沦为贼巢，恐海洋从兹多事矣。考雍正元年，收诸罗县之北地，增置彰化一县，淡水一厅，雍正九年，又增置彰化县属巡检二员，淡水厅巡检二员。今噶玛兰之地，宜遵雍正元年九年之例，收而抚之，则海疆之获益有四：一以绝盗贼覬覦之患。嘉庆十一年，海寇蔡牵欲夺头围地，船至乌石港，其居人吴姓率番民御之，牵给之曰：‘吾但求得地，为耕种计，於尔无伤。’吴姓曰：‘果尔，则盍焚汝



舟?’不听，率众登岸，吴民擒缚数人，贼溃去。十二年海寇朱溃又以贼舟入苏畧，奸民李祐、黄灶阴与通焉。适有官兵从山路人，与居民协力抵御，李祐逃入贼舟，黄灶被缚，溃以十六舟遁去。夫噶玛兰从前出入人少，莫知虚实，今则人居者众，人人传说，无不周知。惟有早行收抚，绝负隅之妄想，则群贼尽失所望，而地方自能绥靖矣。一以使海疆无化外之民。噶玛兰自许拔为伙长后，有吴沙者，董理各围之事，众目为头家。沙死，子光裔不得众心，于是北境董事者柯有成、陈莫邦、何桧、赖岳、吴化与光裔共六家。其南境之溪州及罗东社，则潘贤文独据之。又有林永福、翁清和为义民之首，当朱逆来据苏畧时，林永福率民番穿山辟路，迎接我水师于畧外，贼乃退走。夫以朱逆猖獗之势，而潘贤文、林永福能率众拒之，可谓知大义矣。既能知义，即当早为收抚。况证以普天率土之义，亦未便委弃之以为贼有也。一以使全台增土田之利。噶玛兰田地，南境阔于北境，而居人则北境倍多者，盖由北山穿入，程途独近也。北境之地，嘉庆八年以赛神籍男女六万口，尚有余田，则知南境垦耕，其利赖当更广矣。唯地广无人，野番出人，为上者，必先布置村落，设营汛，奠民居，而后及农田，则有官吏，有兵防，民就垦如归市，立致万家，不召自来，而番害亦不待驱而自息矣。一以使番社怀朝廷之德。雍正初年，总督满保言：‘台湾南北二路生番，自古未通声教，近见内附熟番，轻徭薄赋，亦莫不愿附编氓，应令其照旧居处，并令文官加意抚恤。所报丁口，附入版图，勿事编查，顺其不识不知之性。每年愿纳鹿皮，折银代赋，听其输纳，就台充饷。’今噶玛兰番社，北境二十三，南境十二，北境居民转多于南者，足以见番民并居，两不相碍也。况朝廷以恩意招徕之，以良法绥定之，番垦者归番，民垦者给民，番民所未垦者，官为屯田，则番民辑睦，上下和同，台疆将利赖无穷矣。”疏人，上令督抚议之。十六年，总督汪志伊、

巡抚张师诚乃定议，丈田地，置官司焉。嘉庆十八年，督学广西，剔弊习，黜浮诡。以劳成疾，卒于庆远试院，年六十八。既归葬，太史陈寿祺为志其墓。所著有《驳阎氏尚书古文疏证》五卷，《驳毛氏大学证文》一卷，《奏疏》一卷，《进御诗文》一卷，《山左游记》一卷，《辽沈游记》一卷，《山右游记》一卷，《粤西游记》一卷，《诗文集》十余卷。子云铤，乾隆乙卯举人；云镶，附贡生；云镛，嘉庆己卯举人，福宁府学教授。（同治彭志，参道光通志）

陈学颖 榜名笔锋，后以字行，别字莲石，晚号榕园，石门人。乾隆乙未会魁。观政工部，己酉典广东乡试，适正考官道卒，学颖独掌文衡，所得多知名士。旋由本部郎中京察一等，授山西雁平道。绝苞苴，峻风节。属邑有蠹吏设骡马行，商贾病之，控于学颖。吏惧，纳货请赎，学颖不允，治其罪，立碑示禁。建斗山书院，延名师增膏伙，以课诸生。值朝廷西巡，一切供帐不侵官、不扰民。以母老乞归养。留别士民诗云：“尔有室家吾有母，太平同此乐熙熙。”丁母艰，服除，分发陕西凤郃道。时秦地用兵，在大营赞理军务，事竣，引疾归。居林下二十余年，不出里门，以维持风俗为任。捐祭田，修族谱，睦乡邻，培后进。岁歉，则散所余谷，减价平糶。日临摹名帖，积十余卷，颜曰《稀余堂翰墨》。求书者常履满户外，尺幅寸笺，宝若拱壁。临卒前一月，预撰墓志，自称：“性钝朴，少机警，快口直肠，胸无城府。在部曹恪守绳墨，不知有营求事，有以识风尚讽者，辄笑颌之。出膺外吏，弗求表异，唯职司观察，顾名思义，用自警省。”噫！名臣风度，于其自道见之矣。年七十九卒。著有《榕园诗集》。子诵，嘉庆戊午举人；孙藹，咸丰辛亥亚魁。（同治彭志，参道光通志）

游光绎 字彤卣，一字礲田。先世由感恩迁霞浦，家焉。父晟，字旭轩，岁贡生。兄光纘，乾隆庚子进士，历任福州、兴化、台湾教授。光绎与兄切劘为学。乾隆癸卯举子乡，己酉成进士，改

庶常，授职编修，即教习庶吉士，再为顺天乡试分校。嘉庆四年，擢陕西道监察御史。光绎既居言路，思建言以尽职。是时仁宗亲政，励精图治，官吏屡更。光绎上疏言：“治世之道，莫要于用人，用人之方，在崇久任。守令固宜久任，即督、抚、藩、臬亦然。盖久其地，则官吏之能否，风俗之淳漓，无不周知，其所措施，十得八九。若官既屡迁，送旧迎新，每滋劳费。而蠹胥猾吏，恒于新旧交接之际，因缘为奸。不唯无益于治，且有损。请各省大员，非必不可已者，无辄更调，有迁擢即在原省，庶可收驾轻就熟之效。至于守令，牧民者也，民不得所，罪在守令。今诸督抚于下属劣员未必尽知，知之，往往好为含容，且凡署事之员，督、抚多不为意，即有劣迹，不过撤回，彼一署事，辄敢妄行，异时实授，焉能洁己？愿严饬各督、抚，先使不肖之吏，屏斥务尽，庶吏治肃清，民生有赖。又州县所为，知府具知之，第有所需于州县，州县因得挟之以为利，虽有劣迹，知府亦不能举发，愿隆知府之选，庶可以清州县之弊。”又言：“皇上勤求治理，固宜家给人足，比隆三代，而民生未厚，风俗未淳，水旱时闻，潢池未靖。公卿虽能供职，而未见为上为下之诚；督、抚虽云办公，而罕见有守有为之实。营伍安于废弛，而严明者无多，州郡习于茧丝，而保障者盖少。”又疏论君德当以魏征十渐为戒，反覆千余言，上嘉其鲠直。未几巡视西城，每有讯鞠，不轻鞭朴，然惩奸不少贷。妖民程德挟采生术拐卖，乡闻失小儿以百数，光绎侦捕，奏戮于市，百姓称快。通州水，上命大臣往勘灾，当即发赈，若往返需时日，民不及待，请使者得便宜行事。久之，有天津赏郎某，以年资迁内阁侍读学士，光绎乃疏争，谓：“某捐资出身，人品庸下，不满众望，不可以玷清班。且言以年劳得官，无异于佣之计日受直。贤者无以自异，不肖者得以幸进，非所以鼓励人才。”疏入，上以言官持铨政，近明季科道气习，下部议，既复谕曰：“游光绎以京堂

官，不宜徇资格，言固当，第措词失检，以后京堂须用保举，定为例。”而部议已夺官。诸同年生惜其去，谋为捐复，光绎不可，遂归。时年四十有五。玉制军延主鳌峰书院，光绎非公事未尝修谒。前师郑光策以严肃为教，光绎继之，独解弃束缚，饮人以和，人亦无敢于以私者。时陕西为故巡抚董教增题祀名宦，陕抚某移书闽中照办，总督赵慎畛博询绅士，咸以为可，欲得光绎一言为决。光绎曰：“陕西自可名宦，闽中何必从同？”事乃止。其为大僚所敬惮如此。光绎性孝友，事父及继母备极色养；光绎教授兴化，猝得疾，光绎闻，驰问，亲视汤药，及卒，护其丧归。工行楷书，瘦劲自成一家。诸城刘相国墉极称之。少好学，老而不倦。尝以“炳烛”颜其斋。年七十卒。子大琛，道光丙戌进士。官山西高平知县；大廉，道光庚子举人，人原籍。（同治彭志，参道光通志）

陈文翥 字彦超，一字秋丞，古槐人，省居。初籍闽县，后归籍长乐。道光乙酉，与父寿仁同举于乡。癸巳会魁，改庶吉士，散馆授编修。丁酉，典试贵州，所得士多名宿。以拔贡生联捷者十二人，贵州人谓是科人文之盛，为二百年所未有。己亥，补江南道御史，上疏言州县阴纵差役之弊，督抚回护州县之弊，上皆许可，召见两次。又疏陈东南直省时弊千余言，未上，以病卒。文翥才堪大用，而得年仅逾壮，朝野惜之。（同治彭志）

郑元璧 字用苍，一字锡侯，榕三子。道光庚子进士，改庶吉士。丁生母忧，旋里。时夷氛正炽，全闽震动，偕当事密筹方略，众以无恐。服阙，授编修。庚戌，补陕西道御史。甫履任，即弹劾夷务，不避权贵。旋以母艰，归，主讲凤池书院，训士有方。值土匪不靖，会同地方官劝办捐输团练。戊午，粤匪窜上游，庆制军端奏请偕赴延平，以劳绩保道员，赏戴花翎。己未授湖南长宝道，所辖益阳、湘阴二县，每春水盛涨，常有漫堤之患，饬属勘修坚固，民利赖之。时方事东征，大府委以筹饷局务，设法招



徠商贩，定厘税济军需，并协助邻省。其后士马饱腾，金陵克复，赖接济响银力也。楚省求忠书院少藏书，特捐购群籍，以资诸生讨论。辛酉，署粮道篆，改办漕折，严禁浮勒。署臬篆，用法持平，所获匪党必悉心审鞠，从不株连，全活甚众。寻擢山东盐运使司，未赴任，以劳瘁卒于官。疾笃时，恹抚军尝亲至榻前问视，见敝帷布被，不异寒素，出语人曰：“吾不意其清俭如此。”年五十九。（同治彭志）

林天龄 字受恒，号锡三。咸丰庚申进士。历官翰林院编修、侍讲、侍读、侍讲学士、詹事府左右春坊赞善、左春坊右庶子、侍读学士，署国子监祭酒。父经光，嘉庆己卯举人。官贵州安化、永从、余庆知县，署开州知州、黎平府知府。性清鯁，好施济，辄以廉俸贍亲族，年未六十，弃官归里，宦橐萧然。天龄幼颖悟过人，读书目数行下。十岁娴韵语，习帖括，卓然成篇。旋丁外艰，家徒壁立，同里陈孝廉学澜方设馆授徒，谗其才，而知其未能具脩脯也，亟招之学，为供膏伙，曰：“林生岂长贫贱哉？”且字以女。十八岁补博士弟子员，以诗赋见知于长洲彭学使蕴章。学使授以儒门法语，勗之曰：“士先器识，而后文艺，愿子以理学名，不以文章名也。”天龄于是始博览先儒传注语录，研求存养，所造于姚江为近。尝曰：“阳明之学，煞是简明，但非天资绝顶人，参不透耳。”又曰：“主敬，主静，只是一路，必须从敬边下手，方不坠禅门宗旨。程朱之说，到底无弊。”时闽中英隽结南社，以诗文相切劘，天龄与社中杨叔恽、郭式昌、陈通祺、□□□皆庚寅年生，称五虎。尝摘楚词“唯庚寅吾以降”句，合刻印文。风流文采照耀一时。通籍后，沈阳相国倭仁深器重之，每与纵论古今学术之得失，性命身心之奥，圣贤体用本末之分，天龄多所发明；尤以拟《治安策》三篇，为相国所叹赏，特疏荐入上书房，授孚郡王、惠亲王二王子读。寻命在弘德殿行走，以“学问疏浅，且



素患痰嗽，日侍讲幄，恐失仪”具疏辞。时穆宗冲龄，两宫训政，召见便殿，温谕淳淳。天龄不敢再有陈请，力疾入直，寒暑无间。穆宗每数日必问曰：“汝痰嗽好否？宜调养，勿过劳。”既而大婚礼成，穆宗亲政。天龄疏列十余条，最要为勤圣学，保圣躬，罢土木，与同直金名以进，皆切直动听。其典试江南也，卷帙繁富，正考官侍郎铭安素多病，不耐操劳，天龄悉心校阅，目不停览，手不停披者月余，所取多积学耆宿，士论翕然。视学山右，试日坐堂皇，关防严肃，饭碗茶铤皆亲查验。遇佳文有疑窦者，则面试以决去留。其有议论突暮者，文或未纯，概从录取。曰：“其文如此，其人必非庸庸。甄之，可为国家收一得之用；弃之，将牢骚抑郁，不入于放诞一流，则将肆其狂妄不羁，而习为桀骜之行。”其成就人才，深意如此。嗣视学江南，如使晋时，持法极严，而待士较宽，务以养其廉耻为重。刊尚书汤斌《志学会约》、侍讲彭定求《儒门法语》分给诸生，勸以敦品植行。奏准太仓陆世仪从祀两院，谓崇化励俗，必以表扬前哲为先。宾兴年列贤书者，例赴学政衙门填写亲供达部，胥役需索积弊，革除一清。輶车所至，务戒供亿之烦。试事，虽在病中，不轻假手。按松江，疾甚，金请还署，不允，请停考，亦不允。疾笃，左右扶掖登床，方展衾褥，已跌坐面卒。卒之日，犹亲书试题，手校试卷也。苏抚吴文炳以状闻，予祭葬，赏次子开棻举人。宣统三年，苏抚程德全奏准入祀名宦祠，并将生平事实宣付国史馆立传。

## 长乐县志卷二十四

### 列传四 循绩

民牧称职、分所应尔，似无足奇者、然德足以善政化民，才足以理烦治剧，倘亦盛其遇，而推其量焉，则与庙堂风宪，未必有轩轾于其间，乃功名事业而仅以循良称，盖为职所限也。虽然，其政绩亦千古矣。传循绩。

宋

潘 鯪 字昌言。曾祖吉甫，仕吴越归宋，终国子博士。祖衡，大中祥符元年擢第，知同安县，累迁检校屯田郎中，历知兴化军、建州军州事，终知黄州，遂家焉。比鯪长，复归闽，从周希孟受学。登元丰二年进士。初调蕲州蕲水县尉，民有以花为献者，鯪一嗅而还之，曰：“受赐多矣。”其廉洁类此。迁知州防御推官，知江州瑞昌郡。赋属县鬻建茶，守问：“君瑞昌岁可售若干？”鯪曰：“四斤耳。”守诘其说，鯪曰：“县小民贫，米盐犹不足，而暇及茶乎？独县僚四人，一斤可矣。”守悟，以故诸县皆得无多售。后七年，以事过瑞，有两人拜马前，其一曰：“异时君为县，我讼得直。”其一曰：“异时君刑我当罪，我心服。是以偕来。”徙监楚州都盐仓，寻为吉州军事推官。元祐赦民负官钱，无奸者悉免之。通判摄守事，悉下负者于狱，将鞠其奸。鯪曰：“赦，欲宽之，而君故狱之耶？”执不可，民赖以免。龙泉令捕得私酿三十家，将上

府。鯁谓令曰：“是法皆当徒，龙泉小邑，一日徒三十人，君为令，安乎？”令乃颇减出之。改宣德郎，监汉阳军酒税，遂以奉议郎致仕，仍居于黄。卒年六十有三。子大临，字邠老。以诗名于时。  
(道光通志)

张本中 字崇正。绍兴元年，知连州阳山县。劳力抚字。春秋循行阡陌，教民稼穡；察岁丰俭，而施之以政。民皆遵行之。旧俗婚丧以歌唱为礼。本中下令严禁，风为一变。  
(乾隆贺志，参道光通志)

郑 疆 字南美。绍兴初知汀州。庙学荒圯，疆首度地建之。且市腴田以增廩饩，择严师以职教道，于是人以不学为耻。越三年登进士者四人。后立祠于稽古阁下，春秋祀焉。  
(乾隆贺志)

刘嘉猷 字德徽，嘉誉弟。嘉誉，传见《儒林》。绍兴间，枢密院使郑黻奏补将士郎，铨中优等，调南安军上犹县令。县素号难理，究心抚字，吏畏民怀。适强寇犯境，密设方略，俘执三十余人。以功转宣教郎，调常德龙阳县。值荒旱，大家富室闭籩幸灾，猷痛惩之，邑人赖以全活。后解组归，龙阳数百人送至其家，勒“官德”二字于筹山之峰，其山遂以官德名焉。  
(同治彰志)

陈伯嘉 西隅人。绍兴中，以军功升吉州太和县西平山巡检，累平凶盗。卒。民庙祀之。  
(乾隆贺志，参道光通志)

刘师尹 字伯任。登绍兴二十一年进士。调汀州录事参军，与通判向士俊争学谕叶椿狱，不胜，投劾，弃官归，筑室于黄江之野，有终焉之计。既而椿狱直，得旨复还本任。由是刘录事之名闻天下。秩满，召对称旨，改承事郎。未几，除大理寺丞，谳狱务从宽恕。擢户部郎官，复迁度支郎官。版曹故称剧任，师尹遇事持大体，诸所更张，曲尽利害之实，虽久于金谷者莫之能易。建议豁免无名赋税，二广江浙之民咸被其泽。立朝数月，骤致通显，士大夫间犹以刘录事称之。高宗知师尹贤，有陈请辄可其议。会

得疾，丐外。除提举浙东常平茶司，就医于富阳县而卒。历阶左奉议郎。（同治彭志，参道光通志）

林宗显 字孝扬。乾道间知建宁县。听讼精明，案无留牍。利弊悉与兴除。民立祠东山祀之。（乾隆贺志）

李 角 字定国。宝庆二年进士。累官潮州通判。明察果断，决狱多所平反。以良牧称。（乾隆贺志）

韩 璧 淳熙中为琼管帅，始至，厘籍薄征，教以耕耨。绌官吏无状者为民，陈礼义廉耻之意以开晓之。又表从化者，以厉不率。出入阡陌，劳来不息。期年，民吏浹和，黎人感悦。乃作新州学，海外之士皆有以自表于当世。朱文公有记。（乾隆贺志）

卓 洵 字士直。庆元间知吉州泰和县。留心水利，创置沿溪六闸，灌田万亩，一方永食其泽。（乾隆贺志，参道光通志）

林 枏 淳熙中授闽县簿，改福清丞，以清惠称。尝捐俸修学。后知州事，辟城四千丈，竣事而民不扰。在郡简讼宽赋，民甚便之。（乾隆贺志）

王益祥 字谦叔。后徙居闽县。登淳熙十一年进士。历桂阳、建康教授。兴学校，增生徒，士风丕变。后以陈傅良、张杓荐，历监簿编修说书，出知宁国，改处州。时严伪学之禁，丐祠去。迁江东提刑。以里人陈自强为相，弃官归。（乾隆贺志）

林 岳 字仲山。淳熙丁未进士。知汀州。创书院二所，与六邑士讲订诗书。邑学皆有祠。历太常少卿。（乾隆贺志）

陈 晔 字日华。庆元初，知汀州事。为治精明。以郡帑钱二百贯助学，又以隶官田百亩充诸生廩饩。减户口食盐价。作义冢，掩遗骸无归者。汀俗尚鬼信巫，晔严禁之，俗遂丕变。（乾隆贺志）

陈 映 晔之弟。庆元初，知汀州事。为政一守其兄之法。首蠲积逋，减徭役。又盖五营屋千余间，甃清流路百四十余里。晔

尝创桥于南山高滩角，至映方毕工，郡人因以“棠棣”匾之。秩满，皆迁广东宪。（乾隆贺志）

林伯成 开禧中，知真州。筑城五百余丈，凿河深广之。翼城之筑，自伯成始。（乾隆贺志）

陈逢寅 嘉定进士。有文名。授浦城簿，孳孳职守，垂代，仍朝夕莅事若始至然。浦城簿厅自南渡后无题名，逢寅始为之，而请真德秀为记。（乾隆贺志）

陈 绂 字若悔。宝庆二年进士。调赣州兴国县尉，改泰宁主簿。滞贫十年，泉州守李韶以摄局招，广东转运司黄朴以郡椽辟，皆辞不往。转韶州司户兼司法，以廉平称。摄知仁化县，移摄乐昌，祀周敦颐及程颢、程颐、朱子于学，士经指授者多所成就。再调提刑司干办公事，荐知惠安县。（道光通志）

潘周伯 字宗之。荫补将仕郎。绍定初，改郴州桂东县丞。桂东在万山中，为湖南、江西、广东三路门户，其民暴悍易动，周伯推诚抚绥，民安其政。郴盗高垓寇桂阳，檄摄令事往救，周伯曰：“解围不如捣虚。”自提官军义勇人战贼洞中。主簿何琛死于阵，周伯气愈厉，相持岩谷数日，出奇掩袭。垓先奔，诸党随溃。帅司益知周伯能，一以招抚委之。周伯曰：“屈以力易，得其心难。吾为张纲可也。”单骑造贼巢穴，不以兵随，群獠出迎拜，曰：“我辈非敢弄兵自速祸，常时不堪侵枉，使我至此。公生佛也，今惟令是从。”周伯恻然，晓以逆顺祸福，闻者相顾泣下，送周伯还邑，咸跪请曰：“公苟有命，愿尽死力以报。”诸峒闻风相继听命。适寇大扰江西，吉州守赵彦覃以檄求援，周伯遣七甲义士助之。盗首舒庆二自陨，黄十五乞降。事闻，得旨，因任改官，理为须人，仍与升擢差遣。周伯于是储粟治药，创立义冢，使饥者、病者、歿者有所资。复请恤死事之家，旌孝妇之节，新学宫，增教员，蛮俗为之一变。添差通判潭州。嘉熙元年，蒙古犯边，边帅檄召七



甲三洞兵策应，周伯即日就道，点集壮勇八百人，直抵寿昌，突围以进。敌酋惊顾曰：“赤脚蛮兵来矣。”遂退去。诏转三官。秩满，除监左藏东库。丐外，出知潯州。周伯以岭民去朝廷远，疾痛不得上闻，孜孜然如理家事。蠲例券，损浮费，代民输夏税。一年，安抚使谢逵上周伯治行，累数百言，不报。继知韶州，以父讳辞，改靖州。初周伯以守潯陞辞，援汉唐蒙、晋董元二事，痛言：“蜀、广可通之路。黔、郁共下之江，宜预为经划。”及抵渠阳，访求大理蹊径，严加防遏。未三月，为侍御史周坦所论，罢职，予祠。主管崇道观。其后蒙古帅干腹兵果由蜀江而下，人始服其先见。寻擢广东安抚司参议。有谏官居寓里，欲请大奚山垦田，同僚惮其声势，噤断阁笔。周伯奋然曰：“此盗壑也，居海中心。昔在淳熙为朝廷忧甚久，幸而锄薙，不许生聚、种植其间，著在令甲，是乌可许？”事遂寝。闻者韪之。未几请老，卒于家。积阶至朝议大夫。（道光通志）

陈容字公储，自号所翁，西隅人。端平二年进士。令平阳。辟道路，通沟洫，议赈籩，修学宫。从容简易，政修务举。时集诸生讲论经义，士风大臈。暇则与佳士论文赋诗，凡山川胜迹，多留题咏。嘉熙间，通判临江州事。以才名受知理宗，人为国子监主簿，官至朝散大夫。贾似道欲招致幕下，容酒酣，辄卑侮之，似道亦敬而不怒。出知兴化军。诗文豪壮，尤善画龙，变化欲活，世传所翁龙是也。子梦发，龙兴府判。（乾隆贺志，参道光通志）

## 明

王坚字子正，号三山老樵，海路人。洪武庚戌，辟至京师，试高等，授湖广按察司佾事，左迁知忠州，改泽州。莅政勤慎。兴学，教民，颂声大著。以荐人待诏翰林，寻除刑部郎中。以直言忤尚书开济，济谗于帝，谪嘉兴府同知。朝士送之，曰：“嘉兴民不好，善自为之。”坚曰：“天下有不好官，不曾有不好百姓。”

官好，百姓自好。”至则问民疾苦，分忧革弊。出女囚无辜者六十二人，民情信服。未三月，放归田里。晚号介轩。有《三山樵稿》。（乾隆贺志，参道光通志）

陈祖 字富文，十三都人。洪武四年，以明经荐授新繁县丞。道遇姬哭甚哀，问之，曰：“夫与子俱丧，止余一孙十岁，昨为大蛇所啣。”祖令具状移牒城隍，限日敕蛇至公庭。及期，果有群蛇集庭下。祖谕曰：“无干者退。”独一大蛇伏不去，祖命磔之。迁光山知县。一日，有群叶旋舞不下，其一落案上，取视，旁若有窍。令吏随叶迹之，果有尸。祖曰：“杀人者叶孔也。”捕得之，果伏辜。尚书开济荐祖自代，未及用而卒。祀乡贤、名宦。（乾隆贺志，参道光通志）

陈仲进 字伯康，江田人。性耿介，尚气节。洪武中，以明经荐授宜阳县丞，摄治孟津。三载考最，调韩城。擢知江山县，以德化民。朝廷特褒嘉，民为立生祠。后以勘灾伤，忤旨被逮。仲进曰：“吾以一身活万命，含笑地下矣。”既而释之，卒于京。归槨经江山，父老泣留衣冠以葬，子孙遂家焉。祀乡贤。子登，传见《文苑》。（乾隆贺志，参道光通志）

陈铭 字以义。洪武中以贡入太学。擢衡州府推官。听断公明。母忧去官，民挽留涕泣。服阙，以王孟荐擢大理右评事。卒于官。铭有至行，母患风疾，久卧弗起，与兄震晨夕扶持，弗少怠。震为人所诬被逮，铭走京师，力为伸雪，竟得直。同郡友邬孟为御史得罪诛，其妻王当没官，自经死，人莫敢视，铭收瘞之。（道光通志）

林源 字士仁，沙堤人。洪武二十年，以贡中应天乡试。永乐初，知余杭县。兴学课士，科目得人为盛。均赋役，缓催科。凡部使行县询林令，莫不以公勤廉敏称云。（乾隆贺志）

林赐 字伯予，东林人。洪武癸酉乡试第一。永乐间教谕

乐平。学问该博，持守端严，巍然一时之望。（乾隆贺志）

方 懋 字叔勉，一字龟宇，先世由莆田徙长乐。懋聪颖好学，夜息，卧扁担以警睡。年十八，与陈良、林赐、王锡友善。懋举永乐庚子乡试，知浙江开化县。廉直自矢，不徇权贵，不受干请。愆顽梗，平冤滥，吏民敛戢，盗不入境。邑有争水利者，累岁不决，懋一言折之，舆论大快。值大水为灾，溺死者浮尸蔽江，悉收瘞之。病者予药物，饥者给薪米，全活无算。在任十载，以卓异升通判。未上，卒。士民醵金归葬，建祠祀之。（道光通志）

陈日光 潭头人。成化中为海丰丞。邑僻而习玩，前政率因循，一切条纲教坏，奸豪寢以不戢，日光始振刷之，抑强举废，绰有贤声。罢去，邑人立石纪之。（乾隆贺志，参雍正通志）

黄公甫 成化间为监利教谕。善陶铸士类，讲论不废寒暑。同舍训导卒，公甫为存诸生贖金，适寇至，尽掠其贖，独所贖金故在也，悉持归同舍子。人咸服其义行。（乾隆贺志）

王有恬 字德安，潭头人。幼颖慧好学。成化乙未进士。历南京户部郎中，出为江西督粮参议。先时民逋税，皆由豪宗包揽代输，以故久负，有恬至，下令厘革，悉督入官，税以无逋。淮王就封国，道经九江，费巨万，有恬酌省其半，以宽民力。后自免归。杜门三十余年，终身穷约，世味澹然。祀于乡。（乾隆贺志）

李子仪 字端夫，□□人。宏治间，以贡知颖上县，省刑薄敛，不阿贵势，邑人以板李目之。编户增为一十九里。去后，民犹颂之。（乾隆贺志）

陈 让 字允恭，一字半陶，十三都人。父德隆，以孝廉历浦江、曹县、上海、新建教谕，三十年清修饬己，以师道自任。卒祀于乡。让其长子也。弘治乙卯举人，授石城令。以廉明称，三载报政。时刘瑾窃柄，遂弃官归。弟赞，字允杨，一字三峰。嘉靖癸未进士，为户部郎中，迁湖州守。廉洁自持。擢贵州兵备道。

致仕归，足迹不入城市。（乾隆贺志）

谢廷瑞 字邦应，江田人。弘治壬戌进士。知琼州府数载，有经略，而心事炯然，威慑峒黎，民藉帖席。琼之父老，称为百世牧模。（乾隆贺志）

陈大漫 字则殷，正德辛巳进士。授上虞知县。抑巨室，伸单弱。诸贵有力人弗便之，日毁诸上官，寻调光山。故事，光山民调役他县，值岁饥，符犹及之。大漫抗词争曰：“天降灾于下邑，奈何又重之虐，享民之道也？”台使者无以难，寝其役。用荐，行取入京。奸人中以上虞事，诸同征者率补御史给事，而大漫得隰州知州，复为巡盐御史所劾。然大漫甫至，已捐州四门榷税，廉声大起，吏部为格御史章，迁思恩府同知。辟水关，筑罨庐，戢卢苏、玉受余党。俄陈牒归，襦被萧然，教授里中儿自给。先后邑令数造请，不能得也。朱纨巡视闽中愿一见，竟辞谢，纨叹息去。子省，传见《名臣》。（道光通志）

李 性 字仲复，仙山人。嘉靖癸未进士。知东莞县，不以家累自随。政尚平易，公庭肃清，吏胥望而畏之。时势豪夺海利，性追而归之胥民。徭役悉均，里中不扰，称良令云。官至辰州知府。（乾隆贺志）

高廷忠 字允卿，后澳人。祖伯龄，字平哲，成化十六年举人。知零都县，有惠政，时称循吏。父壘，传见《乡行》。廷忠嘉靖乙酉举人，授奉化令。甫至，即除法之不利于民者十余条，每日戴星出入，不务钓名，惟顺人情，宜土俗，期于政行、事集而已。尤能节用，不滥费，不苟取。有馈海错，潜置金其中者，即默返之，不扬于众。值夏旱，屏盖步祷凡五日，雨如注，民赖不饥，为立祠以祀。（乾隆贺志）

郑源彬 字与宜，号梅冈，西隅人。年十七，领嘉靖乙酉乡荐，癸丑成进士，除南直隶寿州知州。州大水，源彬殫以方略，得



无害。民绘图欢传之。州之正阳，岁输官磨税千缗，例金若干，源彬悉蠲罢之。政暇，游八公山，题咏诸名胜殆遍。民镌其诗于石，并立祠勒碑，以颂德政。转北直隶开州知州，开故古澶渊地也。逾年，政通民和。宣绩详王崇《庆州记》。擢南京户部浙江司员外，升本部陕西清吏府郎中，克举其职。年三十六卒官，同年陈殿撰谨等誄之以文。著有《梅冈诗选》。崇祯癸未，署长乐令刘明遇为之序。  
(采郑氏家谱)

石 梁 字士升，号观海，古槐人。嘉靖己酉举人，癸丑进士。知浙江龙游县，孳孳为民，以兴利、诛不善、恤冤滞、宽逋为己任。罚无赎金，罪未等不责供。在官七月，以劳勋卒。俸无余金，至不能殓，士民会哭，醵金贖其丧以归。建祠祀之。事迹载《龙游县志》，后其族人董溪，道龙游，过其祠，父老群揖而进之，曰：“是石爷之亲也。”为之潸然。(据石氏家谱)

林 恕 字道近，渡桥人。嘉靖己丑进士。授江西知县，历都察院经历。擢守雷州，有惠政，浚湖渠、筑海堤为民利。锄强扶弱，不避权贵。郡人镌石于庭，纪其绩。官终云南按察使。(同治彭志)

林 山 字士人，古槐人。嘉靖己丑进士。授万载令，以最擢户部郎。部长李某不习钱谷事，又交通诸贵人，屡有所请，事下山，山持不可，李强之，持愈坚，怒欲挤以事，山曹事办，不能害也。李罢，金陵梁材代为尚书，材，名臣也，顾独贤山执法，荐知徽州。徽素号剧郡，民贾四方，富而喜讼，诸贵人牒刺干请，动至盈篋，山一切谢绝。断狱明察，期年讼减，郡称大治。擢广东副使，以亲老丐归养，时年甫四十余。山为人强毅任劳，不耻恶衣食。当官，而行必信其志而后已。然自恃清节，好面折人过，乡人或有不谐者。卒，祀于乡。(乾隆贺志)

李丕显 字宪文，湖南村人。嘉靖乙未进士。初以举人权休



宁教谕，操行廉正，日集诸生谈经校艺，士悦服之。既登第，知永嘉。治剧事烦，爱民养士，贤声大著。擢南京监察御史，终赣州知府。尝著《四书及诗经达说》，士子户诵，至今犹称贞庵达说。见赣州、温州二郡志。祀于乡。（乾隆贺志）

陈懋观 字孔质，江田人。嘉靖癸丑进士。知会稽县，甫数月，政声流浹。以忧归，服除，补山阴令。懋观为人廉静宽和，顺民好恶，缓征简讼，恬淡若寒士。邑当前令暴虐之后，民喜若更生。征拜给事中，以言事谪推官，调南京吏部郎中，出知庐州府。遇士以礼，断狱不轻入罪，士民爱慕，不啻会稽山阴也。戊辰覲还，渡淮舟覆，不死，人谓天实庇之。寻卒于官。越民祠于卧龙山麓。后祀于乡。（乾隆贺志）

陈复升 字以见，一字见庵，十三都人。嘉靖丙辰进士。任海南道副使。时因岛寇，议徙珠崖民于内地，复升请筑土堡防守，得罢其役。民为立祠祀之。（乾隆贺志）

林继衡 万历丙戌进士。知温州府。设策平伏莽之奸，措饷安脱巾之伍，葺学宫，修塘埭，汰库头以便金收，调折色以绝侵渔，惠政传于一时。（乾隆贺志）

蒋行义 字思弼，一字恪箴。万历丙戌进士。令永嘉，以艰归，起补淇县。俱文无害。擢南户曹，转司空属，持介不阿。有贵人负重名者，欲取瓦屑坝为别墅，堂属莫敢争，力持之，司空叹服。行义大失贵人欢，遂以此乞归。山居二十年，萧然自足。子奕芳，庚子举于应天。好古笃行，能肖其父。夏允彝论云：“蒋公自志其墓，其言寥寥。如：‘第谓质抗善忤人，他徽行，弗备也。’然人多称公节行。夫不自言其长者，斯即公之长也欤？”（乾隆贺志）

叶时敏 字志卿，一字修自，沙京人。万历戊子举人，授乌程教谕。豪家以私怨修郅诸生，有司亦甘心焉，时敏争之强，乃免。豪复构某生，扼其人试，时敏一夜十往请于郡，乃得试，试

果隼。迁程乡知县，县在万山中，俗悍狡，时敏锄宿猾，均田赋，戒民鬻田，久毋得讼。赋法置置于庭，令里正自输解。程乡俗，与人衅，则预养族之老病贫懦者，使服毒，或使其子弟杀之，以倾怨家，尽劫其产，名曰：“瘦马”。又豪恶诱膏粱子弟与博，产尽，则相与入山为盗，名“红乌贼”。时敏下令曰：“市‘瘦马’者，以子弟杀父兄论。民有掘毒草者，许抵赎金。”不半岁草尽，“瘦马”亦衰止。又严治博徒，置重法，“红乌贼”屏迹。俗大变。民又苦矿税，时敏令民尽塞矿而争于御史，言蕞尔邑，安所得二千金？语侃侃自旦至日中不休，人皆缩舌。御史素重时敏，为减十之八。逋寇李天爵啸聚绿石坑，谋乘令谒府，从上游舟逆之，因以为乱，人情震骇，城门尽闭。时敏自他道归，开门视事如平时，诱其魁杀之，余党悉解。迁太平府永康知州。永康，故夷地，州治草创，无城垣、廨舍，官署仅土室三楹，覆以白茅。居人不数百，闻州守至，不能备饷廩，家人竟不得食。时敏进其父老，与课计田粮户口之数，诸兴作，次第而举。先是，藩司发七百万金为缮治费，前官不敢任，时敏慨然肩之。筑城垣四百余丈，建学宫及公府、吏舍、仓库、庙社，一切创划，悉中规程，不期月告成。州人侏僂，不晓诗书，乃招客游人通文艺者三十余人，自是有弟子员。又戒居民毋火葬，毋健讼，毋开铅井以貽祸。迁衢州府同知。督戎诸弁欲汰兵，时敏曰：“汰兵无益。徒为弃市耳，且驱之为盗。”令巡江上下，以获盗多寡为殿最，兵益奋。往饷金经数手干没，时敏呼兵至厅事给之，兵大悦。漕卒转输都下，甚劳苦，有力者率贿免，往往喧诉于藩司，独衢州以派役平，无诉者。又尝堰西安江山田，条免盐商盘诘，清屯田、恤邮传，皆百世利。在衢八年，转山东运同。以省母过家，病作，衢州祀时敏，方迎木主入祠，而时敏以是日卒。子有禄，诸生。夏允彝论云：“前令郑月庵为余言：‘叶有禄，古君子也。数过之谈，夜分卒无私。’余不及睹修自，得之叶文忠、董

司空之文，不及交有禄，得之月庵。三公非欺人者，传之也攸宜。”（乾隆贺志，参道光通志）

江 墉 字思登，一字镇鲁，云路人。万历壬辰拔贡。授湖广应山令，迁江西临江通判，历云南石屏、广西新宁二州。所至有政绩。在应山勤教养，临江平税务，石屏遏土官之虐，新宁恤荒歉之灾，至今口碑不衰。后引年归，足迹不至公庭，时与乡里族戚，讲明礼让。前后守令咸服其品焉。卒祀乡贤。（乾隆贺志）

陈訏谟 字以弼，一字莲湖，江田人。万历辛丑进士。授刑部主事。楚诸生有以忤珙使陷大辟者，訏谟力脱之。改户部，榷浒关，通旁港，罢小艇税，輿涌大起。差竣，以羨金五千输内帑。出知南昌府，改苏州。豪滑逞淫，沉贞妇于江，而又陷其夫以盗，狱成，訏谟鞫雪之，购得贞妇尸，抵豪于法。无赖少年伪称彻侯胄子，拥传行，所至供帐，訏谟缚置之法，众称神明。郡人侯峒曾、顾宗孟、顾燕诒、曹笙，皆其所甄拔。官终广西按察司副使。卒祀于乡。孙达，字克亨，早岁补诸生。同学有陈圣泰、程坤者，负时名，为人所中，提学将治之，达白其事，得免，由此知名。唐王时，以恩贡生授鸿胪寺主簿，迁锦衣卫经历。鲁王入闽，起职方郎中，擢鸿胪卿。时郑彩专政，达独不阿。鲁王败，达遁居海岛以卒。夏允彝论曰：“予令长乐，顾公方为福兵宪，曹公方为漳郡守，每为予诵公之廉。余每过浒关，睹巨艘鳞次，候启关殊苦。小艇从旁窾出入自如，微独免税，且无滞稽，心善其法，今乃知公所始也。两公既为余称诵之，余又目见公善法，岂阿公哉？”（乾隆贺志，参道光通志）

高士选 字永標，一字毅寰，流水人。万历丙午举人。初授尤溪教谕，嗣调庆元教谕，训士多方。擢广东始兴令，正身率下，理狱明决，民德之。再调浙江崇德令，一以治兴者治崇。卒于官，崇之人为祀名宦。清乾隆间，祀本县乡贤祠。子龙光，传见《名臣》。（乾隆贺志）

清

谢兆麟 字在绂，一字天石，江田人。顺治辛卯举人，授直隶真定县。邑当冲繁，措理裕如。真定土风，有毙命者，审视后，以芦草裹尸悬树间，枯骸暴露，且时久移伤换骨，弊端百出。兆麟陈利害，禀上官易以棺。值圣驾北巡，兆麟奏对称旨，钦取课最，例迁秩。未几，以劳卒于官。祀真定名宦。（乾隆贺志）

王膺祺 字哲鸣，一字亨五，梅花人。幼倜傥有大志。明崇禎末，海氛方炽，作《平海论》，侍郎董应举奇之。年十九，补弟子员。适巡抚熊文举征海失利，下令禁海，膺祺抗之，巡抚欲陷以大辟，奔入京，将击登闻鼓，值明亡。顺治元年，祺上愆贪疏，旨嘉予之，授晋州知州。平漳沱河水患，民立碑曰：“王公堤”。东里村有数十年积草，内窟妖狐为民害。膺祺刈之以资公用，狐妖顿息。民绘像祀之。擢湖广岳常道，因忤权贵解组归，时年四十五。尝自谓：“四十以前为人所不敢为，始知天下事惟有志竟成；四十以后止人所不能止，始知天下事当见机而作。”后家江西乐安县。三子廷广，归守坟墓。卒年八十有奇。著《太平新书》三十章，纂集《太平清谕》十六条及《爰书》、《金矢天籁》等集。（乾隆贺志）

吴日来 字子近，一字海源，十二都人。幼岐嶷，与弟道来，亭亭玉立，道来传见《文苑》。有云间二陵之称。以前明副贡生授江夏知县，有政声。归，会耿逆变作，欲招致之，抗节不从，系之狱。大兵至，始解。卒年六十，子士宏，传别见。（乾隆贺志，参道光通志）

林子兰 字维丹，一字雪崖，十二都人，顺治辛卯举人。知广东开平县，洁己爱民。凿塘引水，灌田千余亩。革槟榔税陋规。丁母忧，服闋，调乐会知县，绥定苗变，民共戴之。（乾隆贺志，参道光通志）

林鼎复 字道极，一字天友。顺治初，大将军范达礼荐授常州通判。在官九载，每领运入都，尝为当事言：“白粮专运，事繁



力分，倘能归并附漕，岁可省经费十余万缗。而民间所重，惟以旗弁交关为难，今既有监兑，则事可两全。”议者惮于改作。及后，户部尚书某斟酌条款，奏行，公私称便，其端实自鼎复发之也。兼摄县事，值西南用兵，供亿旁午，鼎复俄顷立办；然治事权宜互用，以此被议落职。卒于无锡县行馆。鼎复笃于友谊，工吟咏，兼擅书法。著有《华鄂堂诗集》。武夷黄帅先，为史道邻参军，年老无所归，鼎复具舟迎之。及卒，为经纪其丧，令其子就塾，二女皆遣嫁之。常州恽于迈为作《古道行》纪其事。兄日芑，字道两，亦为范达礼所荐，通判山西平阳。著《涵秋医方》若干卷。（乾隆贺志，参道光通志）

曾子驹 字黎崖，七都人。顺治初以贡入贡，授无锡知县。时水旱疫病相继，子驹先赈，后调医药，活人万计。厘漕弊，革门面租，捐筑青城，田岸积潦之地，尽为膏腴。在任三年，不名一钱。乡民以“官清民安”四字勒于石。后以误漕，迁谪。民为建生祠，复汇成诗歌集曰《棠荫》。（乾隆贺志，参道光通志）

郑宗谦 一字益公，十五都仙岐人。顺治辛卯举人。授河南开封府推官。有参将董某，恃势横行，宗谦廉得其实，按法治之。民建生祠祀焉。后即以董某狱触权贵，引年归。（乾隆贺志，参道光通志）

谢汝霖 字用弼，塔头人。康熙己酉举人。由教谕累迁知山西永宁州。安集疲民，革耗羨行户诸弊，兴义学，决狱、催科不事刑威。尝谓“民日富而官日贫，固所乐也。”永之人为树碑立生祠。在官十三年，及卒，柩归，惟图书数篋而已。祀名宦。（乾隆贺志，参道光通志）

高于冈 字克隹，一字来仪，台瑶人。康熙壬子拔贡。松溪教谕。课督多方。捐俸修葺学官，重建朱子书院，增造书室，为诸生习礼所。邑令沈焕为勒碑记，学使者丁蕙扁其额曰：“鱣堂令



范。有《庐山续吟》、《问轩诗集》、《松源记绩》若干卷。任九年。擢建宁教授。未之官，卒。（乾隆贺志）

林谦光 字道牧，一字芝眉。父逢经，传见《忠义》。谦光，康熙壬子副贡生。官政和教谕，延平、台湾两府教授。笃学励行，诲人无倦，多士为立去思碑。擢知桐乡县，移分宜，所至洁己爱民，兴利除弊，绰有循声。著《台湾府志》、《台湾赋》、《历朝甲子图》、《华鄂堂集》行于世。乾隆四十一年，祀郡乡贤祠。（同治彭志，参道光通志）

黄天箕 字行枢，一字南亭，南厝人。家贫嗜学，以孝友闻。康熙庚申举人。知山东曹县。约己裕民，治狱平恕。岁荒，倡捐米于余石助赈，全活无算。权知济宁州，救荒如曹县，又浚浅闸以资水利。三载，督抚交荐。以劳勩卒于官。乾隆三年，福建大吏请以闽县黄榦祠中别室为天箕特祠，年给祭资四金，编入《福建通志》。（乾隆贺志，参道光通志）

陈天立 字利震，号英侯，复升元孙。康熙十九年举人。初任大名令，缓征恤刑，民德之，为立生祠。以亲老乞养归，送者数百里。丁忧，服阙，补泾县，政如大名。岁饥，天立捐廉煮粥，以赈贫乏。大水漂骸以千计，立义冢瘞之。复捐筑河堤，水患以息，旋病卒于官。（采乾隆贺志《选举》注）

江雯 字廷启，一字砥岩，云路人。少有神童之目。康熙辛未进士，知镇平县。值岁荒，发仓煮糜，全活甚众。丁外艰，服阙，补镇原令。岁不登，雯巡视郊野，询疾苦，赈贫乏，以劳瘁成疾。闻母讣，即日奔归，分田产均诸兄弟。卒，祀乡贤。（乾隆贺志，参道光通志）

郑晃 字子伟，一字二瞻，二十都人，籍浦城。康熙甲戌进士，授郧县知县。建武阳堰，设集场，立纳采问名之礼，以绝讼源。劝速葬，禁丧殡演剧妇女庙哭诸陋习。郧处万山外，民死

于虎无虚日，作告虎文，数日虎徙去。摄郟西县，修学宫，复丁祭。入为刑部主事，迁员外郎、礼部郎中。出为广东提学副使五载，寸长必录。事竣归里，卒。年七十二。著有《存山堂集》、《狷犴晨钟》、《拜石堂诗集》、《华胥内外集》、《偶笔诗集》、《粤东文诰集》、《秋心集》、《二瞻真稿》。（乾隆贺志，参道光通志）

马玉简 字介卿，号心岩。康熙乙酉举人；授湖广安乡令。下车值水灾，立请赈豁，全活甚众。邑豪民肆行不法，按律治之，自是敛迹。卒之日，制、抚知其贫，令藩司资之，以归其丧。（采乾隆贺志《选举》注）

严梦两 字伯任，一字觉轩。性倜傥，善诗文。康熙戊子副贡，补八旗教习。雍正初，荐授中书。奉命四川丈量民田，精密不苛，民怀其德。同官多被谴，而梦两独于事毕，加一等，议功，例擢主事，以家贫亲老乞外，知慈溪县。有讼杀人者，审鞫无凶器，太守欲重其罪，梦两不可，曰：“岂可杀人以媚上官乎？”摄台州、宁波、绍兴三府同知，大府重其才，凡巡视海塘、转运官铜诸役，辄檄梦两董其事。乾隆六年补义乌知县，专抚字，缓催科，修学宫及东江桥。好士下贤，岁时进秀民训导之，县试所拔多英才。邑人以比连青天，连亦闽人，名一鸣，有遗爱于义乌者也。摄守某求赂，梦两拒之，为所中伤，民争讼冤，大吏廉其枉，得免。官归，囊橐萧然，父老醵金为赙。梦两家儒素，无生业，至是贫益甚。游粤东，寻卒。著有《贻经堂诗集》、《居官格言》。（乾隆贺志，参道光通志）

郑纯礼 字复武，一字履斋，东隅人。康熙己丑进士。知山西安邑县，县称富饶，纯礼清廉勤慎，值三岁大荒，奉文赈粥，多费仓糶五千余石，以亏缺被议，去官，民为代完。起复，坐补原缺，先调任平顺，父老环泣堂阶者数千入。去之日，祖饯数十里，堕泪攀轡，如婴儿失慈母。庚子、甲辰秋闈分校，甄拔皆知名士。

及复任安邑，百姓欢迎。甫半年，升礼部行人司，协办祠祭司事，清理直省贤良祠。给假归，囊余一拂，犹竭力倡修学宫，捐祖祠田亩。著有《梦樵轩集》。子愈，自有传。（乾隆贺志，参道光通志）

林琼蕤 字光可，一字朗山，壶井人。父嗣荣，字斯猷。性豪旷，尝谓族人曰：“吾族以海为田，不如以土为田也。”捐斥地四百余亩，与从孙申甫筑三塘，计垦田三千亩。初税海鲜，田颇难售，嗣荣诉于官，并豁海鲜诸税，至今利赖焉。雍正庚戌，琼蕤成进士，以亲老不赴选。丁内外艰，哀毁尽礼。服阙，授直隶高阳知县。莅任值水灾，淹百二十村庄，琼蕤恐官赈有稽时日，先捐粥接济，修旧堤，浚淤塞，水不为害。县中旗民杂处，抚之帖然，在任四年，宽严互济。尤以课士为己任。以老疾乞休，归装帷图书数篋而已。年七十余，犹手不释卷。卒于家。著《兰瑞堂文稿》、《四书说解》、《唐诗直解》、《左传评注》。（乾隆贺志，参道光通志）

陈琦 字乾德，三溪人。雍正癸丑进士。知堂邑县，以清俭自持，狱讼立剖。下乡减仆从，毫不扰民。收漕令民自解。详革梁家庄落地税。邻民每叹曰：“吾侪福薄，不能为陈侯百姓也。”在任十年，卒于官。（乾隆贺志，参道光通志）

郑薰 字善元，一字依山，古县人。乾隆丙辰进士。知河南汲县，捐俸倡修学宫，开惠远泉，润田五十余里，民怀其德。巡抚雅尔图赠联云：“案牍能清胸有竹，弦歌不绝县成花。”解组日，囊无余积。汲之士民，立去思碑于西关外。（乾隆贺志，参道光通志）

郑汉章 字序华，一字云亭，西隅人。雍正己酉拔贡。试在平县丞，权知武城知县，值水灾，查勘无遗。摄博兴，开浚小清河，济南所属均感其惠。署沂州州同，监司万国宣重之，辄与谈论诗文，资其匮乏。丁内艰，服阙，补文登知县，移霑化，六年五灾，以劳致疾，卒于官。阖邑士民哀号不绝，柩归，有送至数

百里外者。著《宦游舒啸诗集》。(乾隆贺志)

郑愈 字同哲，一字慕韩，纯礼子。雍正己酉年甫冠，省父于安邑任所。时秦地用兵，诏求人才，经督兵大臣荐举，赐帑金壹百两，发往陕西军前差遣，屡立战功。议叙，引见，授四川永宁县，再任黔江，刚决有为，诸务并举。升贵州麻哈州知州，地僻而险，苗蛮错处，抚之帖然，民赖以安。俗少读书，愈为广设义学，聘延名师，使之互相讲贯，一时人皆尚学，文风丕振。后从狃猪旧疆，丁内艰归，茸角山居，以钞写经传为事，邑侯贺世骏延与修志焉。(同治彭志)

陈九鼎 字敬彝，一字新斋，沟东人。乾隆丙辰副举人。历署广东新会、江门县丞，有政声，人以活菩萨称之。邻邑有以水利上控者，数年莫决。闻鼎精明，两造具呈请听决，鼎为之平情定断，众皆悦服。调琼山海口县丞，旋丁艰归，掌教吴航书院，与修邑志。起补山东茌平县丞，升邱县知县，引经断狱，有儒吏风。年七十，致仕归。生平嗜学工文，簿书之暇，即以著述为事。间或作画，随笔所到，人物毕肖，深得八大山人遗法。著《四书便注》，未梓行。子拱秀，字希文，号质原，邑廩生，善草书，片楮尺幅，人咸宝之；次光祖，字希兰，号兰仙，善画兰。(同治彭志)

林调燮 字德聚，一字鹿沙，东隅人。博学工文。年逾冠，学使周学健拔取第一，入邑庠。乾隆戊午，举于乡。己未联捷进士。会试三艺，皆再易其稿，房师则储在文中子也。历署直隶阜城、新河、无极、南和、井陘等县，所至有循声。先是，真定途次多盗，明火露刃，劫掠行人。燮以猛济宽，盗为敛迹。丁内艰归，服阙，补灵寿，吏怀民爱。公余课士，月有常期，八年不倦，士民拟之汉文翁。年五十六，卒于官。灵之人思慕其德，祀诸书院，以配陆稼书先生焉。后三纪，同邑陈念祖署灵篆，犹及见其所得士，口碑籍籍，咸称为好县官。古之遗爱，调燮其有焉。著有《象虚亭



文稿》。(同治彭志)

蒋岩高 字振泰，一字鲁瞻，屿头人。乾隆己卯举人。历署山东莱芜、昌邑知县，授新泰令，宽猛咸宜，所至多惠政，暇则论文课士。己亥、庚子两次分校乡闈，鉴拔多知名士。年四十八，引疾归。建揖山亭于定山，与二三同志闲步横屿湖，优游自乐，不预外事，人尤高之。卒年六十五。(同治彭志)

陈 畴 字廷琚，一字寿田，古县人，省居。乾隆壬午举人。初令楚中，借补桂阳州州同。州多积案，详为清理，深得民心。调宁乡，贤声日起。补临武县，擢靖州知州，豪蠹敛迹，畏如神明。时诏举丞牧堪胜知府者，督、抚以畴荐。丁艰归，起升江西临江府知府。民好讼，多上控，缙绅家又阴为主持。畴立法不挠，干请悉绝，民无有冤者。旋入都，改补湖南常德府，调宝庆府。畴熟于楚中风土人情，再莅其地，兴革益多。尝曰：“吾初出都门，化龙侄握吾手曰：‘吞得百头腊蛇，方可作外吏。’吾当官遇事时，服此言。”又曰：“吾生平驭下只恩威并济，赏罚分明而已。”旋以年老乞休归。著有《北行纪事诗集》。(同治彭志)

冯鼎高 字彝仲，一字竹娱，屿头人。乾隆丙戌进士。知湖南辰溪县。时大兵进剿缅甸，供亿络绎，不辞劳瘁。丁外艰，巡抚以军兴旁午，奏留，事竣归里。服阙，仍起湖南权临湘知县。先是，湖北民来争沙洲，评讼至五六十载不能决。鼎高履勘，究其原委，分划疆界，俾各遵守，远迩咸颂焉。三十六年，调永定知县，摄湘阴，地滨洞庭，盗贼所窜伏。鼎高设法缉捕，数月肃清。寻回永定，清理积狱，修龙州书院，重建三贤祠。移长沙，修岳麓书院。大吏以卓异荐。丁内艰，归。起授河南新郑知县，值水灾，请开仓平糶，并借给籽种，又捐廉煮粥赈饿者，民困以苏。迁郑州知州，修管城书院。时新蔡奸民滋事，从巡抚富某往擒治之。旋奉檄堵筑祥符八堡缺口，又赴考城坝工，总理料厂，引河。迁



知陕州，大兵征剿甘肃逆回，刍茭糗糒遗行无滞。州有广济渠，岁久寢废，鼎高疏导之，并葺治旧堤，利赖甚溥。又重建宋忠臣李彦仙祠，葺召南书院。擢江南松江府知府，权按察使，审办勾容粮书案，诛巨蠹者八人，余从末减，舆论翕然。移苏州知府，权苏松粮道，莅任三载，修治城垣，改建沙湖、石塘，百废俱举。再荐卓异。计服官二十余年，凡有益于民者，无不实心兴建，故所至有能声，大府咸倚重焉。卒年五十八。（同治彭志，参道光通志）

陈士玉 字岳有，一字芝田，古县人，省居。乾隆戊子举人。令山西祁县，多善政，务德化。有兄弟争产者，其弟馈二千金，士玉受之，出金于庭，动以至情，晓以大义，兄弟皆感泣，还其金。后以勘灾忤大宪，镌秩归。囊橐萧然，几不能备行李。祁邑士民思之，为奉粟主配祀祁大夫祠。方伯蒋君旌其闾曰“民不能忘”。家居四十年，绝迹公门。年八十三卒。（同治彭志）

谢春晖 字齐瑀，一字莲湖，沙京人。家贫力学。乾隆戊子举于乡。辛丑会试，房师张涵虚佳其文，力荐不售，及晋谒，廉知其植品积学，挽留西席。晖以亲老归养，辞至再三。张叹曰：“予何忍夺孝子心哉！”赠以金，又辞。张曰：“老母在堂，卿佐甘脆耳。”乃拜受泣别。截取期届，改授建宁教谕，训士首重伦常，每朔望谒庙后，即集诸生于堂，宣讲《圣谕卧碑》。时邑令江于湘、都司李雪岩均负人望，有三贤之称。俸满，调晋江，邑人士泣饯远送。寻以老告归，宦橐萧然。卒年七十三。著有《莲湖诗钞》。子洽泮，精医学，积所得金，梓其集行世，观察陈学颖为之序。（同治彭志）

刘永标 字良瑞，一字次北。父廷举，安贫力学，笃行工文，由二刘村迁会城，家焉。永标少承家学，与弟永树并擅文名，有二难之誉。登乾隆丁未进士，分发江苏以知县用。值林爽文叛，奉檄运粮，浮海至厦门。差竣，授江浦知县，邑小民疲，前官亏库

金二万余，永标受之，躬行节俭，以时弥补。宅心仁恕，罪犯在大辟者，必原其不得已之情，以故遇赦辄减等，十余年未尝决一囚。邻境有越狱者，伪刻印者，获之仍归邻县，不忍以同官降谪，博一己迁除也。嘉庆四年，补款已足，遂引疾归，卒于家。生平喜为诗，著有《盥白斋集》四卷，作令后，遂缀弗为。陈寿祺太史序之曰：“人或废吏事而溺于诗，君则缀诗而勤于吏事。为何若也？”子建枢，乾隆戊申举人，著有《九一山房稿》；建藩，嘉庆辛酉举人，有《东圃时文》行世；建庚、建韶，乙酉、乙未同登乡会榜。建庚著有《有不为斋诗钞》，建韶著有《宜兰室集》。孙德威，道光辛卯举人，尤深经学，著有《周官辩非》及《弄岩文稿》。累世縑緼，各有著述，省城称家学者，首推刘氏云。（同治彭志，参道光通志）

郑榕 字道植，一字荫莽，世居首占村。父惟润，让遗产于兄弟，营生会城，遂家焉。榕生而颖异，游孟超然、刘永标之门，刻意励行，习为古文词。乾隆己酉举于乡。留京十年，考取教习，以知县需次广东，署和平县事。政简刑清，日课诸生，亹亹不倦。士民德之，颂以诗曰：“我母慈兮隶长乐，人情得处即和平。”语虽质，盖纪实也。旋授琼山令，琼为海外十三岛领袖，差务络绎，榕独办理裕如，得以尽心民事，案无留牍，狱无滞囚。公余则与多士说诗书，敦礼乐，公堂之上，济济如也。时蔡牵游弋海上，常到琼掳掠，榕先事筹防，民不苦寇。莅琼七年，升同知。以母老乞养归，士民沿途攀送，步伐十数里不绝。得暑疾，道卒羊城，柩归日，宦囊萧然。（同治彭志）

陈念祖 字良友，一字修园，溪湄人。乾隆壬子举人。令直隶威县，善体民情，不事鞭撻。遇事能断，卓有贤声。尤精医学，辛酉夏，三辅大水，瘟疫流行，念祖以勘灾到其地，审天时，问土俗，相人体之肥瘠寒暖，制药丸三品，散给城乡，全活无算。家

居后，仍行医济世，诊病必详审脉息，料断如神。尤能起死回生，超出群医之外，韩总宪鼎晋称为仲景后身。所著有《公余四种》，《伤寒论浅注》、《金匱要略浅注》等书行世，目详《艺文志》。（同治彭志）

黄观书 字万钟，一字益斋，观营弟。观营传见《义行》。性鲁而志笃。乾隆壬子举于乡。历任尤溪、漳浦教谕，狷介不苟取。尤善训迪，每月课士，令诸生以次受业，因其材质之高下，闻见之浅深，而开导诱掖之。其立教之法，先行实，次经义，次文艺。盖一时之能立师道造就人材者，必以观书为首称焉。道光壬午，引疾归。旋升邵武府教授，不赴，仍授徒于里，不问外事。游其门者均能砥行励名，拔出流俗，乡评重之。子春云，邑诸生，以能文名于时。（同治彭志）

王起琇 字绩莹，一字玉圃。年十七游庠，乾隆壬子领乡荐，大挑一等，改就教职。历任宁德、晋江、龙溪教谕，永春州学正。喜培养人才，每劝诫诸生力学敦品，恪守“卧碑”。体恤寒士。性端方，绝干请。所在有司礼重焉。晚年卧病，犹手不释卷。以子有树累封中议大夫。（同治彭志）

陈心炳 字希耀，一字葭塘，石门人。本衣冠旧族，心炳独苦读如寒士。嘉庆辛酉举于乡。历署湖南会同、临湘、泸溪、新宁、湘潭、宁乡等县，均有善政。授醴陵令，适蛟灾之后，县城及沿河民居俱被漂没，心炳履任后，议赈议蠲，赖以全活者甚众。嗣复领修衙署，重建考棚书院，以工代赈，抚恤多端。在任三年，士民德之。以内忧去官，众依依不能舍，镌其政绩于石。家居近十年，不事干谒，人尤服其品之高云。著有《韵语琐掇》四卷。（同治彭志）

陈澍云 字允龙，一字松轩，万春四子。万春传见《文苑》，嘉庆辛酉拔贡，庚午举于乡，考授镶白旗教习。秩满，以知县用，呈

改教职。性温厚笃实，正直廉平。工诗，善书法，得黄山谷笔意。任武平教谕，士多固陋自安，澍云以忠、孝、廉、让训诫诸生，复为之明经术，定课程。在任二十年，士习文风，翕然丕变。都人士以整齐严肃颂之，并祀邑之崇文堂。迁泉州教授，祖饯塞途，皆歌诗以志其教泽。寻引疾归，惟图书数篋而已。生平力图寡过，不求人知。壮岁授徒，造就甚众，王文勤瑞璜其最著也。瑞璜由观察来闽，洊升巡抚，前后近十年，毫无干请。年八十五，以寿终。著有《漱芳山房诗集》三卷；《文集》一卷。（同治彭志）

高炳望 榜名祖望，字德彰，一字琳圃，文石人，省居。幼颖异，年十三补弟子员，旋食饩。嘉庆丁卯举于乡。授徒三十年，及门登科第者踵接。道光壬寅，授安徽泗州州同，地滨大湖，胥役多藉缉捕之名苛役商船，不敢停泊。炳望廉知其情，立除积习，勒石湖岸，舟舶靡至。癸卯分校乡闈，称得上。甲辰春，飞蝗过境，积厚五六寸，炳望诚心夜祷，蝗不为灾。暇日进诸生与论诗文，多所造就。历摄五河、天长、盱眙、全椒县事，皆有政声。己酉，引病归里，宦囊萧然。子奎宣，道光庚戌进士，打箭炉同知。（同治彭志）

陈尧书 字诸典，一字赓堂，古县人，省居。以典史赴陕西军营效力，升知岐山知县。岐地土旷田肥，西南五丈原与郿县接壤，即诸葛忠武由斜谷出师处，原下水田千余顷，为忠武屯田旧址，年久渠堰淤废，乃亲往履勘，捐廉千余金，挑修六堤，民利赖之。城乡立义学五处，并请建义仓，劝捐粟七千余石，以济常平之不足，取其羨余资义学。调补咸阳，邑南乡滨泔、渭，积年泥壅，河身日高，每逢盛涨，漫入田园。乃仿区田之法，令按亩浚沟，以备宣泄。俸满引见，特旨召见，异数也。进汉中府佛坪同知，署商州直隶州事，卒于官。尧书虽援例入仕，然娴吟咏，工书札，其《夷门怀古》句云：“公子不辞通患难，美人未免重私恩。”



《佛坪感怀》云：“官俸难储三日蓄，注云：地不产米，贩者亦罕。家书常抵万金看。”风调可想。有《政余吟草》一卷。（同治彭志）

陈仁淳 字于安，一字洽浦，云路人。道光戊子举于乡。壬辰成进士。署安徽庐江令，甫下车，即禁止赛会，甄拔人才。尤慎用刑，凡大小狱讼，悉心研鞫，务得其情，不轻加以鞭朴。时沉澹甫平，室家粗奠，仁淳多方抚字，教育兼修。仅三月，以劳瘁卒于官，未竟其用，士民惜之。（同治彭志）

高 枢 字修仁，一字紫垣，龙门人。道光癸巳进士。授河南正阳知县，邑多捻匪，至则悬赏擒获擒首何在等，余匪远遁，四境赖以安谧。己亥、庚子分校乡闈，称得士。著有《养志堂吟稿》四卷。（同治彭志）

郑廷珪 字用桐，一字桐侯，榕胞侄。家贫事母孝，母善病，侍汤药，衣不解带。道光甲午举于乡，以母病不赴春官者十年。丁母忧，服阙，甲辰捷南宫，即用浙江。以清慎勤自励，尝谓“一丝一粟，皆闾阎膏脂，过分即戾天和。”历任象山、安邑、金华、江山诸县。所至兴利除害，修建书院，与邑文士讲艺，必申明圣贤义理，士论翕然。上官善其政，举卓异。丙午、辛亥，分校浙闈，称得士。以病归，卒于家。（同治彭志）

王锡桐 榜名桐，字贞运，一字煦甫。父溱，传见《文苑》。锡桐咸丰辛亥经魁，拣发浙江知县。时左爵督宗棠由浙入闽，令闽入仕浙者陈事宜，锡桐首以足粮食、肃功令、精募勇、慎遣将、培人才、振士气、挽民风、平物价、复盛典、彰苦节十事对。巡抚马新贻尝语僚属曰：“王令讲求吏治，将来定一员好官。”乙丑，分校浙闈，称得上。权桐庐县事，屡经兵燹，田庐荒废者十之三四，锡桐设法安戢，躬亲畝亩，督令开垦，并为之丈量，筹给耕种，民困始苏。以积劳成疾，逾月卒。贫无以殓，同乡为之营后事，并扶柩归。子钟泰庠生。（同治彭志）



黄翼为 字景弼，一字谷臣，青山村人。咸丰己未进士，观政吏部。谨交游，慎取与，人有干以私者，峻拒之。庚申秋，京师戒严，同官纷纷请假，翼为曰：“人臣大节难亏，太平则养望为高，临变则相率而去，天下后世，其谓我何？”仍在署办事如常。同治元年，护送文宗显皇帝梓宫，礼成，加一级。中途得寒疾，旋闻母讣，以哀毁卒于京邸。士大夫闻者，多为流涕云。（同治彭志）

陈 赞 字大琛，号翊图，青桥人。生而岐嶷，性嗜学，年十五补博士弟子员，食饩，道光庚子登贤书，咸丰壬子成进士。历知河南沈邱、淮宁、固始等县。为政务涤烦苛，以求实济。任固始时，值匪氛未靖，邑当皖、鄂之冲，发、捻诸匪时常窜扰。赞修城堡，缮器械，督练乡勇，防剿并施，破贼寨数十，以功升知府。而兵燹之后，疮痍未复，赞复招徕抚绥，不遗余力。莅固十年，士民感戴，为立德政碑于署前。丁艰，服阙，权知彰德府。岁大祲，捐廉施赈，全活无算。尝监试文闈，剔奸厘弊，能得窾窍。充同考官时，所得多英才。既解组归，课子作基、文明，先后均捷秋闈。赞于光绪壬辰重游泮水。尝偕同邑黄见三纂修县志。年七十五卒。遗命自所居乡起至北山村捐筑石路，行人德之。

黄见三 字景如，一字心垣，青山下人。祖观菴，父一桂，均有传。见三中咸丰癸丑进士。历知河南杞县、汜水、内黄、林县、太康等县及郑州，升补睢州知州。见三以经术饰吏治，所至勤政爱民，振兴文教。士人有对簿者，辄不假刑威，必反覆开导，俾其愧悟而后已。任内黄时，马贼围城，见三督队防堵，城赖以全。生平博极群书，精熟史事，工制义。为同考官，辄有拟墨，每一艺出，士子传诵之。大僚子侄及所部之民，游其门而取科第者甚众。性慷慨，矜恤寒峻，而尤笃友谊，士贫不能赴礼部试者，赈之。同郡许利宾卒于某县任内，见三为经纪其丧，代完亏帑，遣仆护其柩眷以归，其孤贞干，因受业于门，后成进士。见三晚年

潜心五子之学，著《学宫景仰篇》四卷、《全史辑要》二卷。同治八年，在籍守制，邑令彭光藻聘修县志。服阙之官，寻以分校乡闈，积劳成疾，差竣而卒。年六十有四。

林调阳 榜名秋奇，字燮轩，一字瘦山，洞湖人。咸丰己未亚魁，同治乙丑进士。授安徽凤台知县，未莅任，调望江，值兵燹后，元气未复。调阳下车，却额馈，锄积猾，理冤振滞，抚恤疮痍。重建来仙书院，捐修化龙桥、方公堤、刘猛将军庙，百废俱举。暇则论文讲学，虽日与邑诸生群聚衙斋，然无敢于以私者。丁卯岁荒，以吁请减征获谴。亏欠解额，大府檄追严急，民醵金以偿，得回任。丁忧，服阙，权青阳，其治一如望江。光绪壬午，复知望江，时邑大水，县北数十圩没为巨浸，调阳躬督工役，日冒风雪，逾年而圩工成，民建生祠以祀。调阳素负文名，性鲠介，所至绝苞苴，以故，乡闈辄得分校，所取多知名士。乙亥夏元、丙子解首，皆出其门。有某显宦子，闾前通关节，欲出调阳门以掩其迹，介人为道地，请以二千金寿，调阳峻却之；后为同官某所罗致，荐而获售，卒藉其力，题升知府。人咸笑调阳愚，弗顾也。服官十余年，前后凡三至望江，一莅青阳，一以抚字为母，事有不便于民者，虽大府严檄不为动。引疾归，袱被萧然，图书外无长物。

董炳章 前道人。同治壬戌举人。授上杭教谕，修学宫，置祭器，捐俸复月课。士绅延主讲邑琴江书院，严课程，增膏伙，文风日盛。旋调台湾淡水教谕，兼主讲明志书院，兴学教上如上杭。时台民素好讼，炳章力革之，士习为之一变。期年，卒于官，门人归其丧。上杭、淡水皆祀名师祠。著有《经义解纷》四卷、《屈蠖斋集》藏于家。

刘树桂 字小山，三刘人。学问渊博，试县、府、院皆冠军，旋食饩。同治癸亥恩贡。署福宁府教授，严立课程，训士必循礼

法。拔诸生之秀者读书斋中，赏奇析疑，终日不倦。性慷慨，乡居时，遇岁歉，出谷平糶。婚葬无力者，伙助不少吝。邑令徐承禧浚陈塘港，经理难其人，树桂毅然任之，卒以成功。孙成杰，传见《文苑》。

林 济 字作舟。有干略。家贫佣书以给。同治甲戌就某参戎幕，稍知名，于是历佐镇帅幕府。光绪间，以例授阳山知县，下车革陋规、清积牍。日坐堂皇，令下状者鸣梆而入，阍者不复为梗；至辄集取两造剖判，既竟，日未移晷也。有以争产故，死一人，举宗十七人均下狱。济喟然曰：“以一人坐及举宗，是前吏之不善于讞也。”鞠之，盖误伤而致命者，为平其产，讼遂释。旱祷雨于社，行赤日中数里。积十日，雨集，而济中暈，遂不起。年四十九。

陈春瀛 字幼海，古槐人。同治癸酉举人，光绪己丑成进上。试刑部，改直隶州知州，指分四川，权忠州。州犷猛，多命盗狱，岁以三四百计，前官皆痛绳以法。春瀛曰：“是治流也，非清源也。”乃兴水利，劝民力农桑，以充衣食；创艺场，游手者使量力营生，逾年而案牍以清。教民某武断乡曲，春瀛擒而置之法，教上有违言，援万国公法以折之。公余延接英俊，谈诗论文以为常，尤好奖掖后进。兴书院，修四贤祠，皆捐廉为之倡。大府廉其能，辟司机要。士民攀留不得，至有泣下者。而春瀛竟以积劳致疾卒，年五十三。生平博文强记，留心时局，随使东西各国，险要政治，无不周知。制军岑毓英、张树声、奎俊咸器重之。历佐大僚幕府，一时章奏多出其手。所著诗文、章奏等稿，未梓，存于家。

郑 箴 字肖彭，首占人。祖元模，道光丁酉举人，掌教吴航，为时名师。父景运，咸丰辛亥举人，随左文襄西征，歿于幕次。箴幼颖敏，善属文，未冠，籍闽县学第一。光绪乙酉举于乡，乙丑成进士，签分刑部，改知县，权丹阳。邑有积狱，久不决，箴

至一讯而服。岁荒，先邻境行平糶，邑无饥民。旱祷雨，立应。受事四十日，丁艰去。寻充中西学堂汉教习。时初兴西学，少年莛于异说，率诞妄离其宗，箠力持正论，搓其孽芽，学者肃然。服阕，权无锡。时已感疾。下车剔抉爬罗，忘其劳惫。有讼不孝者，令荷校以徇，判词沈痛悱恻，读者泪下。未期月，卒官。性孝友，家故贫，虽举债山积，所以博亲欢者无不至。闽俗产女多不举，箠偕同郡陈景韶请当事厉其禁。立育婴局，以收贫孩，间涉岐黄，多所全活。子宝菁、宝芝。弟筹，名与埒，壬午举人，癸未进士。

李 锦 字纲斋，仙山街人。光绪己卯举人，己丑大挑一等，是科成进士。呈改教职，授延平府教授。到官立课程，严条教，隆冬盛暑，讲学不辍。一时执经者争后先，而黉舍以满。为人端方和藹，不干有司，唯事关风化，如敬节、拯婴之属，孜孜筹办，倾囊不吝也。尝印送《善录》，谓中人以下，当以因果劝之。生平寡交游，独师事同县谢章铤，留心考据之学。学使王锡蕃、戴鸿慈、秦绶章疏其学行，闻于朝。

高凤岐 字嘯桐，号愧室。父绍曾，传见《孝友》。凤岐，光绪壬午举于乡。尝佐林启治杭州府，佐方家澍治桐乡、秀水等县，多所建白。旋入粤督岑春煊幕，时广西乱，奔走兵间赞军务。甲辰以知县需次浙江，岑又奏调归粤，以平匪功擢权梧州府。值大乱后，盗风甚炽，常自督兵役巡缉。得剧盗，必反覆告以应死之故。退语家人曰：“此饥寒无告之民，流而为盗。法当死，而情可矜。”于是知专事捕诛非治本计，乃设工艺厂，收穷民，盗以稍减。有举子武断乡曲，集讯时，抗辩不少屈。凤岐喻之曰：“吾与君均读书人，今吾坐堂皇，而君阶前对簿，君之辱，吾之耻也。”举子亦愧服，其善感人也如此。居官勤治事，夜辄剪烛理案牍，家人苦劝不能止，曰“县不能决，乃至于郡。我视为小事，而吾民之身家系之，奚容缓？”未几果以积劳谢病去，养痾沪上。各大吏屡



征辟，皆未应。侍郎于式枚以御史荐，廷试第一，例得记名，权贵恐其不利于己，尼之。复归沪上，以病卒。弥留时，犹以气机转中国有望为言，盖至死不能忘君国也。后浙人以佐治功，配享林太守于孤山。

陈兆焕 字筱文，青桥人，省居。同治癸酉举人，甲戌联捷进士。以即用知县分陕西。性廉介，陕抚谭钟麟早闻兆焕名，然兆焕不常事衙参。钟麟叹曰：“不奔竞者，必为好官。”益重之。一日奉差乘马出，跌伤，上书愿改教官，钟麟强慰留之。丙子分校陕闈，所得多知名士。左文襄公督陕甘，与钟麟合奏，特例授大荔首县。有巨族为钱商，负民间款巨，兆焕辍之，巨族恨刺骨，其于举人，官京师，思中伤之，短兆焕于某部。受其困者二十年，兆焕晏如也。后署洽阳，又署醴泉。卒于官，贫不能殓，邑士民为治其丧。

林振光 字芝馨，碧岭人。父成漳，字寿彝，性孝友，勇于赴义，幼贫，操工业，所得资悉充善举，不吝也，故亲属里党无不沐其惠。振光以邑廩生中光绪乙酉副举人，己丑举人，甲午成进士。授广东会同知县。清积弊，平冤狱，公出必轻车简从，事理而民不扰。馭胥役尤严，虽巨猾不得售其奸。未几，署临高，临高民早闻振光贤，相率迓于邮，温霭可亲，笑曰：“夫子果无以异于人。”邑豪有希求邑令者，闻新令来，必要于路，百计致新令欢，冀固其盘踞。振光至邑界，果有袖苞苴进者，峻却之，民益信令贤。临高素多盗，振光曰：“治盗必除其窝。”时以他事便道抵其穴，歼其魁，余则谕以顺逆祸福之理，辄感泣而散。广东赌风素炽，临高尤甚，振光禁之严，甘其利者，每陷以巨金，不为动。以此地方宁静，风俗以淳。旋告归，宦囊萧然，至不能治行具，邑士民醵钱以助，始得归。著有《迎碧山房诗文集》、《海南公余随笔》若干卷。



林秉芳 字兰忱，上店人，省居。未冠，以府试冠军，补弟子员。光绪己丑领乡荐。幕游于江苏、吉林等处。寻吉抚以拣选县奏保留吉，署濛江知县。莅任后，孜孜图治，凡福国利民之事，靡不悉力为之。未几，以积劳得疾，卒于任。秉芳以清廉自励，虽累膺榷务，而宦橐犹罄如也。

## 长乐县志卷二十五

### 列传五 文苑

文苑，国粹也。其为黄钟之盛乎？其为变徵之衰乎？其浸沉《庄》、《骚》而出入迂、固乎？其错综王、薛而偏伍曹、胡乎？宁秘玩以为谈助，知考献尤重征文，惟至使索其家，辄叹人皆取去。友辑其草，重惜梓之不全，或者其志乘之憾乎？况吾长文风，开于唐，盛于宋，恣肆于明、清。时上高词赋，遂甲他邑，有由来矣。传文苑。

#### 唐

卓云 河南铺人。乾宁中第二人及第。历官淮南节度。作《未明求衣赋》、《驾在华州赋》、《问善如扣钟诗》，人传诵之。（乾隆贺志）

#### 宋

郑洙 字教生，其先侯官人，徙居长乐十三都柯林山下。宝元元年，擢三礼科。仕至虞部郎中。初，洙赴举，陈襄送之诗，称：“词藻驾曹王，声华压元白。”盖未仕时，已重上林矣。初郡未立学，洙与试，助教黄洵武为请于权州谢微，于是始表立学。闽人德而祀之学宫。（乾隆贺志，参道光通志）

林通 元祐初，文庙颓圯，久莫能建，通忧之，乃作《县图经》鬻之，得钱二十万，富民皆资助焉，遂成庙学。邑之有志，

昉于《图经》。通登乡荐。工诗，有诗集。（乾隆贺志）

林 楠 字子长。淳熙初，任姑孰教授。为太守杨愿作《姑孰志》五卷。（乾隆贺志）

陈有声 字广宗。嘉定进士。尉上高时，岁丰讼简，吏民安之。前此，邑士罕知声律，有声选诗赋百余篇，教以体裁。上高词赋，遂甲他邑。（乾隆贺志）

姚 勉 字汝勤，一字瑞峰，能举七世孙。按：能举字用进。姚坑人，官至江西按抚使司参议、朝请大夫。宝祐癸丑，正奏第一人，授翰林院编修，终朝请大夫。勉性敏，下笔如流，对策万余言，悉称上意。著有《雪波集》行世。（乾隆贺志）

### 明

陈洵仁 字思允，江田人。诗学精深。洪武乙丑进士，拜中书舍人，擢给事中。立朝敢言。文章、政事，望重一时。

林 慈 字志仁，屿头人。力学稽古，娴于文词。尝与陈登、高棟、王恭、郑定辈往来唱和。洪武中，以明经荐任本县训导，国子博士。有诗集。（乾隆贺志）

郑 定 字孟宣，祖闽县人。好击剑，工古篆、行书。为陈友定记室，及败，浮海入交、广间。久之，还至长乐县东。洪武间，征授延平府学训导，历齐府纪善。永乐初，迁国子助教。号浮邱生。有《澹集》。（乾隆贺志，参道光通志）

陈 登 字思孝，仲进子。仲进传见《循绩》。为人谅直。洪武中，以儒生荐授罗田县丞，调兰溪浮梁。善文词，尤工篆籀，擅名海内。凡周秦以来石刻残缺无可考者，皆能辨之。永乐中，以荐召入翰林，预修国史。授中书舍人。入直时，待诏吴郡滕用亨负重名，见其后进，忽之，屡众辱登，登不较也。一日，辨难许氏《说文》，登随问条答，如指诸掌，用亨乃愧服。宣德间，卒于官。有《石田吟稿》。（乾隆贺志）

陈全 字果之，江田人。永乐丙戌进士第二人，授翰林编修。预修《大典·四书、五经性理大全》。书成，擢侍讲，权翰林院事。力疾奔母丧，至南京卒。工诗，五言专法韦、柳。著有《蒙庵集》。祀乡贤。（乾隆贺志，参道光通志）

高廷礼 初名棟，字彦栝，自称漫士，龙门人。先姓张，以祖隆后高氏，因姓焉。永乐初，与王恭皆布衣召入翰林为待诏。迁典籍卒。事亲孝谨。与人交无智愚新故，盎然如一。博学能文，尤长于诗、书、画，时称三绝。尝总唐人诗，扬抑上下之，自正始至旁流为十余品，然其宗旨则归於开元、天宝之间。为《品汇》九十卷，《拾遗》十卷，《正声》二十卷。谈者谓，唐称诗三百年，风调正变，大较如此。又著有《啸台集》、《木天清气集》、《玩字文原》。高氏自序其《品汇》，略曰：“有唐三百年，诗众体备矣。至於声律与象文、词理，各品格高下之不同，略而言之，则有初唐、盛唐，中唐、晚唐之不同；详而分之，贞观、永徽之时，此初唐之始制也。神龙以还洎开元初，此初唐之渐盛也。开元、天宝，此盛唐之盛者也。大历、贞元，此中唐之再盛也。下暨元和之际，此晚唐之变也。降而开成以后，此晚唐变态之极，而遗风余韵犹有存者焉。”又曰：“远览穷搜，审详取舍，以二三大大家，十数名家，与夫善鸣者，殆将数百，校其体裁，分体从类，随类定其品目。因自别其上下、始终、正变各立序、端，以弁其端。爰自贞观至天祐，通约六百二十人，共诗五千七百六十九首，分为九十卷。总题曰《唐诗品汇》”。又自序其《唐诗正声》曰：“诗者，声之成文也，情性之流出也。情感于物，发言以为声。故感有邪正，言有是非。惟君子养其浩气，存其真宰。平居抱道，与时飞沉，遇物悲喜，触处成真，咨嗟咏叹一出于自然之音，可以被律吕而歌者，得诗之正也。”又曰：“因编《唐诗品汇》一集，虑博而寡要，杂而不纯，乃拔其尤，汇为此编。题曰《正声》者，取其声律纯完，而得性情之正者也。”（乾隆贺志）

陈亮 字景明，沙堤人。于学无所不窥。自以故元儒士，明兴，累诏不出，曰：“昔唐尧在上，箕颖在下。吾投迹明时，游戏泉石，于志慊矣。”作《陈搏传》以见志。结草屋沧州中，筑小楼，购书藏之，名曰：“储玉”。亮在永乐中，年八十矣，于十子中年最长。与三山耆彦为九老会，终其身不仕。诗冲淡有韦、柳风。著

有《沧洲集》、《储玉斋集》，其诗轶不尽传。（乾隆贺志，参道光通志）

王 恭 字安仲，通志作安中，沙堤人。家贫，隐居七岩山为樵，自号“皆山樵者”。永乐初，廷礼以儒士荐，起待诏翰林，时年六十。敕修《永乐大典》，偶戏之曰：“无乃以会稽章绶故来耶？”恭笑谢曰：“吾山斧柯，幸自无恙。君无深谓我为矣。”居三年，《大典》成，试诗高第，授翰林典籍，未几投牒归。解缙称其“布衣萧然，不慕荣宠。强起决去，若朝阳孤凤”云。恭诗援笔绵绵，千言立就，意多凄婉，托喻颇深，有大历遗响。与同邑郑定、高棅、陈亮，流寓周佺、黄佺，侯官黄褒、唐泰，福清林鸿，永福王偁齐名，闽中称十才子。（乾隆贺志，参道光通志）

高 淮 字泰仲，二都龙门人。永乐丁酉举人。通三礼。诸生时，代邑令作谕俗文，为时所称。以乡举入都，姻旧多居要地，淮自守不往谒。居国学数岁，以祖母百龄、父母亦年高，归养，不复出。自称竹所老人。著书三十余卷。解大绅、王皆山、马彦声为之序。善画山水，古澹绝伦，时共珍之。（乾隆贺志）

陈汉臣 名留孙，以字行，号蓝田子，南田人。明初辟南安教谕，辞归。所著有《榕溪集》。张以宁称其“不自画于今之能言，而志附于古痴士。安凿齿之疾，而且屡空，天将玉成汉臣而不朽之也。”（乾隆贺志，参道光通志）

李叔玉 东隅人。正统①乙丑进士。官至惠州知州，慷慨好义，博学工诗。有《梅庵集》、《梅花百咏》。（乾隆贺志）

谢汝泮 字滨芹，杰从子。杰传见《名臣》。性廉洁旷达。工诗，歌行尤入妙。著有《顾行愚言》，杰为之弁。（乾隆贺志）

林宪护 字淑衍，二十都松下人。高才博学，工书能文。天启乙丑会试第三名，成进士。授中书科舍人。钦命巡查闽、浙、粤三省军政，边境肃清。（乾隆贺志）

梁 珪 字至铉，一字雪园。幼敏悟，年十五，补弟子员，食



康饩。文词拔萃，雅有器识。乙酉年，逾冠领恩贡。戊子后，隐祖里，绳世业。体素弱，呐於口，惟喜谈忠孝节烈事。久之。北游齐、鲁、燕、赵，酒酣耳热，恒慷慨悲歌，以泄其不平之气。遇人开心见诚，无所隐讳。与父春晖同为知县夏允彝所器重。年未及中寿卒。著有《江田草》、《楚游草》、《江西游草》、《雪园诗》。  
(同治彰志)

### 清

程应辰 字伯枢，一字蕉山，十五都漳港人。颖敏能文，尤善诗歌。尝授徒永福黄编修家，尽得其学。顺治戊戌进士，补平南令，深得民心。旋以老告归，囊橐萧然。著书甚富，散失，仅存有《长乐形胜》一篇。(乾隆贺志)

吴道来 字子绂，十二都感恩人，籍侯官。顺治庚子乡荐第一，丁未进士，授中书。文学德行并优。著有《邺城百咏》。卒于官。子士宸，字翰光，学术浩博，殊有父风。(乾隆贺志)

王颖如 字哲开。兄膺祺，传见《循绩》。颖如性颖异，而度宏远。年十三，随董应举游镇海楼，仿王勃作《滕王阁序》，顷刻数千言，语极壮丽。与兄相友爱。著有《日记》、《天籁集》三十卷及《孝经颂赞》、《三楼纪胜》诸篇。按：颖如实梅花所人，府志误入闽县。(乾隆贺志)

陈 骝 字伯驹，江田人。顺治间岁贡生。性聪颖，过目成诵。幼即工诗。与闽县黄晋良、许友相善，尤见赏于侍郎周亮工。中年纵游燕、齐、吴、越，著作益富。与嘉兴曹溶、长洲尤侗称莫逆交。为人孝友，晚偕兄澹隐溪湄。所著有《雪鸿堂诗文集》十卷。其最传者有《南雅堂纪事诗》、《金陵怀古》诸篇。澹字伯熊，亦有诗名。大司马龚芝麓称其“渊雅简洁，有仁孝之风”。时人共推重之，恒以二伯比二方云。(乾隆贺志)

欧阳士超 字允特，邑诸生，十六都人。学行醇粹。调迁往

复，唯以经史自随。尤精《易》学，著有《周易本义删补便读》三卷。（乾隆贺志）

陈汉章 字可云，一字天于，十四都人。性好学，十七补诸生。邑名士多出其门。既耄，口授手披，无间寒暑。著作甚富，有《天游居文集》行世，《三调迂赋》尤有风雅之遗。（乾隆贺志）

朱 静 字子定，十五都漳港人。康熙癸未岁贡。端方古朴，不妄发一言，遇三尺童子亦谦逊。授徒讲学，即盛夏必衣冠危坐。游其门者，率励廉隅。卒年八十余。著述甚富。藏于家。（乾隆贺志）

陈 范 字朝箕，一字铸岩，江田人，迁会城。少颖异，学有渊源，文脱稿纸贵一时。游其门者多获隽。康熙辛卯领乡荐，公车屡蹶。与孙勤、吴士玉称莫逆交。著有《四书讲章》、《二闻堂集》行世。选建阳教谕，未之官，卒。（乾隆贺志）

陈 崧 字书昂，康熙丁酉副贡。性孝友，好施与，口不言人过。博雅工文，为经师数十年，负笈者屡满户外，生徒取科第如摘髭，而崧独困场屋。需次泰宁教谕，檄甫至，卒，年七十九。（乾隆贺志）

陈子钦 字克器，一字铁云，江田人。先世自江山令仲进、中书登以下代有传集。父崧生，郡诸生。丁鼎革之秋，不求闻达。家积书万卷，唯闭户课子。子钦承庭训，遍读家所藏书，才思焕发，长益肆力于诗文，为江左纪映钟、洛中周亮工所赞赏。以贡入都应廷试，大学士明珠聘为教习，辞不就，殊单骑枉顾，赠狐裘百金，却弗受，即拂衣归，一时都人士咸高其节。所作文与古乐府皆不传，唯《铁云集》八卷，其子玉鼎梓以行世。大抵多故宫禾黍之感，寒如郊，瘦如岛，而风致飘然，实得力于晋之五柳翁者。（同治彭志）

吴 第 字序充，一字纯齐。雍正癸卯岁贡。孝友勤学，至

老不辍，诱掖后进，皆名重一时。著有《纲目俟论》、《纲目地輿便觉》、《五经俟论》。（乾隆贺志）

黄典 字振仪，一字凤村，犀村人。有夙慧，过目成诵，擅神童誉，弱冠，日可成文二十篇，皆中选。为人磊落，不修边幅，气量过人。雍正癸卯举于乡，甲辰成进士，令山东冠县，廉声大著。邑界大名回子营，民向受回害，典立法劝谕，遂相安。旋因病告归，总督田文镜怜其才强留，半年后，知其支床不起，始令行。甫至闽界卒。囊橐萧然。（乾隆贺志）

吴九叙 字瞻侯。父士宏，见《节概传》。九叙雍正癸卯副榜，甲辰举人。孝友天植，兄弟自相师友。足迹所至，名流皆倒屣。尤工诗、古文辞，书法亦妙一时。公车八上，数奇不遇，以疾卒京邸，士论惜焉。（乾隆贺志）

谢绍鼎 字公大，号怡园。父兆麟，见《循绩传》。绍鼎孝友嗜学，试辄冠军。督学沈涵、知县卫良佐咸器重之。雍正丁未岁贡，授崇安训导，署教谕。课士精勤，倡修学宫。著有《四书辨讹》、《春草堂诗剧》。卒年八十四。子人骐，邑庠生。克继父风。母老病，亲侍汤药，衣不解带者累年。父卒署中，躬为扶柩归里。时述父训，课其子孙。（乾隆贺志）

吴化 字子才，一字希轩，二十四都人。性孝友，好读书，从游甚众，就正者日不绝人。安贫乐道，为当事所器重。雍正己酉举于乡。著有《希轩文集》行世。（乾隆贺志）

王思猷 字宗英，一字莫澜，东隅人。笃学能文，汲引后进，知名士多出其门。生平砥节砺行，以优举，士林重焉。屡荐数奇，乾隆壬申始举于乡。两上公车，赍志以歿，人皆惜之。著有《漱玉集》四卷。（乾隆贺志）

陈永书 字茂亮，一字寅轩，表贤村人。乾隆戊午副贡，天姿敏悟，过目成诵。幼从王思猷游，思猷语人曰：“陈子异日所造，

不可量也。”为文高视阔步。与黄典、林琼蕤相友善，游学会城时，称吴航三才子。邑侯贺世骏慕其学，聘修邑乘。家藏书甚富，而搜罗抄录殆无虚日。著有《事类数日考》二十卷、《诗书条贯》三卷行世。门人卢燧、郑兆炜等为之传。子道极，乾隆乙酉科副贡。著有《葩经要解》六卷，藏于家。善墨画，尤工白菜、牡丹，人争宝之。（同治彭志）

林振采 字九苞，一字仪九。乾隆癸未会魁。父琼蕤，琼蕤传见《循绩》。宦归无长物，唯积书十数万卷。振采与兄振品尽读家所藏书，淹通贯串，探其源流，穷其奥蕴，下笔沛然，如决江河。一时名宿如郑天锦、张甄陶皆折节与交。邑令贺世骏聘修县志。身后所有著述，散佚无存。嗜古者慕其学博才高，而慨其后不传也。胞侄观曾，字述谦，一字省吾。性豪饮，书学怀素，得其神妙。年七十八，以诸生老。后亦无传。（同治彭志）

谢瑾 字聘脩，一字怀溪，绍鼎孙。乾隆庚辰举于乡。历任建宁、漳浦、彰化、浦城、台湾教谕。崇尚朴学，启迪有方。擢云南元谋知县，戢健讼、清积案。教条恳挚，有儒吏风。公余之暇，尝手钞《二十一史》，订疑补漏，不遗余力，惜身后散佚不全，今稿存者，尚有《偶见集》三十六卷，《怀溪诗话》八本，分天、地、人、物四门，逐事纂辑，皆渊雅可传。（同治彭志）

陈奇铤 字茂钟，一字晓幢。父逢泰，雍正乙卯副贡，历任广东新安、大鹏，湖南衡阳、长沙县丞，分修邑志。奇铤才高学饱，器识不群，乾隆戊子举于乡。受知刘诸城相国，目为第一人。七上公车，五荐不售。以家贫亲老，选山东富国场盐大使。闲曹偃蹇，常郁郁不得志，遂解官归。作《落花诗》百首以自况。居林下十余年，足不出户庭，唯怡情诗字，字学二王，诗近七子。著有《铸砚斋诗集》二卷，寄托深婉，知非牢盆俗吏所能淹也。（同治彭志）



陈万春 字孟璜，一字新园，青桥人。邑诸生。屡试优等。家贫，舌耕自给，一时知名士如林调阳、林芝芳、黄金鉴、黄日华辈皆出其门，其他蜚声文苑者，不一而足。生平湛深经术，年八十余，犹手不释卷。晚岁家居，率以排难解纷为事。接人推心置腹，尤敦孝友，乡里称善人，卒年八十四。著有《诗经编义》八卷。子澍霖、澍云，传别见。（同治彰志）

陈汝楫 字廷交，一字若川，古槐人。乾隆戊子副贡。性端方，治家严肃，与父兄言，终日侍侧，目不流视，后辈见之，肃然起敬，无敢以非礼犯者。喜读书，聚书六千卷，朱墨殆遍。尤工书法，郑进士薰于同学中独刮目相待。著有《学庸述言》二卷。（同治彰志）

李学莲 字永魁，一字星杠，七星桥人。乾隆丁酉举于乡。教授里门，讲明实学，以古道勸人。知县杨清轮聘主吴航讲席，学规严肃，肄业者必令其各习一经，逐日呈课；清晨则端坐讲堂，与诸生谈经史，敦品行，虽祁寒盛暑不少辍。一时执经者屦满户外，焚膏继晷，达旦书声。论者谓“自有书院以来，名师相望，求其启迪不倦，实首推学莲”云。（同治彰志）

王元麟 字伯瑞，一字芝田。乾隆丁酉拔贡。性嗜古，熟《左氏传》。督学吉梦熊赏其文有经籍光。平生容仪丰伟，健啖逾恒。喜诵永福黄任诗，为之撰注，广证旁搜，屡易稿，数十年始成书，一生精力毕粹于此。今所行《秋江集注》是也。晚选松溪教谕。未几，致仕归。卒年九十。子亨桎，嘉庆戊寅举人。（同治彰志）

陈玉华 字昌泰，一字榕村。父锡璋，传见《义行》。玉华少颖悟，善属文。弱冠补弟子员。肄业鳌峰，与陈琅、林志仁辈作文字交，名噪远迹。乾隆戊申举于乡。需次浙江，署绍兴同知，仅四十日以忧归。生平讲学会城，执经者常七八十人，因材施教，皆



成英隽。论者谓“玉华虽无著述，而其教泽及人。游其门者或以经术称，或以文章显，实为一时老名宿”云。（同治彭志）

林宗洙 字明浚，一字鲁水。父芳，乾隆己酉举人，司训松溪，勤于课士。宗洙年十二通十三经。陈学使嗣龙拔冠多士，寻三试科岁，皆第一。肄业鳌峰，为主讲郑光策、游光绎所器重。与林文忠、廖文恪均以年少负文名。制府汪志伊奇之，公余辄令入署，课所业，赏书籍法帖及先儒理学书。性恬退，不慕荣利。嘉庆丁卯，甫冠举于乡。晚截取知县，不赴选，惟肆力于各经注疏，辨析淹贯，旁及《史》、《汉》、《文选》诸大家文集。陈寿祺太史以经学名天下，尝心折焉，延课其诸子。惜生平不喜著述，辄所心得者抱璞以终。弟宗泽；道光乙酉举人，亦积学不仕，如其兄。（同治彭志）

梁运昌 初名雷，字慎中，一字曼叔。嘉庆己未进士，改庶吉士，散馆授编修。性崖岸，睥睨一世，视富贵人尤嫉之，自在史馆及家居数十年，寥寥寡合，人亦闻而避之，不乐与之交。生平学博识超，著作甚富。有《秋竹斋诗文集》、《陈氏古音考订》、《读诗考韵新谱》、《四书偶识》、《史汉眉评》、《说文小笺》、《难经发明》、《两汉魏晋宋齐诗式》、《全唐诗随笔》、《唐人风格集》、《杜园说杜》、《韩诗细》、《苏诗抄》等集。（同治彭志）

梁章钜 字闳中，一字茝林，晚自号退庵，祖居江田。嘉庆壬戌进士，改庶吉士，散馆，以主事用。考充军机章京，京察一等。授湖北荆州府。累官至江苏巡抚，扬历中外，垂四十年，文章经济昭著一时。公余之暇，网罗文献，手自撰述。东南名下士，如钮布衣树玉、郭明经麇、董明经士锡、朱孝廉绶、姜文学皋、杨明经文荪，皆在馆下。又师大兴翁阁学方纲、仪征阮相国元，辨论考证，贯串周析。著有《论语集注旁证》二十卷、《孟子集注旁证》十四卷、《夏小正经传通释》四卷、《仓颉篇校证》三卷、《经

尘》八卷、《古格言》十二卷、《三国志旁证》三十卷、《文选旁证》四十六卷、《清臣工言行记》十二卷、《枢垣记略》十六卷、《退庵随笔》八卷、《退庵题跋》二十卷、《续跋》二卷、《退庵文存》二十四卷、《藤花吟馆诗钞》十二卷、《退庵诗存》二十四卷、《续存》八卷、《东南峤外诗文抄》三十卷、《闽诗抄》五十卷、《闽川文选》五十卷、《三管英灵集》五十八卷，此莘莘之大者。他如《制义丛话》、《楹联丛话》及诸胜说、诗话之属，尚多不悉著。子逢辰，字聿磐，一字吉甫，道光辛丑进士，书法神似颜柳，而隶书尤胜，名重一时。（同治彭志）

陈玉铭 字希赞，一字潼溪，石门人。嘉庆甲子，年逾冠，以县试第一，补诸生，膺乡荐，乙丑连捷进士，授翰林院编修。历官国子监司业，司经局洗马。癸酉、辛巳典试湖北、山西。丙子乡试，分校北闱，得陈殿撰沆、刘宗丞谊、李太史之瑄、刘制府源灏，皆知名士。壬午考差，为同官株累，罢归。今所存者，唯《慎余堂文赋》一卷、试帖百余首，皆乙丑后馆阁作也。（同治彭志）

柯龙章 字宗起，一字仪周。柯百户人，迁会城。嘉庆丁卯优贡，戊辰举人。历任汀州府训导、永定学教谕，掌教龙山、海东、崇文各书院。生平工制举业，湛深经术，于《礼经》尤多所发明。著《仪礼笺注》三十卷，未梓。有《仪周文稿》行于世。（同治彭志）

黄一桂 字国雍，一字芴林，郡廩生。父观营，传见《义行》。一桂少承家学，不屑屑章句。长从同邑陈玉华孝廉游，益潜心经学。陈语人曰：“及门中讲求实学者，黄子其最也。”家藏书籍，朱墨殆遍。晚年取先文肃公志坚思苦之义，名所居曰：“思苦”，自为之记。大旨谓：“天下之理，唯思能通。吾人之心，唯苦能入。故思者，圣功之本；苦者，通微之几。”其刻励如此。尤喜《左传》，尝采旧说，傅以心得，辑为一书，名《读左广义》，盖

丹阳姜上均先有《读左补义》，兹复从而推广之也。议论创辟，皆足发前人所未及，思苦之学，于此可见。次子鹤三，字景树，一字声亭，道光庚子亚魁。读父书，有文名。署江西安义县知县，以劳勩卒于官。四子见三，传别见。（同治彭志）

王 溱 字利杰，一字成旂。嘉庆癸酉拔贡，己卯举人。大挑知县，改补福鼎训导。少工诗，精楷法。谢征君曦奇赏之，妻以女孙。及司训于福鼎，喜奖才隽，遇士困乏，辄周恤之，而自忘其贫。著有《韵学指南》、《足雨宦诗钞》、《福鼎方言》、《左赋》行于世。其未梓者，《四书笔记》、《诗释人》、《说文音声谱》、《文选音韵》、《经典释文校证》。年六十四卒。子锡桐，传别见。（同治彭志）

王登三 字道起，一字槐卿，感恩人。性聪颖，少时即能下笔作惊人语。弱冠游会城，文名籍甚。汪志伊制府评其文曰：“峰锋风”，目为八闽才子。年五十余，始领道光乙未乡荐。素善讲贯，常即眼前事推出绝大道理，凡秦、汉八大家之文，均能溯其源流，探其旨要。游其门者，如邓庆恩方伯、周瑞图郡守，其最著也。寻挑取河工，任直隶无极知县，留心民瘼，有政声。以劳勩卒于官。生平著述散佚无存。（同治彭志）

冯承基 以字行，一字弼甫，鼎高曾孙。鼎高传见《循绩》。道光庚戌进士，即用浙江。甫抵省，丁内艰归。数月以毁卒。初承基三岁，生父与嗣父相继歿，门祚衰微，两节母及祖母、曾祖母爱如掌上珠。年十六、七始知学，匝岁即能通七经，不二年尽读家所藏书，下笔沛然，累千言不逾先辈绳尺。道光己亥，年逾冠，举于乡。自是奔走公车，常留京邸与同乡何冠英、林廷禧、林寿图为文字交。惜豪放纵饮，而天亦不与以年，俾折节以底大有成也。其师陈宗英为编遗集，有《骈体》四卷、《古今诗》六卷，藏于家。（同治彭志）

陈元炎 九都环山村人。邑诸生。笃志专精，邃于经学。著有《学庸义疏》若干卷，藏于家。

陈 趋 字偶峰，父行登，沙京人，以让产故徙居会垣。趋生而岐嶷，性宽洪笃厚。慕韩乐吾之为。家徒四壁，而能以好施闻。闽县陈左海聘主家塾，旦夕讲经，辄与左海上下古今纵横得失，左海每为之动容而折服之，谓为学者之泰斗。其所居距左海馆将十里，时年且六十，早出夜归，徒步袖甘旨以奉母，如是者以为常。同郡陈若霖，趋故人也，督河南四川时，辄以书招其人幕，趋以母老辞。著有《绳武堂诗文集》八卷，外集数种，其梓以行世者《姚金集句》二百五十余篇。子鸛联，孙寿喆、寿臧，自有传。

陈鸛联 字切夫。生有奇禀，事父母以至孝闻。父趋授徒馆于外，母林课之读。年四岁，卒业《尔雅》全书，群经训诂之字，琅琅然口讲而指画之。母有弗适，则朗诵所授书，其母辄为之解颜，即盛怒卧床，亦蹶然起。会嘉庆初年冬，母以疫暴卒，鸛联幼，弗省，方展卷吟哦，意以此承欢如平日事。戚友临者，咸为之动容，益悲戚。其孝根诸天性，足以感人如此。年十五入邑庠，辛亥举于乡。清沿明代旧制，以制艺取士，鸛联以古文为时文，顷刻千言，一气呵成，神似《战国策》。卜居会城之北，时彦均尊以北门段法。方是时，同郡林鉴塘先生主鳌峰讲席，深喜鸛联为文，每课辄与陈藹人翺凤、陈沅甫瑞虬占列优等。三人皆籍长乐，称为长乐三大鸟，以名字偏旁从鸟，故得此称。此节轶事见《谢枚如先生文集》。然鸛联自谓制举之文不足以问世，又与陈比部承裘、王制府庆云、魏孝廉秀仁订文字交。举春官不第，则遨游燕、晋、秦、陇间。人幕佐治，下帷讲经。所作诗古文词，多豪放，自喜而自视欷然，即其家乘间，亦未能多得其剩稿云。

陈翺凤 字肇海，一字翳人。岁贡生。有文行。授徒省垣，从



游者多所成就。吏部方镛，幼为工肆艺徒，翔凤稔其颖异，资之膏伙，俾受业焉，卒底于成。居恒手不释卷，与同郡范希溥、郑植、何翼为、同邑陈鄂联、陈瑞胤日以文字相切劘，时称为长乐三大鸟。道光己亥、咸丰壬子两科，己拟中矣，均以誉录一字之误，被放。以子翔墀贵，诰封奉政大夫。

陈应驹 字介吾，岱峰人。性敏悟，博涉群书，作文如天马行空，不受羁勒。年二十七，补弟子员，屡蹶场屋，咸丰乙卯以第六人举于乡，然无意仕进，授徒里中，而成就者甚众，陈绍棠、陈萼芬、卢聿炳等皆出其门。晚年以著书自娱，如《亦足轩杂录》二卷，《游磁九梦》、《续梦》、《又梦》三集，尤脍炙人口。盖皆怀才不遇，有托而言也。子亦瞻，字幼吾。品端学邃。同治丁卯乡试第三人。著有《养正堂文集》。孙瑞唐，字铸农。年二十入邑庠，宣统纪元，举孝廉方正。笃实诚朴，诲人不倦，门下多知名士。亦著有《养正书塾四书义》二卷。

柯祖培 字我庵，岱西人。父寿亨，道光甲辰举人，历任南平、沙县、尤溪、归化、莆田教谕。祖培夙承庭训，聪颖笃学，弱冠补弟子员，同治庚午领乡荐。先后肄业鳌峰、正谊各书院，屡试辄弃其曹，主讲林士傅、林鸿年皆器重之。同治甲戌成进士。知江西永新县，有政声。光绪丙子、己卯、壬午充同考官，得人最盛。未几以劳勋卒。

陈寿喆 号翥如。性恬静，淡仕进。早年与弟寿臧同补博士弟子员。困于乡闈，十试十荐，光绪己卯始举于乡，然视之蔑如也。学邃于经，谓读书必先识字，因穷研《尔雅》，旁及许氏学，以《尔雅》与《说文》相表里，取其说而贯通之，往往得群经之奥窔。时郑世恭主致用讲席，每试辄激赏不已，谓可补郭注所不及。曾著有《尔雅补郭》，书未成，以乙酉冬去世。少孤，家徒壁立，授徒自给。督课汲汲，以故及门多知名士，为世所称颂焉。



陈寿臧 榜名世英，字讷如，三岁即工属对，有神童之目。韶龄游泮，同郡沈文肃奇其才，妻以兄之子。寻招佐马江船政幕。凡有章奏必与之商。船政人员，月例给假六日，寿臧少孤，事母谨，届期旋省，承欢膝下，不离左右，朋辈束招游燕，辄辞不赴。里闾以是称其孝。工制艺，为生徒删削课文，顷刻间辄一二百篇，爬罗剔抉，刮垢磨光，请业者莫不履其所欲以去。癸酉领乡荐。时制军王凯泰试诸生以《自强论》，寿臧挥洒万余言。凯泰谓为经生吐属，拔冠其曹，礼待备至。其明年试春官报罢，文肃适督两江，驰书招之。时江南学使林天龄亦同县人，以故制府及学署凡有宏文巨制多属寿臧，寿臧亦任之弗辞，甫脱稿，即为都人士传诵以熟。即如《通州、直隶州志序》、《松江阮氏义庄记》，迄今犹脍炙人口云。年三十二卒。所著文集六卷，同县谢章铤为之序。略曰：“讷如文字踔厉风发，议论每予所不逮。其于学，未得则力求，已得不复失，駉駉乎弩千驥，一朝而可以千里云。”

郑叔忱 字宸丹，首占人。祖廷珪，传见《循绩》。父虞，附贡生，浙江候补知县。叔忱，第光绪庚寅进士，由庶常游历侍讲。朝廷以叔忱经术湛深，正音明晰，擢奉天府丞，兼提督学政。叔忱以正本清源，道在责己，于是益励风操，而绝苞苴。各属凜其严正，请谒无一及者。衡文必视其根柢而甲乙之，不假手于人，而揭晓甚速。延见诸生，奖励裁抑，先实行，后文艺。岁试甫竣，丁内艰。服阙入都，寻病卒。叔忱少孤，事母孝，雍睦兄弟，人无间言。自奉甚薄，俸禄所入，悉以赈戚族之贫者。身后萧然，图书外无长物。

刘成杰 字仲梁，二刘村人。祖树桂，传见《循绩》。父景祺，邑庠生。成杰天资颖异，甫六岁，能日诵千言。年十六，以县试第一，籍学，旋食饩。乙酉拔贡，授户部七品小京官。戊子、己丑联捷进士，选翰林院庶吉士，散馆，授编修。生平端谨仁孝，不

涉外务。通籍后，益自砥励。其兄成俊，屡蹶乡闈，杰自京移书与之曰：“读书当实践，但求无愧于心。科名得失，不足为荣辱也。”及假归，制军卞宝第重其品学，延见礼待周至，款语移时，询近况者屡，而成杰未尝以私干。主福宁府温麻艺塾讲席，从游者众。年四十一卒。所著诗文散佚不成帙，士论惜之。

### 校 注

①原志误作宣德。

## 长乐县志卷二十六

### 列传六 忠义 节概 孝弟 义行 隐逸 流寓

忠孝者，天地之正气，古来忠臣孝子，史册所以特书也。推之孤臣、志士、悌弟、仁人，天性既已无亏，即姓名亦堪不朽。至隐逸、流寓诸君子，或以邱壑为怀，或令山川生色，其清标高躅，虽旷代犹时深仰止之思焉。传忠义、节概、孝弟、义行、隐逸、流寓。

#### 忠义

##### 宋

陈文龙 字君贵，号德云，原籍莆田，幼随父迁邑之后山家焉。咸淳四年，廷对第一。由镇东节度判官，历监察御史。先是，台中有建白，皆呈稿贾似道，文龙独否，似道不悦，出知临安府。襄阳围急，似道阳请督师，无行意，襄阳遂陷。文龙疏论其罪。又言范文虎当罚而赏，赵溍乳臭子，黄万石怠荒，皆不胜任。似道怒黜罢之。未几元兵东下，文虎首迎降；似道兵溃鲁港，溍最先遁。度宗始悔不用文龙言，起为左司谏，迁侍御史。时边事急，王淪与陈宜中不相能。文龙疏曰：“《书》称：三后协心，同底于道。北兵今日取某城，明日筑某堡，而我以文相逊，以迹相疑，譬犹

拯溺救焚而徐行安步也。请召大臣同心图治，无腾虚说。”累迁参知政事。而元兵已至杭北关外，众议降。文龙乃上章乞归养，既复求还，不报。德祐丙子，益王即位福州，复以文龙参知政事。元兵至福州，益王趋广。文龙以前官充闽广宣抚大使，殫家财募兵万人，即兴化军，开阖。已而元兵入广，建宁、泉、福皆降。知福州王刚中遣使徇兴化，文龙斩之。元人来攻不克，使其姻戚持书招谕，文龙焚书斩使。遣将林华侦伺境上，华亦降元，导兵至城下。通判曹澄孙开门降，执文龙与其家人至文炳军中，不屈，左右凌挫之，文龙指其腹，曰：“此皆节义文章也。可相逼耶？”引而就馆。元帅唆都往来谕意，且以母老子幼感动之。文龙曰：“我家世受国恩，万无降理。母老且死；先皇三子歧分南北，我子何足关念？”情词慷慨，唆都愀然改容。械送杭州，不食死。其母病系福州尼寺中，左右视之泣下。母曰：“吾与吾儿同死，又何恨哉！”亦死。讣闻，诏谥忠肃，赐庙号昭忠。元至正间，遣使李文虎至郡，访求陈文龙子孙，将录用，无一应者。（乾隆贺志）

陈 璘 字瑟玉，文龙从子也。少有大节。知天下必乱，无意仕进，散粟出帛以济饥寒，曰：“吾世受国恩，当为国收人心耳。”文龙起参知政事，璘献策曰：“今天下已危，莫若劝上悉召四方兵分屯沿江要害，敌来并力以战，犹可为也。”文龙愀然曰：“策甚善，柄国非人，恐不能用。是行也，吾必死之。”德祐丙子，端宗趋广，璘出家财三百万缗，航海助饷。张世杰欲授以官。璘曰：“某激忠义而来，岂买爵耶？”辞归。十二月叛将林华、陈渊与通判曹澄孙以城降元，文龙被执北去。璘阴部署宾客丁壮攻林华等，诛之，复兴化军。端宗嘉其忠义，命以通判权守兴化。元帅唆都来攻，璘号令严整，每巡城必南面号恸，士皆感奋。逾月力不支，被执，唆都欲降之，大骂不屈。唆都怒，车裂以殉。事闻，赠兵部侍郎，谥忠武。子若水，世杰辟为督府架阁。夏允彝论云：“陈德云

以廷元死忠节，其不负科名，何愧文信国？且从子璜能继其志，亦以忠死，争光日月矣。旧志乃佚不载，然则忠臣烈士湮没简编之外者，何可胜数哉？”并祀忠义祠。（乾隆贺志）

**杨梦斗** 字子仰，号山甫，东渡人。以文章起家。宝祐四年，同兄琦、弟叔济、侄次郑登文信国榜进士。官扬州都统，使镇服夷酋，与琦、叔济、次郑分守要害。景炎末，宋室播迁，梦斗与文信国力抗元师。兵败，赴扬子江死。里人立祠祀之。扁其额曰：“文节点义”。邑祀忠义祠。夏允彝论云：“杨公死难，事甚烈，传梦于故里，父老众共祀之，特为建祠，以承祀公。斯固异矣。余志已告成，诸生林日雋、高燕任屡梦公，促余志其忠烈事。且云：‘大战难守。大败不辱。’又云：‘忠肝烈胆，南州得失，诂不关心？’盖余传公于神祠，而未传公于忠烈，诚为失之。两生大雅士，非诞言者。公之大节，固当与文信国并衡，而三以梦著，忠魂未散，日月为光，尤异也哉。余既为传，复系以诗。”诗载《艺文志》。（乾隆贺志）

**陈公荣** 字子华，十九都人，龟图十三世孙。按：龟图字谋孙，端拱元年进士，国子监丞，知信州，进朝散大夫。初游太学，景炎元年，元兵入寇，征兵勤王，无有应者，荣破产募兵，谒文丞相，共图兴复，丞相喜，荐授福清知县。时蒲寿庚以城降元，荣同子宗傅、侄老成会张世杰讨之。宗傅、老成战死，偕死者百七十人。事闻，赠宗傅提刑简法，老成御史台简法，一切祭葬各有差。荣临终戒族人无事二姓，故终元之世，无一人附宦籍者。明兴，科第蝉联，遂为吴航甲族。祀本里三忠祠。荣有《挽从子老成》诗及《宗傅从军行》，并载《艺文志》。（乾隆贺志）

**高应松** 字箕亩，屿头人。开庆元年进士。由衡州教授通判广德军，召为国子监丞，擢礼部员外郎，翰林院权直。元兵陷临安，自涌金门入，举朝奔窜，从官存者九人，应松其一也。同留者正言陈春伯、侍郎翁仲德、大理寺卿郭珙，皆福州人。是日除应松中书舍人，直学士院，令草降表，应松泣辞。改权工部侍郎，进端明殿学士，签书枢密院事。时国事已去，拥虚名而已。恭帝



及太后北行，应松扈从至燕，绝粒不语，越七日而卒。著有《笈亩策集》，郡邑并祀。（乾隆贺志，参道光通志）

陈觉伯 字宗尹。父如晦，传见《儒林》。觉伯咸淳七年进士。夙承庭训。与高应松友善。教授泉州，以古道迪士。景炎初，幼主航海，舟次泉州港，觉伯率同列表问起居，命摄州倅，扈从入广，拜福建提刑，数月罢归，闻崖山师溃，愤惋不食卒，遗命其子曰：“吾宋臣也。题墓当系吾于宋。”应松弟旂，为撰墓铭。（乾隆贺志）

## 明

黄铜 字孔铸，青山下人。英勇明决。里有福安寺僧恃富黠讼，为虐于乡，铜年十三，能以计除之。中洪武庚午举人。选广西金司，升光州守。会靖难师起，密诏戒诸将毋杀皇叔父，铜愤且泣曰：“恶有不杀而可以禁攻寝兵者乎？吾当奋死为之。违旨灭族，非所计也。”及舟战，亲持矛入燕王舟，不中而蹶；复陆战，以不善马，被获，长笑而死。夏允彝论云，“铜事甚烈，前志以事类斩祛，置不录。然成祖有言：‘练子宁若在，固当用之。’何得讳铜事不传哉。”（乾隆贺志）

王恩及 字戴君，号澹侯，罗仙人。少端庄，不屑与群儿伍。从师肄业山庄。阶前忽出竹笋，一昼夜尖齐几上，恩及顾笑曰：“大丈夫气节，劲直不回，不当若是耶？”平日阅忠臣、孝子、义夫、节妇传，辄流连向往之。天启辛酉，嘉兴谭学使拔取第一，领是秋乡荐。崇祯癸未谒选，令广东信宜县，地界两粤万山中，夷獠杂处，勉力抚绥，恩威互用，不期月，风俗顿更。甲申后，四郊多寇，恩及集壮丁捍御，间或剿贼，躬冒矢石，县赖以完，当事才之。隆武乙酉，召赴行在，欲破格擢用。唐王旋出驻延建，恩及从间道归养老母。身负坏土，经营先坟中林，得毒草，藏以备。丁亥秋，鲁王监国，召为监察御史，犹正色立朝。时事棘且殆，毫无忿郁不平之气。戊子夏五，与妻李氏同仰药死。清乾隆

四十一年，予谥节愍。（乾隆贺志）

高飞声 字克正，十九都流水人。好学，性严毅。崇祯癸酉举人，知江西玉山县。有巨寇据险，久莫能制，飞声躬捣其巢，平之。寻擢抚州同知，以母老乞归。后因明亡死之。清乾隆四十一年，予谥节愍。（乾隆贺志）

陈翔 字克理，长祚孙。长祚见《名臣传》。崇祯癸未进士，授中书舍人。时国家多难，大学士黄景昉假归，翔奉命催起，景昉坚不赴召。得旨，以陈翔奉差不力，该部严处。旋闯贼陷京都，翔抗节不屈，备受夹拷。后恸哭南旋，负重伤卒。识者谓其死于忠也。弟睿，字克乙；兆熙，字克时；兆鼎，字克重，隐居不仕，均以节终。子殿邦，顺治甲午举人。逆耿迫召，避地福清。后官陕西延安府同知。（同治彭志）

陈家麟 字恭夫。邑诸生。恂恂儒素，言行谨恪。族中科甲，三百年来盛冠一郡。甲申后，痛国运沦丧，常郁郁不自得。丁亥间，沿海义兵遍起，家麟喜曰：“此吾致命日也。大事济否，固知有天，安能效儿女子逡巡不出，貽终天恨哉。”结义勇百余，鼓行而进。家业不逾中产，罄所有以佐军。无援死之。（同治彭志）

林逢经 字守一，号铁崖。祖世章，父裕阳，均见《名臣传》。逢经幼聪颖，博洽多才，年十四，补诸生，寻食廩饩。松江夏允彝知县事，与结文字契。福州改元，三事交荐，授诰敕撰文中书舍人，旋兼司经局正字，翰林院五经博士，转兵部武选司主事，改翰林院简讨，预修《毅庙实录》。时勋镇跋扈，官方无序，逢经封章屡上。或劝其职非谏员，何必哓哓贾祸？经曰：“《传》云：‘孔父正色而立于朝，则人莫敢过而致难于君者。’吾海滨男子，累世承恩，无可报称，目此狗鼠辈，弁髦至尊，岂忍箝口不言，甘同寒蝉乎？”闻者心折。丙戌秋，披缁入山，庐于临安君墓下。除夕赋诗，一字一泪。丁亥起原官，兼监察御史。朝夕兢兢，

忠勇奋发。戊子夏，大众奔窜，逢经曰：“吾天朝近臣。不敢草草。”舁篮舆，抵松下，赴海死。宗子日昂捞尸未获，夜梦逢经含笑语曰：“吾已归澳中矣。”及旦，觅水滨得之，面如生。逢经出黄石斋门，与曾弗人、李元仲友善，早岁便有天下己任志。当启、楨间，见任用非人，辄为咨嗟太息；或闻正人死疆场、殉王事，则悲愤交集。世之论者，仅目经为淹博宏才，孰知其一腔热血，迥出类萃，惜未展施行，遂所志。著有《苦竹吟》诸集。清乾隆四十一年，予谥节愍。子谦光，传见《循绩》。（同治彭志）

李上林 字大材，号觉早，十七都仙山人。明亡，死之。（乾隆贺志）

陈颺言 字孝嘉，周山人。国学生。明亡，殉难。（乾隆贺志）

陈 韬 字贞盘，一字汤铭。邑廩生。少恢宏有大志，常以气节自励。明社屋，韬涕泣终日，慨然谋恢复，卒以一旅无援，不得遂其志，全家沉舟于海。土人捞其尸，神色不变。立祠祀之，辄著灵显，至今尚庙貌翼然。（采陈氏家谱）

陈 种 字克□，号云生，古县人。以祖长祚荫官前府都事。历工部员外郎中，转尚宝司少卿，太仆寺少卿。顺治七年，大兵下广东，入桂林，永明王由肇庆奔梧州，转南宁，种终始随奔走锋镝中，叠受刀刃，负伤至浔卒。友人刘伯玟转徙七载，负遗骨归。著有《海霞诗集》。子亿正、志友梓行于世。（同治彭志）

### 清

柯应凤 字伯羽。诸生。顺治二年，巨寇郑某集众海岛，逼为向导官。应凤数其罪，贼怒割其舌，不屈死。妻郑氏，触石而毙。子廩生元标，元标子顺耳，顺耳传见《义行》。（道光通志）

邱能成 坑田人，迁居省城。由行伍出身，任台湾镇右营游击。乾隆五十一年，征剿逆匪林爽文，打仗阵亡。诏赐恤如例。祀昭忠祠。（同治彭志）

邱安国 坑田人，迁居省城。由行伍出身，任福宁镇标中营千总。乾隆五十二年，土寇林爽文肆扰台湾。国奉召赴台进剿，与贼接仗阵亡。诏赐恤如例。祀忠义祠。（同治彭志）

池剑波 字大鲸，别字秋如，旧池人，家会城，籍闽县。尚节概，能文章。癸卯省元，乙巳进士。权江西贵溪县。丙午乡试分校，得士最盛。自以才力不及，改就教职，补兴化府教授，调台湾。任满内渡，宦橐萧然。同治三年，补漳州府教授。到署甫五日，而粤匪突至，士民惊散，官军亦溃。城陷，骂贼不绝口，贼以绳系其项，剑波厉声曰：“头可断，项不可系。”遂被戕。后六日贼退，家人检积尸中，负遗骸归。诏赐恤如例。祀省昭忠祠。（同治彭志）

黄荣庚 原名良彩，字子章，一字星舫，明光州太守铜十六世孙也。幼有至性，览其先世忠烈传，辄涕零。道光癸卯举于乡，留京师者七年。刻意励行，以文章节义自期，乡先达王文勤目为远到之器。中庚戌二甲进士，即用江西。壬子分校乡闈，所拔多宿学士。历署丰城、定南。地遭兵燹，户多流亡。荣庚劳来安集，平狱讼，靖萑苻，士民德之。以定南守城出力，加同知衔，赏戴蓝翎。旋授龙南令，调署大庾县事。时粤匪正炽，荣庚请守隘以遏贼氛，太守不从，请兵，又不从，喟然叹曰：“吾固与城为存亡耳，其如生灵何？”已而贼匪麇至，内无重兵，外无援卒，只恃忠义所积，激励人心，即妇女亦知登陴御贼，效死勿去。固守十昼夜，卒为地雷所轰，城陷。帅众巷战，身受重伤，带创归署，嘱兄兆庚速去，曰：“归事老母，毋以我为念。吾将从先铜公于地下矣。”遂与其妾冯氏俱抑药，恐不死，复借缢。时咸丰八年十一月三十日也。荣庚平日恂恂若无异人，及义所当为，则毅然不可夺，古所谓杀身成仁者，殆庶几焉。著有《考订孔孟年表》、《仪礼精华》。诏以知府恤，赠赐祭葬，祀忠义祠。世袭云骑尉。子以荃，



邑诸生。(同治彭志)

杨鹏南 字翼季，集星桥人，居会城。由行伍补军标把总。咸丰癸丑三月，顺昌土寇四出劫掠，监司胡应泰请兵捕剿，巡抚王懿德檄参将李焯督兵赴延，鹏南与焉。比至，即闻贼首黄有使陷永安，寻又陷沙县。副将李寿春令鹏南同千总宋世超、外委陈文亨、为藩驻三门。鹏南谓世超曰：“三门三面受敌，且兵少不可守，不如扼西芹。西芹庄大粮足，万一失利，退守七星桥，尚可阻险作郡城障。奈何以西芹之粮，弃以饱贼也？”世超怵于军令，不听。四月二十八日，贼入西芹。是时三门兵不满百，又分三队，以文亨守溪岸，为藩守后山，鹏南、世超守中路，贼不得进南平。隶卒卢超导贼破后山，为藩夺小舟而走，守中路者不知也。忽所部兵大呼贼至，鹏南持枪向后击之，毙数贼，枪忽坠，复夺双手带冲围出，贼从密箐中施矛刺之，遂与世超、文亨同时被难。鹏南仲兄春蕃，邵武教谕。闻耗请假赴延平，收其尸归。事闻，赠恤如例。祀省昭忠祠。吁！鹏南壮岁负勇略，方出其力为国家用，何竟以一战毕乃生也？悲夫！（同治彭志）

王三韬 字尚鉴，一字旬臣，旌峰白眉村人。由武举补督标千总。咸丰三年，龙岩土寇黄有使作乱，三韬守延平。以功迁中营守备。六年，红巾贼麇聚顺昌十三乡，四出掳掠，总督王懿德檄三韬募长乐勇三百进剿，战功伟著，贼势穷蹙，郡守金万清倚之。时督粮道王训统兵驻邵武，闻光泽警，调三韬守铁牛关。未几，红巾复猖獗。秋七月，三韬赴大幹，败贼于东乡。一日，贼乘夜骤攻，三韬兵乏，知势不能敌，且天色迷朦，不辨南北，欲突围出，乡民蚁附攀辕，哭声动地，勉力拒守。贼破栅入，兵勇溃散过半，退至吴家祠，贼围之。三韬谓兵勇曰：“尔辈倏去，定遭贼手辱矣。”倾礴于地，引火燃之，烈焰障天，皆灰烬。逾垣出者，仅三人。越日，万清闻耗，仰天号曰：“天绝我矣。事将不可



为。”亟赴东乡，收其遗骸，哭之恸。事闻，得赠恤如例。祀忠义祠。呜呼！三韬当事势危急，甘心投烈焰以死，而不为贼辱，亦可谓志士矣。按：大幹之役，三韬所带弁勇三百人同时殉难。其得知名者，里仁陈朝标、龙门高妥二人而已。附录于此，以表忠勇。（同治彭志）

柯元庆 邑武生。柯百户人，居会城。授督标水师营圆山汛把总，署本营千总。咸丰癸丑四月，土寇黄有使围延平城，庆奉召随征，首先入援，与贼战于城外十里庵，力竭被害。大兵继至，城围遂解。诏赐恤如例。祀省昭忠祠。（同治彭志）

陈登标 字满友，江田人，寄居省城亮功铺。由延平右营马兵拔补左营司外委，署沙县驻防。驭兵有法，捕盗惟严。咸丰七年卸防务，委署将乐县汛。会贼匪肆扰，沙人士以标敢战多谋，稟留在沙防剿，屡立战功。嗣闻匪啸聚洋溪将围城，偕把总廖带壮勇百余名扎营西城外。猝遇贼至，众寡不敌，力竭阵亡。诏赠恤如例。祀忠义祠。

邱步衢 字振翰，一字仰周，坑田人，寄居省城美化铺。由行伍出身，署抚标左营守备。咸丰三年，调赴延平剿匪，猝遇贼至，力战身亡。诏赐恤如例。祀忠义祠。（同治彭志）

王 功 字绩甫，号鸿山，大宏里人。道光癸卯武举人。历任龙岩、漳浦把总。咸丰七年，克复归化等县，升千总，旋署诏安守备。十年汀州戒严，奉宪征剿，至武平遇寇，身先士卒，以寡不敌众，死焉。事闻，诏赐恤如例。祀忠义祠。（同治彭志）

江道福 字世臻，号介卿，三音孙。邑廩生。咸丰七年就永安明府俞林聘，适会匪滋事，襄办联甲防堵事宜。下乡集团，突遇贼至，被执，怒骂不屈，死之。（同治彭志）

## 节概

### 明

陈文禹 字佩相，岭南人。嘉靖六年，以贡为龙游训导。廉正刚介，虽暗室，言笑不苟。与诸生以道义相勉，取与一介必慎。诸生贫者，召至门下，饩之。见监司不途跪，欲拂衣，督学使者敦留之，竟托微故申前志致仕去。（乾隆贺志）

陈安 字勉夫，西隅人。嘉靖乙卯领乡荐。为衡阳令，质直刚方，不能阿媚。衡山黄御史按浙还，过其邑，苞苴甚盛，以属吏礼凌视之。安不能平，发其篋，黄白充牣，遂以状闻，即弃官去，御史亦坐是落职。（乾隆贺志）

陈奎辉 字克榘，别字漆林，江田人。天启辛酉举人。授平和教谕，行取令云南姚州。历五载，有政声。以亲老乞归。福王立，召赴南康同知。清兵下九江，孤城不守，被执。至军府，数以不从罪，仍侃侃与争，旁有为之解者，得放归。居匡山绝顶，草舍萧然。取王阳明先生所传《良知录》，力辨驳之。间道归江田故里，以悲号卒。初奎辉与黄石斋相国友，石斋筑榕坛，讲学其中，特重奎辉，为梓《榕坛问业》十三则，又为序《寤寐斋诗集》，略曰：“陈克榘，思致清深，才藻敏妙。本家学而畅以惠风，数百篇皆和美適逸，可诵也。”今载《石斋集》。（同治彰志）

郑允成 字祖谦，参政岳孙。岳见《名臣传》。父彦，国学生。允成天启丁卯举人。数困会试，恬静自守。邑令郑尚友、夏允彝，居止廉正，少许可，独与允成交厚。允成终二人任，未尝一言及私。唐王时，粮饷不足，允成父人赏，允成例应授美职，辞曰：“国家多难，有能者效力，有财者输金，臣子分所当然，岂可掩吾父义举，博一官耶？”闽事败，允成终隐不出。临卒，强起呼诸子曰：

“吾死有遗恨，铭旌止书‘前孝廉’三字足矣。”乃瞑。（同治彭志，参道光通志）

陈鸣石 字体魁，号若雷，德隆五世孙，奎曾孙也。德隆，景泰丙子举人，历浦江、曹县、上海、新建四学教谕。奎，正隆己卯举人，霍邱知县。族鼎盛，鸣石独甘恬淡。崇祯癸酉举于乡，次年会试副榜。鲁王入闽，授礼科给事中。时方播越，鸣石独正色立朝。鲁王败，杜门扫轨，不入城市。著有《竹溪前集》、《抱冰集》共四卷。（乾隆贺志，参道光通志）

林大乾 字用始，廷选曾孙。廷选见《名臣传》，郡诸生。喜读书，能文善射。美须髯，状貌魁梧，性肮脏。与李世熊、林逢经、张纶辈结文社，咸一时名流。崇祯壬午乡试，落副榜，弃去。是年旋举武科，同社赴贺，大乾掀髯叹曰：“吾文士也，造物吝我一第。世受国恩，图报念切，安能待黄河之清？借此阶进非得已，何贺为？”唐王时，以荐授都察院经历。会太常寺少卿严通奉命视师浙江，戒行有期，而缺其副，金谓非大乾不可。大乾慨然就道，诸参赞事悉合机宜。鲁王入闽，命署罗源县事，洁己字民，虽军兴旁午，正供外一无所扰，寻迁职方主事。鲁王败，痛哭以归。后数年卒。（同治彭志，参道光通志）

曾人翰 字明克。诸生。天性刚毅，不事浮华。授徒多所成就。唐王败，人翰以次应岁贡，不就。提学行牒促之，人翰语役曰：“汝亦知有不畏死男子曾人翰乎？”终不出，提学置不问。未几病，起坐取冠服，审视著之，含笑而卒。（同治彭志，参道光通志）

陈希友 字朝文，号孝兼，江田人。郡诸生。太常卿洙曾孙也。洙见《名臣》。博学能文章，雅负重名。鲁王入闽，荐授兵科给事中。数建言，不为权贵所慑。逾年，鲁王败，希友隐遁。尝刺血写《孝经》百余卷，以贫故，父母未葬，借以报亲也。后以楚世子成怡株连，逮广东狱。人劝易僧服，晦官迹，尚可保全。希友

曰：“吾世沐国恩，致身锁闼，岂容颠沛毁素履，且令张、陆笑人哉？”卒于狱。著有《蓼岩集》及诗文多散失。同郡高子翼为举其丧。（乾隆贺志，参道光通志）

**王挺** 字子玉，五都人。文雅尚学，垂髫游泮。风度弱不胜衣，而刚大之气，虽威武不为屈。明亡。躬耕山居，绝迹城市。草屋数椽，仅蔽风雨，晨昏诵读不少倦，流俗见之，亦知起敬。偶岁祲，逋正供，被拘到县，受鞭责。有讶而痴之者，挺曰：“吾向为黉序中人，近耻赴试，学册无名，则平民也。虽被箠，何足为辱？”闻者壮之。未几毙于虎，众咸谓天道不可知。（同治彭志）

**刘桓** 字愈学，号志来，十六都华夏人。崇祯末贡生。授连江教谕。与福安进士刘中藻相期赴难，后中藻死，桓被执系狱，备受重刑，终不改节。后赦为逸民。（乾隆贺志）

#### 清

**吴士宏** 字嗜士，父日来，见《循绩传》。士宏康熙壬子举人。耿逆变作，士宏偕蒋垣、陈学夔弃家遁迹桔园洲。三年中，逻骑遽至，誓死不屈。逆平，授连城教谕，改永安，擢知彭泽县。承凋敝之后，减赋役，严苞苴，为抚臣所齟齬，两江总督阿山劾抚臣不公，称士宏素履端方，居官廉慎。寻解组归。卒年七十。著有《对山诗文集》。祀郡忠义祠。子九如、九叙、文焕，均另有传。（乾隆贺志）

**蒋垣** 字用崇。其先本邑人，久迁省会。康熙壬子由侯官籍举于乡。值耿逆变，逼授伪职，垣服药毁形，不告妻子，逃屿头，托星卜治生。事平，将归，语族弟用乾曰：“吾半生心血，纂集《八闽理学》一卷，抄以示后，不无少补。”后付梓，学者争购之。今用乾家犹有遗稿云。按：此传乾隆贺志入《流寓》，同治彭志注云：“既是本邑人，则止是归里隐遁耳。未可曰流寓。”注虽云然，而传仍附于《流寓》，兹特改正。



陈庆年 字声扬，一字肖丞，文囊子，文囊见《名臣传》。少随宦京师。刻苦自励。年十三，父卒于官，独力扶榇及眷属归。既冠，以邑廩生中咸丰壬子举人。会试挑取教习，侍郎黄赞汤荐教授郑王端华府中，端华厚待之。庆年居半月，即辞馆，大拂端华意，资脯不备，狼狈至杭，刘观察齐昂留课子弟。未两月，发贼陷杭城，被执，械至江宁，授以伪官不受，令掌书记，以不识字辞。复械归杭城，为鬻下夫，备尝苦楚，不挫其志。嗣杂贾人中逃走，敝衣破屣，行至上海，附火轮船归。卒于家。（同治彭志）

陈光斗 字芝生，先世鹤上人，以太高祖西畴让产，迁邑东隅，因居焉。父椿寿，字鹤舫，绩学，有乡望，廩贡生。光斗生而颖异，年十二，有业灰瓦者，为占骈语云：“百练文章，质存太素；万家覆被，道合彼苍。”识者覩其不凡。事亲孝，岁大比，假馆省垣，闻父病驰归，不解衣带者数月。邑艰医，慨然曰：“人子不可不知医。”发《内经》读之，得神解，遂精于医。试期迫，父促入闈，不忍违去，乃佯治考篋，匿外舍，理医药无间。光绪己卯以第二人举于乡，主将乐讲席。甲申，法夷犯闽海，将军穆图善督师长门，延参戎幄，优饷膏秣不受，请以客备顾问。麾下望丰采争结纳，少所延接，然有才必密启之。有商舶误犯海禁，军吏捕将骈诛，悉白出之，其人感激致厚馈，麾斥令去。初穆拟专牍荐大用，以无功辞。军务竣，保知县。穆内召，阴为治装，要同行，强其出山。宦鄂四年，不衙参，上游礼遇异子僚属。日以删文授经为事，有讽之，辄谢曰：“余以宦游耳。”性慷慨，居无儋石，尝措巨金为人了官亏，不责偿。有故宦贫不能归柩眷者，仗助之。时张之洞督鄂，患头风，召医立方，疑未服；再召，谢去，谓人曰：“医虽小道，吾不能枉己徇长官，为进身阶。且济物何必在官？”遂拂衣归。学不务口耳出处，以道自任。淹贯经传，有创解，尤善言《易》，于《河图》、《洛书》深有心得。讲论能析精微。



不欲以文人名，有所构，随即散弃，子侄生徒求零稿不得也。尤不喜以医名，嘘枯起瘠若桴鼓，无成法，世人终不知其所祖也。

陈 莼 字喜人，升扬子，咸丰辛酉拔贡。性磊落。年十二，试使院，提学伟其文，延宾坐，问童子聘未？盖时有大绅某，物色婿家，提学将以莼应选，莼却之。既出，亲戚以为怗，莼曰：“文果可售，必不以拒婚失；不可售，奚用求援以自污？”识者深许为有志。学淹博，尤邃于经，其师谢章铤恒鉴赏之。素善饮，醉辄科头跣足，就所知剧谈，其脱略类如此。晚年，稍以医自贍，然贫窶者率不取资，人咸以为义。卒年五十八。

## 孝弟

### 唐

林巨卿 县东梅花坊人。有孝行。葬父周，庐墓三年，甘露降墓次。后应文行科出仕。（乾隆贺志）

### 宋

邹 异 字士奇，邑西侍中坊人。有孝行。亲歿，葬南山，庐墓六年，有甘露芝草之瑞。元祐三年，举经明行修，有司因改其里曰“宾贤”，坊曰“文行”。（乾隆贺志）

高宗信 后澳人。甫四岁，能知孝让。及长，凡所以事亲者，惟恐不至。元丰四年，里人直讲陈烈以闻。举孝廉，官金紫荣禄大夫。（乾隆贺志）

### 元

陈仲文 字奎甫。至正末，隐居不仕。嗜学能词章，孝友尤笃，尝与族子洁建义学于蓝桥林壑中，自是乡之子弟知所向焉。（道光通志）

### 明

范御 古槐人。父琼，洪武十四年，由明经荐任黄岩丞，以征粮稽迟，论死。御年十九，击登闻鼓，乞以身代。太祖闻之嘉叹，诏释琼。御竟以擅击登闻鼓，毙杖下。时邹孟妻王氏亦乞赎夫罪，自经死。京师为之语曰“范琼子，邹孟妻，贞与孝，孰与齐。”（乾隆贺志）邹孟妻事详《贞烈传》。

柯文基 石梁人。甫五岁，失怙恃，依祖母陈氏。比长，侍奉温清，备极敬养，祖母九十六卒，居丧三年，衰经未尝去体，丧葬如礼，乡党称孝。（乾隆贺志）

黄熙 字汝明，一字皆山。父铜，传见《忠义》。熙，天顺甲申进士，南京吏部郎中。仁孝天性。初领乡荐，以父老不上春官。父歿，哀毁骨立，竭力营葬。登进士后，复以母老乞归养。母歿终丧，始官于朝，以廉谨见称。后获赠父母，即乞病归。卒之日，命其子薄殓，曰：“吾昔家贫，治父母丧未尽礼，吾虽居官，治丧不可过吾亲也。”祀乡贤。（乾隆贺志）

陈燿 字孟辉，一字竹泉，晚更字睡庵，古槐人。年五十，侨寓省南台后洲。初读书，得朱子《小学》，深体味而训释之，由是以之持身教人，行动不稍逾矩矱。尤喜读朱子《名臣言行录》。不于仕进。性孝友，闾里化之。寿九十终。嘉靖丁酉，巡按李元阳、提学江以达、田汝成入奏，祀乡贤。（同治彭志）

陈祐德 事父孟简，至孝。母谢，晚婴风疾，扶侍逾一纪，寝兴不违。又侍伯父病，五月无倦容。提学杭济檄征之。正德二年贡入太学。任广州府训导。卒年八十二。（道光通志）

郑孔信 字明允，以字行。性至孝，侍父疾，尝粪、祈代，无所不尽。及歿，哀毁几绝。见孤嫠无亲疏，度力资给。与乡人期，即非已所便，必力副之。郑善曰：“见海峰使人检过不暇。”海峰，孔信别号也。子宪，正德丁丑进士。连遭父母忧，不入私室者六年，人称世孝。初与方献夫善，及献夫以议礼骤贵，佐吏部，宪

谒选相值邸舍，一揖而已，不复通。献夫谓宪薄己，遂稽选期，意在阻宪，宪终不屈。官终光禄寺丞。（道光通志）

陈晋昌 字鸿翰，以字行，岭南人。事亲孝。父伯通，（道光通志）作伯迎。年九十余，时晋昌已老，身为涤厕。父病殆，祇天减算，疾为愈，延二年，乃歿。既葬，朔望携果茗诣冢拜泣，风雨不废。以父性爱菊，因遍植菊于莖次。（乾隆贺志）

陈德宗 字克脩，一字复斋，沙京人。八九岁时，母疾，身为枕藉，晨夕不离侧。及事继母，无异所生，厕溺皆躬为浣涤。兄弟四人，同爨五十余年。友人林硕夫，旅死灵山寺，德宗时寓归化，闻即贷金往殡，为挈柩归。嘉靖乙酉贡，任始兴训导，寻告归。兄弟之子，凡十四人，扩堂字居之。（乾隆贺志）

黄 让 嘉靖时，父墓为山贼所发，质其骨赍賕，让罄产赎而葬之。乃募壮士百余人，从督府讨贼，二子启愚、启鲁死之。让出奇计斩首二百人，降者一千七百有奇。贼既灭，推功子诸校，不受赏而去。（乾隆贺志）

郑伯逵 九部人。以孝弟训子孙，六世同居。邑令夏允彝为诗旌之曰：“粤惟郑氏，条分枝散。树德已深，六叶同爨。动非为身，悉捐崖岸。匪惟涵覆，又启迪之，岂无细故，谗口罔施。岂无粟帛，敢曰自私。淳怀天造，猜疑不贮，踵武相衔，进止有序。文嗣遗风，太和懿绪。曜族胜宗，焱腾波涌，乐在家庭，名非荣宠。衣绝盛饰，居无雕拱。千霜植年，万亩结阴。瑞霭如云，南风如薰。抱尔子孙，振振洗洗。”（乾隆贺志）

王恩鸿 字子玉。兄恩及，令粤东。恩鸿在家奉母李氏，以孝闻。崇祯十七年，母病笃，割股以疗。知县虞祐旌其门曰：“孝友相师。”（乾隆贺志）

#### 清

陈貽谋 字克臧，江田人。明季，海寇掳人索赎，貽谋父德

容被执，乞以身代。至三阅月，凡未赎者十七人，贼将尽杀之，其渠魁夜梦神曰：“陈克臧，孝子也，无相害。”厥明释之。卒后，复遭海寇焚劫，乡无余烬，惟贻谋柩无恙，人谓孝感所致。墓在五都马台北坳山。（乾隆贺志）

陈 襄 字昌奋，一字叔举，邑诸生，古县人。父兆甲，字克鼎，前明国子监博士。老矣，以某甲事株及，并左伯周亮工下廷尉。襄囊橐三载，备极艰辛。时西曹新制三木刑，多死。一日，兆甲次当夹讯，襄阑入法堂，请以身代，情辞恳至，法司皆坠泪。后朝审，旋风吹牍人云中，亮工与兆甲冤俱白。襄御父归。与孙学稼、郑宗圭、高兆、许秘、许友及仲兄騷诸名宿，修平远台诗社，追踪曹、徐。襄所著有《中轩薊游》二集。騷字仲桓，老于诸生，有《偶安集》二十卷。（同治彭志）

江子璜 字朝雄，云路人。母卒，值海界内迁，丧不如礼，言及辄流涕。后与父合葬，躬负土成坟，庐于侧。性好施，里有患难，多方拯恤，贫不能自存及无力婚葬者，悉周之。卒祀于乡。（乾隆贺志）

王万年 字眉友，西隅人。康熙十六年，以贡授上杭训导。事继母陈，备极孝养，母病二年，侍汤药左右不离。以产让弟嵩年，乡间有争财者，闻万年言，愧而止。卒祀于乡。（乾隆贺志）

郑兆奎 字学悦，阳夏人。邑诸生。天性醇厚，以孝友闻。母病三年，亲侍汤药，不离左右。待人无忤色，亲朋共饮其和。居家课督子孙多克成立。卒年八十五。（乾隆贺志）

李 泳 字永言，邑廩生，东隅人。孝友端方，抚孤侄如子。为文独出所见，试辄冠军。卫、胡、蒋三邑令历延为义学山长，多所成就，表其闾曰“士林模楷”。邑有公事，无不毅然力任。著有《五经纂要》。（乾隆贺志）

陈佶甫 字孝允。父鸣瑜，明副贡生。佶甫事父母以孝闻。

时海氛初靖，同堂弟侄多流徙四方，佶甫为之筑室，使复其所。有兄孝达早亡，嫂孀居无措，佶甫拨田给之，并为择嗣。康熙丙子岁荒，资举火者甚众。（乾隆贺志）

郑敬贍 字复言，西隅人。性孝友。母病，割股以进，疾遂瘳。雍正十年，藩司张以“孝友可风”旌之。（乾隆贺志）

林庆庭 字章祿，金峰人。少孤，事祖父母孝养弥笃。生平以古道自持，待人无忤色。知县殷凤梧旌曰：“品行端方。”（乾隆贺志）

郑良智 字祖睿，西隅祥厚人。与弟良琬字祖英相友爱。竭力事亲。知县梁旌之曰：“昆友承欢”。（乾隆贺志）

杨元挺 字永哲，一字于岳，邑诸生，犀村人。性笃孝，母病偏枯，亲奉药汤五载，不离床侧。朔望稽顙，求以身代。中丞张伯行闻其贤，征入书院，参订所纂书籍。张志栋延为普文书院山长，成就甚众。著有《学庸正宗》、《古文评本》及诗文集。（乾隆贺志）

吴九如 字质侯，邑诸生。父士宏，传见《节概》。九如有夙慧，博学能文；天性孝友，长于经济。从父宦游十余年，随时佐理，大著循声。祖柩未葬，弟妹已长，父以两袖清风，家计日绌，九如鬻妻衾具，以成其事。居常分甘让肥，不私尺布。士林重之。（乾隆贺志）

欧阳文 字诗同，邑诸生，十六都人。孝友笃学。父母终，家贫不能葬，负土成坟。事兄犹父，岁所得馆脯，悉以分兄，囊无余积。授生徒以简言阐发理要，多所成就。著有《四书集说》五卷。（乾隆贺志）

石 铎 十二都人。乾隆七年七月间，暴雨滂沱，父漂于水，奔救不及，铎触小树抱之，见父随水去，铎舍树赴救，均溺死。乡人哀之。（乾隆贺志）



林天孟 沙京人。幼失怙。甫十岁，母病笃，割股和药以进，母随愈。生平仗义，修桥道，息争讼。知县以“孝义可风”旌之。

(乾隆贺志)

方大教 字尔宗。八岁丧母，哭不绝声。与兄入山采薪，养父而独任其劳。共樵则独荷以鬻，共爨则独饪以献。尝以野蔬自给，而留饭以饱父兄。有招以贾者，以父老辞。昼则负担市上，夜则卧父旁。承欢二十年，父卒，服除犹朝夕哭泣。未几兄又病，焚香告天，请以身代，割股和药以进，病遂愈。时大教所聘林氏近三十矣，以父未葬不娶。且思鬻身以葬亲，同里张孝仔义之，赠以金，使葬父而后娶。乾隆二十二年，知福州府蒋允焄旌其间。

(道光通志)

林崇畴 字文添。祖谦光，见《循绩》。崇畴事继母陈氏，病笃，割腕肉和药以进，母疾遂瘳。乾隆六十年饥，石米值钱七千，崇畴以家藏二百余石，分赈族戚之穷乏者。(道光通志，彭志作宗畴)

张金鼎 字孟彝，西隅人。素有孝行。父死日，有群鸦环绕其居。事闻，督抚以“孝行可嘉”旌其间。(乾隆贺志)

陈天佺 青桥人。性孝友。九岁，母病，奉汤药必亲尝。母卒，一恸而晕。每忌辰岁腊，泪辄沾襟。父年八旬，常扶出入，呼为人杖。年二十六，苦读卒，族党惜之。(乾隆贺志)

陈时夏 字道定，一字常于，古县人。乾隆乙卯举人。少失怙。节母高，督之学，必闲以礼法。十岁，从叔父读书，即知发愤励学，不苟随流俗步趋，同学皆以为迂。平日尝以不逮事父为恨，遇忌辰，必素服哀奠。奉母悉得欢心，事叔父如父，终身不衰。甫冠，入邑庠读书，鳌峰书院主讲乡贤孟超然叩所业，深器重之，时进讲堂，勸之曰：“知志古，勿泥古；知正学，要力学。”时夏自是益屏绝纷华；体认实理。事事必精察而力行。未壮，秋捷。以母老不与计偕，授徒里中，推诚相与。从学者必先示以濂、

洛、关、闽之正，敦伦纪，辨义利，端趋向，随材造就，不苛以所难。从游之自远方来者，至砚席无所容。易簧前一夕，犹强起评文艺，题其末曰：“读书不勤则学荒，学术不端则心坏，此际须大有把握。”年四十有六卒。学者称为常斋先生。录所遗书，有《学庸绎注》二卷、《周礼要解》二卷、《榕轩诗存》一卷。（乾隆贺志）

陈泰瑚 字恒扬，一字鼎石，岱边人。太学生。少孤，事母孝，朝夕奉养唯谨。病侍汤药，不离左右。出与兄谋生计，少有获，必归告母。母歿，哀毁骨立。未几，兄又歿，无子，以长子为之嗣，待寡嫂礼敬不衰。性敦笃，好施与，岁饥减俸，遇疫施棺，里人德之。学使彭蕴章旌之曰：“孝友可风”。卒年七十七。子八人。长鸿材，字淑宽，一字岱轩，邑诸生。继伯兄嗣。纯朴嗜学，与弟鸿音、鸿泉等相友爱，年六十始析居，诸弟以产当两股均分请，鸿材曰：“吾以序长承继大宗，此不得已之事，若因此坐获厚赏，非吾心也。”及分产少自与。家延师五十余载，待先生忠且敬。今其后嗣，科目蝉联，人以为敦睦之报云。（同治彭志）

江三音 号审斋。少失恃。父诸生，舌耕授徒，中年困于病，家计鲜措，音采樵，鬻以供养。侍汤药外，衣箭溷厕，皆躬涤必洁。夜则讽诵不辍，父再三谕，甫就寝。历二十年，父歿，哀毁逾礼。戚友怜为之殓，躬负土垒石以葬，庐墓侧三年。服阕，出就试，补弟子员。嘉庆庚申举于乡。大挑授教职，补福宁训导，摄正篆。下车倡新学宫，岁余监修弗倦。与诸生讲学论文，无不乐其和易。然性严介，不可以非分干，惟事属门墙者，必力持不少贬。调平和教谕，课士益勤。著《左史论文》二十卷，未梓。卒于官。（道光通志）

陈观澜 东隅人，父良琨，邑增生，以苦学致病瘵。观澜寝食不自安，日吁于神，乞以身代，割股和粥以进，父歿，哀毁骨

立。侄肇经，幼孤贫不能读，澜罄所积，为备脯资，俾卒業成诸生，壮为授室。长乐县知县手书“孝友传芳”旌其门。（同治彰志）

方英颖 字隆文。幼随父诸应幕游肥城，逾年令去官，诸应飘泊无依，以病歿客邸。英颖年十五，捶胸号泣，痛不欲生，勉营丧纪，鬻衣裳，负遗骨归。冒风雨，忍饥寒，道出苏州，沾疾月余。资尽，馆主妇屏之出舍，英颖抱骸哭道旁达旦，值长官过，稔其故，厚赈之，并给牒护之归。奔走数千里，历十阅月，备尝艰苦。后四十年，学使吴孝铭采舆论，旌其门曰“髫年至性”。邑人王登三为之传。（同治彰志）

郑敷亨 字元龄，云路人。父行彪，秉性严毅，明取与，慎言笑，族党重之。有以小忿启衅者，得其一言，事辄解。精算学，著有《算经汇源》。敷亨幼孤，随母育于省城舅氏，因家焉。游明经陈本钦之门，本钦深器之，妻以孙女。两应童试不售，以家贫亲老，弃儒习幕。入都，充院供事，秩满，候选府经历，闻母病驰归，侍奉汤药，衣不解带者累月。梦神赐以药，疾顿减。自是杜门养母，先意承志，能得欢心。与伯兄敷昭相友爱，置田三十亩，尽以归兄，不分儋石。素俭约而好施与。戚里有急，每倾篋周之，或质钱以应，于贫士尤眷眷焉。有张姓者，久赁亨屋，亨廉知其苦读，免其租值，又量为扶助，学以有成。生平绝嗜好，喜藏书，得善本必购以归，曰：“以此贻子孙。”今其后嗣科甲蝉联，皆能读祖父遗书。论者以为积善之报。（同治彰志）

黄汝楫 字景麓，一字朴园，青山下人。邑诸生。质鲁好学，遭遇艰屯，昼负薪而夕读书，食力奉亲。连丁内外艰，哀毁备至。以伤感病明，眇一目。弱冠即授徒四方，积束金为诸兄婚娶。抚诸侄如己子，一门之内，怡怡如也。生平尚节操，重气谊，不轻取与，不妄交游。诱教生徒，先品行后文艺，游其门者，无论资稟高下，皆能成就。其贫而无力者，咸助以膏伙，不取束金。一

时知名士如黄荣庚、黄翼为皆出其门。晚始娶室，旋病瘵卒。以门人黄翼为赠中宪大夫。

张 怡 家贫苦读。每饭，常自节食以让父兄，已茶汤充饥。早岁卒。（道光通志）

林仰先 亲老善病，家贫，约衣食为医药费，躬自服侍左右不离。亲歿，哀毁逾恒，水浆不入口者累日。营葬躬自操作，历时罔懈。抚弟妹均成立，经营婚嫁后犹不析箸。远近坟茔，祭扫必谨，隳坏者必竭力修理。戚友告贷者，倾囊不靳。常修桥路，施药茗，以便行人。道光二十九年旌奖。（道光通志）

林仰先 字道平，古县人。父业农，家贫喜读书，道平体父志，勤苦力学。旦晚必侍侧，亲奉菽水。有长兄客连江，久不归，父思之，时流涕。仰先数往，泣跪而挽之归，为娶室，以安其身。父乐之，曰：“吾非道平几无长子矣。”乡党称其能承父志。咸丰元年，入祀忠义孝弟祠。（同治彭志）按：通志所载林仰先事实，与县志互异，或两人，抑同名；无从查核。姑并载之。

蒋 藻 屿头人。事亲孝，髫龄丧父，哭泣尽哀，常不令母知。人问故，曰：“恐伤母心耳。”家贫，为漆工以奉母，中裙溺器，洗濯必躬，至老不倦。母年百岁卒，丧葬毕，叹曰：“年七十不能婚，吾亲将不血食，何如长侍地下哉？”遂自具殓衾，服药而死。（同治彭志）

林树馨 字孝冲，一字在霄，竹田人。邑诸生。肄业鳌峰，与余潜士、何则贤以气谊相友重。一日读《游子吟》，潸然出涕，曰：“吾亦人子也，奈何别慈帏而虚名是恋？”遂归养母，躬亲侍奉，不假乎婢仆。母歿，哀毁逾节。忌日哭泣尽哀，以为常。事长兄如父。与人交，尤见肝胆。有陈某因贫弃学，树馨仗助之，俾卒業焉。（同治彭志）

郑成彪 字其胜，一字炳山，邑庠生，北湖人。博学能文，尤



笃内行，事亲备极色养。亲没，躬营兆域，祭必尽礼。每值讳辰，心常戚戚。与诸弟共爨五十余年，始终无间言。治家严肃，常集先哲名言有裨身心者，书之座右，为子孙观法。生平不骛声华，自安义命。教授乡里，不计脩脯，视生徒无殊子弟。卒年七十八。（同治彭志）

郑思权 字素守，古槐人。父汝诚，诸生。敦品植行，乡里称为长者。权幼知孝让，年十一丧母，哀毁如成人，事继母尤谨。父病，祈天减算。及居丧，哭泣尽哀，遇忌日辄悲戚。伯兄善病，饮食药饵，亲奉十余年，不稍懈。抚爱群弟，董劝并用，俾各成业。岁得馆谷，悉以资兄弟。生平有志正学，尝诣建阳，慕朱子之乡，欲移家就居，以母老兄病不果；乃考订道学源流，采其嘉言懿行，讲求不倦。其卒也，士林惜之。同治四年，邑人陈中翰萼芬为请于朝旌焉。（同治彭志）

高齐云 职监生。迁居省垣南关外醴泉铺。早失怙，椎心泣血。每以未获逮养为憾。家故贫，自饮糜粥，而供母甘旨必备。母多病，每夜焚香祷祝。及母歿，哀蹙异常，呕血数升，以劳瘵死。邑人为之请旌焉。

陈鸣霄 字解勉，西隅人。幼失恃，哀毁备至。父方振，治家严，不如指者■■不少贷。霄先意承志，独得欢心。侍父病，衣不解带者数月。既歿，丧葬如礼。鸣霄素经商，得赢必归兄，不私一钱。年四十以积劳卒。知县秦煦给以匾曰“敦孝笃义”，并为请旌。同治六年建坊，祀于祠。（同治彭志）

张 柏 字可同，一字从寮，东隅人。少孤，母郑氏病卧床簀者十一年，柏承奉不懈。及卒，衬葬父茔，日必诣冢拜泣，风雨不废，数十年如一日。有三兄相继卒，视诸侄如己子，共爨六十余口，内外无间言。待族邻和而有礼。尝途拾遗金，伺还其人。学政邵亨豫表其门曰“孝友可风”。同治八年旌。（同治彭志）



吴三英 字存礼，一字芝田，西隅人。国学生。善画兰。天性纯笃。七岁丧母，哀毁如成人，事父以孝闻。妻王氏，亦割股疗翁疾。后其父失明，英以舌舐泪，以口哺饮者五年。族党称之。同治八年旌。（同治彭志）

柯良贞 岱西人。天性纯笃。幼失恃，十一岁而孤，哀毁若成人。善事继母，先意承志，问视惟谨。母病，衣不解带者弥月。待季弟友爱备至。长任家政，凡事必禀命而行。伤躬励行，恒以辱亲为惧。勤学能文，蹇于遇，艾年犹刻苦异常，语人曰：“非敢躁进，恐负篝灯母训耳。”年五十三卒。同治八年旌。（同治彭志）

陈尚洙 东隅人。性孝友。幼知礼让，不与诸儿戏。人诘之，答曰：“恐致口角，辱及父兄耳。”年十六，父病笃，祈天减算，乞延父命。父卒，哀毁逾常。事母尤谨。与两兄聚处一堂，怡怡如也。因颜所居曰“怡怡室”。年二十六，以苦读瘵疾。同治八年请旌。（同治彭志）

郑孚诚 字茂邦，一字詹岩，邑诸生，西隅人。家贫，性至孝。早丧父，哀毁备至。弱冠舌耕，竭诚将母。邑侯李锜素有知人鉴，下车观风，拔取第一，廉知其事母孝，月给米炭。孚诚因执弟子礼。请业之外，不干一私。李尝寒夜步其馆，见案头有《训徒律句》八章、《训于格言》四则，尤啧啧称羨。每语人曰：“郑某，尚德人也。”其见重如此。光绪十八年，大府上行实于朝，获旌如例。祀孝弟祠。长子焕经，号籍园，增生；三子焕章，号超径，岁贡生，候选教职，迨授沙县训导，而焕章已卒。孙荣元，号彝图，附贡生。（同治彭志）

李斯融 字学昭，沙京人。性肫挚，重然诺。家贫，鬻面营生，族祖显定见其诚实不欺，异之，假厚资俾商于苏，时融年方十九。不十载，致资巨万，富有田宅。融生三月而丧母，父暮年双瞽，奉养周至，晨夕侍寝处，不离左右，盥栉涤溺必躬亲。事

继母能得欢心。继母生三子，融友爱笃至，延名师课之读，不惜重聘。诸弟既壮，有室，以食指繁请析产，融愀然曰：“吾非不计及此，所以迟迟者，欲弟专心读书，博一第以显扬父母耳。既以为请，吾何靳焉。”遂检券籍而付之。腴田美宅悉以让弟，而自取其荒顿者。今其乡有兄弟争产者，人辄举之以为鉴。卒年七十。以子驹贵，赠文林郎。

郑景燮 字宏芳，首占人。廩贡生。父元经，道光乙亥副贡。景燮以办团出力，奖五品衔，以训导用。家无遗产，与兄寅同爨十余年，内外无间言。寅任浦城教谕，卒于官，景燮闻讣，星夜奔驰七百余里，护其丧归，营葬如礼。敬事寡嫂，抚侄如己子。母疾，焚香吁天，愿以身代。学使秦绶章以“孝友传家”表其庐。以子受康赠朝议大夫。

陈仕端 字文石，石门人。生未周岁而孤，事母张唯谨。母患乳岩症，食必滋味，痛乃少减。仕端极力营致，躬调以进，虽风雨无缺，如是者三十二年如一日。晚岁授徒乡里，不计脩脯，贫者德之。

林廷玠 字中立，号于璇，又号述斋。廩贡生，候选训导。以办理团练出力，保教谕。父冠英，年三十丧妻，不再娶，同治间，以义夫旌于朝廷。玠七岁丧母，哀毁如成人，父病，亲侍汤药，衣不解带者三月。居父丧，斩衰苦次，哀动邻右。既葬，庐墓三年。教授生徒，家虽贫不计脩脯，游其门者，多底于成。乡俗好斗，动以细故成大狱，株连不已，廷玠恻之，酌采蓝田《吕氏乡约》，吁请大府，抚军王凯泰颺之。正拟檄县遵办，而抚军改驻台湾，事遂中止。迨制军何璟莅闽，始得飭县举办。邑之有乡约，自廷玠始。光绪某年举孝廉方正。年五十卒。著有《大学图说》、《乡约成规》、《述斋全集》若干卷，藏于家。制军卞宝第奏准祀郡乡贤。

陈声璠 字琮勉，西隅人。早岁失怙恃，与兄弟同爨，四十余年无间言。改建宗祠，修筑祖墓，辄独任其劳，尤不惜捐资以倡。经理吴航书院，款目支应无缺。凡育婴、助葬诸善者，皆踊跃襄事焉。邑令徐承禧旌曰“艺苑宣劳”。

林谨纯 邑廩生，仙桥人。性极孝。父病，衣不解带者六月。药必亲尝。卒年三十六。

黄位中 字立人，一字巳峰。同治乙丑，补行甲子正科副举人。父经商于外，位中事祖母，孝养无亏，二十年如一日。祖母病，焚香祝代，获以延寿。父晚年家居多病，位中日侍左右，十年不应举。父既歿，母哀戚成疾，思食鲙鱼，位中旁皇无所得，跣足至小祉乡，适渔人网得一鲙，位中亟买之，而告以故，其人骇曰：“此鱼久不见，今一举网而得，殆君孝感所致也。”家故贫，教授里中，供母甘旨，未尝远离，省垣有以重币聘者，辄却之。尤笃友爱，教养诸弟，无不周至。三弟某欲赴越南贸易，位中以路远阻之，弗听，继之以泣，目尽肿。夜梦护弟同往，沿途风景历历在目。弟归，叩其途中所历，一如位中梦。叔某，食指多，窘于生计，位中自节缩衣食，时以钱米依助之。生平敦品励学，非公不至公门。授徒多所成就。年五十六，以候选教职，卒于家。光绪辛丑旌表。祀孝弟祠。

许履仁 号梅阳，二十三都大洋人。邑庠生。事亲以孝闻。父歿，寝苫枕块，哀毁骨立，足不出户者三年，居母丧，亦如之。生平操行端方，动循礼法。里有争，辄就履仁平曲直，而事无不解者。

陈承兴 邑东隅人。幼失怙，家贫，与弟承珠俱生有至性。以母早孀苦节，竭力孝养。母病，承兴割股和药进，获愈。承珠待兄弟尤友爱，兄乏嗣，以长子脩为兄后。弟承彩早世，抚遗孤如己子。人称其孝友萃于一门。承兴、承珠均以脩贵，赠奉政大夫。

刘菁字子英，东隅人。光绪己卯举人。性端重和易。好读濂、洛、关、闽遗书，于心身性命之学，辨析精微，躬体而力行之。居恒寡言笑，气粹貌温，恂恂不露圭角。时闭户手一编，罕闻外事，顾戚族有以急难告者，则必力任其艰。事亲，饮食衣服，必丰且洁，视而后进。先意承志，得老人欢。居亲丧，不饮酒，不食肉，制服一准于礼，孺慕逮乎终身，盖其孝行出天性也。以大挑教谕未补官卒。士论惜之。

王景灼字杰堂，一字传俊。邑诸生。父际会，传见《方技》。景灼弱冠失怙恃，事叔秉枢唯谨，跬步追随，出入必告。家故贫，授徒于外，所得馆谷，悉归于叔，一钱不入私室。岁时假归，侍叔寝侧，扶持抑搔无倦容。与弟景皦相友爱。工书，尤善山水，有倪雲林笔意。

刘子才字可三，东隅人。幼岐嶷，嗜学，工制义。光绪己丑举于乡。试春官，辄报罢。归而肆力于古文辞，所作传、序各体，胥得《史》《汉》矩矱。生平笃内行。亲歿卜兆，躬负土而杂庸作，以是劳瘁，病几殆，终而力疾襄成葬事焉。居乡操履端介，邑令陈受颐、刘敦华咸礼重之，然子才惟与商榷诗文，未尝以他事干请，其操行清介有如是者。嗣以大挑二等，署莆田教谕。卒于官。

石暄字槐苍，古槐人。父廷禧，性友爱，以兄弟散处为憾，出己产共之。暄事亲孝，事两叔尤谨，与诸弟处，怡怡然。壮岁补弟子员，旋食饩，授明经，署邵武学教谕。邵本山邑，文风素凋敝，暄以振兴为己任，召诸生讲学，严课程，文风为之大变。未几，丁嫡母艰归，痛哭自挝，恨不得亲侍汤药。时生母在，愆前痛不复出山，日惟承色笑为事。体素羸弱，盛夏犹重裘，盖虑病貽慈亲忧也。尝筑妙远楼为读书所。著有《后汉书精华录》、《战国策精华录》、《建游笔记》、《冷斋日记》诸书。卒年四十八。



易簣时，犹以善事慈亲谆谆嘱家人云。

高绍曾 字莘农，龙门人，省居。事母孝，一日不得母欢心，弗怡也。先世业鹾，弟秀岩实主其事。适洪、杨乱，蔓延闽、浙，鹾业锐减，秀岩以课亏陷狱。绍曾诣官请代系，秀岩执不可，绍曾曰：“汝才胜，出，事或得解。”卒代之。系三月，貌逾丰。盖入狱时，预藏程、朱语录，日据桮床读，夷然不以为意也。后秀岩谒选，官浙西，急病卒。绍曾闻赴，即就道，备极艰阻，取其孤孀并旅棹归。居恒对子弟述先德，兢兢然惟恐坠家声。卒年五十二。以子凤岐、而谦诰赠光禄大夫。

曾家禧 字心如，感恩人。父歿六日而家禧生。事母至孝，母病侍汤药，衣不解带者六十余日。母歿，哀毁骨立。兄早逝，礼敬寡嫂，抚侄如己子。发逆之乱，上流浮尸蔽江，捐资立如心社，购棺筑冢瘞之。好周人急，贷者无不应。病革时，悉焚其券。卒年六十八。光绪三十二年以孝友旌如例。

林懋中 字勉甫，沙堤人，省居。幼失恃，事继母以孝闻。居父丧，哀毁尽礼。与弟懋功、奎辉、钟如相友爱。钟如早世，抚其子女恩恤备至，以次毕婚嫁；奎辉只一子，忽失踪，逃于禅，懋中四出寻觅，逾二年得之僧寺，正在受戒，相见之顷，涕不能仰，携归为之娶妇，以延兄嗣。同治初年，发逆窜汀、邵，省垣戒严，倡办团练，人心以安。乡邻争讼，辄出资解其纷，以故，人咸信服之。宣统三年，祀孝弟祠。

林秀象 字贞臣，厚福人。国学生。性孝友。母病困床蓐，举动非秀象不当意，如是者五年。母卒，见遗物辄哀泣。事长兄严谨，有应白事，亦讷讷不出口。秀象天姿聪颖，读书见古人嘉言懿行，必引以自励。然数奇，以苦读患癆瘵卒。年二十七。

林绍天 字思明。母赵氏病笃，割股和药以进，疾寻愈。

李国仪 字威统，仙山人。父病革，割股和药。敬寡嫂张氏，



至老不衰。

林振燕 东林人。与弟振鲍厚相友爱。母病，割股进，获愈，复延寿二纪。

王贞鳌 寄居后屿。母病笃，割股以进，疾寻愈。

郑昭俭 六岁孤。母病，割股和药进之。子国煊，亦割股以疗父病。

林嵩年 字亦统，号寿庭，林开人。邑诸生。父病，吁天愿以身代，割股以进，父愈。

陈书馨 字尚青，一字雨苍。监生。性耿介，绝奔竞。居家有礼法。事父母，虽壮如孺慕，处昆弟间，怡怡如也。生平笃学，一应乡举未售，遂不复践场屋。督课子侄，济济克有成。闽县李熙，贫将废学，书馨不受脩脯而课之读，后成进士。尝拾遗金，守还其人。乡里争讼不可解，每得其一言而定。卒后，子孙犹遵守遗训云。

陈瑞煊 号耀庭，岱边人，亦瞻第三子也。早孤，事寡母，晨夕弗离左右。母歿后，视长兄瑞唐如父，嫂犹母。兄病危，呼吁请代。兄亡，家无长物，抚孤侄君谋如己出，督之学，底子成。宗党以孝弟称之。

## 义行

### 陈

严光 十三都人。太建初，舍宅为光严寺；舍田为湖，溉田四百余顷，为乡人利，即今西湖是也。按：刘则和旧志云：“严光居紫微峰下。晋建元时人。家富好义，常贷钱于人，不责偿，只令立券，结来生缘，远近咸称长者，时有漳人乘驴诣其家，贷钱数千缗，以驴载去。至鹤岭，驴忽不行。策之，作人言曰：‘子勿策我，我前生向子贷钱，今为驴以偿，债期已满，不可策矣。’漳人

悟，贖钱詣光还之。光子恭，商販扬州，次江浒，遇渔人鬻鼈，市五十枚放之。光在家，忽见有披黑衣者五十人，送缗钱五万，曰：‘君子恭，扬州所附也。’恭回，询之，云：‘未尝有所附，惟于扬州放鼈五十枚，黑衣送钱，毋乃是耶？’于是舍宅为寺，舍田为湖。一日，有乡人客归，黎明路经鹤岭，遇光乘輿，扈从甚都，家人从后发，如赴任行装。及至里中，始知其飞升也。”录之备考。（乾隆贺志）

### 唐

林 鷗 字祥凤，方乐里人。开成中进士，为仓曹参军。大历中，因南郊沙合，捐田筑滨、澗二湖，溉民田七百余顷。妻赵氏亦舍夜田为湖，人呼林婆湖。四里民德之，祀于皇恩寺。又立庙湖旁。（乾隆贺志）

### 五代

房长者 名洗，十都人。舍田为桃枝湖，舍宅为大泽寺。乡民祀之。（乾隆贺志）

### 宋

郑 纲 字举之，沙京人。本里湖塘路一带苦泥泞，纲捐贖铺之。并造石桥。（乾隆贺志）

黄 昭 字惟明，一字恪溪，青山下人。处己清简而好施与。所铺石道不下三十余里，如本乡及罗畚、界牌、坊兜、陈坑岭、阳夏等处，石刻俱在，至今利之。（同治彭志）

林从世 性好博济，因挈家贖远游。治平间至莆田，闻同邑钱氏女筑陂于将军岩下，弗成，死之，乃相溪下流，于温泉水口筑陂，捐资十万缗，以给其役，时人因号为十万陂。陂垂成，为潮势冲激而坏。后侯官李宏筑木兰陂，始克成功。然实由钱氏女及从世开其先。邑人立祠陂上，祀李宏，从世与焉。（道光通志）

### 元

陈有霖 字希说，蓝田人。性恬退，轻财仗义。至正中，筑乡约堂于蓝田书院之旁，中祀先圣，以朱、吕二先生配。朔望举行蓝田乡约，择乡之长老为约正，集邻里子弟讲学其中，时人名

之曰义学。尝与欧阳侁往来论学。尚书贡师泰为作义士记。(乾隆贺志)

### 明

**高 璧** 字德滋，一字东峰，伯龄子。伯龄见廷忠《循良传》。生平端静敦敏，乐善不倦。父俸贲悉让于弟，族兄弟有鬻子者，为之赎归，孱弱者，勉护掖之，俾植其生。弘治辛酉领乡荐。任安仁令。怀节励行，未尝妄取一介。留心民瘼，昼夜不少休。及卒，篋中惟敝衣数袭。士民哀慕之，祀于乡。(乾隆贺志)

**李长孙** 字元善，沙京人。读书好义，乐施不倦。乡有贫不能葬者，出贖营之，凡数十人。里有田数十余顷，低者患潦，高者屡旱，长孙舍田浚沟二百余丈，名福田沟。又浚旧圳，名兴利圳。后以子骐贵，封修撰。寿九十二。(乾隆贺志)

**董 岩** 字建南，诸生。二十四都鳌峰人。好义周乏，置义田以贍宗族。邑令孙濂著《彰德篇》以嘉之。(乾隆贺志)

**姜 颖** 枫林人。轻财好义，尝出田二十七亩，为族属诸生膏伙资。(乾隆贺志)

**陈振龙** 寄居会城南关外达道铺。万历初，沿海经商。至吕宋，见高冈广野，匝地青藤，询之土人，云：“此薯也，生熟皆可食。”试之，甘而脆，思中国得此或可代糗粮。但夷禁严，种靳弗与，龙啖以利，旬其藤数尺，归种之纱帽池旁。子邑庠生经纶，以父所得种，陈六益八利及种法，献之巡抚金学曾，檄所属郡如法栽种，岁大获，民赖之，名曰“金薯”。清康熙间，四代孙以柱带往浙江鄞县种焉，大有成效。其子世元，籍闽县贡生。复与余瑞元挈种至山东胶州。胶地早寒种不易活，元每岁补运，教以藏种法。随遣长子云、次子燮运至河南朱仙镇及河北等县，三子树由胶州运入京师齐化门外通州一带。所种之处，利倍于谷，迄今食其利者数百年。世元著有《金薯传习录》、《捕蝗传习录》行世。论

曰：“龙之功宜隆食报，其子若孙，克承世业，广济民生亦岂易得。圣人于蔬食、菜羹、瓜祭，重本始也。世人於薯之入中国，多不知始于何人，故功郁不彰。如知龙也，黄衣黄冠，报赛敬祀，弥旣匝陌，将接踵不绝矣。”（同治彭志）

### 清

**陈奋鹏** 大宏里人。性刚方，负经济才。奸民欧子禧等导海寇劫诸乡，奋鹏集众杀之。后又有寇掠妇女，据奋鹏馆舍为巢，奋鹏伺其出，尽释之，焚其馆舍，寇信为被焚，不之责。奋鹏徙家厚福，有甘、蓝、赫三镇聚啸马山，官司将文石庐舍尽毁，奋鹏独以徙免，众服其先见云。（乾隆贺志）

**王德勋** 字我山，诸生，居梅花所。性聪敏，学问渊博，夙负大志。时飞沙与梅花城平，德勋率所军民挑之，役者有碎我山肝脑之怨。不逾时，海寇攻城，月余不下，全城获免。又有恩在怨销磨之颂。著有《梅花诗赋》，载《艺文》。（乾隆贺志）

**林维挥** 字弢奇，前林人。慷慨仗义。顺治初，海寇掳梅花、文石男女共二十一口，维挥悉出赏赎之。知县韩武及卫建勋两举宾筵。五代同堂。卒年八十六。（乾隆贺志）

**陈继嗣** 字亨达，一字玉瓚，邑诸生。轻财好义。设家塾，生徒来学辄资膏伙。假亲邻以屋，并周其匱乏，死则为之殡葬。见遭粮者屡受箠楚，即未谋面，亦代输纳。以子天立赠文林郎。同里陈尔枝，捐书田为子姓延师肄业膏伙，又置祭田以备烝尝。立家规二十则，俾子孙世守之。（同治彭志）

**陈守泰** 字而一，西隅人。一门孝友，乐善好施。寿百岁，五代同堂。康熙戊申举乡饮介宾。方伯杨廷耀旌曰“五世德星”，知县陈谐颜曰“百岁翁”。弟知希，顺治初，辟授广东曲江令，子善聘，年亦八十六，并举宾筵。（乾隆贺志）

**陈仕雅** 字道月，府学生，十四都人。性孝友。祖祠坟墓，时加修葺。与弟道蘧白首同爨。族邻有争讼，多所劝息。一日向佃

户取租，佃者怒目肆詈，仕雅不校而归。少顷，佃者坠水死，有赀之诈吓者，其家人曰：“吾遭租反辱业主，奈何复以尸吓之？”其大量服人类此。年八十，县举宾筵。（乾隆贺志）

陈长祚 字亨谷，十六都人。孝友敦睦。有族兄贫甚，往浙贸易，因家焉。嗣夫妇俱卒，子幼，长祚为挈柁归，抚其子如己子，长为婚娶，且给之产。又有舅母早寡，中表幼，长祚迎养于家，教训成立。众皆义之。（乾隆贺志）

陈长焕 字子章，性笃实，从不作欺人语。与柯顺耳异姓同居，历三世，男女各数十口无间言。子琦，另有传。（乾隆贺志）

陈洪潢 字仲春，太学生，五都人。商于洋，乡人受惠者不计。捐千金造湖州、宁波两郡浮桥；建本邑厅事，捐金四百，又捐社谷四百二十石。巡抚张伯行以“尚义可嘉”旌之。别立五都附一图户，永免徭役，碑竖县堂侧。（乾隆贺志）

林廷谟 字明经，二十一都人，居西隅。醇谨好学，补诸生，应乡闈二十余试。邑有公事，辄倾囊倡成。（乾隆贺志）

林嗣荣 字斯猷。性豪旷，所见者大，不屑屑为自己谋。尝谓族人曰：“吾族以海为田，不如以土为田。”捐斥地四百余亩，与侄孙申甫董砌三塘，计成田三千余亩。初税鲜蛭，率以给单稽迟，货多弃地；嗣荣诉于官，并豁海鲜诸税，至今赖焉。子琼蕤，见《循绩》。（乾隆贺志）

王用亨 字存嘉，二十四都人。谦谨有德，好施与。族有贫不能娶者，伙助之。里有偷儿入其室，亨故作警欬声，使闻而去，终不言其姓名。（乾隆贺志）

董逢帅 字尔谋，二十四都人。性孝友，轻财尚义。乡有田数百亩，水道淤塞，逢帅倡捐开浚，旱潦借以不虞。子绍安，乾隆丙子举人。（乾隆贺志）

林毓莺 字有焕，感恩人。敦族睦邻。康熙初，南陂坏，出



货倡修。知县卫良佐以“乐善好施”旌之。(乾隆贺志)

严来 字常有，一字二酉。父尚英，明诸生，鼎革后，绝意仕进，杜门不出。来少承庭训，博洽工文。补学官弟子员。敦孝友，重然诺。邑令器重之，有大事，辄諮访而后行，凡曲直互持，将赴官讼理者，经来排解，莫不心服。有某氏兄弟争产，来引大义喻之，咸感悔，人目为汉王烈。治家严，课子义方。困于场屋，未竟其用，士论惜焉。子梦两，传见《循绩》。(乾隆贺志)

高文煌 字世昭，号新名，邑诸生，二十一都人。顺治初，里有巨寇聚众劫掠，新名独拒之，贼焚掠其家，新名上控佟中丞，因获巨魁斩焉。后行经蓝铺，为余党所支解。里人哀之。(同治彭志)

郑嘉谟 字祖若，一字芝田，东隅人。孝友朴诚，好施与，戚族待举火者甚众。间有逋欠，力弗能偿者，嘉谟辄焚其券。某与某帐目不清，讼于官，嘉谟阴代为偿，以平其事。(乾隆贺志)

林长信 字恂行，十八都人。孝友孚于里闾。时困海氛迁界，族多流散，长信为之葺室庐，鸠子姓，恤困济乏，毫无所吝。(乾隆贺志)

柯顺耳 字治斋，屿头人。府学增生。性醇谨，好行善事。里有高某者，遗七棺不能葬，顺耳代营之。修西坑，掩骸千计。康熙戊子，有总镇夫人某氏发愿修尼庵，一日遗哑尼修庵费，密装米袋中。尼至中途日暮，无赖辈欲攘之，适遇顺耳，斥之而止。引尼到其家，开视米袋，计将值五百金。次早送尼归庵，点交袋中物，并不告以姓名而去。素与陈长涣友善，三世同居，人称为异姓同胞。子琼，以举人任湖广、云梦、襄阳等县，皆有声。(乾隆贺志)

谢清苓 字谨修，一字云美。太学生，议叙州同。居会城。端方质宜。事亲始终尽礼。友于弟兄，让财推产无少吝。有叔无嗣，清苓事之犹父。里有贫者，多资给之。遇横逆，辄以礼化。独修

郡学文庙，创嵩山书院，浚本邑文洽浦，皆以身先。乾隆二十三年，以急公输饷，恩赐品物。（乾隆贺志）

陈文德 字懋来，一字修斋，国学生，潭头人，寓会城。幼孤，有远志。祖遗田宅悉推与伯叔，而家渐起。自奉俭朴，施与不吝。岁延师，里中子弟可造者，辄助膏火。凡庙宇桥道，多鼎力捐修。邑文洽浦久湮，倡捐砌浚。中丞周学健旌曰“义充乡国”。（乾隆贺志）

林佳晃 字允照，厚福人。轻财好施，修本里桥道，又造连江蓬崎道，今呼为“允照道”。康熙六十一年，以遵例急公，授儒林郎。（乾隆贺志）

林郎亭 字静昭，二十三都人。孝友端方，五世共爨。一门皆修儒业。郎亭独持家务，好施恤患，和族睦邻。至今子孙犹服其教。（乾隆贺志）

高岱 字守东。父于冈，见《循良》。岱治家严肃，以耕读课子。尝筑堤岸障溪水润田，又舍租西石岩寺。殊有长者风。（乾隆贺志）

卓至尚 字义哲，仙山人。性笃厚，尤敦宗族。倡建祖祠，不辞劳瘁。早年丧妻，生男世润，甫四月，誓不再娶，曰：“吾恐儿子著芦花也。”又为外祖父母营造坟墓，人称其义。课子孙，家法整肃，康熙间，荐举宾筵。（乾隆贺志）

王应元 字茂任，感恩人。举明经。慷慨好施，周贫济乏，里有丧不能举者，应元辄赠之。子德建，庠生，著有《巽斋集草》。孙韶钧，领乡荐。人以为阴德之报。（同治彭志）按：选举注，例贡生王应元，乾隆己卯举人，王韶钧，均作三溪人。

郑枏 字祖士，西隅人。国学生。雍正二年，奉文广弟子员额，郡属、闽侯、长乐、福清为四大学额，枏偕周元、林琮、姜文春、陈运等请于知县杨儒臣，上达大府，各增五名，士林德之。

乡先达吴化等以有裨宫墻，投牒邑令请旌，春秋丁戊二祭致膳，以志不忘。（乾隆贺志）

郑其凤 字祉冈，十七都人。素倜傥。雍正间，奉文将丁银并入苗米带征，总书乘机滥派，计银二百八十两有奇。其凤力诉大府，乃豁免。（乾隆贺志）

范文昇 字孝康，国学生，古槐人。性孝友，好施予，乡里重之。（乾隆贺志）

林申甫 字久征。年十五，海寇劫其父，申甫哀号，愿以身代，贼怜而释之。耿逆之变，逼授伪职，却不就，匿身桔园洲。母歿，负土营葬。考授经历，未久，乞养归。修祠墓，置义渡，筑湖井塘。知县陈谐旌曰“功垂梓里”。（乾隆贺志，参道光通志）

陈正松 字长观，一字双桥，珠湖人。早失怙恃，独持家计。时海氛正炽，仓皇避寇，正松抚六弟二妹，保护备至。晚尤力行善事，创建支祠，修造桥庙，恒为闾里倡。年七十八卒。孙曾数十人。（同治彭志）

陈宏孝 阜山人。性孝友。与人言和易无忤色，尤慷慨好义。所居滨海，田苦卤斥，宏孝舍田凿新港，南至龙塘角，北至龟蛟潭，计一百七十余丈，以蓄淡水。复浚联横坎，北至猫头，以通于海，计八十余丈，合乡水利赖焉。又捐田四十亩，为祖祠祭产，族人德之，岁祭祖，特拊祀以报焉。（同治彭志）

陈 钟 字秀训，一字芝庭，旒峰人。谨饬好读书，尝肄业鳌峰书院，与孟超然交最笃，晨夕观摩，不问外事。主讲林枝春深器重之。乾隆己卯，超然领解首，钟登其榜，尺牍往来，必以道义相劝勉。居乡和而不流，敦孝弟，守忠信。一二顽梗不法者，必多方开导，使之感悟。掌教宁德书院十余年，多所造就，士林德之。晚授永春州学正，克称其职。（同治彭志）

陈元盛 沙京遮柳人。性笃厚，视人犹己。见碍道荆藜则剪

之，当途瓦石则拾之。时行郊野，凡田有水漏，与害苗之莠，不分人己，并力以治，始快于心。年八十，无疾卒。（同治彰志）

**陈德燕** 以字行，十四都沟东人。贫而廉。尝贩米于漳港，道拾洋银三十员，守候不去，逾时，有贩鱼人王大我者，仓皇至，德燕询其故，还之。（同治彰志）

**许贵登** 大洋人。仗义轻财，邻里构讼，辄捐资以解其纷。有陈、林二姓以燃灯相争，各持械数百，祸几不测，贵登奔救乃止。梅村以建筑祖祠涉讼，久而不决，贵登极力调停，讼遂平。祠竣，梅村人感其德，特祀焉。（同治彰志）

**陈大堤** 江田人。性朴诚。家极贫，好行善。尤敬惜字纸，每日携竹篮遍地检拾，遇有污秽，则用水洗净晒干焚化，习以为常。乡之文人嘉其志，作竹篮授之分送，并给路资，所到人争重之。其卒也，里人醵钱立碑，以表其墓焉。（同治彰志）

**刘用宾** 字观谦，郡庠生，漳港人。生平礼法自持，不苟言笑，邻里望而敬之。尤笃气谊，视生徒如子侄，视朋友如弟兄，人咸称其诚信。弟丰，字德谦，邑廩生。手足友爱，以道义相切磋。乡有久所神作祟一方，巫覡挟之为利，牲牢酒醴演戏赛愿者，几无虚日。用宾曰：“此五通之流也。光天化日，奈何容此邪魅横行？”毁其庙，摔其像，而此风顿息。论者谓用宾严毅而不绝物丰，和易而不徇人性，情虽不同，操守统归于正，盖一时称竞爽云。（同治彰志）

**谢世南** 字治江，一字慈田。廩贡生。肄业鳌峰，主讲朱仕琇器重之。性好施，遇贫穷解衣推食，哺给无所吝。至修文庙、新学宫，尤不惜倾囊以倡。著有《蒙斋讲义》二十四卷、《东岚谢氏诗存》二卷。长子贇，附贡生，治家修身，一遵先训，所存质券多至百数十纸，晚年悉命焚之，曰：“此皆无力偿者，毋留为子孙滋口舌也。”著有《蕉窗笔记》四卷。（同治彰志）



陈锡璋 字尔奏，一字二如，岁贡生，厚福人。弱冠补弟子员，历试优等。教授生徒，讲学敦行。家居弭争讼，和乡邻，掩遗骸，禁溺女，里闾化之。书法学二王，每日清晨必端书《阴鹭文》一篇及先哲格言，分送亲友。尺幅寸笺，人争宝焉。（同治彭志）

陈廷千 以字行，江田人。性笃诚。凡遇族中事必力持公道，常曰：“吾族大人众，良莠不齐。若不申明祖训，不免恃强凌弱，致生事端。”与族长严立规条，犯者不少贷，族人敬而畏之。卒年九十。后乡邻有事，每相谓曰：“安得起陈廷千而挽此颓风也？”妻蒋氏，亦寿登九十三，计同伉俪者七十年。长子春雷，乾隆癸卯举人。（同治彭志）

邱玉山 字有宽，一字两峰，坑田人。乾隆丁酉举人。教谕崇安，修学会以处从游之士。及门如吴锡畴、锡珪兄弟，类能以儒术为吏治。所得学俸尽以置祭田，并婚嫁其兄之子女如礼。晚升漳州府学教授，以重听归。治家严，虽妇孺必绳以礼法。每朔望谒祖祠，严戒子侄毋作非，毋怙恶，不率训者，即以家法治之。族之恶少，平时恃强凌弱者，自玉山归，咸敛迹焉。年七十八卒。有《两峰诗集》四卷。子国铃，嘉庆庚午举人。（同治彭志）

陈学燧 字丕樵，一字金城，表贤村人。乾隆丙午举人。挑取知县，改授教职。气度豁达，博学工文。与会城林芳春、赵士泉、陈焱、林雨化、林志仁、林宾日、陈若霖、魏光厚、陈颖棠等，为三山十友，往来甚契。晚年家居，乡里有争，悉就质，无不帖服。乾隆五十八年，同生员吴占鳌、刘应芳等呈复滨、涧二湖，修堤蓄水、以溉四里民田。嘉庆间，又偕举人李学莲、陈一鉴等督人夫开凿陈塘官港，四里得免淹浸之患者数十年。里人德之。卒之日，叹泣者遍里中。学莲挽以句云：“数所在莫能逃，经济文章，终盖一抔黄土；义当为靡不任，邻里乡党，宜铸六尺丰



碑。”（同治彰志）

**陈魁襟** 字廷恺，一字广江，古槐人。父藩，邑诸生，治家持古道。魁襟幼承庭训，友诸弟以仁，勸子侄以约。自饮食衣服及交游取与之节，一秉忠信，无流俗奢靡巧诈之习。时与后辈谈古近事，识趣高远，渊然莫测，而辞色间，往往有英伟气。乡居数十年，排难解纷不遗余力。有以豆觴启衅者，咸质成而心折焉。终其身，合乡千百户无有投牒讼庭，盖诸生而善格一乡者。族人庚焕为之传。（同治彰志）

**黄观营** 字万达，一字见洛，青山下人。嘉庆己巳岁贡生。父邦柱，植品励行，笃学工文，以优廩生早卒。营少失怙恃，刻苦自励。弟万敦、观书均在稚齿，课之读书，抚之成立。分肥让甘，怡怡无间。嗣仲氏万敦授室而没，遗腹子春膏，躬饮食而教诲之，周恤备至，爱同己子。一门之内，群从同居，男女数十人，无有以嘻嗃闻者，即三尺童子，亦知肃然起敬。有邻家子夜入其室，窃取衣服，观营见之，呼其来前，温语慰藉，赠以钱文，使之谋生。其人卒悔而改行。又有陈姓某，负重债将鬻童养媳以偿，观营闻，急往止之，袖所立券焚于庭，并赠以金，令速完婚，又偏告诸富家，代乞缓追。其盛德类如此。

**陈澍霖** 字允雅，号秋田，万春长子。万春见《文苑传》，以古学第一，补邑诸生。屡试优等，食廩饩，充嘉庆己卯恩贡。性孝友。家贫，竭力事亲，旨甘必具，中年丧弟，抚孤侄如己出。授徒数十年，因材诱掖，以变化气质为尚，常曰：“深沉精进，可决远到之才；浮动飞扬，詎是大成之器？古人所以先器识而后文艺也。”故其所造多英隽士。晚岁家居，日以“守分安命，顺时听天”八字格言勸子侄。里有争讼，必开导劝息。年七十七，以寿终。生平留心书法，喜吟咏。著有《秋田吟草》二卷。子四：长际治，字行阳，一字守耕。童年失恃，事父以孝闻。性淳朴，不妄交游，而

笃於友谊。凡修祠庙、砌桥路，辄捐资为乡人倡。子赞，宦豫，每函谕其“时事多艰，勉图报称”云。（同治彭志）

林继侨 字惠可，一字柳村，邑增生，东隅人。笃学励行，至老不倦。课徒善诱，不责脩脯，门下士多腾达者。卒年八十。属犖时，犹训子孙以孝悌忠信。素精篆刻，工画水墨葡萄，盖自陈天民、高继端后鲜有及者。（同治彭志）

高登峰 字则峦，流水人。邑诸生。砥节砺行，及门士咸奉为仪型。知县杨清轮旌其门曰“薰德善良”，盖表实也。与陈观察学颖幼同笔砚，劝善规过，不以穷达殊。其卒也，观察誄之曰：“浮生幻梦君先觉，晚节丛愆我孰规？”方正之风，可以想见。子元杰，邑廩生。行诣纯粹，有父风。（同治彭志）

郑蔚然 字序秀，别字西林，东隅人。嘉庆辛酉举人。敦气节，励廉隅，辞受取与，概衷诸道，虽一介必辨也。与兄灿然、弟代洋相友爱，均负时名。邑中公事如文武庙、文洽浦、书院、射圃诸役，昆季必倡捐董理其成，而蔚然尤狷介不苟。知县杨清轮素重其人，常延访事宜。值县试，其子列前茅，戒勿人复，曰：“功名有定，无涉嫌疑，致损邑侯清德。”杨公益器重之，其卒也，哭之恸，曰：“良友殁矣，吾谁与规？”灿然字序登，国学生；代洋字序鲁，廩贡生。（同治彭志）

王嘉宾 字孝龙，一字主竹，西隅人。恩贡生。性至孝，人以王祥呼之。游闽县蔡容门，与陈庚焕交最深，故行谊独醇。性好竹，晚退居于碧蘼斋，翠竹百竿，古梅一本。课子侄生徒，循循守礼法，人望见之，不问而知为嘉宾子弟。所著《竹溪笔记》四卷，未梓。仲子道泰，咸丰壬子举人；三子又安，道光己酉副贡。（同治彭志）

黄观潮 字万董，一字耕心，附贡生，青山下人。谦和谨慎，笃学能文。乡先辈陈九鼎器之，妻以孙女。年逾冠，受知于督学

陆锡熊，补诸生。性至孝，晨昏必问视。视同堂兄弟若同胞，分多润寡。尤好施与，每当春夏交，减谷价平糶，亲邻待以举火者，常数十家。盖身后六十年，犹啧啧人口云。（同治彰志）

陈钟濂 字诸实，一字约轩。少不羈，稍长，折节凝重若老成。年十二三，与叔庚焕论《大学》于树下，辄能洞贯明德体用。大父挈游九仙山，适群僧聚谈彼法，钟濂推所闻朱子明德之说，辟其谬，群僧惊叹而去。为学不事涉猎短订。研精覃思，务见其大。性孝友。世味纷华，无所征逐。嘉庆辛酉成进士，授国子监学正。金以需次将及，留俟铨除，钟濂将母念切，冒暑径归。抵舍数月卒。年三十四。庚焕为铭其墓。（同治彰志）

蒋之竹 字兴翠，一字凤庭，屿头人。年逾冠，以古学第一，补邑弟子员。晚食廩饩，举优行。天性强毅，尚节概，好直言，遇有不平事，辄侃侃力争，虽千百人不为夺。居庠序数十年，片楮不入公门。乡邻争讼者，必力为排解。尝曰：“好斗者亡身，好讼者破家。愿以睦邻为重，毋伤和气。”其刚正类如此。生平友教生徒，多所成就。尤重气义，有故入子，家贫无依，助以膏伙，课之读书，卒为名流。时论魁之。（同治彰志）

陈有涵 字丕泳，一字液波，东隅人。职员。少读书，精楷法，晚尤苍劲。性谦让，与人交，和易有礼，虽三尺童子不狎也。家故饶，好周恤，乾隆乙卯，邑大饥，散钱赈乏，全活甚多。道光癸巳又饥，首倡平糶，时家已乏谷，转称贷以济焉。曾倡修九都桃枝湖，人食其利。知县杨清轮、褚登咸重之，称为长厚君子。子九人，孙曾林立。多习儒业，有声庠序间。（同治彰志）

陈盛世 字康勉，一字西河，西隅人。例贡生。以善贾起家。好施与，尤笃友爱。兄弟贫乏者，贍之；诸侄无力娶妇者，资之。道光初，偕侄逢韶捐贖四百贯，重建祖堂，祀支祖，左右房屋，尽以居族属之贫者。常课子侄曰：“种德胜积业，宜俭不宜吝。莫贪

意外财，莫伤手足义。汝曹勸之。”卒年六十六。（同治彭志）

林观成 字沛然，一字脩田。邑廩生。少颖悟，好读朱子《小学》书。稍长，专心制举业，得天崇魄力，为省会名师，及门者多登科第。年四十，始返而精求诸四书，参以《五子近思录》及先儒诸语录，味道之腴，勇猛精进。永福余潜士、闽县何则贤皆称其有一日千里之概。与人交，一本真实，善必劝，过必规。遇时事有不平者，虽权贵前必侃侃力争。又尝举吏治、民风、士习之要，累书千余言，致故人之出仕者。著有《四书集注辑液》、《正学准》、《脩田警言》、《芸窗自警》、《史论》，皆未成书。年五十二卒。（同治彭志）

王伟堂 以字行，一字东升，别字廉甫，潭头人。淹贯经史，工制举业。道光丁酉举于乡。教授生徒，严重有威。讲贯之余，每敦勸以循礼守法，故游其门者，率皆笃实谨厚，不独以能文称也。有牧牛子姜某，日过其塾，听伟堂讲书，久有所得，即能操笔学为文，伟堂奇之，助以膏伙，亲为指授，卒以有成。生平裹足公门，不问外事。其教泽所传，至今犹脍炙人口云。（同治彭志）

陈 辉 字位炯，一字燎甫，岭南人。家贫好学。伤躬励行，老而愈笃。性耿介不苟取，而谦恭和易，与人可亲，故乡之子弟乐就范围。陈本巨族，时有联宗争斗事，辉独能约束族众，数十年乡邻赖以辑睦。年七十九，受知于李学使嘉端，谒见，慰藉再三，云：“生非虚冒年岁者。观精神气色，是有内修之行。”其见重如此。道光癸卯钦赐副榜。寿八十九卒。（同治彭志）

高文骐 字长扬，一字质园。职贡生。好义急公，尝助修文昌宫、武圣庙、贡院、义仓、台江书院、万寿桥、洋中亭、流憩第一亭，铺六柱洋、龙岭、安民崎、上杭街、留饭铺、汤房巷路。坊口，为下游之所，文骐倡捐成桥，行人颂之。他如敬节堂、团练局、育婴、施棺等事，俱不惜资财以成其美。辛丑春，大府议



修省城垣，文骐捐制钱一万缗，藏工后加知府衔。英夷启衅，文骐捐白金二千两助军需，奉旨加二级。又捐洲田二百余亩，以供万岁寺灯油，魏敬中为撰文勒于石。子彬、腾、壁、铎，皆官训导。承父志，砌龙门埠头石道，行人利之。（同治彭志）

吴观国 字万统，一字光宾，京沟人。质鲁嗜学，刻志励行。道光丙午举人。友教生徒，无论材质高下，胥勸之以勤，盖以身教也。乡邻有争讼，常就观国平曲直。滨、润二湖，久为豪姓侵占，观国鸣之官，复其旧。遇旱潦，巡视启闭必躬亲，虽甚雨烈日，弗恤也。己酉计偕北上归，卒于延平途次。乡父老闻之，皆为流涕。（同治彭志）

郑开伦 字潢溪，职监生，云路村人，迁居会城。性友爱，好施与。兄弟五人，合产同爨，内外无间言。贫困者恒待以举炊焉。（同治彭志）

陈茂嗜 十三都鹤上村人。勇于义。全家茹素。村有梁公桥圯于水，嗜倡里人修之。工巨款绌，事几中止，嗜辄捐资以益之，及桥成，而嗜产以罄，故至今犹啧啧人口云。

陈孚俊 云路人，迁居省城文藻山。性忠厚，好施与。乡人称贷，计所需多寡应之。及病革，取约券悉焚之。曰：“是固无力偿我者，毋使后人责其逋也。”子于春，初业儒，以家贫，改习贾。古田郑某，误以重金偿货价，于春检知，而其人已去，夤夜追还之。卒年八十。于春孙端徽，光绪甲午举人，宣统庚戌会考，以知县签分浙江。

李尚薇 字炯垣，沙京人。有隐德。读书务实践，不屑屑为章句学。待人无少长贵贱，一以至诚。途遇妇人，辄迂道让其行。家故贫，躬耕不足以给，教授里中，执经者踵相接，而不责脩脯，以故，岁所得只数十金。戚友以急告者，虽倾囊应之不少吝。授生徒书，必以手障口，不欲以气息触人。启迪劝诱，终日亶亶无



倦容。夜则巡行阡陌，运水溉田，以为常。吏部主事黄翼为少游其门，一见器之，妻以女，人服其精鉴。生平学有根柢，而不得志于有司。年五十九岁卒。子兆珍，夙受庭训，致身通显。诰赠资政大夫。

陈萼芬 字灏川，邑之东渡里人。咸丰丙辰进士，用内阁中书。癸亥补中书缺，署侍读，旋以截取同知选云南阿弥州知州。是时回氛方炽，萼芬由燕而晋而蜀，无日不在兵燹中。初谒刘静丞巡抚于毕节军次，刘升总督，继者为岑襄勤公，檄萼芬办厘局，供军储，未赴州任。回惠少熄，留办善后事宜。修铁桥，撤营勇，重修阆阳书院。积劳得重听疾。丁内艰归。服阙，养父，不出家居。为乡里排解纷难，有质曲直者，宛转开导，莫不悦服而去。光绪丁丑，主讲吴航书院，倡捐数千金，以修学舍，增诸生膏伙，邑文风为一变。父歿，益无复进取志，惟留意于善举，如义学、乡约、水利、蠲赈、育婴、砌桥、种树、修造庙宇诸事，必踊跃为之。壬辰，总督谭钟麟聘主凤池书院。逾年卒。

林森如 字松石，一字调淮，洞湖人。附贡生。性方正，言笑无所苟。好奖掖后进，里党之士，经其熏陶，争自砥砺。行有不检者，辄自戒，曰：“何可使松石公知也？”治家严肃，群从同居男女老稚数十人，无间言。弟调阳，令望江，以率请免征遭谴，负欠累万，森如贻书曰：“为官为民，为民去官，官勿惜也。”鬻田产百十亩，举偿不吝。晚犹力行善举，浚湖渠，建祠宇，悉慨然自任。遇贫穷，推解赈恤，多所全活。子和荃，字衡卿，有父风，尤工书法。

施则常 号袞侯，大宏里人。邑增生。父捷锋，道光甲辰举于乡，颖悟嗜学，笃内行。则常生负异禀，十岁能属文，十六籍于学。嫂王氏少寡，则常让产以膳之，而舌耕自给。精医术。光绪庚子、辛丑间，里中时疫蔓延，经其诊治，多所全活。里有争

执，为平曲直，无不悦服。凡育婴、敬节及修葺桥路诸善举，无不极力筹办。卒年六十四。子二：传薪、平。

**施 寓** 原名祖霖，字兰修，号桐卿，又号问云，光绪己亥举人。幼颖悟，读书目数行下。十岁丧父，祖母在堂，寓恐触其悲，恒阴自饮泣。生平见义勇为，戚友有所请，事无巨细难易，毅然任之。教授生徒，脩脯所入，多以资亲族之乏者。四处礼部试，皆荐而弗售，乃赴部以知县注选。尝有句云：“不期薄俗加青眼，但愧慈亲已白头。”年三十七卒。著有《思鲁室诗抄》若干卷、杂著若干卷、尺牍若干卷，待刊。子四：长景徽，四品衔，江苏候补通判；次宝廉，船政水师学堂毕业生，分省补用县丞；三景琛，附贡生，候选知府；四景崧，邑庠生，分省补用直隶州州同。

**董春捷** 古槐人。少失怙恃。贾于尤溪。岁稔，劝殷户平粜，而先倾己谷为倡，为乡邻排难解纷，率多赔累。尤好施与，戚族以缓急叩，虽扫庾赈之不吝。以病卒。同县少詹郑叔忱为铭其墓。子英高，贡生；英杰，太学生；登云、文在，均武庠；国儒，郡附生。国儒性孝友，克承先志，赈贫恤患，凡足为乡里利赖者，皆踊跃为之。子二：子才，廩贡生；子良，光绪壬寅副举人。

**柯 雍** 字圣简，号时安，岱西人。父寿亨，以举人任莆田教谕。雍性聪颖，读书过目辄不忘。年十九，为诸生，光绪丙子举于乡。为学不拘帖括，喜读经世书。甲申法夷犯福州，邑北临闽江南道，敌舰可乘潮上。雍陈请大府设要塞于南岸，为堵截计。总督何璟檄员察度形势，为建炮台于广石，迄今成重镇焉。主讲吴航及胪峰书院，训迪不倦，多所成就。时邑之保婴已开办，无专所，雍乃筹款六百元，就塔山毓麟宫旧址，重建而设局焉。其赞助善举，类皆不遗余力。选泰宁训导，以母老辞，改莆田，未到官卒。

**李鸿图** 字绂斋，高岐村人。少与其弟从同邑谢章铤游。诚

恣而勤于学，诸家经说，必手自抄录。壮补博士弟子员。光绪丁酉举于乡，时年近五十，将垂老矣。生平进止，必以礼法。尤笃宗族，里党任恤之举，灾赈施济之事，悉乐为之不倦。卒时，其师章铤为之谏，有曰“懿行毛举，阴德耳鸣，邑有吾子，志乘之荣。”盖为其生平最得意之弟子云。

陈韵珂 字玉溪，东渡人。光绪己丑举人。国史馆汉誊录，广东东仓盐大使。为人品方行洁，见义勇为。东渡之东，为闽、长、福三邑交界地，无赖者恒于此肆劫掠。韵珂请于大府，择蕉岭地设保甲局，自是前弊尽绝，行旅便之。死之日，三邑之民，祀之于保甲局后院，以报创设之功云。

郑勤 字勤甫，一字石伍，坑田人。少沉毅尚气节。弱冠游邑庠，旋食饩。家贫，授徒乡邑间。光绪壬寅举于乡。甲辰试春官罢归，同邑高某病滞上海，勤挟之登舟，备药饵以疗，计抵家仅两程，冀得生还，扬帆不数里，高没舟中。轮船洋人忌停尸，遇死者辄投之海。勤秘其迹，朝夕佯进饮食。既抵岸，舁尸归，其家人咸以为义。甲辰任吴航两等学校校长。清操自励，造士极一时选。暇则托于诗歌。著有《洗耳余音》、《和蜂吟》两集。

施德辉 字联岩，大宏里人。邑庠生。性纯谨，好施与，里党穷乏者，恒周恤之。於师友间，必以道义相切磋。生平以培植后进为己任。尝设馆中岩，课弟侄辈多成名。科举既废，又集同志改胪峰书院为两等学堂，以广教育。大宏水利系筹港支流，德辉倡捐巨资，造桥于分流处，名曰高桥，并作闸以蓄水，合乡至今赖焉。

林文庆 字锡轩，梅花人。状魁梧，性亢爽，好义疏财，不屑权子母，里党贫困者，贷不责偿。鰥为娶，病为医，死亡为丧葬，靡不尽力。里中公益事虽艰巨，独任不辞也。知县王叔谦旌其间曰“望重梅城”。年五十九卒。乡人至今犹颂之。

### 义行补遗

郑万尊 仙岐人。邑庠人。尚气义，胆略过人。仙岐地滨海，海寇扰剧。万尊选丁壮御之，寇不敢近，然恨益深。一日，寇遇诸途，掠去，支解之。至今犹呼郑四腿云。按：万尊，乾隆时人，前志遗，兹考其家谱，与父老之传闻，悉相符，因补之。

### 隐逸

#### 宋

刘世脩 字景周。性恬淡，不乐仕进。尝授承信郎，监行在贛军激赏库，寻弃归。留意黄老之术，建得闲堂于雷会峰，列植花果竹木，日与文人羽客觞咏谈玄，不与人间事。其妻兄陈自强与韩侂胄有师友之旧，不数年位至宰相，尝以书辟世脩，世脩力辞不就，因号慧观翁。后自强败，世脩得不预其祸。年八十六，端坐而逝。（乾隆贺志）按：《刘氏家谱》有《高隐雷会峰事略》，系其裔孙沂春所撰。夏允彝为之序曰：“士不为苟隐，必有所以处也，非代之方季，则革易之会耳。岂徒泉石膏肓傲世自足哉？长之邑，连山叠云，老其间者何限？而以隐逸著者寥寥数人，隐何易言也。如景周刘先生，一时权贵，辟以有道作光，公栖迟雷会，高隐不仕，其节良有足多者焉。”

维 仲 失其姓，绍兴间，耽书乐道，晦迹林泉，诏三辟之，竟不起。（弘治刘志）

#### 元

林 清 字以宁，阜山人。泰定间，屡辟不就。赐旨札云：“儒士林以宁，道贯万殊，年高七秩。明经修行，不求闻达于当时；劝士崇贤，宜尔赞扬于盛世。”赐号阜林梅隐处士。（乾隆贺志）

陈 东 字景颺，沙堤人。少隽敏笃学，经史百家及释氏书多所研猎，工词赋。比长，浮游沅、湘、吴、越间，诸所游览，辄

形歌咏。或至禅房道榻凝香默坐，迨如也。金郡同知郭履辟为郡邑儒学，辞不就。金宪赵承禧以遁迹邱园，不求闻达荐，东曰：“吾既不求闻达，乃复名尘荐剡。”去之。隐居，足迹不至郡城。著有杂文并诗集。（乾隆贺志）

### 明

刘一企 诸生。自号抱一山人。默而好深湛之思，遂弃举业。著《阴符难经衍》，喜古文辞。偶身步若翮，遇当意辄戏媵跳舞。从傅汝舟治竹筐、食担、壶芦，游武夷山，遇仙。（道光通志）

林绍 字淳裕。能诗，尤工五七言长律。永乐时，邑人王坚、王恭交章荐于朝。部檄征之，不起。有《林泉清响集》。（乾隆贺志）

林敏 字汝学，一字汉孟，号瓢所，又号佺冥子，又号青罗山樵，罗田人。宋林简肃之裔。资性颖悟，读书过目成诵，为诗刻励清新，与周佺、黄佺辈缔诗社。永乐五年，以人材荐，不就，卒。（乾隆贺志）

郑文霖 字汝众，号耽犁子，邑西永宁坊人。好善乐道。洪武中尝应辟，不仕。与周佺、郑定、高樾、王恭、陈亮诸人赓咏，尤耽于耕，故号耽犁。尝曰：“吾拙于进取，惟犁锄是耽，安於蹇穷。惟稼穡是务。方吾犁之在手也，茫乎其无思，熙乎其自恬，不啻执圭秉璧之荣，而运斤游刃之适也。”所著有《耽犁子》一卷。榜眼练子宁为之赋，状元张显宗为之跋。裔孙佺，工诗画，有祖风。（乾隆贺志）

陈本 字叔固，全之子。全见《文苑传》。性耿介，善诗文。敦尚古道，不慕荣名。隐居江田，与闻人逸士吟咏。有诗文若干卷。（乾隆贺志）

李仕黼 字士殷，号泗峰，邑西人。望隆学校，不求闻达。教人以孝悌修身为本，四方名士多出其门。家甚清，却贫士贽礼。父



母兄弟并外父母，事生送死，皆资之，毫无所吝。学举德行首推焉。著《五经纂要》。当贡而卒。祀乡贤。（乾隆贺志）

梁春晖 字时皇，号淑三，江田人。诸生。隆武乙酉领恩贡。明亡，杜门不出，授徒讲学终其身。有《云龕遺稿》一卷。云龕山名，即龙龕山，在县南千溪潭上。有归云阁、望海亭、香炉峰诸胜。春晖晚年，卜居其地，故以名集。其《生辰识感》云：“不堪思往事，未易说完人。”又《除夕》云：“三间破屋完吾事，一片斜阳照此心。”其志事可以想见。参《江田梁氏诗存》。（同治彭志）

张振玉 号梅如，东隅人。诸生。性孝友，尚气节。与同郡吴大正相友善，明亡，大正死之，玉哭临甚哀，曰：“吾为亲之故，偷生人间，冥冥之中，负此良友。”遂隐居鳌山，不入城市。谈及时事，辄义形于色。参《张氏家谱》。（同治彭志）

谢 杲 肇溯季子，诸生，自号青门老人。少随父授书，见忠臣、孝子、义夫、节妇传，辄流连向往之。壮岁，明乱，避地幽隐。凡山高水深人迹罕到之处，靡不游历，以舒忧愤。甲申后，明社既屋，弃儒巾，杜门扫轨。念世受国恩，偷生人世，恒涕泣不自己。迨庚戌春，浪迹北游，自吴、楚以及齐、晋、燕、赵诸名区，嗟河山之改色，望宫阙而徘徊，又歔歔泪下者久之。庚申秋，自吴门抱病归，遂不复出。凡闽中殉难苦节，及潜身沙门绝意进取者若干人，概为传论，成《节义录》二卷。其已经赠官易名及身尚未死者，弗录。其自序略曰：“吾职非史官，志在发潜德之幽光，不忍其同湮没于寒烟蔓草而已。”连江陈元龙为之序曰：“老人家学渊源。吾固知太史之有子长，叔皮之有孟坚。衡泌乐饥，其亦困而不失所享乎？”（同治彭志）

陈名宾 号际伍，邑廩生，云路人。敦名节，善属诗文。著有《理学真伪论》、《书经讲述》。知县夏允彝雅重之。尝赠以七言古风。诗别见。时海氛起。名宾与长子副贡鸣瑜、次廩生鸣琪谢试

事，筑室松坪，偕隐以老。清榜眼吴文焕怀以诗云：“种树种松柏，论文论古人。松柏节不改，古人德不湮。”御史陈书为之序。（同治彰志）

### 清

**董捧日** 十二都古槐人。邑诸生。通易理，精卜筮。雅不与俗近。中年即不应举，结草庐于董奉山，啸傲烟霞，悠然也。（乾隆贺志）

**高文** 字克斌，大宏里人。喜读书，不乐仕进。小筑数楹，蒔花种竹，每游山水，竟日忘归。著作多，不尽传。于《文石志》见一斑焉。（乾隆贺志）

### 流寓

#### 宋

**陈襄** 字述古，侯官人。庆历间，尝游灵峰寺，题五律於壁上，永乐时，墨迹犹存。（乾隆贺志）

**方元象** 字道辅，莆田人。少与伊川游，伊川遗书云：“足下非混俗之流，其志道之士。”仕至宣议郎、威武军节度推官。乾道中，尝游灵峰山，学者款留，论道久之。归云洞并龙泉寺石刻犹存。（乾隆贺志）

**徐铎** 宋熙宁丙辰状元。常游长乐，筑室于锦阳居焉。今其地为毓麟宫，仍祀木主于旁。（乾隆贺志）

**李纲** 字伯纪，邵武人。建炎间丞相，为言者论罢。绍兴初，许自便，居福州，寻移居长乐。五年起用观文殿学士，除江南西路安抚制置大使，兼知洪州。六年，准告兼营田大使，旋引疾乞罢。八年还居长乐。后三岁，卒于福州寓舍，年五十八，合葬郡之怀安山。（乾隆贺志）

朱 熹 字元晦，建阳人。因避学禁，寓邑之二都龙门。后人名其所寓楼曰“紫阳”。既复寓于方安里之龙峰岩，里人刘砥、刘励兄弟从而受业焉。今其地称为“晦翁岩”。（乾隆贺志）

陆秀夫、张世杰 德祐末，杨淑妃偕弟亮节，负益王昰、广王昺播迁温州，秀夫以兵会之，因与张世杰、陈宜中、杨亮节奉二王航海，自礪澳历王母礁、磁澳、文石澳，入闽安镇。（乾隆贺志）

陈天民 福清人，寓龙门元应宫，善写葡萄。幼随父宦山东，游泰山日观，有道士知归子善于葡萄，天民学之，遂得其妙。（乾隆贺志）

### 明

周 佺 字又佺，一字微之，闽县人。尝令数苍头肩书数千卷，纵游四方。来邑寓龙门高棟家，曰：“吾益友也。”与居十年，辞去，尽弃其书，曰：“在吾胸中矣。”后征任礼部员外郎。（乾隆贺志）

练 纓 子宁裔孙。与弟绮甯寓长乐。万历间，纓子思祖，手哀子宁遗事，伏阙上书，请恤典，大学士叶向高、布政谢肇淛、侍郎董应举各为文以送其行。（乾隆贺志）

钱肃乐 四明人。崇祯丁丑进士，官至吏部尚书。常托迹于三宝、西石、鳌峰、东林诸胜，所至赋诗。居数年后，卒海岛中。（乾隆贺志）

## 长乐县志卷二十七

### 列传七 方技

旧志方技，列于外纪，殆以小道未必可观欤？然涉笔成趣，着手生春，医家、画家载在史册，而诗学、字学、音学、以及星学、地理学，无不各有专书。一艺苟足成名，即片长亦所必录。并蓄兼收，亦考献征文之一助也。传方技。

#### 宋

陈珩 字用行，续通志作珩。号此山。兄容，见《列传》，容以善画龙名。珩时作水墨枯荷、折苇、虫、鱼、蟹、鹤，极有生意。官至朝请郎。（雍正通志）

#### 明

张迪哲 字如愚。为道士。工篆隶。洪武十七年，授上清宫提点。（雍正通志）

林铭 字良箴，沙堤人。工诗文、草书，善画山水、人物、竹石，得宋元遗意。尤精于琴，自号琴乐子。与王恭、高棅、陈亮为友。棅作《琴歌》赠之。（同治彭志）

林真士 洪、永间，与高棅友善，棅题其山水云：“楚天云外数峰青，春水桃花满洞庭。落日楼台明镜里，欲停瑶瑟候湘灵。”（同治彭志）

陈礼 字彦乐，青桥人。洪武间，以堪輿擅名，凡郡邑名

地多出其手。天性倜傥。尝砌海边岸为田，海路一带有陈礼塘，现存，民利赖之。所传《地理经》一册，为江西毛县佐所得，盖至今犹啧啧人口云。（同治彭志）

刘布 字孟升，方安里人。少聪敏，嗜古书法。从中书陈登游京师。归构山房于筹岩。习书二十余年，篆籀甚工，为时所重。（同治彭志）

朱宗明 先福清县人，徙居长乐。善琴奕。永乐二年，征至京师，以疾终，赐棺衾，给驿归。贫不能葬，其徒马修撰铎率士流为营冢圻。（同治彭志）

林景时 屿头人，号虚白道士。善画山水，专学二米，间效商高，竹木林泉有意外趣。尝召入京师。士大夫多重之。（同治彭志）

周文靖 与同邑林景时皆工山水。文靖苍润精密，笔力古健，兼人物、花草、竹石、翎毛、楼阁之类，咸有高致。宣德间，征入直仁智殿，御试《枯木寒鸦》第一。官鸿胪寺序班。子鼎，亦善画，官锦衣卫镇抚。（同治彭志）

张士达 邑西人。善画龙、虎、芦雁，用墨设色，俱入神妙。（同治彭志）

林辅 字叔弼，邑东人。从张士达受笔法，山水、芦雁，龙虎皆臻妙品。（同治彭志）

高继端 号正翁，龙门人，樵之族。善画葡萄，得陈天民体，珍重于时。族人景度，亦工山水。（同治彭志）

刘祥 字瑞初，号雪溪。本县医学训科，精于医，善画龙虎。（同治彭志）

林宏显 号洞阳，仙山人。工画梅石，笔力苍古，世称洞阳梅。（同治彭志）

郑浆 字孔济，邑西人。精医学，诊脉能知数年后生死，活



人甚众。亦能诗。(同治彭志)

李焯 字纯正，号十洋子，邑东人。能诗，善画龙虎。同时张德辅善画鱼。

林泉 字遵性。举永乐甲午乡荐。隐居屿南董山之下。善画竹。(同治彭志)

齐宪 三代习小儿医，至宪尤精妙。遇痘疹未发，一见，即别其吉凶，百不爽一。性落魄嗜酒。每痘疹盛行时，门外围绕常千百人，肩舆子道，聚众攘夺，宪每自病之，欲弃去而不能也。天下诸小儿医，未有及之者，比之钱乙复生。(道光通志)

清

高挾宠 字孝荷。旷达自喜。以字学名家。(同治彭志)

潘敬简 三溪人。岁贡生。画山水、芦雁，笔墨绝佳。(同治彭志)

潘文国 三溪人。郡廩生。工画龙虎，至今宝之。(同治彭志)

陈居仁 西隅人。精医学，诊脉能知数年前病源，决数年后生死，多起死回生。人以卢扁称之。(同治彭志)

陈嵩岩 九都东仓人。精星学，谏吉者多造其门。子孙世传其业。(同治彭志)

郑迪庭 字宗光，二十四都东皇人。幼攻举子业，未就，遂学医，精其艺，活人甚多。(同治彭志)

刘则旺 二刘人。精于医，能探病源，决人生死奇验。兼工琵琶箫管及雕刻人物。(同治彭志)

陈为研 字克光。邑诸生。精医理，制丸药济人，全活甚众。总督刘世明匾曰“湖海风高。”(同治彭志)

陈春树 字利州。邑诸生。十七都陈店人，寓居会城。能诗赋、书画，尤精音乐。总督范时崇、觉罗满保皆雅重之。令画《百鸟图》、《洋海分域图》；又从太史徐葆光册封琉球，令画《琉

球封域图》，皆呈御览。《琉球志》云：“国中无琴，但有琴谱。国玉遣那霸官毛光弼于从客福州陈利州处学琴三四月，习数曲，并请留琴一具。从之。”（同治彰志）

马元散 字典卿，号三峰，罗田人，寓居会城。精丹青，兼工水墨，皆成一家。今之善画者，称为马典谱。（同治彰志）

黄 琰 字亦宏，二十四都西宅人。精篆隶八分书法。乾隆十六年，圣驾南巡，进《百寿图》并颂圣诗，赐采缎一端。吴中士大夫颜其寓曰“赐采堂。”（同治彰志）

郑兴宽 字行敷，号梅亭。善奕，为李方伯发甲所器重。不就功名，恬谈自乐。著有《含哺吟》、《海滨哺唱》、《杂赋》、《棋谱》若干卷。（同治彰志）

应时雨 浙名医也。至长乐，因家东隅。子尚达，字厚兼，承父业，尤精。活人甚多。寿八十三，无疾而终。其后多以医世其家。（同治彰志）

郑良荷 字祖叶，东隅人，号龙台居士。善绘事，尤长水墨，得白阳山人遗法。贺志图画均出其手。（同治彰志）

陈振应 字有觉，号耕云，江田人。善画鲤鲫。（同治彰志）

方大彪 字猷宗，太医院治定之子。年二十即以医名，诊知入贵贱寿夭，人呼方半仙。乾隆四十二年，邑令王隽病笃，群医束手，大彪独言可治，一剂而愈。名重一时。（同治彰志）

陈 超 金峰人，字式轩，号心远。邑诸生。生平不甘小就。精相法，遍历海内，名流倒屣。能预识名公巨卿於尘埃中。百菊溪制府，始以风鉴相亲，继成文字知己，制粤，制吴，皆与俱行，每多匡赞。后随菊溪巡扬州，病卒于苏州官廨。著有《两粤游草》、《三江游草》，皆数佚，今所余唯少时《浣肠居诗文集》三卷。（同治彰志）

高世春 字殷成，号秋实，东隅人。嘉庆癸酉岁贡生。行书

便面、楹帖，人争宝之。（同治彭志）

潘振声 字贞贵，三溪人。精医理，能探病源，多起死回生。求诊者门如市，贫不受谢。人以此多之。（同治彭志）

游光溥 字观宇，号渊如艺子。邑诸生，善绘事，人物法黄瘦瓢，山水宗洪谷子，兼得李营邱笔意，晚侨寓会城水玉巷，破屋数椽，求画者麇至。性狷介，非其人，虽售以百缗不受。年七十余卒。（同治彭志）

郑开源 字峽山，下郑人。善画人物。（同治彭志）

陈德慧 字于汤，东隅人。诸生。善画鱼，水藻游泳，宛有生趣。（同治彭志）

林在田 字泰润，号景竹，竹田人。邑诸生。好金石，精篆刻，能于一桃核刻数猕猴，形状毕肖。凡竹头木屑，经其刻画，均堪宝玩。真、草、篆、隶，各擅家数，篆、隶尤胜，駸駸乎入秦汉之室矣。（同治彭志）

陈有统 号环海，江田人。初业儒，因母老多病，弃举业，潜心岐黄，以医鸣，兼耽吟咏。夏秋疫作，酌古方，远近济活无算。为人玉立锋发，风雅可人，薛生白流亚也。晚益肮脏，可以礼招，不为资动。所著《伤寒论注》、《医学阐微》及《环海吟草》，凡若干卷。没后，遗稿散佚无存。（同治彭志）

王观晋 字茂积，号挹青，东隅人。善写真，工设色。晚年尤长于山水，含毫邈然，盖得力于倪雲林之遗法。家极贫，而性高雅。日在龙潭禅室，与一时文人结莲社，造板桥通溪畔，种竹蒔花，以终岁月云。（同治彭志）

陈扩 字有张，一字仲三。邑诸生。精医学。中岁得异人术，诊脉连三晨，即能决生死于三年中。有友董天焕病牖，日诊视，知不可医，虽夜深路远，犹潜伺于其门，如是者三阅月，而焕家未之知也，其敦子友谊又如此。（同治彭志）

陈兆泰 字祖偕，号六符，东渡人。祖松，父衡，俱习医。泰世其业，精研《伤寒》、《金匱》等书。临症洞见本源，细心体验，投药效如桴鼓。道光间，邑令王履谦以“恒心”匾之。著有《症治一隅》十六卷、《医学时习》十二卷、《万方主治》八卷，未梓行。（同治彰志）

陈成烈 字用奎，旌峰人。国学生。精于岐黄之术，求医者日盈门。有一人暴病，音忽瘖，而眠食如故。延烈诊视，谓其家曰：“无患。需三十五日，瘖自开。”届期，音犹昔，疑前言为诞，复延之到家，坐未几，病者忽自床起，抚其背，曰：“先生来矣。”举家欣然跪谢，诸医亦闻而叹服。（同治彰志）

施传铨 字孔湘，号釜卿，东隅人。邑庠生。善画白乘，水墨浓淡，正背反侧，具有生趣。邑令褚登在翰林日，见其画楚，极加赞赏，后莅任，访其人，出纸索画，并题赞曰：“蔬园野趣，笔墨化工。幽人之致，儒者之风。”晚年兼画山水、花鸟亦佳。（同治彰志）

王际会 字万风，号云石，东隅人。惠贡生。精篆刻，善八分，邑令卢择元称其得汉隶法。延至署，示以古帖，字学益进。晚年尤善作擘窠大字，一日游福州钓龙台，适海防分府司徒绪欲书“肇造区夏”四大字作额，易数十书手，皆不惬意，际会一挥而就，大加赞赏，款留数日。名噪一时。（同治彰志）

陈玉堂 字丕闾，号闾臣，鹤上人。善画山水、人物。（同治彰志）

林观春 字我湖，岱峰人。以善画名，尤长山水。（同治彰志）

刘克光 字桂岩，小刘人。初以经纪谋生，继习岐黄。通医书，精脉理，方不背古，亦不泥古。所医者，百不失一。咸丰间，时疫大作。著《吐泻辨》遍贴乡村，赖以全活者无数。素持斋，亦不佞佛。每早晨，必盥水焚香，端诵《五经》、《四书》及先贤格

言。人称为斋佛。(同治彭志)

郑人瑞 字谷禎，号五云，东隅人，世习医，人瑞尤精其学。能知病源，决生死，活人甚众。道光间，邑令李澍泽匾其闾曰“医学世家”。(同治彭志)

陈于熙 字朝亮。国学生。素性孝友，为宗族乡党所重。善卜占，无不验，人有疑事，咸取决焉。(同治彭志)

李善和 大宏里人。少失怙，事母最谨。初业儒，因多病，母命改习医，辄效。贫不计资。邑侯王运昌以“学闾岐黄”匾之。孙永培世其业，尝医于贫家，其妻将鬻子以疗夫病，培觉，力阻其事，资以医药，人谓其有祖风云。(同治彭志)

僧悟端 别字鉴尘，不知其俗姓。居十二都竹林禅寺，充僧会司。工画竹，得与可遗意。不轻下笔，尝酣卧终日，夜起啜清茗、展纸笔，一扫而成。风晴雨露，各极其妙。盖意在笔先，所谓胸有成竹者也。(同治彭志)

林甘禄 笼下人。精堪輿术。择地有奇验，人咸以甘禄仙称之。后得癩疾，未几卒。

陈学衡 忠宅人。善医术。郡守翁学本聘主官医局，活人甚众。翁以“心存济世”旌其闾。

郑昭起 东隅人。精医术。制方不轻用贵重药，药肆见其方辄挪掄之，而奏效如响。邻儿某，病剧，群医束手，昭起诊其脉，曰：“得毋食荔枝乎？”其母曰：“诚有之。”投一剂，愈。

黄凤来 字国鏞，青山下人。精岐黄术。远近就诊者踵相接。寒夜敲门，亦遽起，随灯往。家人劝阻不听，曰：“病非危急，何必昏夜求医？”其急人之急如此。子翼为，咸丰己未成进士，人以为积德之报。

柯忠瀚 字寿川，柯百户人。少攻举子业，屡试不售，遂学医，精其术。施诊三十余年，活人无算。子炳汉，克承父业。



郑贞嘉 北山人，号隐谷子。以堪舆名。每得一地，作一图秘存之，按其图以葬，无不奇验。故至今购贞嘉图者，多金不吝也。

林友叟 小祉人。精岐黄术，治法如神，所言辄验。延诊者多争要于途；探所往而就诊者，日以数十计。其见信于人如此。卒年七十余。

郑孔禧 字郁夫，坑田人。弱冠弃举子业，学为医。性慈祥，贫家延请不计谢金，有不能备药资者，且给以药，全活无算。子际升，邑庠生，能世父业，著有《临症心得》、《痘疹指南》二书。次子勋，孝廉，传见《义行》。

三 善 竹林寺僧也。医治如神。有为刀杖所伤者，虽垂危能应期愈。谢以金，不计多少；不谢，亦不索也。至今门徒犹世传其业。

黄逢超 青山下人。少聪慧，喜读医书，尤心得于《医宗金鉴》，依法制丸散，治奇症极验。好导引术；每庚申日必登高峰吸日气。忽一日，著道家冠服，跌坐而逝。年四十九。远近惜之。

郑敦焘 字懋功，东隅人，名医人瑞子。精方脉，求医者户外屢满。光绪乙酉秋，虐疾盛行，敦焘酌改古今方，传播远近，全活甚众。知县徐承禧以“医中师范”旌其闾。弟敦宇，亦以医名。知县王宜劬病笃，敦宇视之，言二十日可愈，届期果然，赠以匾曰“医学名家”。

陈迪焜 字理斋，西隅人。邑增生。善画墨竹，精篆隶。子煥，亦以墨竹、篆隶名，人称其有父风云。

郑景文 字筱兰，附贡生，性笃厚。嗜读医书，尤精于妇科。有妇人新产二日，患吐泻症暴危，景文主生化加味一剂，群医大哗，以为芎归分毫不得用，景文力争，服之竟获愈，众服其神。其余濒死而得生者，亦指不胜屈。

陈士青 字抱丹，西隅人。善绘人物，奕奕有生气。

陈延年 字扬松，古槐人。精医学，时以济世为念。壮岁游平潭，所治必应手愈。平潭有防营，将弁伍卒病，辄延请，无不奇效，故与彭定泰军门、黄紫标协戎为莫逆交。

傅文根 傅朱村人。精卜筮，所言辄验，人咸以为神。

姜宜琢 枫林人。性颖悟，精医术。时瘟疫盛行，求诊者日以百计，杵药为丸，布施远迩，获愈者多。

林光志 字晴岚。善画，尤工于传神。

陈 贲 字俊村，江田人。邑庠生。治岐黄术。性仁厚。时鼠疫盛行，患者十八九死，贲曰：“鼠疫之症，为《伤寒金匱》所无。”遂参酌古今，立一方，传布远迩，全活甚众。著有《医学研余》六卷。

陈扬祖 字耀甫，江田人。专门幼科，诊痘疹奇效。著有《痘疹新书》。子明佃，世其业。尤善种鼻痘。

陈道作 字元亮，江田人。善墨画，传神如真。

陈仁诏 字崇丹，东隅人。邑庠生。性仁厚，好施与。精通医术。己卯秋，时疫盛行，投以剂，辄见效。有穷孀子甫六龄，霍乱垂危，仁诏诊之，并给丹药，病寻愈。著有各种医解，藏于家。次子颖，辛卯副贡；三子谔，邑庠生。

## 长乐县志卷二十八

### 列传八 方外

二氏不列於四民，其有外之之意乎？然瑶宫绀宇，借以妆点湖山；释子道流，亦足附庸风雅。况灵通玄妙，济世医人，或符篆以驱邪，或茶毗而坐化，或祷雨而甘霖立沛，或降雪而暑气全消，是亦尘外之高风，而有裨于民物也。传方外。

#### 蜀汉

董 奉 字君异，祖居十一都青山下。三国时人。按：葛洪《列仙传》载：“福州侯官人。”盖唐始置新宁县，前此，长乐犹统称侯官也。奉修道青山，而山以奉得名。结茅之处，至今称仙人旧迹，基址尚存，相传为董拔堦。则奉生于长乐无疑矣。又按：《道藏仙鉴》云：“昔吴先主时，有年少作本县长，见君异年三十余，不知其有道也；罢去五十余年，复为他职，经侯官，诸故吏人皆往见故长，君异亦往，颜色如昔，问曰：‘君毋有道耶？昔在县时，年纪如君辈，今已皓首，而君犹少也。’君异曰：‘偶尔。’每行医治病。以三丸药救活交州刺史杜夔。后居庐山下，为县令丁士彦祷雨。又恒咒水治病，不取钱物，病重者栽杏五株，轻者一株，计得七万余株，郁然成林。杏子大熟，君异于杏林下作簟舍，语时人曰：‘欲买杏者不须来报，径自取之。但将谷一器置仓中，即自往取杏。’谷少而取杏多者，即有虎逐之，自是买杏者皆

不敢欺。君异以所得谷赈救贫穷，供给行旅。冲升之后，人即杏林故地置祠，曰‘太乙宫’。宋真宗赐额‘大中祥符观’。宣和间，敕封升元真人。今医家称杏林者，祖此。”（同治彭志）

### 唐

百丈大智禅师 沙京人。初事龙泉禅师。一日师令浣布于井，见青、黄二龙戏井中，玩之，归迟。其师诘之，遂以钵探二龙献于师。师奇之，令削发游方。临行，嘱之曰：“子逢马则参，逢丈则止。”果至百丈山，参马祖师，遂得道于其山。后复归龙泉，立道场，制《百丈清规》及《语录》传于世。明万历年间，徒孙僧隆珂募缘梓行。（同治彭志）

头陀 俗姓李，沙京人。幼从百丈禅师往洪州，后还葬母于沙堤间，庐墓三年，题诗于石上曰：“守坟三载念生缘，种树为因出世恩。划石寄言相嘱付，一重孙付一重孙。”题毕，石自开，头陀遂端坐于中，石复合。后人勒其所题诗于石，至今犹存。（同治彭志）

### 宋

陈通 十三都人。与弟灵皆有道术，能兴雷雨，除邪祟。宣和中召至京，符咒辄验，徽宗悦之，俱封王爵。没后，人多祀之。（同治彭志）

可瞻 俗姓罗，石梁人，住苏州净慧寺。兼通外学。熙宁辛亥，鸣鼓坐化。偈云：“佛法原无事，本来须自知。汝心若不了。何以消白日？”后七日，荼毗，获舍利五色。（同治彭志）

有諫 连江县人。住邑之报恩寺六年。元祐丁卯坐化，颂云：“吾年六十毕，四大相扣击。藏身火焰中，南斗六兮北斗七。”（同治彭志）

文德 住持灵光院二十余年。坐化偈云：“四大本空，十大何有？澄澄秋月，沥沥寒泉。古岸孤舟，铁帆高挂。去则去，住

则往，谢三不上钓鱼船，洛阳城里东西路。”（同治彭志）

· 欧真人 名无考，沙京人。精道术。夏旱祷雨，甘霖立沛，中有浮萍之异。人诘之，真人曰：“乃东湖水也。”嗣有人自东湖来云：“是日湖涸二尺余。”（同治彭志）

### 元

吴志斗 沙京人。道术震京师。至元间，太后病暑，召入宫，令其降雪为凉，雪立降盈尺。授以礼部员外郎。会副万户杨祥请伐琉球，志斗请先招抚之，帝从其议。乃遣杨祥、阮鉴，同志斗往招抚，谕之不至而还。志斗卒于行，人疑为杨祥所杀，诏福建行省按问，会赦，不竟其事。（同治彭志）

· 义 高 俗姓陈，号秋岩，十二都人。早得仙术。元太祖皇帝召赐金币，归遇贫者，悉分与之。又 精于兵机。晋王北征，累命从行。时六月烦热，王令降雪，乃斋沐飞符，以皂旗麾之，雪旋至。后赐归。端坐而化。赵子昂有挽诗云：“世祖龙飞正统天，先生身价重当年。诗袍碎剪宫娥锦，酒债还分御赐钱。虎卫红云通玉笋，凤池明月送金莲。梁园一去无消息，荒草寒烟思惘然。”（同治彭志）

### 明

善 缘 俗姓许。住连江山庵。有书生读书庵中，值上元，生到庵，曰：“花灯何寂寞？”缘曰：“热闹必须苏杭，请同居士一玩。”生斥其诞。缘令静对合眼，顷刻间如梦，遍阅西湖诸名胜，从此敬信之。嘉靖间自焚。是日有乡人自郡归，至北岭，遇善缘，以锡杖挑僧鞋一只，因曰：“烦将此鞋回敝庵，交某手。”乡人诣其庵，僧众方候火化，大异之。（同治彭志）

### 清

道 宗 俗姓宋，号古镜，兴化莆田人。少有禅性，年二十为僧。至灵峰，叹曰：“此十二奇峰也。”遂卓锡焉。与其徒净楚



募建梵宇，人苦无资，道宗曰：“某日有木至。”适颶风起，有巨商飘下杉木数百株，竟募得之。康熙乙巳，知将疫，采药为备；及夏疫起，济活无算。复工诗，与名公游。一日谓其徒曰：“来日有名人来谒，可煮茗待之。”至期果然。将坐化，预知其期。荼毗得舍利九粒。（同治彭志）

林若晦 沙京人。与十六都刘德真同得符箓于异人，能随意变化。子隆传其术。康熙癸未旱，与德真同祷雨，立应。知县陈谐各匾其居曰“术格苍穹”。（同治彭志）

陈用涣 九都人。长年服夏衣，俗呼济布道。或曰取其济人布惠，故名。能兴雷雨。里中双髻石畔，潭深无际，时有蛟出没，常食羊豕，煠默诵真言，蛟自潭中出，斩之，害遂平。（同治彭志）

## 长乐县志卷二十九上

### 列女上 节孝 孝妇孝女附

刘向传列女，四德并纪也，其类则七。然史之例务备，而志之义求赅。修蘋藻之仪，惟其贤；推兰蕙之质，惟其才；比松柏之操，惟其贞；茹荼蓼之苦，惟其烈。夫所遇不同，斯所成各异。而正气之磅礴，荆布不异笄珈，巾幗至堪珉楔，其秉性然乎？抑扶植之正，砥砺之严，其得诸流传观感又深且挚，故才干气节卓然为志乘光乎？道在阴柔，而清淑挟焉，刚中寓焉。轶则谨而登之，而名亦不敢没，是不仅事乎扬微闾幽已也。传列女。

### 节孝

#### 宋

陈氏 邑东宾贤里林子桢妻。年十八归林，十七日而寡。坚贞自守，百挫不移，抚姐氏二子如己子。年九十卒。事闻，诏旌之。

#### 明

东隅 陈氏 归林思范三载而寡。家贫无子，苦节不渝。纺织营葬翁夫，咸中礼节。年七十二，邑令夏允彝上其事于直指汪游龙为之题旌。

郑氏 李铸妻。全节无瑕。邑令夏允彝为诗以嘉之。

郑氏 陈拱辰妻。归未几，夫卒，孝事翁姑，甘贫抚孤，历五十载。邑令夏允彝为《节妇行》以美之。

李氏 陈守鸿妻。一年夫卒，孝事舅姑，全节无瑕。年五十五卒。邑令夏允彝以“完节纯孝”旌之。

王氏 陈维扬妻。家贫早寡，守节不渝。邑令夏允彝以诗美之。

魏氏 陈德清妻。早寡，抚孤瑱七岁，家贫纺织以供。尝与孤登山采薪，遇虎，魏以身捍孤，虎避去，母子得全。人以为贞节所感。后瑱以吏选授县丞。

林氏 郑恒春妻。年二十，夫卒，孀守六十余载。知县夏允彝以“完节上寿”旌之。

郑氏 儒士陈承笙妻。

西隅 周氏 张利轼妻。年二十三，利轼贸布客死，氏闻讣痛绝复苏，绝食七日。或告以夫柩未归，夫嗣未定，遂复忍死，立嗣营坟墓，备历艰楚。事闻，特诏旌之。

郑氏 陈叔漠妻。夫卒，子永垣、永昉、永晖俱幼。时有巨室谋欲夺之，舅宗玉、继姑林亦意其不能守也，微讽之，氏恸哭截发断指，誓死靡他。自是目不窥户、足不逾闾者三十余年，灯纫雨织以给诸孤。景泰庚午卒，年七十六。

林氏 王公任妻。年二十七，夫卒，长子文谦三岁，遗腹举次子文诚。氏端静贞淑，尤谨礼节。衔恤茹荼，养祖姑黄、姑赵，昕夕弗懈。日组织抚二孤从师，有声黉序，嘉靖间先后贡，任儒学，氏尚康健无恙，戚里称慕之。年九十四。知县蒋以忠扁曰“贞节”。

陈氏 郑逢荣妻，早寡，既节且孝。年逾七十卒。邑令夏允彝有诗旌之。

郑敬姐 陈奇旭妻。甘贫矢志，人共称之。邑令夏允彝美以诗。

陈氏 吴国和妻。奴张氏国泰妻。一门双节，人称为女中夷齐。邑令夏允彝美以诗。

郑氏 庠生陈纯熙妻。早寡，矢志不移，事翁姑孝。邑令夏允彝以“守节纯孝”旌其门。

郑氏 陈应济妻。归半载夫卒，年十七，无子。稚年矢志，至老不移。奉庶姑尽孝。邑令夏允彝美以诗。

林正姐 陈立丰妻。事继姑尽孝。年二十六，夫卒，抚遗孤如坝。家罹百凶，豪强侵侮，氏以得子为幸，割产业与之。甘贫茹蘗，尽礼隆师，课子成青衿。抚弟之遗孤二，俱有恩义。县令夏允彝以“节孝兼纯”旌其门。

二都 高氏 名京小，龙门人，归本乡林某，年十八，夫卒。里少年瞰其色，求娶于其父母，父母以言讽之，京小正色曰：“妇人从一而终，未亡人岂有再醮之理乎？”自是足不逾阈，戚族罕见其面。事舅姑至孝，尽鬻田宅为供养费。舅姑没，哀毁骨立，拜墓号泣，数日不食，遂入元应宫修净。（采《高氏族谱》）

四都 陈节小 高伯明妻。明卒，抚遗腹子杰，勤女红以自给。嫠居四十九年如一日。弘治十五年诏旌之。

五都 黄氏 陈应瑚妻。年二十四，夫卒，绝粒誓死，勉留余生以事姑育子。备极荼苦，孝慈不衰。年近八旬，不履阶庭。崇禎十三年，县令夏允彝以“冰霜完节”旌之。

马氏 林大化妻。年二十七，夫卒。家贫每绝餐，坚节不移。念祖妣四柩未葬，剪发誓死，昼夜勤女红五十余年，卒为营葬如礼。年八十余，邑令夏允彝以“完节上寿”称之。

六都 陈舆姐 六都人，适闽县林镜。镜早夭，氏年方十九，哀痛欲死。姑解之曰：“妇有娠，幸而男，固延一线之脉也。”氏忍

死以俟，弥月举一男，甫周而殇，氏哀恸几绝，姑再四解之，曰：“吾虽老，尚有余年，妇念儿，则无捐生弃我。”氏遂屏葷茹素，奉姑至耄耋，未尝少懈。盖四十余年家人不闻其声。姑卒年九十二，而氏年六十三矣。巡按何熊祥、刘应龙各扁其庐。

七都 林 氏 郑成材妻。孝事姑嫜。夫病呕血，氏以刀割股和药，吁天代死，服勤七载，自食日惟一餐。三年夫死，篝灯纺织课子。人共称之。

十都 吴 氏 沙京陈伯馨妻。早寡，抚孤炯，娶妇 氏。炯卒，姑媳双节，族党称之。时知县扁曰“节孝双全”。

十一都 王 氏 林以德妻。夫卒，时舅姑老，子孔居甫四岁，又值家落，同母兄怜其少，讽之嫁，氏誓奉老抚孤。后孔居天，复抚二孙成立，苦节终身。洪武乙亥诏旌之。年八十四卒。

何 氏 庠生林明继室。十四日夫卒，遗腹生一女。族艳其姿，强嫁之，百折不回，抚前子无异已出。子歿，又抚幼孙成立，历六十余年无间言。两台以“节慈”旌之。

邱 氏 陈焯妻。归八载夫亡，闭户不出，勤习纺织以抚二孤，俭苦异甚。邻家夜半失火，至氏壁，反风而息，人咸异之。坚守二十余载，获见次子食饩。卒年五十五。

十三都 林 氏 黄伯顷妻。归逾年，生子河清未及周，顷卒。舅姑年老食贫，氏织紵事老育孤。有豪悍欺凌者，辄垂泣解谕之，尝摩清勛之曰：“儿克肖，而父不亡矣。”舅姑先后卒，殓葬如礼。清长，家亦稍振。督学金贲亨扁旌其门，潘潢檄给米帛终其身。卒年八十二。

吴 氏 石埭陈天与妻。七载夫亡，子询仅三岁。姑以痛子卧疴，氏侍汤药，久而弥谨。姑亡，棺殓如礼，辛勤营葬二丧。矢志守贞，杜门纺织，虽父家戚获罕觐其面。抚遗孤而督之成，资款师友不吝簪珥。督学潘潢匾其门曰“贞节”。卒年七十二。



石氏 玉溪陈洪妻。方娠洪卒，三阅月生子植，誓终奉陈祀，养舅姑。未几舅亡，举舅棺与夫同葬。植既长，娶林氏。家有百花壶古画，权贵欲攘之，因摺摭其罪，竟死非命。石诣京雪冤，归与妇林相持而泣，人不忍闻。二孙俱幼，石抚字之，与林双杼寒梭，一灯夜织，卧起相依。石年八十终，林年六十五，人称一门双节。后孙德隆举于乡，八子五登科第，立特祠祀之。

蒋氏 祇姐 陈迪光妻。归二载，夫没，绝食自经，几绝而苏，念翁姑老，且有遗孤，遂复饮食。力贫守节，遇岁荒及火灾，辛苦备尝，甘之若饴。年六十一，郡邑上于直指旌之。

十四都 蔡氏 洋边陈宏见妻。沉静寡言。年十八，归方期。夫卒，生一女，贫无饱餐，矢志不移，孝事姑嫜，务竭其力。

陈氏 李宜可妻。孝事舅姑。宜可卒，氏守节坚贞。邑令夏允彝有诗旌之。

刘氏 渡桥武举林绍箕妻。年三十，夫卒，无子，家贫彻骨，氏忍饥全节，不与人知，惟翁姑忌日，必竭力殄饘。历四十年，冰玉不渝，人共称之。卒年六十三。

十五都 薛氏 周仁仲妻。夫卒，遗腹三月，生子季英。氏抚孤苦守四十余年，备极艰辛。嘉靖壬子，直指曾以礼葬之，学使旌其门，邑尹詹范川书“贞节”以表之。

十六都 陈氏 刘克融妻。年二十四，夫卒，以君谨为嗣，娶游氏。君谨亦旋没，游氏年十九，抚遗腹孤珮，备历艰辛。陈氏年七十三，游氏年八十二，院道以“双节联芳”称之。

十七都 李氏 卓明谋妻。归未半载，夫卒，氏年十九，家贫苦节，矢志不移。年六十二。邑令夏允彝旌其门曰“冰霜完节”。

杨氏 李妃妻。少而寡，力贫孝事翁姑，矢志不改。邑令夏允彝以“节孝兼纯”旌之。

十八都 林 氏 高彦禎妻。年二十三，夫卒，子时丕甫三岁。氏欲死者数，族人与其母劝以藐姑无依，乃止。家彻贫，值年荒，拾艾以自食，作粥以食子，备极艰辛。卒年八十三。乡族叹服。

十九都 陈 氏 漳坂谢磔妻。年十九归磔，逾五年磔死，舅瑾亦同日死。氏治舅与夫之丧，哀不废礼。男文爵尚幼，氏奉姑抚孤，备极辛勤，历节五十年。正德甲戌诏旌之，文爵娶妇陈氏，年未三十，文爵夭，氏与姑黄鹄和鸣者三十余年。

戴 氏 江田陈伯惠妻。六年夫卒，长子漳五岁，次泰三岁，季全遗腹生，戴执丧尽礼，辛勤劳苦，抚育诸孤。比长，资从名师受学。氏篝灯夜织，诸孤在侧读书，不敢少怠。后全及第，蜚声翰苑，戴之教也。卒年八十八。国史庐陵曾荣为撰墓志。

高 氏 陈则渊妻。年二十归渊，四年夫卒，遗腹子守志。家故贫，纺织以给朝夕。或劝令改图，辄泣曰：“吾岂不知穷苦难禁？第念死者可伤，嫁心自灰耳。”后守志卒，未几一孙又卒。氏年七十，艰苦万状，人共哀之。

林 氏 陈凤仪妻。年二十四，夫卒。抚嗣联芳，纺织以佐诵读。事姑杨得其欢心。嘉靖三十年，督学朱衡扁其门曰“贞节”。年七十余，以联芳贵，封孺人。

二十都 郑 氏 陈伯遂妻。年二十三，夫亡，有遗腹男，矢死存孤。时松下未知学，氏令其孤天锡负笈从师，子孙俱为儒者，松下遂多文学士。福清令陆从大以“贞节”旌其门。

二十一都 郭 氏 陈朝豪妻。夫歿完节，抚二孤训以义方，里族称之。

方安里 黄 氏 枫林姜元科妻。年二十七，夫卒，遗孤二岁。继姑待之少慈，家又酷贫，时断薪粒，氏坚节不夺。尝绝爨，抱孤呼天泣，忽鹊巢坠，拾以举烟。后不堪贫迫，归就兄以抚孤。每念翁姑及夫柩，辄痛涕。孤子渐长，即归奉舅姑，营夫葬。年七

十二卒。邑令卢云龙为之传，万编上之两台，旌其庐。

江氏 刘希靖妻。年二十二，夫卒。父闽县嘉登里人，家素封，及寡居，产耗不能支，又无子，乡邻怜之，谕以远资于父，氏以义不出阊，苦节自甘。卒年八十三。

刘氏 陈达声妻。二年夫故，贫无立锥。父母兄弟促之改嫁，矢死不移。勤治纺绩，孝事继姑，足不履门外。邑令夏允彝以“节孝兼纯”旌之。

卢氏 诸生刘有志妻。年十八归志，二十五，夫卒。茹荼全节，抚嗣子沂春成进士。人共称之。

林氏 刘应征妻。年十九归征，生一女。年二十三，夫卒，绝去簪珥，与妇人居未尝言笑，历年六十八如一日。

陈氏 刘世河妻。年二十，夫卒，殮毕，家无寸丝粒米，自缢以从，救之得苏。纺织自给，茹苦若饴，历四十余年，未见其笑容。

大宏里 刘氏 陈显妻。年十九归显，逾年夫卒，力贫矢志。有妇人挟赏动之，氏誓拒之。岁歉，并日而食，之死靡他。守节五十余年卒。

姜氏 王泾妻。年十八归泾，生二女。二十五，夫卒，甘贫矢志，孝事翁姑，簪珥告罄，而孝不衰。卒年五十六。

二十三都 刘氏 郑姓妻。夫死，遭倭变，矢志靡他，守贫全节，七十而终。直指以“贞节”旌之。

胡氏 许克祥妻。年二十，夫卒。兄弟劝嫁不从，勤纺织，孝事舅姑。逢夫忌日入哭祠中而外，寸武不出。无子，卒年七十。知县夏允彝旌以“节孝兼纯”。督学吴之屏亦以“冰霜贞操”旌之。

叶氏 陈四端妻。归端甫月余，夫病，割股调药，祷天代死。夫亡三日，自经，家人救而防之。孑处一楼，童仆不许人，邻有火灾，坚不下楼，四旁俱焚，楼独晏然，众共奇之。邑令夏允

彝以“苦节独完”旌其门。

二十四都 周 氏 董琦妻。三载夫亡，无子，舅姑俱存。父母欲夺其志，氏曰：“吾少读《列女传》，知妇人以不再醮为节，善事舅姑为孝。今夫亡身寡，命也。舅姑无托，吾惟知有节孝而已，他非所计也。”年六十余，同邑刘复全奏旌之。

未详都图 陈 氏 刘宗善妻。年二十八，夫卒，抚二孤。次子壑未及晬，家厄回禄。氏忍饥寒，勤纺织，教子殖家，以贞节终其身。

陈 氏 诸生谢廷最侧室。幼知内则，谨于笑颦。及归最，奉姑嫜惟谨。逾年生子充，四岁，最卒，父母怜而讽之，氏誓不易志。茹苦植孤，始终一节。嘉靖庚子，督学田汝成表其门曰“贞节”。

彭 氏 李科妻。江右文江人。父化，为巨商，至闽卜居，以女许字李进士丕显子科。丕显为侍御，遣科归娶，忽遭危疾。妇即欲往侍疾，母兄持勿听；科没，号恸欲徒步奔丧，兄难之，李族亦阻止。女遽欲自杀，其兄延邻居林郡守商之，林曰：“宜徐思之，毋后悔。”女厉声曰：“为守宜知风化，引人于善，何为作此语？从一之义无所思，当何所悔耶？”母兄不得已，听之往，悲恸传远迩，遂守制不复返。屏处一室，食必悬夫像与俱。其为女时，好观《列女传》及古忠臣义士书，守贞后，事姑极孝，言动有则，处事接物、训诫子孙一准于礼。卒年八十五。

朱 氏 太学生李绍芳妻。夫卒，氏与妾王氏共矢苦节，抚训其孤，乡里称之。邑令秦重泰以“茹蘖丸熊”旌其门，文宗何万化以“双节千秋”旌之。

李 氏 湖阳彭门。

清

东隅 林 氏 张文赞妻。夫卒家贫，善事舅姑，尝采苦菜以

自食。邻媪有劝其改志者，氏叹曰：“人言有毒，苦菜无毒，生可食，死可食也。”年五十七卒。后子孙祭祀，饌虽丰必供菜，以志其苦。知县陈谐扁其门曰“巾幗全人”。同治七年旌。

郑氏 康熙间儒士张必达妻。夫卒，纺织以供瞽姑。医言柏叶露可愈目，因手植柏于庭，经月繁茂，时取露以点姑目，目复明，人以为孝感所致，年八十四卒。同治七年旌。

刘氏 林公泗妻。夫死守节，抚嗣子游庠。同治六年旌。

林氏 郑叙都妻。夫卒，矢志孀守，抚嗣子秉藩成立，入太学，历节五十一年。康熙五十五年旌。

柯氏 郑敬正妻。夫卒，事舅姑，抚三子成立。雍正三年旌。

谢氏 王思美妻。夫卒，奉翁姑，抚孤子，历节四十八年。雍正三年旌。

邹氏 陈茂意妻。雍正十年，知县张之珩以“节孝可嘉”旌。

陈氏 李守书妻。夫卒，奉姑抚孤，备极艰苦。乾隆四年旌。

李氏 王道义妻。年十八，夫卒，抚孤成立。知县卫良佐以“节孝超群”旌。

陈氏 张文妻。夫卒，抚孤成立。知县殷凤梧以“劲节凌云”旌。

陈氏 林德彬妻。夫卒，矢志不渝，抚嗣子继濂游庠。乾隆间旌。

林氏 郑其恭妻。

刘氏 陈于礼妻。

高氏 郑懿勤妻。

邹氏 陈孙遂妻。

高氏 郑纯志妻。



- 李氏 林兹锦妻。
- 林氏 陈兆芾妻，媳郑氏，隆椿妻，同守节。
- 郑氏 陈端正妻。
- 施氏 陈茂义妻。
- 李氏 郑义甫妻。
- 李氏 蓝中二妻。
- 陈氏 阮泰极妻。
- 金氏 李永德妻。
- 江氏 林德耀妻。
- 郑氏 高在祚妻。
- 谢氏 知县陈捷登妻。
- 郑氏 陈式满妻。乾隆庚戌年建坊。
- 林氏 监生陈逢春妻。年十八守节，卒年八十一。
- 朱氏 郑祖吉妻。通书籍，能诗，善楷，尝咏松云：“冬岭孤松秀，苍苍挺数枝，中藏真节操，霜雪不为欺。”吉于乾隆二十九年县试案首，丁父忧，哀毁卒。氏年二十四，抚孤成立。
- 陈氏 生员郑兴楫妻，举人蔚然媳。素通书籍。年二十五，夫故，守节不渝。尝即景咏云：“莫羨郊原外，春来景物华，何如松柏翠？劲节独堪夸。”读其诗而操可见。
- 蒋氏 林仁恭妻。道光间建坊。
- 谢氏 陈有滋妻。孝养翁姑，抚孤成立。道光四年建坊。
- 陈氏 郑勤碑妻。建坊。
- 王氏 陈丕宗妻。夫卒，茹苦含辛，抚孤成立。道光二十二年旌。
- 陈氏 监生王大珠妻。道光间建坊。
- 李氏 郑时建妻。祀省节孝祠。
- 陈氏 林特可妻。守节抚孤。嘉庆九年，学宪恩普以“潜

德幽光”旌。

陈氏 郑行拔妻。夫卒，子有成甫四月，氏辛苦抚育，督责甚严，嘉庆戊寅举于乡。

任氏 黄敬爵妻。道光间旌。

郑氏 林久义妻。

邹氏 王长机妻。

吴氏 张行德妻。夫卒，矢志抚孤，训子履绥游庠。道光二十八年旌。

陈氏 林用时妻。夫卒，孝养老姑，抚育幼子。道光十四年旌。

王氏 林圣添妻。年二十三归林，两月夫故，矢志孀守，以夫侄用材为嗣，娶媳陈氏。材又以血疾卒，媳克承姑志，训嗣子尧年游庠。姑年八十一，媳年六十三，相继寿终。道光间建坊。

陈氏 王代西妻。青年孀守，抚孤成立。建坊。

刘氏 王滚绩妻。夫卒子殇，遗一女。家贫，携女依兄。兄歿，女嫁依婿，婿又歿。典史高延华闻而悯之，给以薪米，并书其扁曰“茹蘖守贞”。年七十二卒。族人为立嗣焉。同治五年旌。

欧阳氏 王邦绩妻。年二十一归绩。未逾年夫病，割股以疗。越二年，复病不起，氏解带自经，家人救醒。翁泣劝之。立嗣子秉枢，氏谆谆勉学，游于庠。督学徐树铭表其门曰“瑶池冰雪”。同治五年旌。

林氏 郑序时妻。坊在石岳岭。

林氏 陈于聘妻。

林氏 郑其积妻。积苦读成劳，以血疾卒。氏奉养耄姑，抚遗腹子随章成立。

陈氏 林圣茂妻。

孙氏 陈于杭妻。

- 林氏 监生陈梦泽妾。媳张氏，承烈妻。俱守节。
- 王氏 陈承范妻。
- 董氏 郑行厚妻。
- 陈氏 林用贤妻，同治五年旌。
- 陈氏 李本作妻。
- 陈氏 郑其秀妻。道光十六年旌。
- 张氏 郑其茂妻。
- 金氏 外委李学秋妻。同治五年旌。
- 郑氏 陈学育妻。
- 郑氏 黄贤孔妻。守节四十四年。事闻，旌之。
- 林氏 陈丕文妻。夫卒，家贫，苦节四十年，抚三子皆成立。以孙修赠宜人。同治五年旌。宣统二年，同次孙尚豪妻严氏建坊。
- 施氏 林宗逵妻。同治五年旌。
- 张氏 陈于德妻。
- 林氏 陈尚忠妻。
- 卓氏 郑昭文妻，矢志抚孤。同治六年旌。
- 林氏 陈承瑶继室。瑶本故家子，苦读善病，氏侍奉十年，无少懈。夫卒，事老姑尽敬尽孝，抚育子女。供奉观音大士，持长斋诵佛终其身。卒年五十七。同治六年旌。
- 陈氏 林用新妻。同治六年旌。
- 高氏 郑昭华妻。华卒，年二十四，以夫侄为嗣，矢志守贞，奉舅惟谨。同治五年旌。
- 陈氏 许字高振钿，未婚钿卒，氏察知之，谓母曰：“儿本当死，奈终鲜兄弟，妹又幼，愿与母同事祖母暮年，然后归作高家鬼。”年二十八，以礼归高家，择嗣子，孝翁姑，和妯娌，戚属罕见其面。后母老，氏迎终养；没为立祀营葬。卒年五十六。

刘氏 陈承梅妻。归陈甫四年而寡，遗孤三岁，茹蘖饮冰，翁姑在堂，备承色养。督孤读书，饬从名师，不令家务纷心。子孚邑庠生。咸丰十年建坊。年九十八岁卒。

陈氏 林久事妻。

唐氏 张顺管妻。

林氏 郑昭燧妻。抚弱居家，以孝谨闻。同治六年旌。

张氏 刘友大妻。

郑氏 陈铎勉妻。矢志冰霜，备尝甘苦。同治六年旌。

洪氏 王友严妻。

郑氏 陈承豪妻。

颜氏 黄其潮妻。

施氏 周亨祥妻。

林氏 郑行香妻。

王氏 黄贤畴妻。

林氏 监生黄国用妻。

欧阳氏 监生郑瑞霖妻，与妾陈氏同守节。同治五年旌。子文彬，邑庠生。

林氏 郑茂奎妻。年十八归奎，三年夫卒，家徒壁立，奉姑尽孝，抚孤子资发成立，入太学，尤精于医。氏卒年六十一。同治元年建坊。

林氏 郑昭鸿妻。同治五年旌。

王氏 林祖金妻。

任氏 陈喜勉妻。

程氏 郑行香妻。

陈氏 林忠枝妻。

李氏 □孝达妻。

林氏 陈承纘妻。同治八年旌。

陈氏 许道雅妻。知县崔蓬瀛以“节孝双全”旌。

陈氏 蔡惠修妻。同治五年旌。

孙氏 施孟忠妻。同治五年旌。

林氏 李孔方妻。同治五年旌。

林氏 石凌云妻。同治五年旌。

张氏 李友臻妻。同治五年旌。

林氏 陈承笃妻。

林氏 郑茂增妻。年十八归增，三载夫卒，遗一女二孤，矢志孀守。奉姑尽孝，训子甚严，族党钦之。同治五年建坊。

吴氏 林侯盛妻。同治五年旌。

薛氏 陈承繁妻。

黄氏 陈承金妻。

黄氏 陈承尧妻。子我猷，庠生。同治六年请旌。

邱氏 陈尚洙妻。年十七归洙，善事迈姑，扶持抑搔，从不假手仆婢。二十四岁，夫以苦读成瘵疾卒，氏欲殉，既而曰：“二子俱在襁褓，与其激于烈性，使孤子无依，不如抚之长成，俾亡夫有后。且迈姑在堂，晨昏侍奉，皆吾事也。”乃矢志自守，事姑训子，以孝慈称。子席珍、儒珍，以贡生应乡试。同治四年旌。

蒋氏 陈尚能妻。能卒，遗孤子才及周。奉事舅姑备极孝养，抚育幼子，课以成名。同治五年旌。子鸣鸾，邑庠生。

陈氏 周德培妻。

刘氏 周德秀妻。

郑氏 陈方有妻。同治三年，教谕谢绍筠、训导黄兆鳌以“冰清玉洁”旌。

郑氏 陈尚岩妻。

郑氏 林洸祖妻。

陈氏 黄昌开妻。



- 高 氏 周亨明妻。  
 林 氏 王有香妻。同治四年旌。  
 黄 氏 杨资镇妻。  
 董 氏 张敦岗妻。  
 任 氏 监生刘孝登妾。  
 黄 氏 陈彦斌妻。  
 郑 氏 陈崇德妻。  
 郑 氏 王梦花妻。  
 黄 氏 周德伦继室。同治四年旌。  
 郑 氏 林道烈妻。  
 林 氏 郑茂楷妻。  
 陈 氏 郑茂斌妻。  
 张 氏 黄贤鲁妻。  
 蒋 氏 林有芳妻。  
 谢 氏 陈尚年妻。  
 高 氏 陈梁勉妻。

林 氏 贡生陈春波妾。勤中馈，尤工针黹。生一男一女，常以庶出不敢与嫡子匹。年三十，夫与嫡先后故，抚育男女，一家和睦，人以为贤。卒年四十四。

- 王 氏 陈崇实妻。  
 郭 氏 郑昭乐妻。坊建牛山下。  
 陈 氏 张茂都妻。  
 田 氏 陈积善妻。

陈 氏 高则源妻。年十八归源，九载而寡，遗一女二男，长敦致，次鹏章，抚之成立毕婚嫁。未几，敦致歿，其妇陈氏，年二十八，遗孤纯声等三人，氏借媳又抚之。纯声既娶而夭，其妇黄氏年二十六，氏复借媳及孙媳抚其孤如抚纯声时。遭家多故，茹

苦夔居，氏以失明。光绪己卯，鹏章举武闈，其子懋德寻亦籍学，氏皆身见。敦致子浑金，后亦继懋德而籍学，懋德复以毕业法政奖举人。氏于癸未年获旌，建坊时犹健在，至七十二岁卒。媳陈氏，卒年五十九；孙媳黄氏，现年五十七。

王氏 贡生刘协妻。年十八归协，二十七岁协卒，抚遗孤五，奉舅姑，睦妯娌，内外无间言。尝割臂以疗姑病，舅病又割臂。舅寻歿，氏奉姑益谨，饥寒疴痒，调护备至。姑年百有三岁卒，氏哀泣不自胜，越七日亦卒，年七十三。子逢源食饩，以贡候选训导，孙春森、春曦，亦相继籍学，氏皆身见之。同治乙亥旌，建坊南关外。

蒋氏 陈敬洲妻。守节二十年。现存。

高氏 刘景贤妻。年十九归，而继姑已歿，夫弟炳南甫四龄，饥饿寒煖，氏护之唯谨。以故翁无内顾之忧。夫歿，恸绝者数，遗孤三，婚娶毕，而长次继歿，氏悲恸丧明。已而三男又歿，遗一孙为娶妇。逾年氏卒，年七十九。光绪甲辰旌。长孙用英妻高氏，次孙用彦妇郑氏，均以节终。

邹氏 刘景瞻妻。守节二十八年，现年五十六岁。男用焕妇邹氏，亦以节终。

陈氏 邑庠生刘向阳妻。年二十三孀，无子。氏哀毁欲殉，家人苦劝乃止。自是屏居，所亲罕窥面。嗣子用声既娶妇抱孙，氏稍自慰，然终其身无笑容。年四十五卒。光绪十一年旌，建坊南关外官仓岭前。

郑氏 陈秉鉴继室。孀守二十八年卒。

陈氏 名香娃，附贡生宗藩女。幼字河阳张统溥，未嫁而夫卒。家人秘不以闻，女知之，忧郁成疾。医以药，女曰：“我气结，非药所能愈也，但得尸归张，于愿足矣。”言已而歿。两家父母义之，遂合葬焉。

张氏 陈尚韬妻。孀守三十八年卒。

郑氏 陈崇星妻。

陈氏 王敬宏妻。

黄氏 陈尚沧妻。孀守三十四年。现存。

陈氏 郑用尊妻。

陈氏 王友鉴妻。

陈氏 黄贤玉妻。

郑氏 陈尚通妻。

林氏 陈抡元妻。

张氏 己卯举人大挑教谕刘菁继室。夙娴内则，至性过人。夫得厥阴疾，氏侍汤药，备极劳瘁者五稔。年二十七，夫歿，屏居纺织，族党称重之。守节二十三年。

刘氏 陈振鏞妻。归数年，不宜子，为夫置妾张氏，生女甫三岁而鏞歿，氏与妾矢志守节。刘年五十四，妾年五十。

李氏 刘景施妾。年十八归，甫三日孀。茹素终身，守节十二年卒。光绪某年，嫡孙盐大使春晖为之请旌。

林氏 陈孝钟妻。

卓氏 陈崇梁妻。年十八岁孀。敬事翁姑，抚孤成立，守节二十五年卒。

郑氏 陈孝浚妻。

严氏 陈尚豪妻。光绪三十二年旌，与祖姑林氏同建一坊，在里仁村西。

陈氏 刘用洪妻。二十三岁孀，现年六十五。光绪二十九年旌。

谢氏 陈丕培妻。孀守六十年卒。

陈氏 刘用湘妻。二十九岁孀，卒年六十二。光绪七年旌。

任氏 陈尚居妻。孀守十八年卒。

林氏 贡生郑锡恩继室。年十九孀，抚遗腹子鼎铭成立，邑诸生。光绪庚子旌，年七十一。

郑氏 陈孝颖妻。

邵氏 陈崇镛妻。孀守十八年卒。

陈氏 张茂智妻。

林氏 郑昭俊妾。光绪十八年旌。

陈氏 监生黄诚仰妻。年十九孀，守节五十八年卒。光绪甲午旌，建坊。

黄氏 郑国本继室。现年五十八。

陈氏 刘景龙妻。

郑氏 陈承柔妻。孀守四十五年卒。

许氏 王振联妻。年二十八孀，守节五十年卒。

陈氏 武举人郑鹏超妻。

陈氏 梁秉鹤妻。

施氏 郑昭铤妻。

柳氏 陈孝渭妻。

陈氏 郑昭兆妻。

陈氏 贡生黄敬陶妻。年二十七孀，守节三十年卒。

张氏 郑国馨妻。年十六归，甫三载夫卒，遗腹产一男，抚之成立。

陈氏 林连攀妻。

某氏 贡生郑义塘妻。年三十，夫卒，抚嗣子际泰成立。

王氏 郑锡扬妻。

林氏 陈承登妻。

郑氏 陈崇畅妻。

刘氏 陈尚传妻。

苏氏 陈承顺妻。年十九孀，守节二十三年卒。

- 王 氏 刘用富妻。年二十七孀，守节十三年卒。
- 林 氏 陈良臻妻。年二十四孀，守节十九年卒。
- 王 氏 陈孝贵妻。附生王鸿銜女。年□□□。
- 郑 氏 刘友畅妻。孀，守节三十五年卒。子镇铨，籍武庠。
- 余 氏 生员陈学濂妻。
- 卓 氏 陈崇兴妻。
- 杨 氏 监生郑国缘妻。
- 孙 氏 陈尚英妻。
- 林 氏 王诚钟妻。
- 林 氏 郑昭鸿妻。
- 林 氏 郑用鹤妻。
- 陈 氏 郑昭广妻。
- 郑 氏 程齐懋妻。
- 陈 氏 郑肇拱妻。
- 萧 氏 蔡祖和妻。
- 高 氏 郑昭斌妻。

西隅 林 氏 陈友叔妻。未婚，友叔他适。翁病笃，氏归就养，脱簪珥为医药资，翁歿，治丧如礼。友叔归，始成婚。后友叔又他往无踪，氏抚男女，孀守四十余年。

陈 氏 郑良进妻。归进二年，夫卒。氏奉姑抚孤，历节五十余年。知县卫良佐以“节傲冰霜”旌。

郑 氏 陈其澧妻。

李 氏 郑纯能妻。夫卒，时海寇蚊集，氏保七岁孤以延一线；又值耿变，避寇途遇盗，欲杀之，氏诉其伶丁孤苦得免。知县卫良佐旌曰“阃节昌家”。年九十六卒。

陈 氏 李亨墀妻。青年孀守。知县杨方江旌曰“节操冰清”。卒年九十余。



郑氏 陈志豪妻。年十八，夫卒，守节六十年。知县杨儒臣旌曰“松筠清操”。

陈氏 郑良献妻。夫卒抚孤。知县廖兴镇以“丹穴怀清”旌。

李氏 郑德生妻。夫卒，守节五十八年。知县廖兴镇以“冰玉比节”旌。

王氏 郑纯应妻。夫卒，孀居五十年。知县戴永朴给扁旌之。

林氏 郑敬尧妻。归逾年，夫卒。教谕黄寅亮、训导伍可远以“义重冰霜”旌。

郑氏 陈尔金妻。

郑氏 陈可立妻。

郑氏 陈爱香妻。

谢氏 郑良淇妻。夫卒，矢志抚孤。知县贺世骏旌曰“节孝可嘉”。

骆氏 郑良进妻。夫卒，奉姑抚孤。乾隆十五年旌祠。又骆氏，郑祖禹妻。

陈氏 郑纯铨妻。夫卒，孝事翁姑，抚孤成立。孙玉树，乙卯举人。乾隆八年旌。

林氏 郑肇桃妻。未婚，肇桃往浙卒。氏白舆素服，诣夫家择嗣，饮冰茹蘖，奉姑以孝闻。卒年五十四。

陈氏 张孔植妻。青年孀守，抚孤成立。历节四十余年。

陈氏 郑良琦妻。夫卒，抚孤汉章，课训经书，以母兼师。迨汉章登仕籍，尤谆谆以为国为民邮囑。卒赠安人。

刘氏 陈行富妻。富商东洋，卒于乍浦。时氏年二十五，弃家资亲运柩归葬，抚三子成立。卒年六十。

郑氏 陈永济妻。

林氏 陈义雍妻。

王 氏 郑代焕妻。

高 氏 郑昭亨妻。

林 氏 郑代邻妻。

林 氏 郑良正妻。

金 氏 李永德妻。

林 氏 陈式龙妻。

李 氏 郑师机妻。

陈 氏 郑纯嘏妻。

姜 氏 郑序宽妻。

张 氏 诸生陈道祐妻。

施 氏 生员郑春光妻。

高 氏 陈光枢妻。

张 氏 陈爱敷妻。

陈 氏 郑祖雍妻。

谢 氏 郑良岱妻。

张 氏 郑纯佶妻。

叶 氏 郑奎章妻。

林 氏 郑祖福妻。

陈 氏 王奕思妻。

程 氏 郑祖兴妻。

林 氏 王廷显妻，与夫侄扬尹妻陈氏，均守节。学宪恩普表其门曰“潜德幽光”。道光元年旌。

潘 氏 陈良兴妻。

陈 氏 郑行言妻。

张 氏 陈行歌妻。

董 氏 郑代锦妻。

王 氏 曾恒光妻。

陈氏 郑行奉妻。

李氏 郑祖举妻。

陈氏 郑行仪妻。

黄氏 高长昆妻。

吴氏 王道可妻，与其子妇立国妻陈氏同守节。

郑氏 曾忠江妻。乾隆四十八年旌。

林氏 陈式可妻。

张氏 陈义正妻。

林氏 郑茂美妻。

林氏 郑国泰侧室。

王氏 陈叔永妻。夫卒，四子皆幼，克勤克俭，教督成立。  
卒年五十八。

林氏 陈惟仲妻。

陈氏 郑茂广妻。

郑氏 武生陈捷芳妻。

林氏 郑茂藻妻。

李氏 郑茂韬妻。

周氏 陈茂湘妻。

陈氏 郑得伟妻。

王氏 郑世卫妻。卫卒，遗四子，勤纺织，严教诲，后皆  
成立，家称裕焉。道光间建坊。

谢氏 陈行魁妻。

陈氏 郑昭典妻。已旌。

欧阳氏 监生郑昭美妻。同治五年旌。

陈氏 吴存仁妻。

王氏 郑行恭妻。嘉庆九年，恩学政扁其门曰“潜德幽  
光”。道光十五年旌。

- 林氏 陈世登妻。  
 张氏 陈行大妻。已旌，建坊。  
 江氏 陈式泰妻。已旌，建坊。  
 陈氏 郑行务妻。同治六年旌。  
 曾氏 郑貽添妻。  
 詹氏 武生陈九峰妻。道光间旌。  
 官氏 陈循琚妻。道光间旌。  
 任氏 陈方荐妻。道光间旌。  
 翁氏 郑茂爵妻。道光二十三年旌。

林氏 赠儒林郎陈达勉妻。性仁慈，善待下，尤喜周济。年二十六，夫卒，遗孤子仅六龄，抚膺长哭，曰：“宗嗣书香，赖兹一线。”乃以家财托夫仲兄盛世，篝灯课读，血泪涔涔。子逢韶，承慈训，知孝养，成人授室，旋入国学，众咸谓夔妇有子矣。未几，子又早亡，复偕其媳抚三孙，持家计，黄鹄和鸣，十数年如一日。临卒，谓诸孙曰：“保世以德不以财，尔曹勉之。”年六十四。媳高氏，贞静仁慈如其姑，卒年五十二。咸丰四年请旌，邑侯庞立忠题其坊曰“节孝联芳”，后以覃恩，均赠太安人。

- 林氏 郑行龙妻。  
 陈氏 郑仕岳妻。已旌，建坊。  
 冯氏 贡生陈钟谦妻。已旌，建坊。  
 刘氏 生员陈承虞妻。  
 林氏 郑其芳妻。道光间旌，建坊。  
 周氏 生员陈大镛妻，与妾郑氏同守节。道光十四年旌。

陈氏 增生郑焕经妻。经以笃学成疾，支床八载，氏割股和糜以进。及夫故，奉迈姑，抚弱女，一贫如洗，处困弥贞。以夫弟长子义鼎为嗣，游于庠。道光间旌。

- 郑氏 张家森妻，庠生郑孚诚长女。夫卒，男未及周，家

贫难度，携孤依母家，与嫂陈氏篝灯夜织，共矢贞心。卒七十余。道光十五年旌。

董氏 郑昭志妻。

陈氏 张顺文妻。

郑氏 陈必尊妻。

任氏 郑昭松妻。

林氏 监生陈久青妻。道光二十八年旌。

邹氏 郑同默妻。

林氏 郑序榆妻。

董氏 郑昭位妻。

王氏 陈修和妻。子玉华妇欧阳氏，同守节。

陈氏 郑其高妻。同治六年旌。

高氏 郑昭钟妻。钟卒乏嗣，氏抚弱女，茹苦含辛，以女红度日。卒年六十五。道光间旌。

林氏 张顺团妻。

陈氏 张法起妻。

陈氏 张家标妻。同治五年旌。

倪氏 高尊本妻。同治五年旌。

黄氏 高圣春妻。

高氏 徐世知妻。同治六年旌。

陈氏 张孟恩妻。

陈氏 郑代岩妻。

林氏 生员郑昭恩妻。同治五年旌。

林氏 陈义炳妻。

郑氏 陈方友妻。

池氏 陈端鏗妻。

郑氏 张孟忠妻。



- 郑氏 主朽失传。
- 陈氏 张法天妻。
- 谢氏 郑序科妻。
- 陈氏 郑兴超妻。
- 林氏 郑序魁妻。
- 阮氏 郑茂鼎妻。
- 邵氏 阮恒超妻。
- 林氏 阮恒超妻。
- 陈氏 郑代泮妻。
- 邹氏 郑昭忠妻。
- 林氏 王发香妻。
- 林氏 郑昭畅妻。
- 王氏 陈方枝妻。
- 江氏 陈方棋妻。同治六年旌。
- 陈氏 武生郑成铨继室。同治六年旌。
- 叶氏 郑国岩妻。夫卒，女红度日，备尝甘苦。同治六年旌。
- 高氏 张家让妻。
- 陈氏 监生郑国鹿妻。
- 谢氏 陈于春妻。
- 陈氏 郑昭谟妻。
- 陈氏 郑贻媛妻。媛卒，遗孤三岁，氏矢志自守，勤纺织事翁姑，食贫自甘，历数十年如一日。同治六年旌。
- 陈氏 郑用琼妻。
- 黄氏 陈腾勉妻。
- 陈氏 郑国惠妻。
- 陈氏 张法章妻。年十七归张。后张改儒为贾，卒于日本。

时氏年二十八，闻讣几毙者数，既而幡然曰：“吾殉死易，奈遗孤何？”遂矢志抚孤，纺织终身。同治四年建坊。

高氏 李延瑞妻。

郑氏 陈祥霖妻。

郑氏 张顺锦妻。

欧阳氏 陈式灼妻。夫卒，氏矢志守节，服事翁姑，抚育子女，以慈孝称。卒年七十二。同治四年建坊。

郑氏 陈方桂妻。年十八归桂，六年夫卒，养翁姑，抚子女，以妇兼子，以母作师。厉学政扁其门曰“全节树型”。卒年五十四。同治三年旌。子举勉，裔生。

王氏 张家余妻。同治五年旌。

王氏 郑茂芝妻。

高氏 陈亨澜妻。

张氏 郑用行妻。年十八归行，逾年行病瘵，氏割股和药以进，卒不愈，痛哭欲殉，既念家贫，翁姑老迈，遂矢志坚守。日夜纺织，备尝甘苦。后两老以天年终，氏为营丧葬，率皆如礼。同治七年旌。

高氏 郑昭庭妻。

林氏 陈肅勉妻。同治七年旌。

陈氏 官良响妻。同治六年旌。

林氏 陈式珪妻。

邹氏 陈标勉妻。

李氏 林守田妻。

朱氏 郑国雅妻。同治五年旌。

陈氏 生员郑先春妻。春病笃，氏割股和药进，卒不愈。氏安贫矢志，孝事老姑，抚育幼子。丧葬舅姑皆如礼。子天铸，邑庠生。

高 氏 郑行精妻。同治五年旌。

黄 氏 郑昭河妻。同治五年旌。

何 氏 黄其湍妻。同治五年旌。

林 氏 陈祖忠妻。

郑 氏 陈克月妻。

陈 氏 郑贻秋妻。

田 氏 监生陈文修妾。

陈 氏 吴存丹妻。

张 氏 裔生陈义书妻。

高 氏 刘良钟妻。同治五年旌。

李 氏 陈鹿勉妻。

叶 氏 陈承美妻。

陈 氏 郑昭振妻。

何 氏 陈亨亿妻。

陈 氏 阮德刚妻。

欧 氏 郑行鹤妻。

陈 氏 张敦爵妻。

郑 氏 陈团勉妻。

张 氏 陈承拱妻。

邹 氏 陈承锦妻。年十八，夫卒，惟一女在抱，依母家纺织度活。有营兵游姓欲强娶之，氏闻，将投缳死，邻媪救止。自是足不出闾，亲邻罕见其面。卒年二十九。

郑 氏 陈玉衡妻。

郑 氏 陈澄光妻。

邹 氏 陈浑勉妻。

张 氏 陈捷勉妻。

王 氏 监生郑启隆妻。

陈 氏 张本材妻。

张 氏 陈承定妻。

郑 氏 林捷芳妻。

任 氏 陈方声妻。

李 氏 陈承尧妻，坊建福州东门外。

蔡 氏 陈丕基妻

李 氏 林守理妻。

董 氏 张顺银妻。

郑 氏 郡庠生陈馘麟妻。

郑 氏 王嘉本妻。

陈 氏 郑用发妻。坊建里仁村。

蔡 氏 陈元勉妻。

陈 氏 林宏涣妻。

陈 氏 名添金，武举人张元皋妻。年二十七孀，抚孤守节。

现年七十七岁。

陈 氏 郑惠田继室。夫歿，以节终。

陈 氏 郑谷福妻。年二十一孀，无子，家极贫，女红自度，守节十八年卒。

郑 氏 监生张宗龄妻。年二十一孀，遗孤二，氏教养兼施，皆有成就。长心杰，国学生，全闽法政毕业，次心贯，邑庠生。

郑 氏 陈克和妻，年二十七孀，抚三孤毕婚娶。守节四十三年而卒。

黄 氏 陈方捷妻。年十四归捷，二十九岁，捷卒。家无担石，氏勤女红，抚孤成立。知县某旌其间。卒年六十八岁。

王 氏 陈榛妻。年二十八孀。矢志抚孤，敬事舅姑，守节

至四十八岁卒。知县某给以匾曰“节孝流芳”。

陈氏 张本宜妻。

王氏 陈珂勉妻。年十七归，而姑已歿。珂患劳损症，长年卧病，家无弟兄，氏事舅惟谨。舅歿，丧葬如礼。已而珂卒，氏年方二十七，抚夫从堂侄为嗣。守节五十年卒。光绪十七年旌。建坊井下村后官仓岭。

郑氏 陈光让妻。

林氏 陈鼎年妻。年二十八孀，抚夫侄为嗣，事姑孝谨。年四十卒。

张氏 陈承贤妻。年十六归贤，三载而孀，抚夫甥为嗣，事舅姑以孝。宣统元年，邑令为请旌。

张氏 武生陈馨妻。

黄氏 县前铺郑昭河妻。幼许字河。寻失怙恃，兄嫂继逝，侄友忠等四人均稚弱。河父母亦前卒，河病且笃，遂迎娶以侍汤药。不数月而河歿，氏年方十七。河族式微，无期功亲可嗣，拮据衾殓，哀毁如礼。丧毕归而抚侄，家贫，勤女红，节缩衣食，积资毕诸侄婚娶。光绪四年，获旌如例，友忠等为建坊，祀节孝祠，知县徐承禧旌以匾曰“松贞”。时氏年六十五，后数年卒。人称义姑。

郑氏 监生陈应祥妻。

陈氏 郑国模妻。年二十四孀，遗孤甫啐，抚之成立，备尝艰苦。卒年七十七。

陈氏 张敦恭妻。年二十七孀，以节终。

高氏 陈方正妻。

郑氏 张本征妻。

蒋氏 郑昭琴妻。

陈氏 郑昭振妻。归振七十日而孀。振病笃时，嘱氏曰：



“尔能终事吾母，九原之下吾无恨矣。”氏泣许之。事主姑九载无倦容，抚嫡二孤如己出。年八十一卒。

张氏 郑国典妻。

高氏 郑昭顺妻。二十九岁孀，守节四十四年卒。

何氏 郑用宜妻。年三十孀，守节至三十八年卒。

林氏 里仁陈善勉妻。

金氏 郑用鉴妻。

陈氏 郑用本妻。

杨氏 郑国扬妻。年二十三寡，孝翁姑，抚幼子。县令为之请旌。

黄氏 郑用大妻。

魏氏 里仁村陈临勉妻。

沈氏 郑和堂妻。

卢氏 郑用奎妻。

林氏 里仁陈同勉妻。

李氏 上湖江能云妻。孀守三十六年卒。

郑氏 上湖江能照妻。

二都 陈氏 郑德贺妻。尝割股疗母疾。及归郑，早寡，事翁抚子，历节五十余年。知县傅宸楹旌曰“恺摯堪风”。卒年八十余。

林氏 龙门高在宽妻。宽卒，氏立嗣承桃，矢志不磨，历节四十余年。知县张尹旌曰“柏操松龄”。

林氏 高纯璜妻。

魏氏 郑师任妻。

黄氏 郑师玉妻。

谢氏 监生郑光浩妻。

林氏 郑孟豪妻。

- 陈 氏 郑惟敬妻。  
 陈 氏 郑东山妻。  
 林 氏 郑大腾妻。  
 马 氏 郑崇凝妻，与侧室李氏同贞守。  
 朱 氏 郑师应妻。  
 陈 氏 郑用藩妻。道光十六年旌。  
 陈 氏 郑惟应妻。乾隆四十九年旌。  
 林 氏 郑作宾妻。道光十六年旌。  
 郑 氏 高淦诚妻。  
 戴 氏 郑善桂妻。乾隆五十六年旌。  
 陈 氏 监生郑龙彪妻。  
 林 氏 高体略妻。  
 林 氏 高纯声妻。  
 王 氏 生员高建基妻。  
 邹 氏 高文仁妻。  
 李 氏 高体健妻。  
 陈 氏 高体宗妻。  
 郑 氏 高居调妻。  
 张 氏 高体虔妻。

郑 氏 道夏女。父母俱亡，依叔母以居。许字闽邑薛氏子，薛亦无父母，寻夭。讣至，氏哀痛翦发矢志，茹素终身。年四十余，往薛门，拜宗祖，为夫立嗣，仍回依叔母，操女红以给朝夕。卒年五十九。

邹 氏 高捷诚妻。

陈 氏 高则芳妻。夫卒，氏哭以诗曰：“夫卒年方廿七时，孀居孤子不胜悲。可怜堂上翁姑老，孝事翁姑慈抚儿。”

高 氏 赵祖玉妻。

林氏 黄国暖妻。

林氏 高体舒妻。

陈氏 曹朝根妻。

陈氏 郑惟粹妻。

李氏 郑道尚妻。

郑氏 赵用邦妻。

范氏 赠君郑道商妻。年二十寡。奉迈姑，抚嗣男元璧，课之读书，赖以成名。卒年七十一。晋赠太夫人。

程氏 赠君郑榕妾。年二十五，夫卒，与嫡陈氏奉姑抚孤，同心无间。卒年五十九，以本生男元璧贵，赠太夫人。

张氏 龙门庠生高凤鸣妻。事姑如母。年二十五，夫死不哭，父怪而问之，氏曰：“我哭姑更哭。”父恐其烈，防之，氏觉曰：“我死，姑无媳，子无母，父无女，弟无姊，何敢死？”及姑卒，期犹哭，泪尽继以血，乡人哀之。年六十一卒。同治七年旌。

郑氏 林道春妻。

陈氏 郑道镇妻。

林氏 郑用贞妻。

薛氏 郑行定妻。

陈氏 高体赛妻。

林氏 高润诚妻。

郑氏 高体让妻。同治五年旌。

陈氏 郑维宽妻。嘉庆九年学宪给匾。

李氏 高体祖妻。

管氏 高体伦妻。

吴氏 高行仁妻。

卓氏 黄国育妻。

陈氏 高成筹妻。

- 赵 氏 郑任长妻。  
 林 氏 郑用高妻。  
 林 氏 郑任魁妻。同治七年旌。  
 林 氏 高体增妻。道光二十六年旌。  
 连 氏 林必尊妻。  
 薛 氏 郑宏芝妻。  
 黄 氏 林绍禄妻。同治六年旌。  
 郑 氏 黄庆扬妻。  
 林 氏 郑龙妻。  
 卓 氏 高体铄妻。  
 李 氏 郑用仕妻。  
 陈 氏 郑道川妻。  
 莘 氏 监生高文璋妻。  
 林 氏 郑道銮妻。  
 林 氏 郑用享妻。  
 郑 氏 高轩妻。同治七年旌。  
 陈 氏 郑用左妻。  
 李 氏 郑用秦妻。  
 郑 氏 黄庆聚妻。  
 黄 氏 赵祖业妻。  
 王 氏 高定诚妾。年三十，夫故，矢志守节，养迈姑，抚嗣子，以慈孝闻。  
 潘 氏 郑道嵩妻。  
 陈 氏 高诚连妻。  
 张 氏 高诚淑妻。  
 张 氏 高宾仁妻。同治六年旌。  
 阮 氏 高富仁妻。同治七年旌。

- 梁氏 郑道烈妻。
- 陈氏 生员高文升妻。
- 张氏 生员高英妻。
- 宋氏 郑宏康妻。
- 高氏 郑用儒妻。
- 陈氏 郑道让妻。
- 林氏 郑用梅妻。
- 邹氏 高总仁妻。
- 陈氏 郑允纯妻。
- 林氏 高仁双妻。
- 高氏 郑逢春妻。
- 郑氏 黄德彩妻。
- 陈氏 高仁汉妻。
- 陈氏 阜山詹大淑妻。
- 林氏 阜山郑世同妻。
- 陈氏 阜山吴时豪妻。
- 潘氏 龙门高锐仁妻。守节六十年卒。同治十年旌。
- 李氏 阳厦郑伏波妻。守节三十二年卒。学使孙旌以匾。
- 陈氏 高敬匡妻。
- 黄氏 高体魁妻。光绪丙午旌。
- 王氏 高信鏞妻。
- 陈氏 高居累妻。
- 李氏 高尊伟妻。
- 王氏 高居璇妻。
- 林氏 上洋顶生员高鸿洛妻。年三十孀，哭夫丧明，茹苦抚孤，守节十五年卒。
- 陈氏 高居炳妻。



- 陈氏 上洋顶高居昌妻。年二十四孀，守节四十二年卒。
- 张氏 龙门高居采妻。
- 叶氏 龙门高标侧室。
- 高氏 阳厦郑景水妻。年二十六孀，抚夫侄为嗣，卒年四十五。
- 高氏 阳厦郑统富妻，年二十九孀，卒年五十。
- 高氏 阳厦郑兆新妻，年二十七孀，守节二十年卒。
- 陈氏 高居华妻。
- 陈氏 高贤枝妻。
- 赵氏 高聚仁妻。
- 程氏 龙门高居坚妻。年二十孀，卒年八十五。
- 池氏 龙门高涛仁妻。年十九孀，卒年七十二。
- 林氏 高居足妻。
- 林氏 龙门高体唐妻。年二十四，夫卒，矢志抚孤成立。娶媳阮氏，甫二年，孤又歿。光绪六年，同媳获旌建坊。
- 郑氏 龙门高居所妻。年二十一孀，卒年六十九。
- 江氏 高居绥妻。
- 杨氏 龙门高信义妻。年二十孀，卒年七十八。
- 陈氏 龙门高照仁妻。年二十四孀，卒年四十二。
- 陈氏 龙门高渠仁妻。年三十孀，卒年四十九。
- 王氏 龙门高志会妻。年二十五孀，卒年六十六。
- 蒋氏 龙门高居桓妻。年十八孀，卒年四十岁。
- 谢氏 龙门高简仁妻。年二十九孀，卒年五十二。
- 林氏 龙门高居捷妻。年二十七孀，卒年五十六。
- 周氏 龙门高居来妻。年十九孀，卒年六十。
- 裘氏 高居山妻。
- 叶氏 龙门高豪仁妾。年十九孀，卒年七十。

- 林氏 龙门高全仁妻。年二十八孀，卒年六十。  
张氏 龙门高椿仁妻。年十八孀，卒六十六。  
林氏 龙门高推仁妻。  
郑氏 龙门高体董妻。年二十孀，卒年六十五。  
陈氏 龙门高体暖妻。年二十八孀，卒年五十九。  
张氏 龙门高体容妻。年二十二孀，卒年五十一。  
黄氏 龙门高体爱妻。年二十二孀，卒年六十。  
林氏 上洋顶高银诚妻。年二十六孀。卒年五十三。  
林氏 龙门候选县丞高连波妻。年三十孀，五十四卒。  
郑氏 龙门高团仁妻。年二十八孀，卒年四十九岁。  
邹氏 龙门高皆诚妻。年二十五孀，五十一卒。  
谢氏 龙门高榦《勉仁妻。年十九孀，七十二卒。  
林氏 龙门高纯文妻。年二十三孀，五十九卒。  
王氏 龙门高咏仁妻。年十八孀，四十二卒。  
陈氏 龙门高居日妻。年十八孀，卒年五十。  
魏氏 龙门高信宽妻。年二十二孀，四十八卒。  
陈氏 高居炽妻。

王氏 龙门高居乾妻。年十九，夫得痲疾，久不愈，请绝婚。氏矢志不二，归侍汤药。甫二年，夫卒，无子，纺织自给，抚夫侄为嗣，奉迈姑甘旨无缺。姑疾笃，尝割股以疗姑疾。宣统三年建坊。

- 陈氏 首占郑宏取妻。年二十九孀，卒年六十九。  
陈氏 高居图妻。  
李氏 首占郑宏传妻。二十九孀，卒年六十五。  
林氏 郑中忱妻。  
林氏 郑宏旺妻。  
陈氏 郑允钦妻。

- 陈 氏 郑允添妻。  
 淡 氏 首占郑允堆妻。二十六孀，卒年二十七。  
 石 氏 郑允清妻。  
 黄 氏 郑用庆妻。  
 林 氏 郑宏庄妻。  
 陈 氏 郑允兴妻。  
 张 氏 郑用熟妻。  
 王 氏 郑允著妻。  
 陈 氏 首占郑用应妻。二十岁寡，八十三岁卒。  
 林 氏 首占郑宏治妾，二十八孀，六十六岁卒。  
 黄 氏 郑用罢妻。  
 林 氏 郑用鹿妻。  
 蒋 氏 郑用棉妻。  
 谢 氏 郑允潮妻。  
 邹 氏 首占郑允凤妻。年二十八孀，卒年五十一。  
 杨 氏 郑宏灼妻。  
 林 氏 首占郑允剥妻。年二十七孀，卒年五十岁。  
 卢 氏 首占郑允邦妻。年二十三孀，卒年三十七。  
 程 氏 首占郑宏进妻。年二十九孀，卒年七十岁。  
 陈 氏 首占郑允铭妻。年十八岁孀，卒年二十八。  
 陈 氏 首占郑宏敏妻。年二十九孀，卒年五十六。  
 陈 氏 首占郑宏根妻。年二十一孀，现年七十岁。  
 林 氏 首占郑宏雅妻。年二十七孀，卒年四十六。  
 罗 氏 首占郑宏熙妻。年二十二孀，卒年六十七。  
 陈 氏 首占郑道谦妻。年二十三孀，卒年七十三。  
 陈 氏 首占郑宏存妻。年二十九孀，卒年六十二。  
 曾 氏 首占郑宏还妻。年二十七孀，卒年二十九。

陈氏 首占郑允精妻。年二十九孀，卒年五十二。

林氏 首占郑用让妻。年二十三孀，卒年五十四。

林氏 郑宏信妻。

林氏 首占郑道诵妻。年二十五孀，卒年六十六。

李氏 郑宏循妻。

陈氏 郑宏棋妻。

林氏 郑中新妻。举人林定四女。

林氏 生员郑宗爵妻。

李氏 首占郑宏颜妻。年二十孀，遗孤产甫旬日，家赤贫，族人郑怡为醮金依助，丧乃以举。未几，姑又歿，拮据殡葬如礼。励节抚孤，纺织度日，虽馆粥弗充，晏如也。行年五十一，犹足不逾闾，族党钦其节，有莫覩其面者。

雷氏 监生郑琼锵妻。年二十四孀，守节三十一年卒。

翁氏 监生郑景灏继室。年二十六孀，卒年五十五。

陈氏 乙卯举人授浦城学训导郑寅妻。年二十八孀，守节二十六年卒。

郑氏 阍兜高纯竹妻。光绪间建坊。

张氏 高纯便妻。

高氏 鹏上黄良敦妻。年二十一孀，卒年五十九。

氏 鹏上黄增魁妻。年二十三孀，卒年二十五。

高氏 鹏上黄良耕妻。年二十六寡，卒年五十六。

林氏 鹏上黄纲实妻。年十九孀，卒年二十四。

李氏 廩生黄会午妻。年二十八孀，卒年六十三。

陈氏 鹏上黄良熙妻。年二十九孀，卒年五十二。

高氏 鹏上黄良瑶妻。年二十九，夫卒，三十八歿。

郭氏 鹏上黄万时妻。光绪间旌奖建坊。

李氏 黄良松妻。

- 周氏 鹏上黄良章妻。年二十四孀，卒年四十八。
- 高氏 阳厦黄景鏗妻。年二十二孀，卒年三十六。
- 陈氏 阳厦杨用明妻。年二十四孀，卒年六十六。
- 黄氏 杨克进妻。
- 吴氏 杨慈孝妻。
- 林氏 阳厦杨端友妻。年十九孀，卒年六十五。
- 黄氏 杨克敏妻。
- 黄氏 杨益友妻。
- 李氏 赵必枝妻。
- 高氏 阳厦杨团友妻。年二十二孀，卒年四十八。
- 陈氏 吴纯教妻。
- 陈氏 吴纯庸妻。年二十八孀，卒年六十一。
- 欧阳氏 杨顺友妻。
- 林氏 首占郑用则妻。年三十孀，卒年六十一。
- 陈氏 郑宏辉妻。
- 林氏 首占郑宏准妻。
- 林氏 首占郑宏旭妻。
- 陈氏 首占郑宏许妻。
- 郑氏 龙门高居城妻。年三十孀，卒年七十四。
- 王氏 高居阜妻。
- 陈氏 龙门高居钦妻。年二十二孀，卒年五十六。
- 王氏 高信武妻。
- 蔡氏 生员高璠妻。
- 林氏 吴远拔妻。年二十六孀，卒年五十六。
- 卢氏 生员高蔚芳妾。年二十一孀，卒年三十。
- 潘氏 生员高球妾。年二十五孀，卒年三十五。
- 郑氏 高居颂妻。年二十七孀，守节以终。



卓氏 阳厦黄国敬妻。光绪间旌，卒年九十八。

三都高氏 陈长芬妻。事姑以孝闻，夫卒将殉，姑止之，曰：“汝孕已数月，若生男，为我抚之；生女，任自为也。”后生男，茹苦抚孤，以迄成立。卒年七十八。

林氏 陈克畏妻。夫卒，子世甫两周，励节抚孤。卒年八十四。

郑氏 陈世厚妻。夫卒，子甫弥月，亲属垂涎，将不利于孤，氏毅然护持，孝事孀姑，抚幼子鸣西成立，入太学。

郑氏 陈于上妻。夫卒，以纺织易菽水奉姑，抚嗣子有成。苦节五十余年。

高氏 郑德来妻。

卢氏 陈恒传妻。夫卒，纺织度生，矢志靡他，晚年与孙寄食于族叔家，歿为之殓。年七十一。乡里哀之。

陈氏 郑贞挺妻。

林氏 张茂章妻。家极贫，纺织度生，寡言语，慎出入，终其身乡里鲜有见者。

高氏 岱边陈恒勇妻。年二十，夫卒，足不履户外者三十年。平居慎言语，无怨怒，以俭约自持。生一女，教嫻内则。卒年五十九。嗣子鸿才，庠生。道光旌，建坊。

连氏 林必万妻。

陈氏 郑尚吉妻。

郑氏 陈世积妻。事姑尽孝。夫卒，子公文甫四岁，纫麻擘苧，以供饘粥。文好嬉戏，氏挞之，姑怜阻之，泣曰：“稚子心性未定，养而不教，则纳于邪。挞之，使有所惮而自克耳。”卒年六十。

陈氏 高昌升妻。

郑氏 林有如妻。

郑氏 珠湖陈公奎妻。夫卒，子甫三周，矢志孀守，孝事翁姑。家无厚产，勤俭治生计，积数十年，渐致殷实。子良润，入太学。学使恩普以“潜德幽光”旌。卒年六十五。

陈氏 高良宵妻。

张氏 庠生陈扬妻。夫卒，将以身殉，姑止之，曰：“累世单传，余二人年老，两孤幼，妇若此，如后事何？”遂忍死抚孤，日事纺织以奉舅姑。逾数载，翁疾，氏焚香告天，愿以身代。翁卒，姑病瘵疾，割股和糜祷于家庙，疾寻愈。子琦，游于庠。卒年七十七。

陈氏 高学道妻。

张氏 郑居堂妻。

王氏 生员谢培元妻。

郑氏 谢治华妻。

陈氏 张敬龙妻。

江氏 郑仁学妻。

陈氏 林光大妻。同治六年旌。

郑氏 谢治苞妻。

黄氏 林有矩妻。

李氏 郡增生谢琼林继室。

林氏 珠湖陈世庆妻。夫卒，以夫侄为嗣。翁姑相继逝，丧葬毕，即登楼不与眷属相见，惟一婢供使令。卒年六十三，足不下楼者三十余年。道光间建坊。

林氏 珠湖陈崇莲妻。莲以弱质苦读，卧疴三载，矢志以殁。时氏年二十七，长子实方八岁，次广书甫离襁褓，遣腹生女，氏殚心鞠育，孝奉翁姑。两老偶沾微恙，药饵躬亲，至忘寝食。治家严而有法，减获无怨言。同治六年旌。

林氏 薛华如妻。

谢氏 林我藻妻。

黄氏 陈季晓妻。夫病笃，祷于天，愿以身代，复割股和药以进，罔效。氏欲殉，翁哭告之曰：“尔姑早亡，妇若此，如襁褓之孙何？”氏遂矢志抚孤学楫成立。

郑氏 陈端严妻。

田氏 珠湖陈公乾妻。夫卒，家贫，编履、纫线以供食用。抚嗣孤成立。

陈氏 高永柱妻。夫卒，男照未离襁褓。稍长，延师课读，勤纺织以佐膏伙。

林氏 陈本经妻。孝翁姑，勤操作。夫卒，子甫三周，茹苦抚孤，治家严肃，邻里贤之。

曾氏 高学培妻。

林氏 陈崇好妻。夫病笃，氏抱幼子佳奉汤药，好哭而囑之曰：“我非怖死，所难恕者儿耳，若为我恤之。”言讫而逝。将殓犹视，氏咬指尖出血，书二绝焚之，有“从些膏兰抛不蓄，甘心誓柏慰陈郎。”之句，目乃瞑。后抚三孤皆成立。

林氏 陈崇调妻。性闲静，勤女红。年十八，夫卒，无子。姑继逝，事后姑惟谨。昼操井臼，夜事纺织，三十年如一日。

欧阳氏 珠湖陈崇建妻。年二十，夫卒，女甫周岁，立夫兄次子为嗣。饮泣吞声，足不出户。及女归林，告嗣子曰：“余所以不死者，事未了也。今婚嫁已毕，未亡人不欲生矣。”遂不食十有一日卒，年三十五。

郑氏 琼林高永灏妻。年二十二孀。光绪己亥旌奖建坊，奉主人祠。

陈氏 郡庠生李瀚妻。卒年五十四。

林氏 珠湖陈本鸿妻。年二十五而寡，遗孤二，长思宜甫七岁，次思泰甫五岁。家贫，氏日夜操作，备历艰辛，抚之成立。

孝事翁姑，甘旨无缺。行年六十余，犹俭勤自励。闾里贤之。

陈氏 李忠焯妻。

陈氏 李孝坤妻。

林氏 李孝胡妻。

陈氏 高居训妻。

王氏 陈元坦妻。

连氏 林祖俭妻。

郑氏 林祥捷妻。年十八孀，卒年四十八。

高氏 陈元魁妻。

林氏 陈尚思妻。

吴氏 林发亮妻。

陈氏 林祥茂妻。

郑氏 张敬振妻。年十七孀。卒年六十。

林氏 张敬畴妻。年二十八孀。卒年五十八。

林氏 谢尊有妻。

邱氏 高孝超妻。

陈氏 林道齐妻。

氏 珠湖陈本铤妻。

林氏 陈端丰妻。

四都 郑氏 坑田邱光辉妻。夫卒，氏抚遗孤，教诲以礼，不令从群儿游，俗有为叶子戏者，尤严戒之。二孤卒皆成立，子正起、孙炳年，俱选用县丞。

陈氏 邱汾渚妻。与侧室同贞守。

陈氏 邱子玉妻。归玉三年，夫卒。氏奉翁姑立嗣，历节三十九年。乾隆二十四年旌。

马氏 陈惟修妻。年二十五，夫卒。氏事姑抚孤，纺织度日。子存焕，邑庠生，早卒，妇林氏承姑志，食贫茹苦，孝养无

亏，抚幼孤祖向成立，娶林氏。未几，向又亡，林呼天号泣，割股无灵，欲以身殉，既念有娠，且重姑在堂，遂矢志养老抚孤。后生男德在，教训成立。德在子三易。所谓苦节亨，或不爽欤？

高 氏 陈宙宗妻。

林 氏 陈廷辟妻。

陈 氏 马惟正妻。

陈 氏 邱元麒妻。

陈 氏 邱有祥妻。

陈 氏 马惟同妻。

邱 氏 陈廷眷妻。

洪 氏 邱孝垂妻。

林 氏 陈祖苞妻。

冯 氏 邱□□妻。

刘 氏 邱有高妻。

李 氏 陈祖孟妻。

余 氏 马惟著妻。

施 氏 李孝开妻。

黄 氏 陈念祖妻。

蒋 氏 邱永祺妻。

林 氏 马以堂妻。

高 氏 陈存鹏妻。

林 氏 陈德贵妻。

杨 氏 举人邱国风妻。

陈 氏 庠生邱国日继室。年十七归邱，越三载夫病，割股和药，旋卒，子方数月，嫡子炳焕才九岁，抚如己出。和妯娌，操井臼，善事舅姑，终其身孝养不衰。子正图，咸丰己未举人。

李 氏 马正容妻。



- 林氏 邱永履妻。  
 刘氏 马正义妻。  
 刘氏 陈承虞妻，同治四年旌。  
 田氏 陈德恩妻。  
 田氏 陈存时妻。  
 郑氏 陈德善妻。  
 田氏 陈德音妻。  
 高氏 陈祖彩妻。  
 田氏 陈存台妻。  
 李氏 陈道润妻。

林氏 监生陈廷通妻。年二十六而寡。夫无兄弟，甫三月姑又逝，翁以恸丧明，氏抚孤事翁，念经礼佛，恤困济穷，祈翁康寿。年余，翁目复明，八十三岁始卒。人谓其诚所感。后氏年将七十，夜梦青衣女童导引升空，旦召家人，自叙一联云：“念吾身励节半生，养老抚孤，迭尝辛苦；勉尔曹存心一点，持斋修行，广布慈悲。”无疾而逝。子春铎，邑庠生。

戴氏 陈廷佐妻。年二十归佐，生一子，三岁，夫卒。姑曰：“家贫如此，何以营丧？”妇曰：“此妇分内事。”丧葬毕，家益困，织席自给。两手患疯，氏曰：“手疯则织席废，是天废吾姑吾儿也。”逾年愈，人谓节孝所感。

- 王氏 陈存节妻。  
 谢氏 陈德常妻。  
 叶氏 马正雅妻。  
 林氏 李仁焰妻。  
 方氏 邱世典妻。

程氏 庠生林治如妻，进士程维清之妹也。归林三年而治如歿。遗一女，赘县尹钱谦益，未逾年，钱歿於发匪之难。母女

孀守。氏年九十五卒，女年七十四卒。均建坊入祠。

林氏 邱世涵妻。年三十孀，守节三十三年卒。

程氏 林冶如嗣子鏞年妻，进士程维清侄女。归鏞年二十日而夫卒。氏矢志柏舟，抚嗣子德荫如己出。荫由海军学校出身，擢北洋右翼都司，氏常勉以忠义，后荫以积劳成疾，歿于滬上，事闻，诏优恤之。氏年六十三而卒。

林氏 邱永兴妻。娴内则，谨言语，里党重之。年三十夫歿，守节四十一年卒。

陈氏 邱世务妻。年二十八孀，守节三十六年。

林氏 陈道润妻。年十七归润，七日而孀，卒年四十八。光绪戊寅年旌。

黄氏 邑庠生潘翰源妻，副贡位中之女也。幼娴内则，纺织佐读。年二十五孀，无子，氏终身孀守，里党贤之。守节二十七年。

陈氏 邱则音妻。

马氏 林学梨妻。年二十五，夫卒，守节三十五年。

卓氏 陈诸攸妻。

李氏 邱维如妻。

陈氏 邱维敦妻。年二十五，夫卒。

陈氏 邱则阔妻。

林氏 邱维玉妻，邵武府学教谕林宝书女。聪慧知书，喜读《列女传》。年二十四，夫卒。

陈氏 邑庠生陈锋女。适国学生邱世传子维钟。年二十，夫卒，缝紉漂洗，以抚嗣子。

郑氏 东渡陈子赛妻。年二十，夫卒。

田氏 陈德音妻。年二十寡，孝事翁姑，卒年六十八，已旌。

吴氏 陈德群妻。归群七阅月而孀。氏矢志柏舟，奉翁姑以孝，里党贤之。宣统元年，经采节局呈请旌奖。

陈门三节妇 东渡陈德协媳也。协生三子：长子蒙，妇林氏；次子贤，妇田氏；三子认，妇卓氏。兄弟相继逝，娣姒同心矢志孀守，人称为一门三节云。

吴氏 下张陈彦如妻。年十九，夫以甲申战歿于阵，祀阵亡祠。氏矢志守节。

袁氏 马厝马正运妻。嫗内则，善治产。年二十八夫故，延师课子，督促甚严。性好善，凡修建祠宇，氏无不捐资襄助，曾舍租二亩零，为水月寺香火田。卒年七十四。光绪乙酉旌。

刘氏 邑庠生马应午妻。

林氏 马亦彬妻。年二十三孀，卒年七十七。

李氏 马守平妻。年二十八孀，卒年八十五。

陈氏 马亦雪妻。年二十三孀，卒年五十。

五都郑氏 林振声妻。年二十八，夫卒子幼。氏矢志孀守，抚孤德魁游于庠。知县黄瑞鹤以“劲节凌霜”旌。

潘氏 陈良兴妻。夫卒，遗孤孔德。族有谋杀其子，氏恐，寄养母家。姑多病，侍奉汤药十余年。乾隆二十五年旌。

韩氏 陈廷恭妻。孝养翁姑，纺织佐读，艰苦备尝。

郑氏 陈子基妻。夫卒，孝以奉姑，勤于课子，尝口吟曰：“菜莫和油煮，为儿照读书。”

林氏 方邦仁妻。年二十而寡，卒年七十五。

郑氏 方秋文妻。归文三阅月，夫卒。家贫，勤女红以养翁姑，丧葬如礼。立嗣子，婚娶成立。

林氏 方治本妻。年二十寡，家极贫，勤治女红，奉姑抚孤，以孝慈闻。

田氏、陈秋章妻。年十七归章，越九年，章卒。姑老子幼，

家徒壁立，余园半亩，荷锄种溉，积囊营葬，辛苦万状。子拱，邑庠生。

李氏 东林村林克翼妻。沉默寡言。二十五，夫卒，抚一男一女，勤俭治生，乡里称贤。

邱氏 陈诸旺妻。年十八归旺。善事太翁姑暨翁姑。越八年，夫卒，子未周岁。稍长，课之读书，尝勸之曰：“汝父苦读未售，尔其毋忘先志。”子席珍，邑庠生。

翁氏 林和隆妻。

方氏 陈道宏妻。

莫氏 方燿宗妻。

林氏 方利文妻。

陈氏 方标宗妻。

游氏 方必文妻。

林氏 陈春树妻。

郑氏 陈春传妻。

田氏 陈道铿妻。

林氏 游忠豪妻。

朱氏 大坪陈春发妻。年二十七孀，守节至七十六岁卒。光绪十七年旌。

蒋氏 陈有本妻。

田氏 陈道枢妻。二十二孀，卒八十八。

方氏 坝仔林云石妻。归逾年而夫卒。时氏年十七，矢志守节，事姑孝谨。民国乙卯旌。建坊。

潘氏 大坪陈彦爵妻。年十五，归数月而寡，茹苦守贞，事姑尤孝。卒年三十九。

林氏 陈秋竹妻。年二十二孀，守节至四十二岁卒。

林氏 陈常敏妻。年二十八孀，守节至五十九岁卒。

黄氏 儒士陈彦煌妻。年二十八孀。缝纫度日，抚孤成立。年四十五卒。

林氏 陈常江妻。

周氏 廩生陈梦斗妻。

叶氏 溪澗增生陈济川继室。年二十三孀，卒年八十四。

田氏 儒士陈诸年妻。年二十六孀，守节至七十岁卒。光绪间旌。

高氏 东园王忠宏妻。

蒋氏 陈诸赞妻。年二十四孀，守节至八十二岁卒。

马氏 陈道联妻。年十九孀，守节至八十二岁卒。光绪间，知县何如谨为之请旌。

王氏 陈彦浚妻。年三十孀，守节至六十九岁卒。

陈氏 上丁魏在深妻。年二十四孀，守节至七十二岁卒。

邱氏 陈彦标妻。年二十八孀，守节至六十二岁卒。

王氏 陈彦帜妻。年二十六孀，守节至五十八岁卒。

王氏 陈彦桧妻。年二十七孀，守节至五十五岁卒。

林氏 下丁陈扬滚妻。

张氏 陈扬禄妻。

卢氏 王建翠妻。

江氏 王建兴妻。

陈氏 三山林启恭妻。年十九孀，卒年五十五。

六都 陈氏 林本冈妻。夫卒，无子，择嗣子显，娶妇陈氏。显又卒，姑媳双贞。知县卫良佐以“节孝可风”旌。

章氏 王国美妻。

陈氏 何亮俊妻。嘉庆间旌。

黄氏 林隆占妻。嘉庆九年，学政恩以“潜德幽光”旌。

马氏 陈恭在妻。



- 陈氏 林孝栋妻。
- 谢氏 陈利起妻。
- 陈氏 林孝武妻。
- 林氏 冯贤就妻。
- 戴氏 何采敬妻。
- 陈氏 林朝康妻。
- 蒋氏 贡生林彪妻。偕妾曾氏同节，建坊。
- 陈氏 何采麟妻。
- 郭氏 林朝静妻。
- 林氏 陈利章妻。
- 郑氏 林朝锋妻。幼娴闺训，善事父母。归锋八载而寡，坚贞自守。孝翁姑，抚孤子，备历苦辛，闾里称之。歿年八十五。
- 何氏 陈克基妻。
- 谢氏 林孝典妻。
- 陈氏 林泰腾妻。
- 黄氏 林朝从妻。
- 黄氏 监生林开运妻。偕妾李氏同节，建坊。
- 王氏 举人陈士炜妻。
- 周氏 林朝辟妻。
- 薛氏 林泰诚妻。年十六归林，逾三载而寡。子甫二龄，将以身殉，母劝之曰：“夫歿家贫，徒死无益。事翁姑，训幼子，一生大节足矣。”由是苦守益力。夫弟泰华夫妇相继歿，氏抚其二男三女，视如己出。子成礼长成，娶媳均亡，夫侄亦夭，命乖年老，闾里怜之。卒年八十一。
- 何氏 林弥淮妻。年二十二，夫故，抚遗腹男长成娶媳旋亡，孙亦不举。一身孤苦，赖女红度日者三十余年。
- 陈氏 林朝葵妻。同治六年旌。

- 黄 氏 林朝域妻。  
 谢 氏 监生陈有技妻。  
 陈 氏 林朝祚妻。同治六年旌。  
 郑 氏 陈道忠妻。  
 杨 氏 樊朝褒妻。  
 何 氏 林朝杰妻。  
 张 氏 王诸枝妻。  
 陈 氏 林臣英妻。同治七年旌。  
 何 氏 林泰雍妻。同治七年旌。  
 杨 氏 樊朝济妻。  
 郑 氏 樊朝耸妻。  
 陈 氏 林泰城妻。  
 林 氏 陈道和妻。  
 卓 氏 陈道章妻。  
 周 氏 陈丕华妻。  
 陈 氏 林泰攀妻。  
 史 氏 生员林弥符妻。  
 王 氏 樊贞材妻。  
 郑 氏 儒士林泰显妻。年二十八孀，遗腹生男，抚之成立。  
 事姑尤孝。守节九年卒。  
 陈 氏 林臣串妻。  
 陈 氏 竹田林泰焕妻。年二十七孀，矢志贞守，抚养幼孤。  
 历节四十九年卒。  
 李 氏 林臣荆妻。年十九孀，守节至五十八岁卒。  
 庄 氏 林臣价妾。  
 陈 氏 林臣滂妻。年二十一孀，守节至五十八岁卒。  
 陈 氏 林良栋妻。二十一孀。卒年四十九。

冯氏 井门陈尚高妻。

林氏 陈承都妻。二十孀，守节至三十九卒。

王氏 陈尚樽妻。

田氏 陈承池妻。年二十七，夫歿，守节四十年卒。

陈氏 竹田林泰淑妻。年二十五孀。事姑孝谨，至老不懈，抚遗孤底於有成。六十七岁卒。

陈氏 林臣早妻。年二十九孀。孝事翁姑，抚孤成立，守节十五年卒。

陈氏 林良苏妻。

田氏 霞墩陈明豪妻。

七都高氏 李应茹妻。年二十五，夫卒。甘心孀守，足不逾闾。奉事翁姑，克尽妇道。抚男发游于痒。历节四十七年。知县黄瑞鹤以“节孝流芳”旌。

陈氏 张茂来妻。

陈氏 林思敬妻。

潘氏 陈奕华妻。

陈氏 李泉祥妻。

郑氏 林孔用妻。

张氏 李汝开妻。

黄氏 张敦松妻。年十七归松，三载夫卒。家贫，勤纺织，奉翁姑，抚嗣孤，字弱女，辛苦备尝，卒年八十八。

曾氏 陈有焕妻。同治六年旌。

郑氏 曾道昭妻。

郑氏 曾家恩妻。同治六年旌。

陈氏 李崇耀妻。夫卒，女仅五岁。家忽遇火，夫柩在堂，氏呼天大哭，百产俱焚，柩独无恙。卒年七十七。立嗣子孝銮。

林氏 贡生曾大杨妻。偕妻陈氏同守节。

林 氏 陈昌典妻。

谢 氏 陈其厚妻。

林 氏 张敦秀妻。

陈 氏 张本如妻。

陈 氏 曹良规妻。同治七年旌。

陈 氏 李崇裕妻。

陈 氏 林中行妻。

官 氏 李梦庚妻。

陈 氏 曾家淮妻。

陈 氏 林佳在妻。

陈 氏 郑昌双妻。年十九，夫卒。家徒壁立，一男一女，就母而居。缝织度日者数十年。

陈 氏 郑仁建妻。

林 氏 郑逢珠妻，年二十一，夫卒。事翁姑以孝闻。抚嗣子典章入太学。同治七年旌，建坊。

曾 氏 陈本忠妻。夫卒家贫，纺织度日。孝养翁姑，丧葬尽礼。抚二孤皆成立。氏母某氏，亦守节六十余年卒。

李 氏 陈本兰妻。兰训塾郡城，身故，氏怀孕八月，闻信扶柩归葬。家贫俯仰无资，有劝其改志者，氏苦节自誓。逾月生男，抚育成立，卒年七十。女一，适欧姓，寡而无子，节操与母同。

陈 氏 曾家添妻。同治七年旌。

林 氏 监生曾道珠妻。同治六年旌。

方 氏 监生游务捷妻。同治三年旌。寄居洞头。

陈 氏 李敦祖妻。

高 氏 陈祖榕妻。

谢 氏 杨孔书妻。

林氏 曾尊余妻。同治六年旌。

林氏 陈其铭妻。

官氏 张敦来妻。

蒋氏 陈祖敏妻。

章氏 王宗禧妻。

林氏 曾孔著妻。

陈氏 游守良妻。

郑氏 曾家本妻。

林氏 曾星炜妻。

郑氏 曾星煌妻。

张氏 曾恒康妻。

林氏 陈祖善妻。

陈氏 李崇楷妻。

园氏 林良宽继室。

陈氏 港西吴本重妻。

张氏 仙桥林忠瑛妻。瑛病，割股和药以进，寻愈。既而瑛以苦学得瘵疾，氏复割股冀如前效，而瑛竟不起，时氏年二十四，矢志抚孤，坚贞自守。

张氏 林义芳妻。年十九归芳，二十一而寡，卒年五十四。

陈氏 林秉森妻。年二十二而寡，家贫，以缝纫度活，历苦节四十年。年六十二卒。

陈氏 华源刘敦祐妻。年二十一孀，卒年七十六。

石氏 刘敦利妻。二十九寡，卒年七十三。

陈氏 刘金鹏妻。二十九孀，卒年四十九。

陈氏 郑孝淮妻。

黄氏 洋下张忠碧妻。年二十孀，事翁姑二十余载，乡里称其孝。



陈氏 张阿财妻。

曾氏 感恩郑善贞妻。氏年十九孀，守节至五十五岁卒。

陈氏 张于椿妻。

吴氏 曾道裔妻。年十九寡，五十四卒。

孙氏 曾道钟妻。年二十四孀，卒年五十九。

林氏 曾道彩妻。年二十三寡，卒年五十九。

陈氏 洋下张本筭未婚妻。五岁抱养夫家，比年十七，消吉以某日成婚，未及期，而夫忽暴病卒。氏矢志靡他，长斋奉佛。宣统元年建坊。

郑氏 曾家禧妾。年二十二孀，卒年四十四。

八都周氏 陈思骥妻。年十八归骥，二年夫卒，矢志孀守，至老不渝。乾隆五年旌。

林氏 陈则敏妻。年二十，夫卒。立嗣子课督成立。为翁姑营葬称礼。乾隆十年，知县戴永朴以“松筠比操”旌。

权氏 王德威妻。威是瘖疾且兼瘫，使人辞婚，氏曰：“事夫，妇职也。”竟择吉勉成合卺礼，别治床席。药饵必躬亲。三年威歿，矢志抚嗣孤。及五旬将歿，忽微吟曰：“结发为夫妇，三年失所天，五旬犹处子，再订未来缘。”著有《闺中草》。

林氏 生员潘奎妻。

林氏 陈本琰妻。

陈氏 黄德锦妻。乾隆间旌。

陈氏 潘仁兴妻。乾隆间旌。

郑氏 陈尔祚妻。

郑氏 陈立品妻。乾妻四十九年旌。

陈氏 潘利厚妻。

王氏 潘恒庆妻。

蒋氏 生员陈宗华妻。嘉庆十二年旌。

林氏 潘贞隆妻。

林氏 生员陈国猷妻。猷以名诸生刻意励行，得癆瘵卒。氏抚一子一女，纺织度生，备尝辛苦。卒年七十八。同治元年，以外孙黄见三赠太宜人。

黄氏 陈学暨妻。

蒋氏 陈学程妻。嘉庆十八年旌。

林氏 陈希端妻。

林氏 潘孝冠妻。夫卒家贫，艰苦备尝。

郑氏 林希香妻。夫卒，家徒壁立，忍受饥寒，不渝其志。

周氏 潘贞好妻。夫卒家贫，矢志抚孤。

谢氏 陈昌贤妻。夫卒，孝养翁姑，女红自给，抚三子皆成立。

郑氏 陈希推妻。

林氏 潘利绥妻。夫卒，矢志抚孤。家贫，纺织以给，足不履外庭者数十年。卒年八十三。

冯氏 陈希莱妻。道光十七年旌。

黄氏 陈希珍妻。同治六年旌。

陈氏 潘友思妻。同治六年旌。

陈氏 潘恒镛妻。同治六年旌。

林氏 陈惟彪妻。

陈氏 潘孝西妻。

刘氏 陈希准妻。道光间旌。

林氏 潘恒开妻。

陈氏 潘友诗妻。

祝氏 封奉政大夫监生陈笔光侧室，年十九归陈，五年夫卒，氏以礼节自守。贞静端庄，性极仁慈。嫡出子妇孙曾男女内外百余人，抚爱如一，三党敬服其贤。卒年七十六。

- 郑 氏 生员陈应准妻。同治二年旌。  
林 氏 潘茂魁妻。  
李 氏 陈圣坦妻。  
陈 氏 曹克辉妻。  
唐 氏 陈希夔妻。同治六年旌。  
田 氏 陈学藻妻。  
林 氏 杨孔华妻。  
林 氏 潘孝辉妻。  
林 氏 潘孝归妻。同治六年旌。  
黄 氏 监生陈心祥妻。同治六年旌。  
陈 氏 潘孝进妻。同治六年旌。  
林 氏 陈圣治妻。  
张 氏 陈希科妻。同治六年旌。  
郑 氏 陈圣恩妻。  
孟 氏 潘懋寿妻。同治六年旌。  
陈 氏 潘孝永妻。同治七年旌。  
田 氏 陈圣厚妻。  
陈 氏 潘孝思妻。  
陈 氏 潘茂田妻。  
吴 氏 陈谟哲妻。  
邱 氏 陈圣发妻。  
谢 氏 杨宗天妻。同治七年旌。  
林 氏 陈立端妻。  
林 氏 陈希勉妻。  
高 氏 陈学桂妻。  
郑 氏 陈希安妻。  
潘 氏 陈希诚妻。

林氏 陈行灿妻。

张氏 陈颂哲妻。颂哲本世家子，以苦读病瘵卒。氏年方二十七岁，重庆在堂，藐孤在抱，仰事俯育，贞静可风。卒年六十一。同治六年旌。

吴氏 监生陈兰芳妻。夫卒，子仅数龄。姒亦早寡，一门两节，松柏同贞，族人罕得见其面。同治六年旌。

黄氏 陈圣廉妻，她封文林郎黄一夔女。夫卒，事迈姑，抚两稚，坚贞自励，处困而亨。同治六年旌。

林氏 陈希勤妻。同治六年旌。

蒋氏 陈饒哲妻。同治六年旌。

林氏 潘茂规妻。

陈氏 潘茂矩妻。

葛氏 陈圣珪继室。

曾氏 陈圣育妻。同治六年旌。

黄氏 陈希年妻。同治六年旌。

田氏 陈端哲妻。

蒋氏 陈圣捷妻。

郑氏 陈义旺妻。

陈氏 潘茂钗妻。

林氏 潘茂莲妻。

陈氏 潘茂谿妻。

丁氏 监生陈绎先继室。

严氏 潘茂池妻。

林氏 潘孝钧妻。

杨氏 石门陈礼光妻。光以英年苦读，得癆疾卒，氏方十八岁。事翁姑孝养备至。抚遗腹孳生仕振、仕章，课之成立。卒年三十五岁。同治八年旌。

高氏 潘恒盘妻。

陈氏 潘恒云妻。

林氏 潘恒麟妻。

黄氏 石门陈圣众继室。年二十八孀。家无余资，一子又殇，无期功亲可嗣。氏痛夫嗣弗立，节缩衣食，积资购田，捐为宗祠祭产，奉夫粟主入祠，族入义之。督学沈源清旌以匾曰“苦节流芳”。

李氏 陈弼顺妻。年十九归陈，甫二年而夫卒。孀守抚孤，足不出户。孤病，忧怖成瘵而卒，三党哀之。

曾氏 陈朝栋妻。夫死，与姑矢志柏舟，连年相继而卒。

黄氏 中书科中书陈用昌继室。年二十四，夫卒。总督许应騫上其事于朝，获旌如例。

郑氏 陈群哲妻。年二十三而寡，守节三十二年卒。

高氏 周长茂妻。年十六归周，二十一岁而夫卒，遗一孤甫三龄，室如悬磬，氏勤女红，抚之成立，长为授室。年近古稀，孙曾绕膝，犹手不停织云。

陈氏 周祖喜妻。年二十四，夫卒。氏矢志守贞，抚孤成立，课之耕作，家以小康。苦节数十年，以寿终。

郑氏 周泽镛妻。年二十孀，守节十五年而卒。

潘氏 陈圣燮妻。年二十二，夫卒，茹苦含辛，持斋自励，训嗣子荀鹤成名。三党贤之。卒年七十。

邱氏 生员陈文麟妻。年二十五，夫歿，氏哀毁逾恒，忧郁成疾，年三十九卒。

李氏 陈仕富妻。

林氏 陈琼哲妻。年二十四而寡，卒年四十岁。

石氏 陈财哲妻。年二十二孀，卒年五十四。

邱氏 陈荫哲妻。年二十四孀，卒年四十三。



- 翁氏 陈期哲妻。
- 吴氏 潘茂舆妻。
- 李氏 潘友镕妻。
- 郑氏 潘茂泰妻。年二十二，夫卒，以节终。
- 陈氏 潘茂俊妻。年二十一孀，守节十七年卒。
- 陈氏 潘恒重妻。年二十五，夫卒，无子，家徒四壁，茹苦含辛，为夫立嗣。女红度活，至老不倦，三党怜之。
- 罗氏 监生潘茂宰妻。年二十六孀，守节十六年卒。
- 郑氏 儒士潘茂辅妻。年二十一孀，守节十七年卒。
- 林氏 潘茂燿妻。年二十五孀，守节三十八年卒。
- 谢氏 潘茂营妻。年二十三孀，守节十三年卒。
- 陈氏 潘为增妻。年二十七孀，守节三十一年卒。
- 陈氏 潘茂大妻。年二十一孀，守节三十一年卒。
- 陈氏 监生潘茂汉妻。年二十三寡，守节四十年卒。
- 郑氏 潘茂泰妻。泰以苦读得瘵疾，氏侍汤药惟谨。及歿，哀毁尽礼。抚夫侄启荣为嗣。历节十一年卒。
- 林氏 寄居闽邑营前陈哲铨妻。夫绩学未售，资志而歿，遗一女。氏立夫侄仕笃为嗣，毕婚嫁。历节三十五年卒。
- 郑氏 陈大忠妻。
- 吴氏 陈圣法妻。年二十三孀，卒年四十五。
- 刘氏 陈仕金妻。
- 潘氏 陈大厚妻。年二十六孀，卒年五十三。
- 周氏 陈圣俊妻。年二十一孀，卒年四十八。
- 郑氏 陈仕洋妻。年二十五孀，卒年五十四。
- 曾氏 陈仕起妻。年二十七孀。卒年五十二。
- 郑氏 陈喜哲妻。
- 欧阳氏 陈会哲妻。年二十孀，卒年四十六。

九都 李 氏 青桥陈国佑妻。年二十一，夫卒，孀守终身。乾隆五年旌。建坊。

李 氏 陈则美妻。同治七年旌。

林 氏 陈正亲妻。

李 氏 青桥陈希忠妻。夫卒，苦节自守，矢志靡他。同治七年旌。

高 氏 湾里生员陈以高妻。同治七年旌。

林 氏 陈行泽妻。同治七年旌。

高 氏 陈希商妻。同治七年旌。

林 氏 李崇衡妻。孤灯夜绩，事姑抚子，乡人重之。同治七年旌。

高 氏 陈文静妻。同治七年旌。

张 氏 陈敬彬妻。守节七十四年，寿一百一岁。同治七年旌。

陈 氏 卓宜连妻。夫卒，二子均稚齿。家无半菽，日则采薪，夜则织履，二子赖以成立。卒年八十八。

郑 氏 陈孟景妻。同治七年旌。

高 氏 湾里陈敬求妻。夫卒，抚孤铭盘成立，充道光乙未恩贡。长孙敷施妻高氏，次孙敷达妻高氏，同孀守。一门三节，邻里称贤。咸丰九年建坊。

郑 氏 青桥举人陈朝溥妻。道光十一年旌，祀省节孝祠。

曾 氏 青桥陈行品妻。道光十一年旌，祀省节孝祠。

邹 氏 李崇庆妻。年二十，夫卒。氏刻苦事翁姑，育孤子，闺门之内肃然。学宪陈用光以“百世之纪”旌。

郑 氏 青桥生员陈朝濂妻。道光十一年旌。祀省节孝祠。

林 氏 陈孟月妻。同治七年旌。

林 氏 青桥陈允奎妻。道光十一年旌。祀省节孝祠。

王 氏 魏昌隆妻。同治七年旌。  
洪 氏 陈敬来妻。同治七年旌。  
林 氏 魏昌照妻。同治七年旌。  
高 氏 陈德启妻。同治七年旌。  
宋 氏 陈行坤妻。同治七年旌。  
陈 氏 李守珠妻。同治七年旌。  
陈 氏 许道举妻。  
李 氏 陈居通妻。同治七年旌。  
施 氏 魏实知妻。同治七年旌。  
邹 氏 李克资妻。事姑育子，勤俭可风。学政陈用光以“松柏其心”旌。

曾 氏 李克静妻。事姑抚女，克尽妇道。学政陈用光以“百世之纪”旌。

陈 氏 李守蜜妻。学政陈用光以“百世之纪”旌。  
林 氏 李守叶妻。道光十一年旌，祀省节孝祠。  
陈 氏 李继儒妻。同治七年旌。  
林 氏 青桥陈行传妻。同治六年旌。  
吴 氏 陈孚畴妻。同治七年旌。  
陈 氏 李守舒妻。同治七年旌。  
林 氏 青桥陈允在妻。同治七年旌。  
王 氏 魏实衡妻。同治七年旌。  
黄 氏 陈学齐妻。  
林 氏 青桥陈道占妻。同治七年旌。  
陈 氏 卓可焮妻。  
高 氏 岱岭陈明勉妻。咸丰元年旌，建坊。子承礼、次孙宝书，俱邑武庠生。  
林 氏 陈孚简妻。同治七年旌。

陈氏 林用德妻。

王氏 魏昌开妻。

王氏 魏昌贵妻。

陈氏 李守爵妻。道光十一年旌，祀省节孝祠。

郑氏 陈行镇妻。同治七年旌。

郑氏 陈行良妻。同治七年旌。

郑氏 青桥陈行舒妻。同治六年旌。

卓氏 魏实命妻。同治七年旌。

沈氏 陈功勉妻。同治七年旌。

高氏 陈允齐妻。同治七年旌。

杨氏 青桥诸生陈际蕃妻。祖籍连江，迁会城。本衣冠旧族，幼涉诗书，知大义，父采仁钟爱之，不轻许人。道光壬辰，蕃府试冠军，补郡弟子员，仁耳熟其名，遂以氏妻之。簪挂日于归。诂蕃以苦读积劳，得肺痿疾，朝咏结褵而夕悲破镜，氏惊恸欲绝，苦节自甘。家贫翁老，操女红以奉甘旨，历十数年如一日。年二十九以疾终。咸丰十年，以夫胞侄赞勋赠宜人。嗣子弼，乙卯副贡；孙长元，邑痒生。同治五年旌，建坊。

李氏 卓可桢妻。

邱氏 青桥儒士陈际清妻，举人瑞云女。生长名门，稔知大义。孝翁姑，善妯娌，躬操井臼，抚孤成立。同治五年旌，建坊。

卓氏 欧阳世美妻。

陈氏 何善庆妻。

虞氏 魏在钿妻。

郑氏 陈典金妻。同治七年旌。

黄氏 林世庚妻。同治七年旌。

裘氏 卓宜庆妻。

林氏 陈孚琼妻。

张氏 陈于阳妻。同治七年旌。

蒋氏 魏实禹妻。

高氏 卓敦锐妻。夫病风，手足不仁，支床蓐者三载，氏服事不怠。夫歿，氏年二十七。事姑抚子，备极勤劬。卒以节终。光绪二十年旌。

郑氏 卓敦焮妻。

郑氏 卓敦麟妻。

王氏 卓孝杰妻。

陈氏 栳桃源欧阳长桢妻。光绪二十八年旌，建坊。

林氏 桃源魏自农妻。

林氏 桃源魏自敬妻。

黄氏 东仓陈则乐妻。

张氏 东仓陈则法妻。

张氏 环山陈于扬妻。

李氏 环山陈政典妻。

陈氏 岱岭林圣言妻。夫歿，抚夫侄为嗣。守节五十余年。

获旌如例。

黄氏 东仓陈斯儒妻。

林氏 环山陈敷简妻。

李氏 环山陈敷长妻。

林氏 环山陈敷琼妻。以侄鸣鏞赠孀人。

张氏 环山陈敷传妻。

蒋氏 岱岭武痒生陈万象继室。

林氏 取青陈国光妻。获旌如例。

黄氏 取青陈道华妻。

高氏 岭顶李孔朝妻。



- 黄氏 北山卓则会妻。  
 郑氏 北山卓可祥妻。年十八孀，苦守七十余年，以节著。  
 陈氏 东仓郑用钺妻。光绪己丑年旌，建坊。  
 姜氏 欧阳长好妻。  
 十都林氏 李用章妻。  
 林氏 李志国妻。雍正元年，学宪阿尔赛以“闾范可风”旌。  
 郑氏 李必会妻。  
 陈氏 林敬都妻。  
 林氏 陈式法妻。  
 郑氏 陈爱书妻。  
 黄氏 林圣武母。  
 陈氏 林圣武妻。  
 林氏 李孝严妻。  
 邱氏 林克长妻。  
 程氏 林孝谟妻。  
 陈氏 李名茂妻。乾隆五十四年，知县以“节凜冰霜”旌。  
 陈氏 李光位妻。  
 李氏 郑其化妻。年二十二，夫卒，遗腹举一男，誓死抚孤。卒年六十六。乾隆四十一年旌。  
 陈氏 李于雅妻。嘉庆二十四年旌，建坊。  
 王氏 李仕魁妻。  
 王氏 李孟燧妻。  
 张氏 李孟达妻。  
 王氏 郑文泽妻。年二十一，夫卒，誓不易志。奉迈姑，抚孤子，始终一节。卒年七十四。乾隆五十九年旌，建坊。  
 郑氏 陈维宽妻。  
 陈氏 李尚可妻。

林氏 李于俊妻。

吴氏 李正献妻。

陈氏 郑用著妻。幼知内则，归郑十年，夫卒。上奉王姑，克尽孝道。抚二子，教训尤有义方。卒年八十三。道光十七年旌。

蒋氏 郑用全妻。夫卒家贫，勤俭自守。奉毫翁色养备至，抚二孤慈而不姑息。卒年七十二。道光十七年旌。子藻江，咸丰辛亥举人。

林氏 李道照妻。获旌，建坊。

陈氏 李自辉妻。

陈氏 李显御妻。嘉庆元年建坊。

吴氏 李显雨妻。道光十八年旌。

陈氏 李于日妻。

陈氏 李于琼妻。

周氏 李道澄妻。

陈氏 李于宁妻。

郑氏 李自年妻。

陈氏 李名风妻。

陈氏 李于枢妻。同治六年旌。

林氏 阿致金妻。

陈氏 林用孙妻。

何氏 李斯进妻。

陈氏 林用德妻。

林氏 郑家璧妻。夫卒，家贫，于幼，无以度日。时有媒姬欲夺其志，诱以利，氏曰：“吾有命在，穷饿固所甘矣。”苦节自守，历数十年如一日。

林氏 李道勤妻。

林氏 李正功妻。夫卒，奉侍毫翁以孝闻。性简重，抚孤

尤庄而严，饮食教诲，督课有方。歿年六十八。

陈氏 郑用义妻。夫死，遗腹生一男，矢志抚孤。后子举数孙又早逝，邻里咸为叹悼。

陈氏 林中恒妻。

林氏 郑用盛妻。夫卒，矢志守节，非至亲不与一言。值夫忌辰，恒泣下。

王氏 郑其度妻。夫卒，家贫，苦节自守，勤纺织，督课孤子，樵采度活。卒年五十二。

戴氏 郑其勉妻。夫卒，无子，家贫如洗，苦节弥甘。

叶氏 郑昌香妻。夫卒，矢志守节，不苟言笑。家本贫，以勤俭自持，课督孤子，慈而有法。

林氏 李正谋妻。本富家女，习女红有针绝誉。归李，钗荆裙布，并白躬操。孝翁姑，和妯娌。年二十而寡，勤俭抚孤，族邻称之。

王氏 李于鉴妻。性庄严，知大义，事父以孝称。嫁未十年而夫卒。竭诚奉姑，课诸孤读父书，以迄成立。子向荣，邑痒生。同治六年旌。

黄氏 李于铠妻。夫卒，子女四人，均在幼稚，抚育教诲，义方可风。卒年五十。同治六年旌。

林氏 郑昌修妻。夫卒，矢志守贞。事太翁以孝敬称，抚孤尤慈而有法。卒年三十五。

高氏 武生李浩然妻。

陈氏 李复康妻。

陈氏 李守和妻。

高氏 郑用玉妻。

李氏 林用壮妻。

王氏 李于灼继室。

林氏 李斯衡妻，痒生林朝重女。年十九归衡，越三载衡卒，遗子永棉。氏极力抚孤，事孀姑尤谨。同治六年旌。

郑氏 李斯藏妻。

陈氏 李于济妻。

林氏 李斯尚妻。

王氏 李斯泰妻。

陈氏 李于确妻。

陈氏 李于莲妻。

薛氏 李复高妻。

陈氏 李正丹妻。

陈氏 郑昌殷妻。

林氏 李永重妻。

余氏 李于广妻。

欧阳氏 李钟英妻。

柯氏 李永善妻。

周氏 谢崇发妻。

黄氏 李斯坦妻。

陈氏 李于临妻。

潘氏 湖尾儒士李永隆妻。隆笃学能文，应县、府试皆列前茅。将届院试，而永隆病剧，以身后事问氏，氏泣对曰：“事舅抚孤，吾职也，妾敢有异志乎？”隆歿，丧葬如礼。家虽贫，而堂上甘旨必具。抚遗孤，毕婚嫁。孀守四十余年，乡里罕有见其面者。

陈氏 福湖郑道红妻。

陈氏 郑昌修妻。年二十四寡，守节至六十二岁卒。

陈氏 郑用韬妻。年三十，夫歿，守节至七十二岁而卒。

李氏 上陈陈忠雄妻。

- 陈氏 六林林中法妻。
- 林氏 湖尾李克亨妻。
- 柯氏 福湖郑昌言妻。
- 陈氏 岐头李存曾妻。年二十七而寡，事翁孝，孝子慈，里人敬重之。
- 林氏 湖尾李斯邦妻。
- 陈氏 福湖郑治焯妻。
- 陈氏 湖尾李永濂妻。
- 卓氏 湖尾李发蕤妻。
- 潘氏 上李李庚孔妻。
- 陈氏 岐头李立定妻。
- 石氏 福湖郑用万妻。
- 潘氏 上李李田孔妻。
- 陈氏 福湖郑昌恭妻。年十九归郑，未两旬而夫卒。家虽贫，坚贞自矢，百挫不移。苦守七十余载而没。
- 林氏 郑昌富妻。年二十八孀。卒年六十六。
- 李氏 郑用镇妻。年二十七，夫歿，守节至四十岁而卒。
- 林氏 郑昌谟妻。年二十二孀，卒年三十二。
- 高氏 郑昌宋妻。年二十四孀，守节十六年卒。
- 李氏 郑治涛妻。年十六孀，守节十一年卒。
- 陈氏 湖尾李发鏊妻。年二十孀，守节十二年卒。
- 陈氏 上李李双孔妻。年二十二孀，守节二十三年卒。
- 杨氏 路北李复苏妻。年二十八孀，守节至六十四岁而卒。
- 陈氏 路北李复情妻。年二十九孀，守节至六十三卒。
- 李氏 路北邑痒生李景琛妻。年二十孀，守节二十六年卒。
- 李氏 金马谢周容妻。年二十二孀。守节至四十八卒。
- 陈氏 金马谢治达妻。年二十五而寡。卒年七十四岁。



张氏 六林林中琼妻。年二十五孀，守节至六十岁卒。

陈氏 湖尾李于度妻。年二十，夫歿，守节至七十九岁而卒。

郑氏 湖尾李永枝妻。年二十五孀，守节至七十二卒。

薛氏 路北云骑尉李复高继室。归三年而复高病，割股和药以进，罔效。复高既歿，氏年方二十一，无出，而姑又年老，奉事惟谨，甘旨无缺。姑卒，丧葬如礼。抚嗣子安澜成立，中同治庚午武举人。孙曾满眼，享寿一百有二岁卒。光绪丙子旌建坊。

林氏 上李李道日妻。同治间获旌。

郑氏 岐头李自明妻。光绪二十六年旌。

王氏 路北李复滨妻。年十九归李，未逾年而夫病，氏祈神乞减己算以益。夫卒，氏恸晕几绝，遗腹举一孤，抚之成立。与嫗薛氏，同事迈姑，均以孝闻。光绪丁酉，有司上其事于朝，获旌如例。

林氏 湖尾贡生李庆椿妻。年二十四，而庆椿歿于天津，丧归，氏恸不欲生，晕绝者数。遗孤甫三龄，抚之成立，为太学生，长孙冠英，毕业法政，历任安徽典狱审判等官。孀居数十载，克尽妇道，内外无间言。光绪二十年旌。

蒋氏 湖尾李德馨妻。

萧氏 六林林中雅妻。年二十孀，卒年五十五。

陈氏 路北李英厚妻。

十一都 卓氏 林日显妻。年二十五，夫卒。事姑孝，姑病，割股和粥立愈。知县崔振琳旌曰“节孝双全”。

陈氏 郑天敏妻。夫卒，年二十四，立嗣守节，母给以田二亩，甘心茹苦。雍正二年，知县杨儒臣以“柏舟矢志”旌。

李氏 青山黄文就妻。年十九归就，七阅月就卒，氏欲殉烈，以姑老，且怀孕三月，冀生男以延夫嗣，乃隐忍就生，奉养

老姑。后七月生男，抚育成立。至老，课孙登瀛为诸生。雍正五年旌，九年建坊。

林氏 蒋文钦妻。年十九归钦，越三年夫卒，欲就殉，家人劝以翁姑年老，且遗腹六月，所全者大，乃隐忍就生。得男国珍，课督成立，入太学。知县杨儒臣匾曰“节孝双全”。乾隆元年旌。

吴氏 柯国标妻。夫卒，遗腥五月，后生男章，家贫作苦，抚孤成立。乾隆二十年旌，祀侯邑节孝祠。

林氏 蒋用聘妻。

蒋氏 青山黄德望妻。

林氏 蒋士朝妻。

陈氏 郑天谷妻。

张氏 黄万酈妻。

郑氏 陈行龙妻。

官氏 黄肇经妻。乾隆间旌。

高氏 蒋则言妻。嘉庆十二年旌。

郑氏 黄万臧妻。

李氏 林宗琼妻。琼浮海经商，为洋匪所害。氏腹有遗孤，矢志事姑，抚孤成立。卒年八十八。

陈氏 生员蒋嵩高妻。嵩高以苦读积劳，病故。氏坚贞自守。嘉庆元年建坊。卒年九十二。嗣子兴友，妻郑氏，端庄严肃，有姑风，夫卒日，以身殉之。论者谓其姑媳节烈，可风世云。

陈氏 林承鸿妻。事翁姑谨。夫卒，屡遭凶歉，亲冒饥寒，抚三男一女成立，历节七十六年。一日梦女童持幡以招，觉召诸孙曰：“吾寿其至此矣。”一呕而歿。同治间请旌。孙冠傅，举于乡。

陈氏 蒋兴充妻。邑诸生超鹏女。于归后，蒋得痰疾卒，庶

姑又病，事之无倦色。抚二子成立。家贫不能常得饭，往往采苦菜度日云。

陈氏 黄国蓬妻。

冯氏 青山黄文让妻。青年孀守，矢志抚孤，日夜纺织，虽祁寒盛暑，汗注手僵，未尝少懈。教子以义方，长为授室，庆衍孙、曾，及身而亲见之。寿六十二卒。

林氏 蒋则沼妻。

高氏 蒋振情妻。

何氏 蒋振抑妻。乾隆间旌。

陈氏 蒋廷璧妻，嘉庆十三年旌，建坊。

郑氏 蒋兴齐妻。

蒋氏 青山黄万紫妻。夫卒，奉舅姑，抚幼子，克勤克俭，家以小康。卒年七十七。

何氏 林希鼎侧室。年二十八，夫卒。腹有遗孤，守节抚育，训以义方。

林氏 李家尹妻。

郑氏 青山黄万敬妻。夫卒，子女二人均在襁褓，教训成立，勤俭治生，家以小康。卒年五十六。同治六年旌。

邓氏 青山黄万敦继室。敦以苦读咯血卒，氏方十九岁，遗腹子春膏，课之读书，励以成名。卒年八十一。同治五年旌。

陈氏 武生蒋天轍妻。

黄氏 蒋尚重妻。嘉庆元年旌。

高氏 李孝冠妻。

林氏 监生蒋光邦妻。嘉庆二十一年旌。

陈氏 李家彩妻。

林氏 蒋兴骏妻。

蒋氏 郑国宝妻。

黄氏 苏州知府冯鼎高妾。年二十三，夫卒。氏卒年六十七。嫡子均，妇丁氏同节。

卓氏 晋赠资政大夫青山黄明镛妻。镛家贫苦读，咯血而卒。氏方二十六岁，翁姑在堂，幼子在抱，仰事俯育，勤女红以度日，夜则篝灯课子，寒暑不辍。子星枢，出宰太原，以路远不就养，卒於道光丙午年。诰赠太宜人，晋赠太夫人。

陈氏 青山黄万亨妻。年二十四，夫卒。抚育遗孤，坚贞自矢。卒年七十七。同治六年旌。

陈氏 高忠俊妻。

陈氏 蒋兴嵩妻。同治七年旌。

邱氏 王章春妻。

陈氏 青山周岱光妻。同治六年旌。

郑氏 陈于泰妻。同治七年旌。

陈氏 青山黄国睿妻。睿本大家子，屡蹶童试，拂郁而卒，氏方二十八岁，侍奉太姑及翁姑尽孝尽敬，三党称其贤。道光十一年旌，二十年建坊。卒年六十一。嗣子省三，贡生。

林氏 青山黄景邦妻。

陈氏 青山黄景玉妻。夫卒，抚育三子，备历苦辛。歿年六十。同治六年旌。

李氏 郑万禄妻。

郑氏 蒋兴渠妻。

郑氏 青山黄清贤妻。同治六年旌。

郑氏 蒋道尊妻。

郑氏 李友宁妻。

高氏 陈于奎妻。同治七年旌。

陈氏 蒋道琼妻。

林氏 冯元镇继室。幼聪颖，好吟咏。于归后，事老姑能

得其欢，处妯娌无间言，小姑贫，终其身调恤弗衰。夫故，子幼，择名师以训之，夜分犹自课不少息。闻何广文则贤将梓乡贤《陈惕园全集》，命子出资以赞其成。年六十一卒。

彭氏 冯元翰妻。陆丰人开归河道彭如幹女。年十九鬻，无出。姑老患瞽，抱持不离侧者三十年。凡家人婢媪有过失，恐致姑怒，辄引为已咎。家丰于财，无私蓄，姑与以金帛，辄矫姑命，调恤夫家之穷者。氏父固显宦，诸弟亦典剧郡或观察数郡，遣使迎氏，辄谢曰：“我非不覲父与母也，如我姑之常念何？”孀居十数年。夫兄举子命嗣氏后，氏以夫长兄无嗣谢，及夫兄嗣定，乃立嗣景澜。年四十八完节终。景澜成诸生没，妇龚氏亦以节著。嘉庆间旌。

何氏 邑庠生蒋春沂继室。夫卒，家中落，氏抚所生子归母家，针黹自活计。守节二十余年。

陈氏 冯邦杰未婚妻。闽县进士廷焕侄女也。幼失怙恃，廷焕抚而育之，许字邦杰。其从兄璩知化州，杰随宦粤东，久而未归，及璩卒，邦杰遂羁滞五羊，绝音耗。氏依叔父以待年。非亲兄弟不相见，足不逾阈，声不出户，历六十余年卒。

石氏 武生林大观妻。事姑孝，夫妇相敬如宾。夫病笃，医药罔效，氏祈神乞减己算，以益夫龄，复割股以进。夫卒，遗腹生两男。人谓其有善报云。

陈氏 林贤邦妻。

阮氏 蒋振党妻。同治五年旌。

陈氏 蒋兴铎妻。

连氏 林孔盛妻。

魏氏 蒋兴钤妻。

陈氏 蒋兴囊妻。

潘氏 青山黄明闻妻。夫卒，氏侍奉迈翁，抚育幼子，茹



荼饮藜，苦节自甘。卒年七十三。同治六年旌。

陈氏 蒋道鞏妻。

李氏 冯士康妻。

郑氏 蒋道典妻。

石氏 林朝训妻。

高氏 蒋兴挹妻。

董氏 蒋兴浹妻。

高氏 郑厚藩妻。同治七年旌。

江氏 李代术妻。

林氏 蒋道绥妻。

程氏 李友瑞妻。

郑氏 李代化妻。

王氏 生员郑春霖妾。

陈氏 蒋道谋妾。年十九，夫卒，无子，立夫兄子为嗣。勤纺织，忍饥寒，营葬五棺。又为嗣子婚娶，后复夭，孙幼，饮藜茹苦，晚节弥艰。

萧氏 郑世丛妻。同治五年旌。

陈氏 蒋兴众妻。同治六年旌。

高氏 蒋道郡妻。

郑氏 蒋道见妻。

陈氏 蒋振土妻。

吴氏 蒋兴莢妻。

陈氏 郑厚滨妻。同治七年旌。

林氏 李敦迹妻。

刘氏 李敦量妻。

黄氏 李敦珠妻。

王氏 李敦大妻。

林氏 李孝绥妻。

马氏 李友厚妻。

郑氏 李友爵妻。

陈氏 李友允妻。

陈氏 李友玉妻。

谢氏 李友江妻。

郑氏 蒋道赞妻。

李氏 黄清江妻。

林氏 蒋兴冲妻。

黄氏 蒋道亩妻。年十七归亩，越二载夫卒，遗腹子本楼。氏矢志抚孤，纺织度日。同治六年旌。

柯氏 青山黄景飧妻。归四月而夫卒，无子，氏方十九岁，家无立锥，纺织度日。松筠之操，处困弥贞。同治八年旌，建坊。

陈氏 蒋道贯妻。

林氏 蒋振阁妻。

林氏 蒋兴闾妻。

李氏 郑永和妻。

陈氏 郑永年妻。

腾氏 陈孚言妻。同治七年旌。

胡氏 蒋道钊妻。

陈氏 郑云超妻。

李氏 郑贞交妻。

陈氏 郑贞华妻。

蒋氏 高贞庆妻。

林氏 郑孔施妻。

石氏 蒋本成妻。

余氏 李于广妻。

- 翁 氏 生员蒋观涛妾。
- 黄 氏 林玉训妻。
- 陈 氏 李代宾妻。
- 蒋 氏 郑贞往妻。
- 林 氏 蒋振潮妻。
- 郑 氏 蒋道浓妻。
- 郑 氏 蒋本润妻。
- 林 氏 青山黄文恕妻。
- 蒋 氏 青山黄邦爵妻。
- 李 氏 青山黄景华妻。
- 李 氏 屿头蒋秀道妻。
- 石 氏 屿头邑庠生高开德妻。年二十九孀，守节至五十二卒。
- 林 氏 高兆骐妻。
- 郑 氏 儒士高永图妻。光绪二十三年旌。
- 李 氏 邑庠生蒋定国妻。
- 赵 氏 儒士蒋泰兴妻。二十一孀，四十七卒。
- 陈 氏 高永亨妻。二十一孀，七十四卒。
- 朱 氏 蒋道最妻。年二十四孀，守节至八十二卒。
- 林 氏 蒋道枇妻。
- 林 氏 蒋天喜未婚妻。
- 陈 氏 湖阳邑庠生李鹏翔子妇，贤治妻也。少端重，寡言笑，事父母孝，年十七适李。逾二年，李以霍乱死于外，氏闻讣，号天恸哭，决意殉亡。有遗腹娠数月，所亲劝之延夫嗣。氏乃含痛待娩，乃产得男，抚养备至。未几，氏以忧郁成瘵而卒，年二十九。
- 陈 氏 青山黄良端妻。年二十二孀，守节至五十八卒。

- 陈氏 黄良邦妻。年二十三孀，守节至六十二卒。  
 陈氏 黄良悦妻。年十九孀。卒年五十二。  
 潘氏 黄良恂妻。年二十孀。卒年四十八。  
 陈氏 黄景香妾。年二十五孀。卒年五十七。  
 陈氏 黄明礼妻。  
 魏氏 黄明群妻。  
 蒋氏 黄忠跨妻。  
 谢氏 举人黄以茎继室。  
 黄氏 屿头蒋普修妻。  
 陈氏 邑庠生蒋步瀛妻。  
 林氏 湖阳李孝筹妻，施氏其妾也。筹歿，林年二十六，施  
 年十九，同心守节。光绪十六年旌，建坊。  
 石氏 李世匡妻。  
 陈氏 雁塘林行安妻。  
 陈氏 蒋兴让妻。二十四孀，卒七十六。光绪十六年旌，建  
 坊。  
 王氏 蒋秉兴妻。年二十三孀，卒年四十八。获旌如例。  
 高氏 蒋本是妻。年二十五孀，卒年五十二。  
 李氏 蒋本霜妻。  
 黄氏 蒋豫修妻。  
 周氏 蒋齐荣妻。  
 李氏 蒋琼兴妻。年三十孀，卒年四十二。  
 林氏 蒋本漪妻。  
 陈氏 青山黄景爵妻。年三十孀，卒年四十五。  
 张氏 李世笃妻。  
 林氏 蒋鹤兴妻，年二十四孀，卒年四十三。  
 林氏 蒋鹄道妻。

- 陈氏 蒋爵道妻。
- 陈氏 邑庠生蒋锦裳妻。年二十二孀，卒年六十。
- 郑氏 雁塘林育训妻。二十三孀，卒年六十四。光绪二十九年旌，建坊。
- 陈氏 青山周岱光妻。同治六年旌。
- 郑氏 林行彩妻。年十八孀，卒年四十一。
- 郑氏 林行望妻。
- 陈氏 林承典妻，年十八孀，卒年四十一。
- 金氏 林列训童养妻，早寡，守节三十八岁卒。
- 陈氏 黄良渭妻。
- 郑氏 陈于泰妻，同治七年旌。
- 十二都 林氏 郑春英妻。夫卒，守节不渝。雍正三年旌。
- 石氏 林维严妻。夫卒，母欲夺其志，氏断发不移，苦守终身。
- 郑氏 石孝琼妻。夫卒，苦守奉姑。知县卫良佐以“劲节凌霜”旌。
- 林氏 石权妻。年二十，夫卒，矢志抚孤，孤殇，氏立嗣，营葬如礼。雍正三年，知县杨儒臣旌曰“岁寒松柏”。
- 高氏 陈朝恒未婚妻。恒卒，氏归陈门，守节十年卒。
- 陈氏 郑大镛妻。
- 陈氏 郑时英妻。
- 邱氏 郑时本妻。
- 林氏 石世照妻。
- 郑氏 林邦直妻。
- 林氏 石世统妻。
- 郑氏 石世敬妻。
- 林氏 郑天梅妻。



陈氏 郑天栋妻。

陈氏 郑时启妻。

林氏 陈昌珩妻。

韩氏 董永吉妻。

陈氏 董孝高妻。已旌，建坊。

曾氏 石世科妻。

林氏 石世藻妻。

蒋氏 石永地妻。

蒋氏 石其暖妻。

张氏 石其荐妻。年二十四，夫卒。氏事姑以孝闻。后子、  
妇不数年相继亡，氏复抚二孙成立。卒年七十六。

林氏 石其花妻。

李氏 陈式香妻。

林氏 石其增妻。

李氏 郑思玉妻。

魏氏 郑齐惠妻。

林氏 陈永宛妻。

林氏 郑可秀妻。

吴氏 石其赋妻。

邱氏 林孔和妻。

林氏 石其严妻。

刘氏 陈善保妻。

郑氏 陈世恩妻。

吴氏 石其起妻。

郑氏 陈圣启妻。

周氏 林舒可妻。

郑氏 石学标妻。

- 孙 氏 董述鲁妻。  
 石 氏 陈世林妻。  
 林 氏 董述珠妻。  
 林 氏 陈世财妻。  
 孙 氏 陈久珠妻。同治六年旌。  
 陈 氏 石其猷妻。  
 李 氏 林道力妻。同治六年旌。  
 陈 氏 林学可妻。  
 周 氏 郑齐苍妻，同治六年旌。  
 郑 氏 董祖礼妻。  
 郑 氏 董祖来妻。  
 蒋 氏 董述开妻。  
 周 氏 黄明祥妻。  
 林 氏 陈立信妻。  
 詹 氏 郑家豪妻。  
 柯 氏 陈光烈妻。  
 林 氏 董述香妻。  
 阮 氏 陈则旺妻。年十九，夫卒，守节五十一载。  
 马 氏 职员陈宗基妻。  
 郑 氏 石昌厚妻。  
 董 氏 石昌郎妻。  
 蒋 氏 石昌暖妻。归石未三年，夫与翁并歿，哭泣不绝夜，所滴泪皆成血。后十年卒，无子。  
 林 氏 古槐董道培妻。十九岁归培，逾年而孀。抚遗腹孤成立娶妇。终事迈姑，殓葬如礼。卒年六十五。  
 郑 氏 董道萌妻。年十九适萌，五闋月而夫歿。家极贫，氏矢志守节一十五载卒。

- 郑氏 石学苏妻。
- 林氏 石昌梨妻。
- 吴氏 石昌猷妻。年二十二孀，六十二岁卒。光绪间旌。
- 王氏 感恩林仁丰妻。
- 石氏 古槐石学珍女。适闽县陈家桢，未逾月夫卒，氏矢志守节。
- 陈氏 林功孔妻。
- 陈氏 石其猷妻。年十七归石，七月而寡。坚贞自守，百挫不移。邑令某旌其门曰“冰霜完节”。卒年八十六。
- 陈氏 石昌滔妻。年十八归，未半载而寡。家贫苦节，矢死不移。卒年五十一。
- 陈氏 石学选妻。年二十六孀。奉翁姑抚孤。历节十九年歿。
- 李氏 石涌泉妻。年三十孀，卒年八十岁。
- 郑氏 邑庠生石渠妻。年二十八，夫卒，孀守六十载。邑令某以“完节上寿”旌之。
- 郑氏 刘孝学妻。
- 高氏 武庠生石宗剑妻。年二十九，剑卒，氏与妾蔡氏同矢柏舟，均以节著。光绪间旌，建坊。
- 林氏 石宗诗妻，年十九归诗，甫三载而寡。勤俭治家，训嗣子以义方。光绪三十二年旌。
- 陈氏 石昌谷妻。年十七孀，历节五十二年。
- 蒋氏 石学恬妻。年二十八寡，奉姑抚孤，守节不渝。
- 黄氏 曾道仪妻。子尊彝受职请旌，蒙奖“人伦坊”表匾。
- 林氏 监生石孔春妻。年十七归春，八载而春卒。上奉迈姑，下抚二子，饮荼茹蘖，里党称贤。
- 潘氏 石宗居妻。年二十二，夫卒。家贫，勤纺织，奉庶

姑，抚孤子，孝慈兼尽。

高氏 石宝璋妻，与妾蔡氏同贞守。

胡氏 石宗隆未婚妻。氏名顺贞，江苏甘泉人。父兰畦携眷幕游于闽，遂籍焉。顺贞幼许字宗隆，未及婚，而宗隆病歿，时氏年二十六，闻讣悲恸，诣夫家执丧礼。宗隆家奇贫，氏足不下楼，纺织自给，积余资营宅兆，以葬翁夫。乡里咸啧啧称之。

陈氏 龙田郑家宜妻。

黄氏 郑思好妻。年二十三，夫卒，历节三十七年。

陈氏 郑思为妻。

陈氏 郑绎笃妻。年二十九，夫卒，历节三十九年。

蒋氏 郑家亨妻。年二十六，夫卒，历节二十八年。

陈氏 郑思纯妻。年二十六孀，历节四十二年。

陈氏 郑齐和妻。年二十七，夫卒，历节三十二年。

李氏 郑思筹妻。

吴氏 郑思串妻。年二十四孀，历节三十七年。

董氏 郑齐劝妻。年二十九孀，历节四十一年。

林氏 郑谊周妻。

谢氏 郑齐建妻。年二十五，夫卒，历节四十年。

陈氏 郑家汉妻。年二十八，夫卒，历节二十三年。

十三都 林氏 陈彦兴妻。年二十二，夫卒。子幼家贫，矢志孀守，抚孤成立。知县卫建勋以“节比松筠”旌之。卒年七十六。

林氏 陈能华妻。青年孀守，抚孤成立，历节四十七年。知县戴永朴旌曰“孝节双全”。

林氏 陈锡爵妻。夫病，割股和药，疾愈，生三男，疾复作，卒。氏绝粒累日，妯娌谕以诸孤俱幼，死将何恃？乃强进水浆，抚孤良琨，游泮，补增，有声庠序间。

林氏 陈简元妻。年二十，夫卒。苦志孀守，以侄孙利方为嗣。卒年八十五。

林氏 陈克成妻。年二十四，夫卒。家无遗产，日夜纺织，抚二孤成立。年七十六卒。知县杨儒臣旌曰“懿德可风”。

柯氏 陈利笏妻。年二十五，夫卒，抚孤。知县熊男良旌之。

刘氏 陈于礼妻。年十八归陈，时夫抱病，氏日夜扶持，凡三阅月。夫卒。矢志守节，历四十余年。

陈门三节妇 陈元铸生三男，长灿，娶妇林氏，生二子煊，璠；次煜，娶妇张氏，生三子培、垠、墀；三熺，娶妇张氏，未有子，立璠为嗣。灿与煜、熺兄弟相继早亡，妯娌同心苦节孀守，奉姑孝敬，抚孤成立，戚里咸重其节。

林氏 陈锡圭妻。

林氏 陈兆祐妻。

李氏 林敬聪妻。

林氏 陈利采妻。

张氏 陈茂东妻。

林氏 陈云绮妻。

黄氏 陈亨圭妻。年二十二而寡。事翁姑，课继嗣，孀守五十余年。

颜氏 陈利典妻。

张氏 陈天俊妻。

赵氏 林佳广妻。

林氏 生员陈弼贤妻。

邱氏 陈利贤妻。年二十二，夫卒。子方二岁，矢志孀守，抚孤成立。子茂就复卒，妇林氏踵姑志，为夫立嗣，以续宗桃。

董氏 陈奎辉妻。



高 氏 陈利坤妻。

张 氏 陈丕安妻。

黄 氏 陈丕立妻。

林 氏 陈利倪妻。

高 氏 陈利巩妻。

杨 氏 陈丕高妻。

林 氏 陈于豹妻。年十七，未婚，夫卒。氏泣曰：“妇以夫为天，今失所天，何以生为？”欲自经，众皆劝之。乃诣夫家，立嗣守节，孝事舅姑。年七十九卒，道光七年旌。

林 氏 陈高拖妻。年十七，未婚，夫卒。归夫家守节，孝养翁姑，抚育嗣子。道光七年旌。

林 氏 陈显楫妻。年十七归楫，二年夫卒。日夜饮泣，抚遗孤成立，奉事翁姑，不出户庭，卒年七十九。子国勉，监生。道光十八年旌。

郑 氏 监生陈灯光妻。年二十归光，四年夫卒。氏素精书数，勤俭持家，幼孤谦枢，课以成立。道光二十二年旌。

王 氏 陈承通妻。与夫弟承刚妻程氏，妯娌同节。

姜 氏 陈承献妻。

郑 氏 陈丕翰妻。孝敬翁姑，克成妇道。夫卒，以女红度生，课子读书。卒年七十六。

黄 氏 陈承知妻。夫卒，家极贫，有劝其改志者，辄泣曰：“穷苦易过，节操难移。”闻者壮之。同治八年旌。

林 氏 陈丕霞妻。

陆 氏 陈丕雍妻。同治七年旌。

林 氏 陈义和妻。

任 氏 陈式著妻。

郭 氏 陈尚应妻。

郑 氏 陈于冬妻。

陈 氏 林用桑妻。同治七年旌。

郑 氏 陈尚往妻。

谢 氏 陈行魁妻。

李 氏 陈承献妻。

陈 氏 黄敬周妻。

魏 氏 陈尚志妻。

吴 氏 黄万重妻。夫卒，家贫，勤女红，孝养翁姑，抚育

二子婚娶成立。

端木氏 陈崇本妻。

徐 氏 陈利年妻。

郑 氏 陈利器妻。

高 氏 陈茂囊妻。

刘 氏 陈承悦妻。

李 氏 陈玉坚妻。

高 氏 陈玉铅妻。

林 氏 陈承鉴妻。

林 氏 陈丕显妻。

阮 氏 生员陈魁麟妻。

林 氏 陈于蔚妻。

林 氏 陈丕堂妻。

李 氏 陈尚庆妻。

蒋 氏 李天财妻。同治五年旌。

林 氏 陈于合妻。

林 氏 陈于畏妻。

林 氏 陈于顺妻。

郑 氏 陈尚师妻。

洪 氏 陈丕博妻。同治七年旌。

李 氏 陈光煜妻。

张 氏 陈丕扬妻。

郑 氏 陈承豪妻。

李 氏 陈尚恬妻。

程 氏 陈丕味妻。

刘 氏 陈承叶妻。

黄 氏 林以秋妻。

王 氏 陈坚勉妻。

朱 氏 陈承蔚妻。

黄 氏 陈玉钟妻。

林 氏 陈承煌妻。

赵 氏 陈承桓妻。

蒲 氏 陈尚麟妻。

林 氏 陈茂止妻。

李 氏 陈尚政妻。

刘 氏 陈于选继室。夫卒，三子俱幼小。家徒壁立，纺织度日，抚孤成立。

郑 氏 李天朗妻。

张 氏 陈玉团妻。

陈 氏 武生李步衢妻。

黄 氏 陈承莲妻。

林 氏 陈承显妻。

黄 氏 陈于暄妻。年十六归暄，甫一年夫卒。遗腹一子，家贫，日夜纺织，养姑抚子，矢志靡他。

柯 氏 陈尚和妻。

林 氏 陈茂貽妻。夫卒，矢志贞守，杜门纺织，立夫侄于

衍为嗣。

田氏 陈式幹妻。

邓氏 陈尚彝妻。

王氏 李天生妻。

刘氏 陈尚豪妻。

李氏 生员陈连饒妻。

王氏 陈尚华妻。

邹氏 陈兆标妻。

邹氏 黄敬周妻。

邹氏 黄敬兰妻。

蔡氏 陈丕坤妻。

林氏 陈义瑞妻。

郑氏 陈于饗妻。

李氏 陈承育妻。

高氏 陈茂铤妻。

张氏 陈于枢妻。

柯氏 陈丕鲍妻。年二十四孀，卒年九十三。

何氏 陈承丰妻。

林氏 名水仙，处士陈于焰妻。生员天璧母也。氏于归时，翁姑已卒，尝以不逮事为恨。年三十，夫歿，哀毀备至，几不欲生，已念二孤稚弱，含痛鞠育。稍长，课之读书，而自勤纺织，以供膏伙。身见天璧游庠，卒年六十四。

薛氏 陈丕暹妻。年二十八，夫歿。事孀姑温清如礼，训于成名。卒年七十八。光绪丙午旌。

詹氏 薛长朗妻。年二十八，夫歿，家故贫，纺织自给，抚三子成立。卒年八十八。

陈氏 薛以同妻。年二十九，夫歿。家贫，遗孤方数龄，抚

之成立。七十一岁而卒。

郑氏 陈承让妻。年二十二孀，获旌如例。卒年六十九。

林氏 例贡陈寿河妻。年三十孀，抚孤成立。卒六十三。

王氏 陈崇咏妻。年二十四孀，卒年四十八。

林氏 陈崇衷妻。年二十七孀，守节三十年卒。

王氏 陈孝机妻。年二十九孀，事姑尽孝，教子有方。

林氏 陈孝清妻。

林氏 黄良波妻。于归后，事翁姑尽孝。氏年二十九而波歿，抚二孤忠山、祖荫成立。无何，而忠山夫妇先后卒，遗孤二，氏教养兼尽，备历勤劬，为毕婚娶。守节二十三年卒。

陈氏 黄忠山妻。夫卒，氏年二十七。清操自矢，抚二子，事孀姑，孝慈兼尽。守节十四年卒。

蔡氏 黄良灏妻。年三十而寡，誓志不二。勤于纺织，养姑抚子，备历艰辛。守节三十年卒。

林氏 黄明俞妻。年二十四，夫卒，茹苦自甘，矢志不渝。守节三十八年卒。

陈氏 林本金妻。二十六岁夫歿，遗三孤年俱稚。家极贫，氏勤纺织，以易薪米，抚之成立。比长，娶妇生孙。守节三十九年卒。

张氏 陈茂川妻。年二十四孀，卒年八十八。

陈氏 柯峰林孝友妻。年二十三，夫歿，守节四十六年卒。

林氏 陈茂姜妻。年二十九，夫歿，家贫纺织，抚孤成立。卒年八十四。

李氏 陈尚吉妻。年二十四孀，安贫守节。卒年五十四。

李氏 陈丕忠妻。年二十二，夫歿，抚孤成立，既受室而孤夭，遗一孙，氏偕媳抚之。

王氏 陈丕钧妻。



徐氏 陈于美妻。

郑氏 陈于品妻。

杨氏 陈于谦妻。年二十九孀，卒年四十九。

柯氏 陈尚芳妻。

林氏 陈丕富妻。年二十七，夫故。家贫，纺织度日，抚夫侄为嗣。

薛氏 陈丕叶妻。年三十孀，现一百有一岁。

郑氏 陈茂义妻。年二十九孀，卒年六十余。

林氏 陈承羲妻。年二十九孀，守节三十年。

杨氏 陈尚训妻。年二十四孀，卒年五十七。

林氏 陈承开妻。年二十五孀，卒年五十。

李氏 生员陈骏祥妻。年二十九孀，事姑尽孝，抚子底于成名。光绪丙午旌。

王氏 生员陈兆昌继室。年二十一孀，抚前室子友梅如己出，教以义方，卒年五十。

林氏 陈宝樵未婚妻，闽邑韵球女也。年十九，未于归而宝樵病歿。女闻讣悲恸，哀告父母，请奔丧，许之。蓬头易服，诣夫家，即丧次哀奠如礼。庙见后，克尽妇道，奉姑以孝闻。女性聪慧，通书史，尝自叙三千余言，以写其抑郁悲哀之概。乃以思夫伤悼而卒，逾夫歿八年。

曾氏 陈丕頌妻。年二十五孀，抚孤成立。卒年六十一。

林氏 陈承严妻。年二十一，夫卒，守节抚孤，事翁姑惟谨，兼抚夫侄，爱如己子。年七十卒。

王氏 陈承梭妻。年二十四孀，守节抚孤。年七十卒。

李氏 陈丕起妻。年二十九孀，抚孤成立，守节以终。年五十四。

谢氏 陈承杖妻。年二十孀，家徒壁立，翁姑欲夺其志，誓

不再醮，抚遗腹孤成立。

郑氏 州同陈于钿妻。年二十八，夫歿。矢志守贞，事姑惟谨，教子以正、孙亦豪籍于学。卒年六十四。

郑氏 州同陈于真妻。年二十七，夫歿，孝事翁姑，抚孤成立。卒年六十三。光绪丙戌旌，建坊。

郑氏 州同陈于略妻，职员行友女。年二十八寡，事姑孝谨，抚遗孤骏祥游于庠。守节五十四年，卒年八十二。光绪丙戌旌。

王氏 陈端祥妻。

李氏 州同陈于瑞妻。年二十六，夫歿，孝事翁姑，抚夫侄友竹为嗣，竹亦克尽孝道，无间言。卒年六十六。光绪己丑旌，建坊。

郑氏 监生陈于柏妻，生员昭彰女。年二十五，夫卒，抚孤振韶籍于学，援例为贡生。卒年六十三。光绪间旌，建坊。

李氏 陈丕锋妻。

林氏 陈崇阜妻。年二十五孀，五十三卒。

谢氏 陈孝瑀妻，年二十于归，甫逾月而寡。誓志不二，奉姑抚孤。守节二十六年卒。

陈氏 黄敬雄妻。年二十归黄，七载而寡，抚孤成立。卒年五十二。

陈氏 黄敬业妻。年十九于归。夫外出谋生，歿于安南。氏抚孤成立，备历艰苦。卒年七十五。

十四都 彭氏 陈吉甫妻。年二十五，夫卒，抚孤成英例贡，孙焯游於庠。历节四十七年。乾隆三年旌。内阁学士谢道承为之传，邑令贺世骏有诗嘉之。

郑氏 江元晓妻。归五载，夫卒，奉姑抚孤，历节五十一年。乾隆四年旌。

翁氏 林长佩妻。年二十，夫卒，腹孤五月生男，守节四十一年，乾隆四年旌。

王氏 柯万明妻。夫死。啮指血书“守节抚孤”四字于壁。乾隆十八年旌。

林氏 陈孝金妻。归陈五载，夫卒，矢志抚孤，苦节三十八年卒，年六十三。知县张尹以“松筠比操”旌之。

林氏 王大恩妻。夫卒，子周岁，纺织育孤。知县侯海旌曰“节凜冰霜”。

黄氏 陈孝麟妻。夫卒，氏年二十四，抚孤成立。知县黄瑞鹤旌之曰“孀萱永茂”。

石氏 陈孝定妻。夫卒，抚孤敬芍成立。敬芍死，妇张氏亦踵姑志，奉姑抚孤。知县黄瑞鹤以“一门双节”旌。

许氏 陈孚政妻。夫得废疾，母欲退婚，氏年十八，不从，适陈侍汤药，五载无怨声。夫卒，抚孤士照，纺织度日。卒五十三。

高氏 监生江霁妻。归七载，夫卒，抚孤崑玉入庠。卒七十二。

郑氏 林贤周妻。年十九，夫卒，怀孕仅六月，誓志守节，奉祖姑江、姑陈以孝闻。抚遗腹孤宗立，课督弥勤。历节五十五年，年七十三卒。

刘氏 陈旺旗妻。夫卒，课子曾江入国学。历节三十四年。

陈氏 黄文福妻。年二十四，夫卒，奉翁姑，抚三岁孤成立。乾隆二十七年，年八十二。知县贺世骏以“松筠同操”旌。

林氏 陈光瀚妻。

林氏 陈道来妻。

刘氏 陈孝锦妻。

郑氏 陈光叶妻。

刘 氏 陈以良妻。

黄 氏 陈孝麟妻。

施 氏 陈以重妻。

林 氏 蔡传和妻。

郑 氏 陈行成妻。

卓 氏 陈敬瑞妻。

林 氏 李与灿妻。

樊 氏 陈以爵妻。

郑 氏 杨永华妻。

牛 氏 林得健妻。

林 氏 陈可弦妻。

陈 氏 林昌德妻。

卓 氏 蔡世严妻。

陈 氏 林广泮妻。

邹 氏 陈江春妻。

林 氏 陈敬恩妻。

江 氏 林广福妻。

陈 氏 江邦敬妻。

林 氏 陈汝钰妻。

郑 氏 陈敬尹妻。

莫 氏 贡生林琮妻。年二十二，琮卒，遗孀子英，教诲惟谨，及氏病笃，英奉药以进，氏挥之，曰：“汝成立有室，吾事已毕，死晚矣。何以药为？”遂卒。

陈 氏 王大西妻。年十七孀，矢志守节，乾隆间旌。

陈 氏 王大银妻。

陈 氏 王子煌妻。

林 氏 江有言妻。事姑抚子，各尽其道。

林氏 陈敬耀妻。夫病，割股以疗，不效，乃剖胸裂肝调药以进，夫病渐平。后夫复犯旧疾卒，氏抚育幼子，苦节终身。

陈氏 赠君郑敷亨妻。幼从大父本钦学，通书籍。年十九归敷亨。亨故贫，常幕游，氏勤女红，以持家计，不烦堂上忧，姑深爱之，称其贤而能。姑病，侍汤药，长斋求神，密割股以进，病寻愈。与敷亨以道义相勖者十有二年。亨卒，恸晕几绝，既而曰：“姑老子幼，责在吾身。”遂破涕节哀。训子奇峰，课读特严，偶辍业，辄施夏楚，谓吾仅一子，倘不树立，即无以对先人。居恒蔬布自甘，而好施与，亲戚有急，每典钗钏以应。卒年五十八。以子奇峰，晋赠太恭人

何氏 王资会妻。

黄氏 王资见妻。

李氏 王资堂妻。

林氏 王大桃妻。

郑氏 王尚恭妻。

陈氏 王资彦妻。

林氏 王绩锦妻。同治七年旌。

刘氏 王尚和妻。

张氏 王子菊妻。

李氏 柯孝达妻。

杨氏 王子湖妻。

林氏 王大拔妻。

陈氏 柯友爵妻。

施氏 柯友权妻。

郑氏 王尚尊妻。

李氏 陈孚钦妻。

张氏 陈孚礼妻。



陈氏 李孔洲妻。同治七年旌。

陈氏 王尚雄妻。

郑氏 云路陈孚作妻。年二十四，夫卒，无子，叠遭家难，事迈姑，抚弱女，荼蓼自甘。卒年三十九。同治六年请旌。以婿黄见三赠太宜人。

郑氏 江世芳妻。

林氏 陈材子妻。夫卒，笃志奉姑，抚三子，长化鲲，邑庠生。

李氏 王子豪妻。

蒋氏 王尚茂妻。

曾氏 王子钱妻。

蔡氏 刘克崇妻。

郑氏 王子薇妻。

林氏 王尚玉妻。

陈氏 林立章妻。

李氏 陈星于妻。

刘氏 江良灌妻。

黄氏 陈光于妻。

陈氏 王谨华妻。

孙氏 王子昂妻。

刘氏 陈孚监妻。

欧阳氏 陈于珠妻。矢志抚孤，善事翁姑，大小无间言。

邹氏 王子秉妻。

刘氏 江世镇妻。十六归江，阅五月夫故。识礼文，通文史，一家称其柔顺。课嗣子读书成立。

曾氏 王尚近妻。

李氏 王子亭妻。

李氏 王子篆妻。

邹氏 陈孚传妻。同治七年旌。

高氏 陈作统妻。

李氏 王谨遂妻。

洪氏 王慎波妻。

柯氏 陈孚书妻。

陈氏 监生王应龙妻。

陈氏 王慎桐妻。偕妾陈氏同守节。

陈氏 江良殷妻。年十九，归江，三年夫卒，守节不渝。孝翁姑，抚幼子。七年子殇，愤郁寻卒。

陈氏 江世玉妻。守节不渝。孝翁姑，抚三子。同治六年旌。

张氏 陈政程妻。年二十归陈门，二十七而寡，茹苦含辛，抚二男一女，均成立。同治七年旌。子金馥，庠生。

郑氏 王慎利妻。

林氏 王谨笃妻。

蒋氏 陈子道妻。

朱氏 林圣濂妻。夫卒，无子。家极贫，依母居，立志苦守。知县王仲汶以“潜德幽光”匾之。同治五年旌。

陈氏 王孝仁妻。

林氏 生员陈广枝妻。

杨氏 陈政美妻。孝事翁姑，抚育幼子。姑病，割股和药以进。

江氏 许字云路郑元奎。年十五，婚有日矣，元奎病歿，闻讣，痛哭几绝，素舆归郑，守节二十年歿。邑侯给以匾曰“未婚节孝”，并为请旌焉。嗣子文树，援例翰林院待诏。

方氏 陈学显妻。

- 曾 氏 陈政登妻。  
 陈 氏 王友捷妻。  
 刘 氏 王尚崇妻。  
 林 氏 王尚慈妻。  
 曹 氏 王尚豹妻。  
 杨 氏 王传化妻。同治七年旌。  
 卓 氏 王子义妻。  
 陈 氏 王谨需妻。  
 王 氏 陈琳峰妻。  
 郑 氏 陈政环妻。  
 林 氏 陈政洲妻。  
 吴 氏 江世栋妻。  
 郑 氏 柯经润妻。  
 陈 氏 柯万闻妻。

蒋 氏 洞湖林和莹妻，进士林调阳之侄妇也。年十八，归莹，甫期而寡。氏悲号欲绝，慨然有殉亡志，姑以大义责之而止。抚夫侄为嗣，爱如己出，而严课读，风雨篝灯，声泪俱下，夜分书声未歇，氏不就寝也。嗣子亦英发嗜学，未冠，随从祖调阳之任安徽，以苦学成瘵疾，归未逾年卒，姑又继逝，氏哀毁备至，复立侄承桃，而家中落，躬亲纺绩，撙节自持。至岁时忌旦，匪不龟勉蘋蘩，以竭诚敬，如是者数十年如一日，光绪十八年，翰林院编修刘成杰上其事于朝，获旌如例。

郑 氏 王尚恭妻。守节六十七载，年九十八岁，亲见孙及曾孙入武庠。督学孙诒经以“贞心寿骨”旌其闾。

林 氏 王道明妻。年十八归王，逾三年而夫卒。抚遗腹孤成立，长貽馨，邑庠生；次貽香，武庠生。年五十九。

丁 氏 王守阜妻。年二十一而寡，抚夫侄允贤为嗣，中光

绪壬午副车。又抚夫之弟妹成立，为毕婚嫁。今氏年七十八，孙曾绕膝，闾范肃然。

- 陈氏 王大珠妻。同治十一年旌。  
陈氏 王子蔚妻。  
吴氏 王孝梅妻。  
林氏 王守察妻。  
陈氏 王谨澄妻。  
陈氏 王谨鳌妻。  
陈氏 山边李章珍妻。  
黄氏 犀邱蔡厚忠妻。  
张氏 旒峰陈新铨妻。年二十孀。  
黄氏 王尚苔妻。  
陈氏 王永寿妻。  
萧氏 李宗舜妻。  
廖氏 洞湖黄贤镜妻。  
林氏 王永丹妻。  
陈氏 犀邱蔡俊德妻。  
杨氏 蔡元德妻。  
黄氏 蔡达德妻。  
陈氏 蔡孝道妻。  
林氏 蔡忠邦妻。  
萧氏 林由盈妻。  
萧氏 演屿杨肇双妻。光绪二十三年旌。  
郑氏 杨达雄妻。  
柯氏 杨友显妻。  
陈氏 杨达禄妻。年二十三孀，守节至八十二卒。  
李氏 杨达沱妻。年二十四孀，卒年四十四。

陈氏 杨达吉妻。年十九孀，守节至六十七卒。

邱氏 沟东陈海端妻。年二十三孀，守节至三十七卒。

邹氏 名秀枝，云路陈政绂妻。年十七而寡，遗孤端徽才六月，抚之成立，光绪甲午举于乡。御史林绍年、潘炳年为之奏请，获旌如例。

陈氏 云路江良密妻。年十八归，二十四孀。奉姑孝谨，抚二孤成立。卒年七十八。

王氏 洞湖黄贤竹妻。

陈氏 洞湖黄良喜妻。

郑氏 陈于连妻。年二十一孀，卒年七十六。

刘氏 王永淮妻。

王氏 渡桥林圣洋继室。年二十归，逾月而夫病，氏奉侍惟谨，尝割股和药以进。夫寻歿，距氏于归甫百日也。抚前室子如己出。长金荣，弃儒入伍，以功赏给五品蓝翎；三奋，毕业全闽师范学校及公立法政专门学校。

柯氏 云路江能明妻。年十八归，阅八月而夫卒。守节三十八年，卒五十六。

林氏 监生王代卫妻。乾隆间旌，建坊。

郑氏 蔡祖銮妻。

郑氏 蔡品修妻。

李氏 林从在妻。

陈氏 林从新妻。

刘氏 王守和妻。

陈氏 王永淇妻。

十五都 张氏 陈允护妻。年二十八，夫病，割股以疗。夫卒，割耳投棺。遗腹生男，氏冰霜自矢，抚养成立。卒年五十八。

柯氏 陈其照妻。



- 陈氏 林允时妻。
- 李氏 生员陈绍翅妻。
- 郑氏 陈茂有妻。
- 陈氏 李有春妻。
- 黄氏 陈五美妻。
- 郑氏 生员陈谟妻。
- 刘氏 吴圣选妻。
- 陈氏 林泽生妻。
- 李氏 柯孚元妻。
- 许氏 陈守占妻。
- 林氏 徐忠会妻。
- 陈氏 郑昌图妻。夫贸易死，氏年二十五。孝敬翁姑，祭葬如礼。抚遗孤，昼纺织，夜课读，三十年不辍焉。
- 陈氏 邹仁煌妻。
- 萧氏 柯圣起妻。
- 孙氏 陈守行妻。
- 林氏 漳港李登衢妻。年二十五，夫歿，抚孤守节。知县黄家驹旌之以匾。
- 柯氏 萧为琼妻。
- 陈氏 漳港林宗恩妻。
- 刘氏 漳港朱得喜妻。
- 林氏 萧燕兆妻。
- 郑氏 漳港萧时涌妻。
- 陈氏 仙岐郑偕寿妻。年二十八，夫卒。
- 林氏 郑泰祥妻。
- 石氏 郑泰和妻。
- 王氏 郑昌宁妻。

林 氏 郑偕昭妻。

施 氏 郑偕海妻。

萧 氏 郑治善妻。

陈 氏 郑与川妻。

林 氏 路顶陈立平妻。年十八孀，无出。家贫如洗，姑夺其志，誓死不二。

郑 氏 陈敬义妻。

郑 氏 陈忠展妻。

林 氏 陈代文妻。

林 氏 陈敬迎妻。

林 氏 陈忠畴妻。

陈 氏 监生陈于镜女，上墩顶郑厚规妻。年二十五，夫以苦读成瘵疾卒。氏侍奉迈姑，抚养二孤，以孝慈闻。

吴 氏 郑隆品妻。

林 氏 萧精兆妻。

十六都 林 氏 陈守平妻。年二十二，夫卒，子长祚方四岁，家贫，矢志抚孤。及子长，勤俭营生，家渐起。弟赓存死，氏并抚弟妇及侄。知县韩武旌曰“节义流徽”。

刘 氏 林赓存妻。夫卒，子幼家贫，依夫甥陈长祚，抚孤成立。卒年九十余。

林 氏 刘高琼妻。孀守，抚孤成立。

郑 氏 黄存祯妻。年二十，生子甫周，夫卒，奉姑抚子。姑卒，丧葬如礼。子长娶妇，艰于嗣，又置妾生子复夭。两世孀居，白首弗渝。

陈 氏 吴承谨妻。夫卒，抚二孤，历节七十余年。年九十九。四代一堂。

洪 氏 郑代昌妻。奉姑抚孤，历节五十年。知县张学举旌

曰“节孝堪型”。

邹氏 郑同馱妻。夫久病，割股以疗。夫卒，抚三子成立。知县廖镇以“操凜冰霜”旌之。历节四十余年卒。

刘氏 陈永宁妻。夫卒，奉姑，抚夫兄子为嗣，教训成立。

卓、郑二节妇 陈长祚媳。祚二子，长诸生天保妻卓氏，次天球妻郑氏，俱早寡。孝于姑，各抚二孤，互相课督，稍长，延师以课其业，郑男永书，乾隆戊午副榜。妯娌各历节四十余年。乾隆十五年以“双节”旌。

郑氏 林能章妻。年二十，夫卒，子一岁，纺织育孤。知县卫建勋以“芦获清风”旌。

陈氏 刘大斌妻。夫卒，奉孀姑，抚幼子成立入太学。

刘氏 欧阳兴侯妻。

陈氏 黄洪妻。

欧氏 陈允志妻。

王氏 林述魁妻。

陈氏 欧阳坤旭妻。

陈氏 吴兴经妻。

李氏 吴天厚妻。

林氏 黄有守妻。

蔡氏 黄德秀妻。

刘氏 黄文珠妻。

田氏 陈利晏妻。

林氏 陈邦俊妻。与妇林氏昌圭妻同守节。

吴氏 陈国卿妻。

谢氏 陈昌守妻。

林氏 陈利德妻。

陈氏 吴承品妻。

陈氏 林茂旺妻。

王氏 生员陈道栋妻。夫卒，二孤俱幼，课督有成。夫弟廩贡生道槐亦早卒，姒林氏遗二孤，长五岁，次甫数月，矢志抚孤，俾至成立。妯娌各守节三十余年。知县吴大勳以“表贤双节”旌。

林氏 陈道枚妻。知内则，通《孝经》，女红针黹，无不精工。夫卒，孀守。颇知韵语，有咏燕句：“今日殷勤培旧垒，他年犹愿得同归。”历节四十年，老而无子，里党哀之。

林氏 陈茂绥妻。夫往东洋贸易，客死他乡。氏方二十二岁，无子女。初闻凶信，未确，隐忍以待，久无音耗，苦守四十余年，不亏大节。

潘氏 陈于粹妻。夫卒，二孤皆幼，氏辛勤抚养。母怜其少，劝其改志，之死靡他。寿九十二。子学燧以孝称。

邹氏 廩生陈学强妻。夫卒，无子，茹荼自苦，矢志不移，立夫侄为嗣。

陈氏 林存德妻。道光七年旌。

杨氏 吴碧昭妻。道光二十二年旌。

陈氏 林孟仁妻。道光十四年旌。

林氏 陈循胜妻。

李氏 黄万都妻。

高氏 黄国登妻。

郑氏 黄国香妻。

薛氏 陈尚铨妻。

黄氏 郭国信妻。

李氏 刘良祝妻。

陈氏 郭仕佐妻。

林氏 陈承堂妻。

陈氏 林良荷妻。

陈氏 郭德扬妻。媳任氏，齐益妻。同节。

林氏 陈亨起妻。

郭氏 陈丕苞妻。夫卒，家徒壁立，子女俱幼，苦持家计，以贞节称。

林氏 陈承滋妻。夫卒，家贫无子，勤俭度日，苦守四十年卒。

卓氏 陈循尧妻。

吴氏 陈常有妻。

赵氏 林孔亮妾。

陈氏 林孟程继室。

吴氏 陈尚友妻。夫病瘵三年，服伺不怠，及卒，自矢冰霜。奉舅姑，抚子女，两尽其道。三党称之。

林氏 陈承源妻。源勤读以劳瘵夭。氏矢志贞守，立夫侄为继，爱如己出，抚之成立。

卓氏 陈承毓妻。贞静少言。适陈四载，生一男一女。夫卧病逾年卒，痛绝复苏。里有奸豪慕其色，辄托媒诱以金，氏曰：“妾闻烈女忠臣，有死无二，岂以多金而失节于奸狗辈耶？”言訖，引刀自刎，幸其姑劝止，终全大节。

柯氏 林诗云妻。

刘氏 蓝田陈良茂妻。

陈氏 李添文妻。

林氏 陈良登妻。

林氏 欧阳村陈性宾妻。

陈氏 华刘刘敦澄妻。

卓氏 刘孝在妻。年二十六孀，守节至五十岁卒。

陈氏 刘友汜妻。



- 李氏 刘孝旺妻。年三十孀，守节二十五年。
- 林氏 刘孝庚妻。年二十六孀，守节至七十六卒。
- 林氏 刘敦高妻。年二十三孀，守节至五十一卒。
- 黄氏 刘克敬妻。年二十四孀，守节至七十五卒。
- 陈氏 刘孝茂妻。年二十三孀，守节至六十卒。
- 杨氏 刘克香妻。
- 林氏 刘敦畅妻。
- 陈氏 刘顺日妻。
- 池氏 刘孝就妻。年二十八孀，守节至六十七卒。
- 陈氏 刘敦在妻。年二十三孀，守节至六十九卒。
- 陈氏 刘敦翠妻。年三十孀，守节三十九年。
- 卓氏 刘顺桂妻。
- 梁氏 刘敦勤妻。
- 陈氏 刘敦枝妻。
- 王氏 刘敦国妻。
- 刘氏 蓝田陈良犁妻。
- 董氏 生员陈士镇妻。年三十孀，守节四十七年。
- 林氏 陈承麻妻。年二十一孀，守节三十年。
- 高氏 陈济鹏妻。年二十二夫卒，守节四十一年。
- 高氏 陈济炮妻。
- 谢氏 陈宏兴妻。年二十八孀，守节至七十二卒。
- 林氏 陈良豪妻。
- 林氏 陈宏龙妻。
- 曹氏 陈济声妻。
- 梁氏 刘孝本妻。
- 陈氏 刘克贵妻。
- 陈氏 刘敦恩妻。

林氏 刘敦禧妻。

李氏 池境陈本合妻。

黄氏 表贤陈尚捷妻。年二十九孀，守节至六十四卒。

王氏 陈尚秀妻。

陈氏 新东洋黄亨团妻。

林氏 黄贤益妻。

陈氏 黄贤慎妻。

吴氏 黄敬雅妻。

周氏 华恩林厚程妻。

江氏 林孟建妻。

陈氏 华厦梁贤宽妻。年二十八孀，遗孤三，矢志抚育。

邱氏 表贤陈丕思妻。

林氏 表贤陈丕齐妻。幼哑，于归后，事夫惟谨。夫病剧，氏刲肱为糜以进，病寻愈，贸易罗源，歿于旅次。氏闻讣恸哭几绝。家贫无子，矢志柏舟，卒以节终。

王氏 洋里吴源统妻。

陈氏 吴绍莺妻。

陈氏 吴克信妻。

陈氏 吴克仪妻。

黄氏 吴绍达妻。

林氏 吴绍镜妻。

刘氏 吴好统妻。年二十四孀，守节三十年。

十七都 郑氏 施有梁妻。夫卒抚孤，历节五十年。乾隆十二年旌。

黄氏 陈元智妻。夫卒，氏年十九，奉翁姑，抚幼子。知县卫建勋旌曰“松筠比操”。

林氏 谢于通妻。年十九归通，一月夫病，奉侍汤药，三

年不懈。夫死，孝事舅姑。知县殷凤梧旌曰“柏舟令节”。

陈氏 林家贵妻。年二十，夫卒，奉翁姑，抚二孤成立，长有祁入太学，次玉振郡痒生。知县侯海旌曰“茹蘖饮冰”。

李丙姐 陈鲁生妻。性贞静，年二十归陈，三载夫卒，无子，丙姐矢志孀守，奉老姑孝养弥笃。父亦缺嗣，丙姐兼尽子道。时值调迁，屡经困顿，绝少二心。家少产业，勤纺织以治生，经营数十载，渐致殷饶。轻财好施，为夫家父家修建祠宇，置租以充祭典；各乡庙宇及塘岸、桥梁、道路，多系捐金修造。卒年八十有奇。事迹纪在《陈姓三贤祠约》内。

陈氏 池良周妻。夫卒，矢志孀守，奉翁姑，抚嗣男，贞节不渝。乾隆二十六年，知县贺世骏匾曰“劲节凌霜”。

刘氏 施希龙妻。

蒋氏 李琼妻。孀守抚孤，历尽艰苦。

林氏 陈孝远妻。

杨氏 陈孝章妻。

姜氏 林能为妻。道光十六年建坊。

许氏 陈孝文妻。

王氏 陈孝信妻。

刘氏 李开元妻。乾隆间旌。

谢氏 陈传达妻。

陈氏 池良典妻。

何氏 池诚忠妻。

李氏 陈孝扬妻。

田氏 卓国鸾妻。

杨氏 刘克升妻。

马氏 陈恭在妻。

陈氏 池良助妻。道光间旌。

- 刘 氏 王资华妻。  
张 氏 李良统妻。  
卓 氏 刘敦秋妻。同治七年旌。  
郑 氏 陈于起妻。  
林 氏 黄国盛妻。  
陈 氏 郑遵宝妻。  
刘 氏 陈敷监妻。

池金姐 旧池人，幼育于谢姓。配夫奶送，家贫未成婚。夫卒，穷不聊生，有花林人欲娶之，托氏兄求婚，氏以死辞。兄念其无依，给之归宁，径抬花林某家，氏大呼号，婉劝不从。某怜其志，归焉。以穷饿死。

- 池 氏 黄功位妻。  
陈 氏 刘友善妻。  
刘 氏 郑遵星妻。  
陈 氏 卓维藩妻。  
陈 氏 监生李芳妻。  
林 氏 刘敦恩妻。  
陈 氏 刘克修妻。  
李 氏 刘敦赠妻。  
董 氏 黄功康妻。  
董 氏 刘友玉妻。  
郑 氏 刘克见妻。  
许 氏 刘友钿妻。  
戴 氏 监生李国谔妻。  
林 氏 廩生李维祺妻。  
吴 氏 陈彦经妻。  
王 氏 陈扬珪妻。

- 陈氏 刘克乐妻。
- 卓氏 孙君甫妻。
- 吴氏 卓则丰妻。
- 刘氏 厚团诸生陈尚立妻。年十六归陈，甫匝岁而立卒，遗腹生两男。事姑抚子，艰苦备尝，卒年六十六。同治间旌。
- 董氏 陈尚畴妻。年二十六寡，卒年七十一。
- 曾氏 陈学紫妻。年二十七寡，卒年六十一。
- 陈氏 郑太政妻。
- 林氏 郑太务妻。
- 李氏 东卓卓维忠妻。年十九孀，卒年七十八。
- 陈氏 卓敦光妻。年十九孀，卒年四十七。
- 黄氏 卓孝盛妻。年十八孀，卒年三十八。
- 林氏 卓贤景妻。年二十二孀，卒年五十九。
- 池氏 卓维潮妻。年二十四孀，卒年六十七。
- 廖氏 卓贤锐妻。年二十一寡，卒年六十八。
- 王氏 卓贤山妻。
- 林氏 卓贤锦妻。年二十六孀，卒年六十二。
- 施氏 卓仁习妻。年二十二孀，子维秀早死，妇李氏矢志贞守，一如其姑。里党咸钦之，姑卒年五十六，妇五十三。
- 刘氏 何孔珠妻。年二十七孀，卒年六十八。
- 陈氏 西卓卓维敦妻。
- 郑氏 陈店陈承琨妻。年二十二孀。宣统元年，邑令以“劲节凌霜”旌之。
- 柯氏 陈丕水妻。
- 刘氏 陈崇楼妻。
- 王氏 陈尚品妻。
- 林氏 鹏程谢贤柱妻。



- 王氏 谢圣快妻。
- 林氏 谢贤攀妻。
- 陈氏 谢能师妻。年二十二孀，卒年七十。
- 官氏 谢圣达妻。
- 杨氏 谢贤猷妻。
- 李氏 陈扬和妻。年十九孀，卒年四十二。
- 王氏 陈扬端妻。年二十九孀，卒年四十六。
- 林氏 陈扬拱妻。年二十八孀，卒年四十六。
- 王氏 陈扬松妻。
- 谢氏 陈贤开妻。年三十孀，卒年七十一。
- 李氏 陈杨连妻。
- 杨氏 陈杨焕妻。
- 卓氏 陈杨瑞妻。
- 王氏 谢贤同妻。
- 陈氏 登贤郑昌文妻。年三十孀，卒年七十一。
- 叶氏 郑治恺妻。年二十四孀，卒年四十三。
- 郑氏 芝岭陈敬文妻。
- 谢氏 陈敬开妻。
- 池氏 麦厝许道盛妻。年二十九孀，卒年八十三。
- 王氏 许忠翼妻。年三十孀，卒年六十二。
- 陈氏 郑景堂妻。
- 林氏 郑太源妻。
- 刘氏 巷头严士登妻。年二十六孀，卒年四十。
- 陈氏 广文郑加聚妻。年二十二孀，卒年七十四。
- 高氏 郑加璋妻。年二十孀，卒年六十六。
- 陈氏 郑加林妻。年二十八孀，卒年八十。
- 林氏 郑船陈尚华妻。

林氏 高岐李盟宜妻。年二十六孀，卒年七十八。

陈氏 李述严妻。

陈氏 李守清妻。

王氏 李雄统妻。年二十四孀，卒年六十六。

谢氏 李聘宜妻。年二十二孀，卒年五十二。

王氏 李郎宜妻。年二十三孀，卒年七十四。

姜氏 李銮宜妻。年二十八孀，卒年六十二。

陈氏 李日宜妻。年二十三孀，卒年五十六。

陈氏 李兴祺妻。年二十八孀，卒年七十三。

池氏 李绍举妻。

潘氏 李祥宜妻。

林氏 李虎宜妻。

郑氏 李昭宜妻。年二十九孀，卒年六十四。

陈氏 李循统妻。年二十三孀，卒年八十一。

郑氏 李守在妻。年二十八，夫卒，持斋奉佛，守节不移。  
年七十一。

林氏 李强宜妻。幼失恃，养于夫家。未婚而强病且笃，扶病行婚礼，庙见毕而强卒。氏时年方十五，抚嗣子为夫后，纺织度日。卒年二十四。

陈氏 李祖铿妻。少抱养于夫家，铿病笃而婚，甫庙见而铿卒。时氏年十七，为夫立嗣。卒年二十九。

陈氏 李祖羲妻，举人品辉媳也。年二十八孀，奉翁姑，抚二子，矢志靡他。

陈氏 湖东刘孝用妻。年二十二孀，卒年七十八。

黄氏 刘孝党妻。年二十七孀，卒年九十六。

黄氏 刘友财妻。年二十八孀，卒年五十六。

林氏 刘景兴妻。年二十三孀，卒年七十六。

郑氏 刘景锵妻。

陈氏 刘景奎妻。

黄氏 刘景朴妻。

刘玉红 湖东孝时女也。许字仙富李声锵，未婚而夫卒，女誓不改节。父母为筑屋以居，额曰“守贞”。女斋佛诵经，足不出户，朝夕纺织，积有余资，葬夫如礼，立嗣为夫后。邑令丁振德匾曰“冰清玉洁”。光绪间旌，建坊。卒年六十八。

陈氏 仙山诸生施奏周妻。年二十孀，卒年七十二。

刘氏 林亦德妻。

十八都 陈氏 林天莲妻。夫卒，奉翁姑，抚嗣男光崧游于庠。知府徐景熹以“松操荻画”旌之。

卓氏 林久亨妻。

郑氏 林久辉妻。

黄氏 林开庚妻。

陈氏 林永材妻。

陈氏 林焕可妻。

陈氏 林苞可妻。

周氏 林居可妻。

郑氏 林世佑妻。

李氏 林以谦妻。嘉庆十二年旌。

黄氏 林緬谦妻。道光十七年旌。

陈氏 林尚位妻。道光十七年旌。

叶氏 林则纲妻。道光十七年旌。

陈氏 林尚旅妻。道光十七年旌。

李氏 林尚梨妻。道光十七年旌。

李氏 林尚璐妻。道光十七年旌。

陈氏 林尚步妻。

陈 氏 林尚况妻。

陈 氏 林尚兰妻。

蔡 氏 林尚舒妻。

石 氏 林尚界妻。

陈 氏 林益娘妻。

杨 氏 林则昂妻。

周 氏 林则谋妻。

郑 氏 林益滔妻。

陈 氏 林阜光妻。

陈 氏 林益冕妻。年三十孀，守节至四十五岁卒。

陈 氏 林道淦妻。

李 氏 林益献妻。

陈 氏 儒士林益仪妻。年二十孀。孝事翁姑，抚夫侄士勋为嗣。士勋以县试第一籍学，其子华钟，后应县试亦第一，踵父游庠，人以为节孝之报。光绪十六年旌，建坊。

陈 氏 儒士林益暄妻。年十九孀，守节至五十九岁卒。

陈 氏 儒士林驹光妻。年二十一孀，守节至五十一岁卒。

郑 氏 林益吉妻。年二十孀，守节至五十三岁卒。

刘 氏 林益多妻。年二十孀，守节至四十七岁卒。

陈 氏 林则密妻。年二十四孀，守节至六十七岁卒。

李 氏 生员林光经妻。年二十一孀，守节至五十七岁卒。

黄 氏 林益调妻。年二十孀，守节至六十岁卒。

郑 氏 林乾光妻。

乌 氏 林□□妻。

十九都 方 氏 陈潜妻。夫卒，抚孤，苦节可风。雍正十三年旌。

潘 氏 陈朝享妻。甫一岁夫卒，无子，孝事翁姑，终身茹

素，足不逾闕。翁姑卒，治喪營葬。為夫立嗣。知縣黃瑞鶴以“操比松筠”旌。

徐氏 謝君陟妻。年十七歸陟，時夫已病，越三月卒。氏堅貞守節，卒年八十五。

陳氏 高飛聲媳，生員宗蔚妻。蔚早卒，奉姑叶氏惟謹。值海寇猖獗，扶姑逃東蓊山北，回遇賊，欲害其姑而污之，氏以銀五十兩并簪珥與賊，得免。復遇賊如前，氏告以姑老、夫亡、子幼，賊不聽，氏以手自毀其面，賊怒斫之，傷面及臂。微息未絕，僮婢扶歸，調治復蘇。延師訓子，長宸椒，諸生；次際昌，貢生。年七十八卒。

鄭氏 諸生陳元秀妻。幼習經史。歸秀二年，夫病，割股和藥，罔效，矢志撫孤。翁志友遠宦回，兩袖清風，氏簪珥奉翁姑，生事葬祭，躬自拮据。母病篤，割股療疾。治家嚴而有法，課子孫經史皆口授，賢聞姻黨。卒年七十。

秦氏 諸生陳一文側室。生二子，長澣七歲，次驢僅七月，一文卒，氏年二十七。方一文彌留時，氏啗斷中指誓必死。一文諭以撫孤後事，氏乃忍死受命，敬奉姑、孀。越數年，姑孀相繼沒，喪葬必慎。課督二孤，從師受業，日夜紡織，以佐誦讀。澣與驢砥行能文，有聲黉序。卒年六十。鍾陵熊伯龍為之傳。

黃氏 陳克樂妻。歸樂十餘年，未有子，家貧，勸夫納妾。生男韜光，甫四歲，夫卒。氏與妾茹荼撫孤，課光入庠，旋卒。又撫其孫成立，苦節數十年，卒年九十七。

陳氏 黃德景妻。年二十四，夫卒，無子。事翁姑以孝聞。守節三十餘年，未嘗見齒。乾隆二十七年旌。

陳氏 謝一壩妻。夫病篤，焚香告天，割股和藥以進。夫卒，苦志撫孤，守貞不渝。

陳氏 林行敏妻。



- 冯氏 陈朝曾妻。  
 郑氏 郡诸生谢锡章妻。  
 林氏 谢家彬妻。  
 姚氏 谢表妻。子麟，妇王氏，同守节。  
 洪氏 监生谢希哲妻。  
 邱氏 陈圣英妻。  
 陈氏 谢元驹妻。  
 林氏 监生高上卿妻。  
 吴氏 谢亶修妻。  
 游氏 谢齐越妻。  
 孙氏 举人陈晓妻。  
 潘氏 陈道怀妻。  
 黄氏 陈诸朗妻。  
 赵氏 谢天凭妻。年二十四孀守。道光二十年旌。

田氏 陈朝广妻。年二十，夫卒，子司挺甫三岁。及长，娶媳何氏，不数年子复故，媳曰：“丈夫长谢人世，且无子，留媳妇无用也。”请择为翁姑后者，议定，夜经死。当时称为“姑媳双贞”。

黄氏 陈廷阶妻。夫卒，矢志孀守。课子弥严，理家事井井有条，论者以为“女中丈夫”。卒年八十四。

郑氏 陈有彩妻。年二十四，夫卒，日勤纺织，抚育嗣子。乾隆四十四年建坊。

李氏 陈有波妻。夫卒，遗子道畴，抚之读书，娶媳蒋氏，三载畴又卒，孙诸程甫三月，门祚衰微，亲属窥伺，姑媳相依为命，尝指斋中桧树，曰：“此吾姑手植也，望世世子孙奋志读书，当如此树之发荣，庶不负先人手泽。”卒年八十五，媳亦年登七十九。五代同堂。道光元年建坊，题曰“双节”。孙诸程，太学生；

曾孙成文、元孙骐，均邑庠生。论者以为苦节之报。

高氏 谢治明妻。

林氏 陈道秋妻。

林氏 陈道添妻。

李氏 高维顺妻。

郑氏 陈有池妻，郑龙彪婢女也。主母陈氏孀居多病，氏割股以疗。年二十四适陈，三载夫卒，家贫如洗，纺织度日，抚子道三成立。卒年七十二。

魏氏 陈道仰妻，夫卒，茹苦抚二孤，课督成立。卒年五十二。子瑞麒，贡生。

林氏 高则熙妻，夫卒，家贫如洗，日勤针纫，仰事俯育。年六十四卒。

田氏 陈有节妻，夫卒，遗一子兆标，邻乡周某谋娶之。氏矢志不渝，穷饿自甘。标短折，又立嗣子澄。卒年七十二。

林氏 陈有灿妻。夫卒，课二子，约束弥严，无有佚志。卒年八十。

魏氏 陈道仰妻。

马氏 举人谢庭蓉妾。道光八年旌。

邱氏 生员谢允兹妻。割股疗亲疾，夫卒，守节。道光八年旌。

郑氏 陈彦云妻。同治六年旌。

邓菊姑 故儒士谢顺平妻。未嫁而顺平病痲，既婚益甚，菊姑滴血和药，祈天请代，掖以卧起者二年，形骸骨立。顺平歿，事姑以孝闻。嗣子宸书，严于课督，早岁入邑庠，旋充优贡生。道光戊申呈请旌奖，建坊入祠。卒年八十一。

任氏 陈彦请妻。夫卒，二子俱幼。家无业产，自甘穷饿以育孤儿。凡言动起居，均可为法。

张氏 陈彦钟妻。钟素有才名，赴省应试病卒，氏年二十五，抚三子成立。坚贞之操，至老不渝。

汪氏 陈有领妻。夫卒，无子，氏年十八，立嗣子道禄，抚之成立。咸丰九年建坊。

戴氏 陈诸碑妻。

田氏 陈诸围妻。

陈氏 黄景峻妻。夫卒，氏年二十二，抚幼女，足不出户，立侄士兴为嗣。

游氏 陈诸威妻。

周氏 陈道赠妻。夫卒，遗一子云栋。家无余囊，女红度日。

樊氏 陈诸增妻。夫卒，二子均幼，氏上奉翁姑，中睦妯娌，下课孤儿，各尽其道。

林氏 陈诸崇妻。

田氏 陈扬庆妻。

郑氏 陈晴溪妻。性严毅，姻大体。夫经纪会垣，疾笃，氏闻信，叩神吁代，携子女趋省，夫已在殡，扶柩归，恸绝复苏。翁姑谕以苦节抚孤，氏以母兼师，督课成立，曰：“吾事毕矣，可以见亡人地下，并复命翁姑也。”寻卒。子穆孚，郡诸生。

林氏 陈诸精妻。

石氏 陈诸蕃妻。

蒋氏 谢尊兰妻。

高氏 戴本仁妻。事姑抚孤，孤又殇，终不变其志。

郑氏 陈扬彩妻。夫卒，矢志坚贞。每夜课读，指遗孤泣曰：“尔父赍志以没，书香之继，惟在汝也。”后子贞荣游于庠。

林氏 陈扬奎妻。

林氏 高则庄妻。

林氏 高则叶妻。

郑氏 高维著妻。

林氏 谢尊问妻。

郑氏 陈扬铨妻。孀守茹素，抚孤贞铸成立，娶媳李氏，已生孙矣。铸赴省试，旅卒，氏哀慰寡媳，同抚藐孤，闻者伤焉。

潘氏 监生陈允雅妻。性缄默，略通书史。年十九归雅，四年而寡。孝事翁姑，抚育遗孤，未几孤夭，氏愤郁成疾卒。

黄氏 监生陈由坚妻。年二十八孀，守节十三年卒。

黄氏 陈彦朗妻。年二十七孀，矢志抚孤，坚贞自守。

郑氏 陈诸调妻。

林氏 陈扬喜妻。年二十四，夫卒，家徒壁立，缝紵度日。

郑氏 陈彦富妻。夫病笃，氏泣祷于神，割股和药以进。夫寻歿，氏年二十二，家无余粮，食贫苦守，历三十四年，以节终，里党咸称之。

郑氏 陈有池妻。已旌，建坊。

蔡氏 陈道统妻。督学陈学芬为之题旌。

林氏 廩生陈赞勋妻。夫卒，抚二孤成立。长锡龄，游于庠，现充汴洛铁路科长，欲为其母请旌，氏泣阻之，曰：“妇人守节，自行所志而已，庸求名乎？”事遂寝。

林氏 陈诸炳妻。年二十四孀守，抚遗孤成立，以节著。

潘氏 陈彦动妻。

□氏 陈诸洪妻。年二十六孀，卒年五十二。

林氏 陈雍彦妻。幼端慧，博涉群书，尤通《孝经》、《内则》。年十八归雍，孝翁姑，睦娣姒，持家有礼法。越两年，举一男炳星，未晬而孤，氏哀毁，绝饮食，欲以身殉。所亲苦劝之，乃勉强啜粥，哭奠如礼。抚孤课读，篝灯风雨，虽夜分未尝稍息。炳星既籍学，有声于庠，后考职获选，分发广东，氏以时局多艰，留

侍膝下。

廖氏 陈富诸妻。早年孀守，矢志不渝。事姑抚子，备历艰辛。兼善刺绣，时人有针绝之称。卒年六十四。

郑氏 陈绩彦妻。夫歿，遗一女。家极贫，夜雨孤灯，纺织度活。尝谓妇人当知大义，何可以穷饿故而稍变节耶？苦节二十余年而卒。戚族怜之。

郑氏 流水高敦由妻。

陈氏 高敦宝妻。夫歿，矢志抚孤，不渝其节。

郑氏 高敦暨妻。夫歿，家无余囊，佣力自给，卒以节著。

陈氏 高敦秋妻。

田氏 陈彦让妻。夫早卒，家酷贫，针黹度活，以育遗孤，乡里悯之。

林氏 陈道丹妻。

郑氏 陈时诸妻。

周氏 陈道衍妻。夫卒，茹素诵经，贞操自守。卒年六十。

林氏 陈诸於妻。

林氏 陈诸参妻。与妾某氏，同心守节。抚遗孤彦来，娶妇谢氏，逾月而来夭。谢与其姑及妾均以节著。

戴氏 陈诸午妻。夫早逝，家贫抚孤，矢志不二，里党贤之。

黄氏 陈诸庸妻。年十七归庸，逾月而寡。嗣子贡彦，娶妇黄氏，不二年而嗣子夭。姑媳夙居，冰霜共凜，一门双节。里党称之。

周氏 陈诸现妻。

林氏 陈诸语妻。

郑氏 陈由衡妻。年十六归，七阅月而夫卒。闭守深闾，虽密戚至亲亦罕覩面。里党咸称其节。



郑氏 陈明开妻。年十七归陈，甫八月而夫卒，氏矢志孀守，久而不渝。

曾氏 陈明英妻。年十九而寡，嗣子由长，娶妇高氏，未几又寡。姑媳相依，闾范肃然，戚党贤之。

林氏 诸生陈扬年妻。年籍学后，以痲疾卒。氏坚贞自守，至老不渝。

高氏 陈明乾妻。年二十二孀，卒年五十六。

李氏 陈明陶妻。年二十而寡。事孀姑能得欢心。抚孤霁岩，躬课之读。后霁岩以忿蹶棘闾，赍志而歿。岩长子学箕夫妇相继逝。次学箕，籍学后以痲瘵卒，其妇林氏亦孀守抚孤。一门三节，里党称之。

郑氏 陈诸作妻。

林氏 陈道冠妻。

李氏 陈彦畅妻。年十八归畅，逾两年，生邦度，甫五十二日而夫卒。氏悲怆欲绝，将以身殉。其父仰星晓之曰：“尔上有迈翁，下有幼子，责无可了，何以死为？”氏乃强起视事，誓以贞操自守。事舅抚孤，孝慈兼尽。经营生计，家以小康。卒年四十八。

林氏 陈彦山妻。年十九而寡。夫弟彦德妻周氏，亦早寡，林抚其子珍玉为夫后，妯娌相敬睦，同抚孤儿，以承先嗣。

李氏 陈扬贡妻。年二十二而寡。严正寡言，动必以礼，教嗣子以义方，族党重之。

连氏 陈彦修妻。

吴氏 陈诸照妻。

潘氏 陈彦岩妻。

张氏 陈扬畴妻。年十八寡，孝翁姑，睦妯娌，族党称之。

王氏 陈有厚妻。夫病，割股和药以疗。夫歿，氏年二十

四，家贫无以为衣食资，勤女红以奉姑育子。年七十九卒，旌如例。孙九人，长吉光，邑诸生；三吉喻，武举人；六杰，毕业法政别科。考取县知事。

田氏 陈道统妾。年十八孀。卒年五十九。

陈氏 林诸於妻。

二十都 林氏 郑春英妻。年二十，夫卒。事姑孝，苦节三十载。康熙五十九年旌。

林氏 郑任鉴妻。夫卒，孀居三十余载。孝事太姑及舅姑。每夜课读，指孤曰：“尔父夤志以没，累世书香尽在汝也。”子念翼，邑庠生。雍正二年旌。

林氏 郑任铨妻。旌奖节孝，与鉴妻同建坊。

倪氏 拔贡郑任铨妻。铨卒，氏年二十，无子，营兆冢葬夫，立后存祀。嗣子念盟，雍正甲辰举人。

张氏 郑维俊妻。年十七归郑，二年夫卒。遗腹举一孤，矢志自守，艰苦不渝。卒年八十一。

周氏 林本湊妻。

陈氏 郑常雨妻。本衣冠旧族，粗知礼义。夫故，家徒壁立，矢志抚孤。乾隆五十四年，署知县樊晋匾其门曰“贞节流芳”。卒年七十五。

高氏 林必贵妻。年二十三孀守，抚孤子有和，娶媳陈氏。不数年，和又故，媳抚孤子，奉孀姑以孝闻。姑寿八十八，媳年九十三卒。道光十九年建坊，题曰“双节”。

刘氏 林佳卫妻。

杨氏 林光德妻。年八十二终。

陈氏 林奕珠妻。

林氏 张敦言妻。

陈氏 林荣超妻。

- 何氏 林永贵妻。
- 潘氏 林昌明妻。夫卒，善事翁姑，抚遗孤成立。
- 连氏 林祖周妻。
- 陈氏 林永根妻。归根四年，夫卒，甘心孀守，抚嗣孤成立。同治间旌。
- 章氏 林昌珠妻。夫卒，事舅姑以孝闻，抚幼子成立。
- 陈氏 武生林枝英妻。
- 郑氏 例贡林起凤妻。
- 陈氏 林永煊妻。
- 吴氏 武生林枝新妻。
- 谢氏 林昌昭妻。
- 翁氏 张昌雅妻。
- 陈氏 张昌澄妻。
- 陈氏 林永庆妻。光绪乙酉旌。
- 郑氏 林昌熙妻。光绪乙酉旌。
- 谢氏 林昌昭妻。年二十孀，守节三十三年。
- 郑氏 林永远妻。年十八孀，守节至六十四岁卒。
- 陈氏 林永刚妻。年十九孀，守节至六十八岁卒。
- 陈氏 林永严妻。年二十孀，守节至八十四岁卒。
- 陈氏 林光焰妻。年二十七孀，守节至七十八岁卒。

二十一都 潘沂英 谢宸浩妻。生男文恭，甫周，夫卒。氏年二十一，事舅姑，抚孤子，誓死靡他。文恭长聘泮院林氏，未婚恭亡，林归谢，欲殉烈，太翁姑及姑痛止之，乃立嗣。姑媳昼夜纺织，事生送死，潘年七十五卒，林年六十余。乾隆九年以“姑媳双贞”旌。

高氏 陈广哲妻。年十九，夫卒，翁姑俱迈，子方一岁。时方调迁，家业荡然，氏勤女红以养翁姑，抚孤子成立。卒年八十。

知县卫建勋旌其门曰“节孝可风”。

刘氏 陈有程妻。夫卒，子三岁。家贫，氏纺织抚孤，茹糠充饥。知县黄瑞鹤匾其闾曰“霜清荻影”。卒年八十。

范氏 林公璧妻。夫卒，姑老子幼。同堂利其产，将不利于孤，氏毅然护持，不为所夺。奉姑惟谨，课子朝绅入国学。历节五十余年。

李氏 陈式奎妻。夫卒，誓以身殉。父母防之。哀毁成疾，勺水不入，完节而终。

陈氏 林挺世妻。

陈氏 诸生林有腾妻。

陈氏 谢颀先妻。

陈氏 谢用能妻。

陈氏 高国梁妻。偕媳江氏同守节。

姚氏 陈朝建妻。

卓氏 陈有强妻。

叶氏 陈学通妻。

徐氏 陈道光妻。

邓氏 许贵御妻。

李氏 武生许祥妻。

林氏 陈淑悦妻。夫卒，茹苦抚孤，克守妇道。人咸称之。

施氏 陈道盛妻。

卢氏 高以纯妻。夫病，尝割股和羹以进。

林氏 陈学栋妻。

黄氏 陈季笏妻。

陈氏 林奕快妻。

李氏 陈学德妻。

林氏 高恒昌妻。夫卒，家贫，子宗泽甫襁褓，氏勤纺织，

抚之成立。娶媳郑氏，年十八，泽复故。媳欲殉，以有娠忍死，嗣生男周岁后以哀毁终。氏复抚遗孙，五龄殇。氏年六十七抑郁卒。计历节四十年。

陈氏 林奕洙妻。抚育子女，孝养翁姑。

王氏 许道天妻。

黄氏 陈久长妻。同治六年旌。

陈氏 高恒顺妻。夫卒，子诚鳌方周岁。氏矢志抚孤。娶媳曹氏甫三载，鳌溺死，媳以哀毁歿，氏复抚遗孙八载卒。

董氏 陈学居妻。

郑氏 许道远妻。

郑氏 张敦礼妻。

曾氏 张敦祺妻。

曹氏 陈循烁妻。

张氏 陈久发妻。同治六年旌。

刘氏 林宏洪妻。纺织养姑，以孝闻。

江氏 林宏钟妻。

陈氏 许纯稟妻。

张氏 陈学党妻。

林氏 陈学芝妻。

柯氏 张敦扬妻。

陈氏 林侯文妻。

刘氏 陈循杰妻。

李氏 陈循举妻。

林氏 曾心喜妻。

郑氏 张敦拔妻。

高氏 张顺照妻。

陈氏 林榜仲妻。



- 曹 氏 陈德善妻。
- 王 氏 林煌仲妻。
- 张 氏 陈久亨妻。光绪二十年旌。
- 曹 氏 陈循灼妻。
- 李 氏 陈本著妻。
- 林 氏 陈本秀妻。
- 刘 氏 陈礼祚妻。
- 郑 氏 陈本仕妻。
- 林 氏 陈礼相妻。
- 黄 氏 林庄芳妻。
- 李 氏 林世榕妻。
- 林 氏 陈礼安妻。
- 陈 氏 林亦健妻。
- 柯 氏 儒士林世照妻。
- 林 氏 陈礼增妻。
- 谢 氏 张本时妻。
- 许 氏 林克材妻。
- 叶 氏 林克源妻。
- 王 氏 林培基妻。
- 陈 氏 林侯栋妻。
- 郑 氏 林侯发妻。
- 李 氏 陈久昌妻。年二十四而寡，守节十六年卒。
- 黄 氏 陈圣聪妻。年二十一而寡，守节十五年卒。
- 林 氏 陈礼时妻。夫卒，坚贞自矢，择嗣承桃。历节四十年，备尝艰苦。
- 曹 氏 陈循扬妻。夫卒，家贫，为人赁作，抚孤本正成立，既娶妇而本正夭，与媳王氏同心贞守，以节著。

陈氏 高崇实妻。

张氏 儒士林亦精妻。夫卒，事迈姑，抚孤子，备历艰辛。未几，子世源又卒。与媳陈氏夔居二十余年，以节著。

高氏 张顺鸾妻。

林氏 张敦升妻。年二十八孀，守节至七十岁卒。

叶氏 张忠德妻。德以力学卒，氏年二十九，奉姑抚子，内外肃然。长子仰伊，以诸生举孝廉方正。

郑氏 张忠捷继室。年二十三而捷卒，妾郑氏时年二十八。孀庶同心，孝事迈姑，抚孤成立。子高栋，妾郑出，以诸生毕业全闽师范优级，奖举人。

王氏 生员林葆英妻。归林五月而寡，时年十九，屏处孀帟，戚族罕见其而。

李氏 林和祖妻。

谢氏 林培祖妻。

陈氏 武庠生林景声妻。

李氏 林玉祖妻。

林氏 叶克能妻。

陈氏 前林林豪祖妻。年二十五，夫卒，事姑嫜，抚子女，慈孝并称。行年九十七犹健在。孙曾济济，五代同堂，福祉之盛，有自来矣。

李氏 贡生林书年妻。夫卒，幼孤赞猷，体羸善病，氏抚之备极劬劳。长游太学，已娶而夭。其妇王氏，贤淑知书，妇姑相依，同抚孤孙。光绪二十年，孙奉其主人大宏节孝祠，时王年才四十，格于例，主未入祠。氏卒年八十四，媳卒年五十四。

李氏 陈循矩妻。光绪二十年，主人大宏节孝祠。

陈氏 邑诸生林雨南妻。年二十九而寡，遗孤向荣甫二周，氏训之严，人谓孤幼可勿尔也，氏曰：“吾只一子，今若少纵，后

何有成？”长出就傅，既籍学而夭，媳陈氏，事姑孝养备至，抚孤子，理家计，一如其姑。光绪九年，氏获旌如例。卒年六十六，媳卒年六十一。

陈氏 太学生林翊彤妻。归林一年而寡，矢志抚孤。卒年六十三。

刘氏 林亦德妻。年二十四而寡，子甫襁褓，抚以成立。光绪三十年族。卒年五十七。

林氏 陈礼通妻。归十年而寡，善事舅姑，抚二孤成立。长义成，既娶而夭，媳高氏，克承姑志，忍饥操作，日夕不遑，氏倚之以资家用。

林氏 郑和禧妻。年二十三孀，历节三十二年卒。

郑氏 陈循辉妻。

王氏 林传铨妻。夫卒，忍死抚孤，奉舅姑，勤纺织，足不逾阃。舅姑既没，母家欲夺其志，氏折钗以誓，终不少渝。生平未尝有完衣，而浣濯必洁。历节三十年。卒年五十二。

方安里 高氏 刘则立妻。早寡，抚孤成立，乾隆十四年旌。

方氏 刘敬谦妻。夫死，矢志从一。知县给匾旌之。

徐氏 刘善甸妻。夫卒，翁姑老，孤幼。未几孤夭，复立嗣。苦节四十余年。

郭氏 刘以衡妻。

林氏 陈以琢妻。

姜氏 刘元瑄妻。

董氏 刘卜哲妻。

陈氏 姜时亮妻。

陈氏 刘伦谦妻。

陈氏 刘以章妻。

陈氏 刘泗谦妻。

- 许 氏 刘良翥妻。
- 林 氏 姜茂章妻。
- 陈 氏 刘良序妻。
- 王 氏 刘克乐妻。夫卒，家贫，抚二孤成立，乡人称之。
- 陈 氏 刘克耀妻。嘉庆间族。
- 陈 氏 姜德球妻。
- 张 氏 刘克性妻。
- 郑 氏 刘敦云妻。
- 李 氏 刘敦亨妻。
- 刘 氏 姜德崇妻。
- 姜 氏 刘克快妻。
- 刘 氏 姜敬开妻。
- 陈 氏 刘敦枝妻。
- 陈 氏 刘良利妻。道光二十一年旌。
- 林 氏 刘克荷妻。
- 林 氏 刘良都妻。
- 邱 氏 刘克璧妻。
- 曹 氏 刘孝时妻。
- 伍 氏 林克宣妻。
- 王 氏 陈守清妻。夫卒，堂无期亲，家无宿粮。姑老病，氏竭力奉养。岁饥，赁舂邻舍，得佣值米，尽作粥奉姑，己以米汤度日，闾里贤之。
- 叶 氏 陈守雅妻。旌奖建坊。
- 曹 氏 刘良统妻。
- 姚 氏 刘敦畴妻。道光二十一年旌。
- 史 氏 刘良浚妻。道光十一年旌。
- 史 氏 刘良波妻。

- 曹氏 陈守交妻。  
林氏 陈则福妻。  
林氏 刘孝畅妻。  
林氏 刘孝琪妻。  
周氏 刘孝思妻。  
曹氏 刘克奋妻。  
姜氏 刘孝齐妻。  
曹氏 刘孝贵妻。  
陈氏 刘良川妻。  
陈氏 刘孝瑞妻。  
陈氏 刘克牙妻。  
姜氏 刘友芹妻。  
黄氏 刘良霓妻。  
陈氏 刘克朋妻。  
陈氏 刘敦耀妻。  
郑氏 刘敦毓妻。  
陈氏 刘孝悌妻。  
陈氏 刘敦海妻。  
王氏 陈则亲妻。  
陈氏 刘孝模妻。  
林氏 刘克□妻。  
陈氏 刘敦实妻。  
王氏 刘孝茂妻。  
周氏 刘友桂妻。  
李氏 刘景清妻。  
陈氏 刘克晦妻。  
陈氏 刘景丰妻。



- 柯氏 监生陈则澄妻，举人柯寿亨女。
- 陈氏 姜宜观妻。
- 曹氏 陈世和妻。
- 林氏 陈则亮妻。
- 江氏 刘敦谟妻。
- 李氏 刘友元妻。
- 周氏 陈世魁妻。
- 池氏 刘克澄妻。
- 林氏 陈则长妻。年二十孀，卒年五十八。
- 王氏 陈则桢妻。年二十一孀，卒年六十五。祀北区节孝祠。
- 叶氏 陈世家妻。守节三十八年卒。
- 李氏 刘永亨妻。年二十四孀，卒年五十一。
- 刘氏 陈守双妻。守节四十六年卒。
- 林氏 刘用育妻。年十六孀，卒年六十三。
- 陈氏 刘孝长妻。光绪十八年旌，建坊。
- 林氏 王万斌妻。光绪乙酉旌。
- 林氏 王万贞妻。年二十孀，卒年七十五。
- 李氏 王绩建妻。年十九孀，卒年五十六。
- 刘氏 王万集妻。年二十孀，卒年六十三。
- 张氏 王传乾妻。年二十二孀，卒年六十一。
- 黄氏 王万楷妻。年十八孀，卒年五十七。
- 陈氏 刘成相妻。光绪二十八年旌。
- 陈氏 刘永焯妻。年二十九孀，卒年五十三。
- 柯氏 潭头刘永洙妻。已旌，建坊。
- 曹氏 刘孝雷妻。青年孀守，家无遗产，日夜纺织，抚孤成立。

- 王 氏 刘孝燕妻。青年孀守，抚孤成立。历节四十余年。
- 施 氏 刘孝璋妻。年十七归璋，善事太翁姑、翁姑。越五年夫卒，子钟鼎才六月，抚之成立，毕业法政，任崇安县典狱。
- 陈 氏 刘用贤妻。孝事翁姑，抚嗣子成立。历节三十余年。
- 周 氏 刘友年妻。青年孀守，抚孤成立。
- 陈 氏 刘永光妻。性贞静谨约。夫卒，孝翁姑，抚子女成立。历节三十余年。
- 曹 氏 刘用泮妻。孀守抚孤，备历艰苦。
- 陈 氏 刘永清妻。守节二十余年。
- 任 氏 刘友腾妻。
- 陈 氏 刘必新妻。
- 王 氏 刘永义妻。
- 陈 氏 刘永治妻。
- 周 氏 刘孝奎妻。
- 周 氏 刘孝锐妻。
- 卢 氏 刘孝为妻。
- 董 氏 刘永衡妻。
- 周 氏 刘孝镜妻。
- 陈 氏 刘友丰妻。
- 郑 氏 刘孝藻妻。
- 蔡 氏 刘孝板妻。
- 张 氏 刘孝翠妻。
- 陈 氏 刘永琳妻。
- 游 氏 刘孝福妻。
- 吴 氏 刘永桢妻。
- 林 氏 刘永定妻。
- 陈 氏 刘友坡妻。

王 氏 刘孝训妻。

陈 氏 刘孝祥妻。年二十五孀，守节六十余年。

梁 氏 刘敦潭妻。

林 氏 泽里陈则恭妻。年二十四孀，守节六十年。

王 氏 陈恒举妻。年二十二孀，遗腹产一男，勤织抚孤，事姑尽孝。

大宏里 陈三娘 德育季女。德育家颇饶，生三女，无子。三娘年十八将嫁，父卒，母萧氏，遗腹分娩得男。长女利父产，给母曰：“女也。”竟弃之，几死，以三娘救苏。月余，三娘适本里严姓，甫五月，夫卒。三娘将殉，众劝之，三娘曰：“年幼当死，无子当死，未逮事舅姑当死，何以劝为？”乃治死计，适母讣至，三娘大呼曰：“吾不死，如亡人何？吾死，如吾父呱呱孤弟何？”因延残喘，返于陈，抚弟。长女仍利父产，微挑三娘再醮，辄正言拒之。长女仍为三娘议婚，届期欲劫之去，三娘断发刮面得免。嗣弟稍长，渐习荡赌，三娘持长素，祝其成立，竟如愿为之婚娶。后三娘归静慈为尼，以寿终。其弟生三子，诸孙蕃衍，金祀三娘，同于玉溪之报义姑云。

陈 氏 高必璋妻。年二十三，夫卒，历节四十三年，雍正十二年旌。

卢 氏 诸生陈夏妻。年十九归陈，生子纪，甫三月，夫卒，奉养翁姑，抚孤成立。历节二十四年，乾隆二十五年旌，建坊。

陈 氏 郑纯岳妻。守节五十二年，孝养翁姑，抚孤成立。诏建坊旌之。

贵 氏 陈诗育妻。早岁孀居，抚男书大成立，又早逝。妇林氏踵姑志，抚孙尔玕又夭，孙妇郑氏复继贞操。时称“一门三节”云。

董 氏 张明珠妻。夫卒，氏年二十四，奉养翁姑，抚育孤

子。知县陈谐以“节孝可风”旌。

邓氏 刘以治妻。治生一子，治弟生二子，兄弟相继死。家贫，弟姒改适。氏年二十五，勤女红，抚育子侄，五世同爨。历节六十余年。

陈氏 曹云妻。夫游学而卒。氏孝养翁姑，抚孤子元猷。猷，邑廩生。

陈氏 施满庚妻。年二十一，夫卒，子其椿方三月，抚训成立入庠。

陈氏 李文浩妻。年十九归浩，逾年夫卒，遗腹男善，授室生子又亡，氏复抚孙成立。知县张尹旌之。

程氏 施长藩妻。未婚，长藩卒，氏归守节，终身不改。

陈氏 林兹定妻。未婚，定卒，氏诣林，立嗣守节，历尽艰辛。卒年七十二。

陈氏 曹士锐妻。

李氏 陈文辉妻。

刘氏 陈文炳妻。

黄氏 陈茂美妻。

周氏 陈德科妻。

林氏 陈魁昭妻。

李氏 林兹桂妻。

池氏 邱天佑妻。

邱氏 林兹惠妻。男开炽妻廖氏，同守节。

卢氏 林兹福妻。

邱氏 林文滋妻。

刘氏 生员林茅妻。

林氏 彭昌万妻。

曹氏 陈茂柄妻。

谢氏 林位洙妻。  
 江氏 张茂章妻。  
 谢氏 陈学孔妻。  
 林氏 林允纯妻。同子妇陈氏守节。  
 张氏 王奕酬妻。  
 陈氏 王代国妻。  
 刘氏 曹道赠妻。

刘氏 国学生陈宗漳妻。夫卒，抚遗孤，孝翁姑，克尽其道。长子三台，入成均；次三升，武生。乾隆四十九年建坊。三升复早逝，妇林氏遗腹二孤，励志抚育，绝迹外庭，孝事孀姑。长子占鳌，武生。

郑氏 林克春妻。  
 郑氏 王代兴妻。嘉庆七年建坊。  
 陈氏 林亮可妻。  
 刘氏 王纬香妻。  
 陈氏 林克培妻。  
 林氏 施光周妻。

林氏 柯友基妻。性贞静谨约。年二十七，夫卒，抚孤守节，足不出户者三十年，闺门内外肃如也。

陈氏 佾生曹文芳妻。  
 陈氏 林文华妻。  
 陈氏 曹道由妻。  
 周氏 王代尊妻。  
 王氏 谢治康妻。  
 施氏 林道钦妻。  
 高氏 林宜木妻。嘉庆六年旌。  
 董氏 王代喜妻。年二十一，夫卒，子伟澄方周岁，氏抚



之长，娶媳刘氏，生两男。伟澄复卒，刘氏年二十五，善事姑，抚两孤，而次孙男绩在又卒，孙媳林氏，年二十八，课子作霖入庠，俱以节终，人称“三代奉斋，乾坤俱古；一门贞节，草木皆香。”董氏，道光间旌；刘氏、林氏，同治五年旌。

李氏 曹朝信妻。

林氏 施世为妻。

刘氏 曹用华妻。

黄氏 郡庠生曹彪妻。

董氏 施盛尚妻。道光间旌。

周氏 王绩庆妻。

王氏 林克宾妻。

陈氏 曹朝尊妻。

赵氏 施世明妻。

刘氏 王绩财妻。道光庚戌旌。

刘氏 陈春芳妻。年二十四，夫卒，遗孤梁甫三周，抚训有方，入武庠。

鲍氏 王伟智妻。

陈氏 王伟见妻。

刘氏 柯友书妻。

陈氏 柯忠隆妻。

柯氏 王绩惠妻。道光二十九年旌。

林氏 曹朝铠妻。

曹氏 谢治梅妻。

陈氏 李永栋妻。

郑氏 王伟紫妻。

高氏 柯忠御妻。夫卒，孝翁姑，抚二子。卒年七十九。

周氏 陈天福妻。

陈氏 曹朝铨妻。

刘氏 曹朝国妻。

曹氏 陈恒右妻。年二十二，夫卒，抚孤硕宝成立。长娶媳林氏，硕宝复早逝，林亦守志，与姑相依。

陈氏 林明诗妻。

林氏 王伟真妻。

陈氏 王伟南妻。

曹氏 郑君瑞妾。

王氏 林永正妻。

谢氏 陈时禄妻。

刘氏 曹道来妻。

张氏 赠君柯友辅妻。年十九归柯，事舅姑尽礼，戚党称贤。夫卒，遗孤甫九龄，家赤贫，氏矢志抚孤，昼夜勤针黹，虽隆冬十指皲瘃，不少辍。常称道古人嘉言善行，以勸其孤，自少至成立如一日。子玉栋，盐提举銜候选通判，诰封太宜人。

林氏 陈克立妻。

萧氏 施世朝妻。

张氏 陈位瑀妻。彭学宪以“潜德徽仪”旌之。

刘氏 王绩聚妻。

刘氏 曹朝泽妻。

陈氏 柯良全妻。

姜氏 林明勋妻。

王氏 陈克从妻。

陈氏 曹用汉妻。

李氏 林久成妻。久成迁居省会，以家贫苦读，资志而歿。翁姑年老，男甫数周，女在襁褓，小叔小姑亦皆幼龄，一家八口，遗园几弓，氏以一妇女，力任其苦，灌园以外，并业针纫，备尝

苦楚。曹学宪以匾旌之。

郑氏 林宗响妻。

姜氏 施世相妻。夫卒，矢志抚孤，孝舅姑，勤纺织，邻里称之。子以诚，邑庠生。

吴氏 林宗兴妻。

林氏 陈克从妻。

张氏 练宜泰妻。道光七年旌。

张氏 王伟谷妻。

陈氏 王伟器妻。

陈氏 曹用科妻。

高氏 陈敬德妻。年十九，夫卒。氏贞静自安，谨言语，勤女红，以节称。

陈氏 柯良望妻。

林氏 柯良松妻。

陈氏 曹用珏妻。

陈氏 曹朝总妻。

张氏 林宗赏妻。

程氏 王万钟妻。同治癸亥旌。

陈氏 王绩涵妻。

张氏 柯良田妻。

张氏 王伟谷妻。

曹氏 施文章妻。

刘氏 林常双妻。

陈氏 林明台妻。

吴氏 陈雄列妻。

江氏 王绩能妻。

卢氏 谢统平妻。

- 谢氏 曹用坦妻。
- 谢氏 副贡曹朝纲妻。夫卒，闭门独处，守节三十一年卒。
- 陈氏 林宗灿妻。
- 陈氏 监生王鸿升妻。
- 施氏 鲍孔梨妻。
- 林氏 王绩金妻。
- 刘氏 林成仪妻。
- 游氏 王贞宝妻。
- 陈氏 曹朝杖妻。
- 董氏 施世卓妻。
- 林氏 郑宪珠妻。
- 林氏 柯忠谏妻。
- 欧阳氏 王绩庭妻。光绪丁丑旌。
- 林氏 陈克灿妻。
- 陈氏 曹用忱妻。
- 陈氏 郑宪金妻。家贫，纺织给养遗孤。
- 吴氏 郑明芳妻。夫卒，家贫，勤女红自给，抚遗孤成立。
- 林氏 王绩施妻。
- 张氏 诸生郑臣玉妻。夫卒，抚遗孤良灏。灏又早卒，媳张氏殉烈。氏苦节终身，抚孙成立。
- 林氏 李学梁妻。同治二年旌。
- 黄氏 陈永茂妻。性严肃，持家勤俭。夫卒，苦节自守。奉迈姑以孝，抚孤子以严，尝曰：“爱儿骨，不可爱儿肉。”族党贤之。
- 曹氏 王禹忠妻。
- 姜氏 诸生郑臣孝妻。夫卒，孝事翁姑，抚遗孤成立。
- 陈氏 林祥美妻。年二十四，夫卒，家贫，辛勤纺织，以

养遗孤。

蒋氏 王伟体妻。

王氏 鲍孔上妻。

林氏 李昌惠妻。

曹氏 柯圣尊妻。

方氏 王绩杖妻。

陈氏 曹用秋妾。

陈氏 曹用年妻。

陈氏 曹用享妻。

刘氏 施文良妻。

郑氏 职员林礼东妻。偕妾张氏同守节。

郑氏 王万宇妻。

陈氏 曹忠芳妻。

王氏 曹忠谋妻。

张氏 林文岳妻。

王氏 施寿武妻。于归五载，夫卒，矢志贞守，不出户庭。

孝翁姑。勤纺织。翁捷锋病几殆，医药无效，氏焚香默祷，翁病寻愈，人以为孝感所致。

许氏 王万州妻。同治癸酉旌。

林氏 王绩贵妻。同治癸酉旌。

江氏 王万乐妻。

周氏 王传恒妻。

林氏 王万松妻。

林氏 王绩栋妻。

林氏 柯良悦妻。

陈氏 刘克兰妻。

陈氏 林文照妻。



董氏 林宗沧妻。

王氏 曹忠卿妻。

郑氏 林茂锦妻。

王氏 陈永长妻。年十九于归，二十四岁，姑病危，割左股奉姑，旋愈。夫继病，复割右股奉夫，不效。夫故后，矢志抚孤，事姑尽礼。乡邻善之。

林氏 施文珠妻。

陈氏 施文猛妻。年二十七孀，守节抚孤。卒年七十二。

林氏 施玉知妻。年十八于归，六载而孀，抚孤守节。卒年七十六。

陈氏 施世坦妻。年二十二，夫卒，抚孤成立，既娶而夭，媳曹氏与姑孀守，历节数十年。姑年五十八卒。

姜氏 施世相妻。年二十四而寡。抚孤以诚为邑诸生。年九十二年卒。

林氏 施世建妻。获旌，建坊。

刘氏 施文敬妻。年十七于归，十九而寡。侍翁姑病，亲尝汤药，不离左右。抚遗腹二孤成立。长增光，毕业全闽师范专修科；次业农。光绪二十六年，邑令李详咨部旌如例。

张氏 厚福林文岳妻。年二十七孀，抚二子成立。卒年五十六，主人大宏节孝祠。

张氏 厚福林守兹妻。年二十二，夫卒，氏矢志不渝。主人大宏节孝祠。

王氏 监生林秀兼妻，闽县副举人沙县学教谕王允普、增贡生汀州府学训导王允春胞妹。氏生长名门，夙娴《内则》。年二十归秀兼，事舅姑以孝称。秀兼力学有声，已而病歿。遗孤泰灿，抚之成立，毕业商业专门学校。今氏年五十四，已弄孙矣。闾范严肃，如初孀时。

刘氏 林文映妻。年十九于归，甫四年而夫卒，家极贫，立志抚孤，恒数日不得一饱。闭户操女红，十余年间，乡人罕有窥者。

陈氏 曹用忱妻。

刘氏 沙堤林宗健妻。年十八孀，守节至七十岁卒。

二十三都 游氏 周格可妻。夫卒，年方二十八，侧室陈氏年仅二十二，同心孀守。游抚遗腹孤璧峰为诸生，陈抚孤世泽例贡。乾隆十一年，以“双节”旌。

姚氏 陈朝建妻。夫卒，有遗孕，越五月生男。甘心孀守，抚孤阳春入国学。乾隆十八年旌。

傅氏 林静坚妻。夫卒，矢志抚孤。乾隆二十五年旌。年八十五终。

池氏 周有壺妻。

谢氏 董馨朗妻。青年孀守，抚孤成立。雍正五年，知县熊男良旌曰“巾幗全人”。

陈氏 周有泰妻。同妾唐氏守节。

林氏 王维连妻。

林氏 周世玃妻。同子妇高氏守节。

李氏 林梅诚妻。嘉庆九年，学宪以“潜德幽光”旌。

施氏 陈茂义妻。

王氏 周时长妻。

郑氏 生员陈超妻。

王氏 周朝恣妻。

董氏 王有珠妻。道光十七年旌。

郭氏 王有豪妻。道光十七年旌。

蒋氏 王有耀妻。道光十七年旌。

吴氏 陈永声妻。获旌，建坊。

- 黄氏 陈安远妻。获旌，建坊。  
李氏 陈同远妻。  
林氏 陈义端妻。  
李氏 周时敏妻。  
郑氏 周时焰妻。  
柯氏 周时望妻。  
周氏 陈元华妻。同治七年旌。  
董氏 周孚典妻。  
林氏 陈方统妻。  
李氏 周时怡妻。  
江氏 王有谟妻。  
高氏 周孚珠妻。  
陈氏 姚同敬妻。  
郑氏 周时衡妻。  
林氏 王成和妻。  
陈氏 王利怀妻。  
林氏 周用乾妻。  
关氏 郑伯鳌妻。  
林氏 王利章未婚妻。旌奖，建坊。  
董氏 周孚琼妻。  
欧阳氏 周用全妻。  
董氏 陈元楷妻。同治七年旌。  
刘氏 吴克煌妻。  
陈氏 吴克浚妻。  
曾氏 吴克成妻。  
黄氏 陈吉勉妻。  
陈氏 周用建妻。

刘 氏 陈亨翔妻。

刘 氏 郑廷兰妻。夫卒，家贫，苦节事姑。

唐 氏 王有棫妻。赠朝议大夫王起璠次媳。

刘 氏 陈亨嘉妻。

林 氏 王贞浩妻。

陈 氏 周用祥妻。

郑 氏 王有粟妻。封奉直大夫王铭常次媳。

陈 氏 金峰李如琚妻。年十四，未及嫁而夫病且笃，请命父母，往侍疾，父母义而遣之。入门，夫病已大剧，氏昼夜侍侧不寐。或劝其少息，则对曰：“夫病势如此，欲长在榻前得乎？”如是者数日，而如琚卒。氏呼天恸哭，晕绝者数次。已念舅前卒，姑夔居，忍痛拮据衾殓如礼。姑有疾，割臂为糜以进，姑寻愈。贤声遍于里党，乡父老犹啧啧其轶事者。

黄 氏 陈承富妻。

陈 氏 曾显扬妻。

陈 氏 周用台妻。光绪十一年旌。

郑 氏 陈利发妻。

董 氏 金峰林道华妻。

周 氏 金峰李昌敦妻。年二十八守节，卒年五十五。

林 氏 上陈陈贞财妻。

董 氏 上张林必贵妻。年二十六守节，卒年五十八。

陈 氏 大洋许俊齐妻。夫早逝，家极贫，事翁姑惟谨。寿百岁。邑令某恤以粟帛，并赏给“升平人瑞”匾。

二十四都 陈 氏 李隆妻。年二十二，夫卒，氏奉翁姑，抚嗣子成立。历节六十年。乾隆十四年旌。

尤 氏 陈兴镜妻。镜早夭。氏将殉，既念翁年八十无后，因为翁置妾，生一男，妾复病废，氏任襁褓养耄翁。卒年六十五。

庄氏 陈需桐妻。夫卒，氏年二十，事舅姑以孝闻。历节三十余年。

吴氏 林元秋妻。年十八，元秋病笃，以老母弱子为囑，氏断指明心。后子复夭，立嗣孤。守节三十七年。

杨氏 柯天弼妻。年二十，夫卒，抚一子，孀居五十余年。

陈氏 林情妻。年二十二，夫卒，抚一男一女，男殇，氏与孤女纺织度生，苦节四十年。

董氏 吴圣昊妻。

郑氏 林钟英未婚妻。钟英卒，氏绝食欲殉，闻姑薨乃归林侍养。守贞四十年。

李氏 吴孝稻妻。

王氏 董绍章妻。

郑氏 董昌开妻。

吴氏 刘子周妻。

石氏 许世滔妻。

池氏 董玉琮妻。

施氏 董绍肅妻。

陈氏 董绍礼妻。

周氏 董孝华妻。

黄氏 董永卿妻。

许氏 刘君茂妻。

林氏 吴孝志妻。

王氏 陈恒大妻。

孙氏 林秉长妻。

陈氏 林永长妻。

黄氏 董道臣妻。嘉庆十二年旌。

董氏 许国谅妻。



吴氏 李永腹妻。

薛氏 监生董玉瑞妾。年十六归董，越二年夫卒，子文照才五月，抚之成立，娶媳陈氏。照病，陈割肱和药以进，寻卒。子泽甫四岁，陈欲殉，氏止之曰：“尔之命犹我也，我能育五月孤，尔独不能抚四岁子乎？”陈感姑言，立节苦守，事姑尽孝。子泽，邑廪生。同治间请旌。

王氏 李锡龙妻。

陈氏 董祖奎妻。

张氏 吴学清妻。年二十三，夫卒，矢志抚孤。卒年六十八。

张氏 孙世仪妻。年十九，夫卒，抚孤，备尝甘苦，言谈不苟。歿年七十。

吴氏 谢守魁妻。年十九适魁，魁抱病六年，氏奉汤药不怠，嗣卒。事翁姑以孝，抚遗腹以慈。卒年六十五。

陈氏 蔡聿朱妻。夫卒，子方周岁，守节抚孤。卒年七十五。

张氏 林登光妻。夫卒，生子兴仁甫一日，守节不渝。卒年五十六。

刘氏 陈孔乐妻。青年孀守，抚孤成立。

刘氏 池大亨妻。年二十四，夫卒，矢志不渝，立夫侄为嗣。

陈氏 池建雍妻。雍卒，年方二十二。夫弟建整亦早逝，叔姒陈氏年甫二十一。妯娌如姐妹，同爨同眠，始终无间，人均称之。

徐氏 郑道旺妻。年二十，夫卒，孝舅姑，抚孤子，各尽其道。年二十六卒。

刘氏 诸生吴士英妻。英卒，三男一女皆幼稚，抚孤成立。

卒年六十一。

吴氏 董道端妻。

林氏 蔡世纯妻。年十九，夫卒，抚孤聿兴，事继姑无间言。卒年六十八。

林氏 陈燕勉妻。

池氏 董则对妻。道光十五年旌，建坊。

任氏 董维搏妻。道光十五年旌。

陈氏 董文照妻。

林氏 王良达妻。

林氏 王良建妻。

陈氏 李永魁妻。

刘氏 沈永远妻。

张氏 蔡厚俊妻。年二十四，夫溺水死，氏抚孤成立。卒年七十八。

林氏 董谊秀妻。

王氏 林学芳妻。

施氏 董传岩妻。

林氏 董谊本妻。

林氏 宋道秀妻。

黄氏 刘敦灿妻。

陈氏 黄其銮妻。

黄氏 李则达妻。

陈氏 薛聿务妻。

陈氏 郑廷秋妻。

董氏 沈学波妻。夫溺水死，氏抚遗孤，纺织度活。

董氏 陈学城妻。归陈六年，夫溺水死。矢志殉烈，翁姑劝止。遗腹一男，日夕纺织，勤俭治家，逮事翁姑尽敬尽孝。

- 池 氏 李则为妻。
- 刘 氏 郑廷魁妻。
- 林 氏 董文荣妻。
- 陈 氏 董祖康妻。夫卒，家贫，日夜纺织，葬夫课子。后孙、曾林立。年八十一卒。
- 刘玉红 李章未婚妻。
- 欧阳氏 监生郑亮丰妻。
- 黄 氏 李俊德妻。
- 陈 氏 李明俊妻。
- 林 氏 董祖泗妻。夫卒，遗孤才四月，辛勤度活，苦守终身。
- 吴 氏 张得珍妻。
- 刘 氏 郑学钟妻。与妾林氏同守节。
- 林 氏 李赐银妻。
- 陈 氏 李赐领妻。守节三十年卒。
- 何 氏 陈开勉妻。
- 陈 氏 郑廷庆妻。
- 刘 氏 郑廷庆妻。
- 徐 氏 沈其珠妻。
- 刘 氏 沈永远妻。
- 池 氏 陈燕勉妻。
- 林 氏 周乌枣未婚妻。同治七年旌。
- 陈 氏 梅花林文禧妻。归文禧时，舅姑已歿，常以不逮事为憾，遇忌日，必整饬豆笮，以将诚敬。年二十七，文禧卒，遗孤又殇。族故式微，无期功亲可嗣，决计殉亡。同里陈其乐悯之，邀集戚党多方劝谕，佥议立远族某为文禧后。氏乃抚之以守，朝夕悲泣，奄奄骨立，足不逾阈，里党哀之。尝撰绝命词数十章，以

写其幽怨。

陈氏 梅花陈士杰之女，同里宋德华妻，性至孝，事父母能得欢心。年十七归宋，逾年而夫卒。氏呼天悲恸，决意殉亡，有遗腹娠数月，姑以延夫嗣劝之，妇矍然辍泣，曰：“诺。”及产得男，长而授室，妇亦稍慰。姑久病卧床褥，氏侍汤药十六年未尝少懈，甘旨之供，百方求进，务悦姑心。姑尝语人曰：“吾非氏，早不活于人世矣！”姑歿，氏哀毁逾恒，绝粒数日。未几翁又逝，子与媳且相继歿，遗孤在抱，形影相吊，而氏复抚之如抚儿时，备历诸苦况。族党贤而敬之。

陈氏 薛绳烘妻。年十七孀，矢志不移。守节二十五年歿。  
未详都图 郑氏 监生林兆凤继室。

石氏 林立幹妻。

陈氏 林成栋妻。

陈氏 林尚裕妻。

高氏 林向焕妻。

陈氏 林奕德妻。

范氏 林则南妻。

陈氏 林宗宜妻。

陈氏 林尚驹妻。

吴氏 林圣春妻。

高氏 林文灼妻。

郑氏 林宗泰继室。

黄氏 林勉谦妻。

官氏 林克春妻。

连氏 林则世妻。

林氏 蔡世统妻。年十七归统，二年夫卒，抚孤成立，事继姑无间言。

- |   |   |                 |
|---|---|-----------------|
| 王 | 氏 | 蔡世东妻。           |
| 林 | 氏 | 一作王氏，冯廷升妻。乾隆间旌。 |
| 陈 | 氏 | 曹道隆妻。乾隆间旌。      |
| 郑 | 氏 | 尧慎源妻。           |
| 陈 | 氏 | 邱宗灏妻。           |
| 陈 | 氏 | 欧阳澜妻。           |
| 连 | 氏 | 林守恩妻。           |
| 何 | 氏 | 林凤雏妻。           |
| 何 | 氏 | 林凤长妻。           |
| 陈 | 氏 | 林明智妻。           |
| 蒋 | 氏 | 林则耀妻。           |
| 谢 | 氏 | 林宗美妻。           |
| 黄 | 氏 | 林勉长妻。           |
| 高 | 氏 | 林尚尊妻。           |
| 陈 | 氏 | 林廷达妻。           |
| 潘 | 氏 | 林文成妻。           |
| 黄 | 氏 | 林尚炽妻。           |
| 金 | 氏 | 林邦耀妻。           |
| 柯 | 氏 | 林明朗妻。           |
| 黄 | 氏 | 林常可妻。           |
| 陈 | 氏 | 林明用妻。           |
| 孙 | 氏 | 林则芳妻。           |
| 连 | 氏 | 林翊妻。            |
| 廖 | 氏 | 林开之妻。           |
| 高 | 氏 | 林某妻。            |
| 吴 | 氏 | 林复敦妻。           |
| 陈 | 氏 | 林能恩妻。           |



- 陈氏 林能顺妻。
- 黄氏 林某妻。偕子圣武妇陈氏同守节。
- 程氏 林孝谟妻。
- 潘氏 林则銮妻。
- 邓氏 诸生林济川妻。
- 郑氏 林必礼妻。
- 陈氏 林元材妻。
- 黄氏 诸生林鹏举妻。
- 陈氏 林敬全妻。
- 池氏 林存大妻。
- 葛氏 林元锐妻。
- 田氏 林必凤妻。
- 郑氏 林必庆妻。
- 谢氏 林仕耀妻。
- 蔡氏 诸生林运锋妻。
- 陈氏 林登崇妻。
- 王氏 林学芳妻。
- 杨氏 林廷岳妻。
- 陈氏 生员林公云妻。
- 陈氏 林荷谦妻。
- 黄氏 林崇兴妻。年十九，夫卒，守节五十余年。道光间建坊。
- 关氏 林佳成妻。归二年，夫卒，抚遗腹孤义超成立。卒年七十余。
- 程氏 庠生林金镛妻。年二十五守节。以寿终。
- 陈氏 林思敬妻。
- 刘氏 武生陈捷元侧室。

- 林 氏 陈丕香妻。  
刘 氏 陈治纶妻。  
叶 氏 陈守雅妻。  
范 氏 陈廷书妻。  
任 氏 陈性亨妻。  
杨 氏 陈学东妻。  
田 氏 陈惟可妻。  
田 氏 陈国成妻。  
高 氏 陈于推妻。  
吴 氏 陈茂树妻。  
王 氏 陈文成妻。  
郑 氏 陈于普妻。  
林 氏 陈于刚妻。  
梁 氏 陈承德妻。  
赵 氏 陈行言妻。  
林 氏 陈行著妻。  
郑 氏 陈子基妻。  
李 氏 陈式惠妻。  
周 氏 理问陈绍纶妻。  
吴 氏 陈性朝妻。  
林 氏 陈丕亮妻。  
李 氏 生员陈爱商妻。  
蒋 氏 陈承周妻。  
杨 氏 生员陈奋庸妻。  
龚 氏 生员陈夔光妻。  
郑 氏 陈道香妻。  
高 氏 陈承兰妻。

- 高 氏 陈丕英妻。  
石 氏 陈有勇妻。  
林 氏 陈有富妻。  
董 氏 陈位玉妻。  
林 氏 陈式免妻。  
何 氏 陈富有妻。  
周 氏 陈坦有妻。  
周 氏 陈有桂妻。  
王 氏 陈乾有妻。  
李 氏 陈行义妻。  
高 氏 陈行镳妻。  
田 氏 陈兆郁妻。  
蒋 氏 陈厚模妻。  
王 氏 陈式品妻。  
林 氏 陈立宗妻。  
李 氏 陈允敬妻。  
冯 氏 陈希来妻。  
林 氏 陈元金妻。  
田 氏 陈典安妻。  
林 氏 陈有万妻。  
吴 氏 陈震藻妻。  
韦 氏 陈亨骏妻。  
林 氏 陈廷基妻。年二十寡。寿七十。  
郑 氏 陈受雍妻。  
刘 氏 陈位泉妻。  
郑 氏 生员陈应春妻。  
黄 氏 陈亨嘉妻。

- 李氏 陈亨玉妻。
- 张氏 陈亨弼妻。
- 张氏 陈德宗妻。以上二十二人乾隆间请旌。
- 郭氏 陈敬行妻。
- 吴氏 诸生陈宗培妻。
- 潘氏 陈行筹妻。
- 易氏 陈茂麟妻。
- 王氏 陈仕祖妻。
- 杨氏 陈有德妻。
- 马氏 陈春溥妻。
- 吴氏 陈德乾妻。
- 王氏 陈德纶妻。
- 林氏 陈志澄妻。
- 林氏 诸生陈奏韬妻。
- 黄氏 陈心斌妻。
- 徐氏 陈世豪妻。年十七守节。
- 林氏 陈守密妻。
- 黄氏 陈方达妻。
- 林氏 陈世贵妻。
- 金氏 陈贞谦妻。年十八守节。
- 梁氏 陈朱列妻。
- 林氏 陈行贺妻。
- 曹氏 陈旭德妻。
- 林氏 陈和烈妻。
- 周氏 陈元华妻。
- 郑氏 陈彦琚继室。归四月，夫病卒，氏年十九，遗腹男应兴，抚之成立。

高 氏 陈彦美妻。

林 氏 陈彦请妻。

谢 氏 陈其厚妻。

李 氏 陈光守妻。

刘 氏 陈世奎妻。

李 氏 陈守光妻。

江 氏 陈以柱妻。

刘 氏 陈本观妻。

高 氏 监生陈逢韶妻。

郑 氏 监生陈循煌妻。

刘 氏 陈德彪妻。

姚 氏 陈陞妻。

刘 氏 郡庠生陈金源妻。早寡，子登炜，甫三岁，次象贤，在遗腹中。氏勤女红，以抚家计。历节三十年。抚二孤，长俱入泮。

张 氏 陈子虔妻。虔贫，就赘于张。张家会城。虔卒，氏哀恸几绝，夫弟劝之，氏泣曰：“去矣。”夫弟亦泣曰：“去耶？”氏大惊曰：“吾生为陈家妇，死为陈家鬼。去者，归去长乐也。”遂奉夫柩及遗孤华壮、华柯归。

林 氏 庠生陈焕章妻。早寡，抚孤备极艰苦。戚属有谋倾其产，诈以非命者，氏控诉公庭，卒保其孤。

高 氏 庠生陈时风妻。风秋试后，赍志以歿。氏教诲必循规矩。子正源，邑诸生。

郑 氏 陈世雨妻。夫卒，氏恪守闺训，足不逾闾，历三十余年。嗣子已娶室，虽家中人犹罕见其面。

江 氏 陈英谦妻，举人三音女。年十七归陈，月余夫卒，氏欲殉，以刀自刎，姑救止，泣劝。为夫择嗣营葬，勤俭持家，事



姑尽孝。历节三十余年。

董氏 陈炫未婚妻。夫卒，依母家守贞，兄亦早歿。族有谋噬产而害孤侄者，氏与嫂欧阳氏百计捍御。比侄长，誓从夫死。会疾笃，遂屏医药。卒年三十六。侄为持三年丧，人称义姑云。

林氏 陈昶妻。诸生永勋女。夫病笃，氏割股疗之，又十年，夫卒。矢志事姑，抚子成立。

张氏 陈永护妻。夫病，割股以进，夫卒，割耳殉殓。以节终。

高氏 诸生陈超鹏妻。

林氏 陈永琬妻。

林氏 王永琼妻。

郑氏 王在礼妻。

陈氏 王文杰妻。

林氏 王为朝妻。

陈氏 王则高妻。

陈氏 王于瑯妻。

林氏 王在贵妻。

林氏 监生王文藩妻。乾隆间旌。

陈氏 监生王天惠妻。

郑氏 王某妻。嘉庆间旌。

陈氏 王传阡妻。

罗氏 王季良妻。

李氏 王经合妻。

林氏 王维速妻。

陈氏 王昆都妻。夫卒，矢志抚孤。族人欲为请匾于县，氏泣告之曰：“妇人守节，寻常事耳。悬匾示人，非以守志，徒沽名耳。”乃寝其事。

- 陈 氏 生员郑世凯妻。  
陈 氏 郑行焕妻。  
高 氏 郑世章妻。  
陈 氏 郑茂芳妻。  
李 氏 郑行大妻。  
林 氏 郑绎俊妻。  
王 氏 郑茂滨妻。  
石 氏 郑昌琚妻。  
陈 氏 郑克光妻。  
赵 氏 郑行劝妻。  
陈 氏 郑家成妻。  
陈 氏 郑茂沅妻。  
林 氏 郑茂岗妻。  
高 氏 郑奕在妻。  
林 氏 郑加敦妻。  
陈 氏 郑韬长妻。  
欧 氏 郑在福妻。  
陶 氏 郑元涯妻。  
林 氏 郑茂藻妻。  
林 氏 郑可彦妻。  
陈 氏 郑良乐妻。  
陈 氏 郑代极妻。  
陈 氏 郑纯岳妻。  
林 氏 郑学卿妻。  
陈 氏 郑邦龙妻。  
戴 氏 郑善继妻。以上六人乾隆间旌。  
林 氏 郑希玉妻。

- 陈氏 郑某妻。  
 谢氏 郑某妻。  
 林氏 郑时序妻。  
 王氏 郑道钊妻。  
 林氏 郑茂藩妻。  
 陈氏 郑兴选妻。以上七人嘉庆间旌。  
 林氏 郑可达妻。合卺夕，夫以疯自缢。越八载，氏亦哀  
 毁卒。  
 林氏 郑大鹏妻。  
 陈氏 郑时顺妻。年十八守节。寿八十。  
 某氏 郑时典妻。  
 谢氏 郑昌石妻。  
 林氏 郑朝天妻。  
 邹氏 生员郑泉妻。  
 范氏 郑道商妻。年二十守节。  
 高氏 郑逢泰妻。  
 陈氏 郑昌图妻。  
 陈氏 监生郑如圭妻。  
 陈氏 郑序言妻。夫卒，年二十四，苦守六十一年。县令  
 彭匾其门曰“节寿慈祥”。  
 陈氏 郑昌宝妻。未婚夫卒，年十七，闻凶耗，即请诸父  
 归于郑。事翁姑孝，处妯娌和，族党无不称羨。  
 周氏 郑茂鸿未婚妻。乾隆间旌。  
 林氏 郑朝源妻。  
 谢氏 郑良岱妻。寿登百龄。  
 李氏 生员刘宗英妻。  
 陈氏 刘克祖妻。

- 陈氏 刘良修妻。  
陈氏 刘高璟妻。  
陈氏 刘克邦妻。  
林氏 刘克发妻。  
高氏 刘建谦妻。  
黄氏 刘良品妻。  
陈氏 刘良利妻。  
邹氏 刘栋妻。乾隆间旌。  
卓氏 刘敦秋妻。  
黄氏 刘以通妻。  
邹氏 刘文栋妻。  
郑氏 刘则调妻。  
陈氏 李孝茹妻。  
周氏 李茂成妻。  
陈氏 李于吉妻。  
刘氏 李昌端妻。  
史氏 李亨美妻。  
陈氏 李名峰妻。  
卓氏 李章灿妻。  
陈氏 李章衡妻。  
陈氏 李某妻。  
曾氏 李尧静妻。年二十守节。  
陈氏 李成章妻。  
刘氏 监生李锡金妻。  
方氏 李国龙妻。  
何氏 李国明妻。  
萧氏 生员李振熙妻。善事翁姑。夫卒子幼，其弟欲迎养

于家，氏以翁姑年老不往。姑毫无齿，不能食，氏遗腹男甫五月，即断乳，以乳其姑，姑赖以延年。后翁姑歿，执丧尽礼，中外以孝称。年三十九卒。

陈 氏 张顺久妻。

郑 氏 张顺天妻。

郑 氏 生员张舒英妻。

程 氏 张春泰妻。乾隆间旌。

林 氏 张孟乾妻。嘉庆间旌。

许 氏 张孚政妻。夫患恶疾，愿退婚，氏不可。归未久而寡，后以节终。

林 氏 张茂佃妻。

施 氏 张敦清妻。

刘 氏 张敦开妻。

颜 氏 黄瑞龙继室。

何 氏 黄其则妻。

刘 氏 黄光灿妻。

陈 氏 黄昌芳妻。

卓 氏 黄邦昂未婚妻。

某 氏 黄德彩妻。年二十寡。卒年七十。

郑 氏 高郑诚妻。

陈 氏 高绮诚妻。

林 氏 高体田妻。

陈 氏 高惟书妻。

李 氏 高维助妻。

谢 氏 贡生高文骏妻。

刘 氏 高文驹妻。

蔡 氏 程崇栋妻。



- 陈氏 程崇文妻。  
陈氏 程恒亮妻。  
林氏 程德亨妻。  
陈氏 周祖权妻。  
林氏 周学漠妻。  
丁氏 周朝光妻。  
叶氏 周知仕妻。  
林氏 周时乾妻。  
郑氏 江国知妻。  
王氏 江有昂妻。  
周氏 江有澜妻。  
陈氏 江邦赏妻。  
吴氏 谢齐双妻。  
林氏 诸生谢璋妻。乾隆间旌。  
蒋氏 谢日讲妻。嘉庆间旌。  
汪氏 谢天骝妻。  
林氏 谢知有妻。  
林氏 谢治善妻。  
陈氏 谢善孚继室。  
陈氏 谢斌妻。  
林氏 谢云平继室。  
袁氏 谢铨平妻。  
邓氏 谢顺平妻。年十九守节。  
黄氏 谢永兴妻。  
黄氏 谢日赓妻。年十九寡，卒年七十二。  
王氏 谢应修妻。  
林氏 谢文恭未婚妻。文恭父宸诰早歿，恭甫周岁，母潘

氏鞠养以长，聘林而夭。林奔丧谢门，立嗣子，勤十指养姑，以完节终。

王 氏 谢拔未婚妻。

林 氏 附监谢希玉妻。及笄于归，甫结褵，玉已遵重痾，氏调侍汤药，早夜不懈者数年，卒不起，氏痛不欲生，既念夫付托之重，勉进饮食。事姑嫜，抚子女，克孝克慎。后子入成均，孙游庠，皆亲见之，人以为苦节之报也。卒年八十。乾隆六十年旌。

王 氏 施世合妻。

郑 氏 施希禹妻。

郭 氏 吴珉卿妻。

陈 氏 吴春昭妻。

刘 氏 戴德孚妻。

郑 氏 戴梅魁妻。偕子德雅妻黄氏同守节。道光间旌。

吴 氏 卓则丰妻。

刘 氏 卓仁礼妻。

王 氏 官远裔妻。

黄 氏 官体乡妻。

陈 氏 叶世福妻。

林 氏 叶长富妻。

林 氏 叶礼有妻。

林 氏 冯永德妻。

林 氏 柯宗兰妻。年二十一，夫卒，无子，矢志奉姑，抚嗣子庭芳。历节三十余年。道光间旌。

陈 氏 徐必伸妻。乾隆间旌。

林 氏 游高恩妻。

刘 氏 邹得康妻。道光间旌。

郑 氏 阮恒昂妻。

- 陈氏 杨成章妻。  
 陈氏 杨国柱妻。  
 耿氏 杨凤官妻。  
 林氏 郭大元妻。  
 陈氏 名冕姑，毛愿未婚妻。举人于候女。年十九，愿卒，女守贞不字。  
 林氏 陈涛妻。夫病，尝割股侍疾。

## 补遗

- 东隅 高氏 郑昭臻妻。年二十八孀，卒年七十二。光绪己亥，建坊官仓岭。  
 陈氏 郑和圣妻。年二十，夫卒。  
 刘氏 幼字郑同谦。年十六，未及婚而谦卒。氏闻讣，适郑守贞。卒年三十四。邑令奖以：“史笔流芳”。  
 陈氏 生员郑韬略妻。  
 林氏 增生郑闻履妻。  
 陈氏 郑兴选妻。  
 张氏 郑茂恭妻。  
 林氏 郑茂年妻。  
 林氏 郑茂楷妻。  
 陈氏 郑茂焜妻。  
 徐氏 郑茂榕妻。  
 赵氏 郑昭华妻。  
 陈氏 附生郑逢时妻。  
 邹氏 郑昭廉妻。  
 高氏 郑国起妻。  
 陈氏 郑国裳妻。

三都 郭氏 闽县柏荫女，欧宁学训导郑景渊妻，山东盐运使元璧之媳也。年三十而寡，事姑曲尽孝道，抚诸孤成立，躬课之读，长子承晟，浙江永绥县丞；孙庆豫，毕业绎学馆，以中书用，现任外交部主事。氏博览群书，工诗，著《继声楼诗集》二卷。其父柏荫为之序。

郑氏 黄忠舆妻。年十八孀，卒年五十一。

十二都 徐氏 武生董文在妻。幼归董，夫患瘵，与氏异寝。夫卒，氏年二十五岁，犹处女也，欲以身殉，姑劝谕之而止。卒年五十九。获旌如例，建坊。邑令王秉策题云：“封发抗名门，家乘待编良史笔；薰香持雅操，穹题争拜义夫间。”邑绅李兆珍巡按为之传。

余氏 董孝月妻。年二十二，夫卒，守节十一年歿。

李氏 董祖铈妻。年二十五孀，以节终。

蒋氏 董道喜妻。年二十六，夫卒，以节终。

陈氏 董道隆妻。夫病瘵，氏亲侍汤药，年二十六，夫卒，氏矢志不渝。

陈氏 石学善妻。

郑氏 石学侯妻。

林氏 董述昆妻。传见葛氏。

省居 葛氏 董祖诒妻，教谕炳章母也。与姑林氏俱通文能诗。姑媳孀守食贫，训孤炳章至能文始就傅。光绪间，邑人谢章铤等金请学政王锡蕃给奖“寒梭两杼”坊额。葛诗选入《闽闺秀诗录》。

叶氏 郡庠生董顾妻。

蓝氏 董述阳妻，教谕炳章胞叔母。殉夫未遂，斋居九年以终。

陈氏 董捷三妻。

十四都 李 氏 柯友彝妻。

李 氏 柯友严妻。

夏香姐 逸其姓，诸生柯忠椒妻。椒家贫，苦读，咯血而歿，氏年方二十二，遗孤甫三岁，矢志守贞，备尝苦楚，抚孤成立。已而孤夭，遗孙亦三岁，氏又抚之如抚子时。里党贤之。

陈 氏 柯友箴妻。

薛 氏 柯忠根妻。光绪间旌。

程 氏 柯忠山妻。

李 氏 柯忠定妻。

王 氏 柯忠鉴妻。

陈 氏 柯贞象妻。

陈 氏 柯忠彭妻，贡生陈惠女也。夫卒，年二十四，事翁姑孝养备至，抚遗孤课督綦严，节啬衣食，家以小康。子鸿超，由山西善后局办事出力，奖给五品顶戴。宣统三年旌。

谢 氏 柯贞惠妻。

萧 氏 柯圣敏妻。

林 氏 柯贞高妻。

陈 氏 柯贞松妻。

杨 氏 林彩兴妻。夫卒，年二十三，翁劝改适，氏常藏利刃于怀，誓死以守。茹苦躬耕，人咸钦之。

林 氏 山边李子汶妻。

陈 氏 柯经奎妻。

林 氏 柯贞亨妻。

陈 氏 柯柱年妻。

十八都 林 氏 东山村陈诸满妻。

郑 氏 林光宇妻。

李 氏 林昌光妻。



陈氏 林则密妻。

王氏 林光泳妻。年十九，夫歿，获旌如例。

二十一都 林氏 三星桥陈玉才妻。幼养于夫家，年十七，合卺有日矣，才病，医药罔效。氏夜焚香祷祝，割股和药以进。夫饮之而愈，始克成礼。逾十年而寡，坚贞自矢，事翁姑尽孝，教子女以义方。

方安里 陈氏 二刘村刘用琛妻。年二十一孀，遗孤彦秀甫晬，彦文在妊，氏抚之成立。守节二十二年卒。彦秀毕业法政别科。

大宏里 王氏 厚福林宏发妻。

蔡氏 林道祥妻。

陈氏 林道长妻。

王氏 邱天吉妻。

施氏 汶上王绩情妻。

陈氏 王绩台妻。

林氏 王万章妻。

郑氏 王传太妻。

林氏 王传农妻。

陈氏 曹朝总妻。

鲍氏 曹忠庚妻。

陈氏 曹用业妻。

林氏 岭南陈位谷妻。

曹氏 陈令炳妻。

张氏 施文来妻。

姜氏 施祉武妻。

薛氏 前陈陈尚满妻。

林氏 陈于棋妻。

高氏 沙堤林守球妻。

省居 许氏 郭良珠妻。年二十五而良珠歿，守节抚孤，事舅姑尽孝。姑悯其子幼孤，不能治生，临歿，授以积金。氏告伯氏曰：“姑遗命固然，然氏以一子私积金，非义也，请均诸伯氏则可耳。”卒如所请。族党以为难。今其云初蕃盛，人以为节孝之报。

东隅 高氏 黄贤畴妻。

陈氏 郑国勇妻。

卓氏 陈承保继室。

郑氏 林侯筹妻。

十三都 姜氏 陈孝炜妻。

十都 郑氏 湖尾李其琛妻。年二十二孀，以节终。

大宏里 林氏 王绩在妻。

程氏 王万钟妻。

刘氏 王伟澄妻。

十二都 王氏 石铜铜妻。年二十，铜卒，族无赖者屡诱卖，氏每以白刃自卫，卒逃归。一日复卖之，氏欲自戕，买者怒，解其履纵之，氏黑夜匍匐归。氏家奇贫，日携篮丐市上，族有怜而敬之者，欲收养之，氏不允，曰：“孀妇不易受人恩。”或有与以果饵茶饭者，拒不食，恐有药乱其性也。氏嗜读，日所丐钱，供粗糲外，以余钱买油佐夜读，故破屋中，灯火常荧荧焉。

高氏 鹏上郡庠生黄则伊妻。则伊以苦读得咯血病，氏减己算益夫龄，复割股和药以进，不效。夫卒，矢志抚孤，勤女红度日，夜则篝灯课读。子鸿图，附贡生。

### 孝妇孝女附

高氏 郑善章妻。事姑孝，姑病，氏割股杂药以进，寻愈。氏年八十一卒。知县陈谱以“女宗接武”旌之。

林氏 东林人。年十六，父病，割股和药进。长适林，奉老姑复以孝闻。

林氏 七都生员游旭妻。性端慈，年十二，适游。家贫，孝事翁姑，姑继室也，生幼子，促氏与旭另居，氏承顺无违。凡有甘旨，必使人遗翁姑，如是者数年，姑感其诚，乃召氏及旭归。未几姑病笃，以所生幼子托氏，氏卵翼备至。后翁病危，旭馆远方，氏无措，乃割股和粥，得延数日。旭归，翁卒，氏佐旭治丧，尽礼尽哀，远近无不嘉叹。氏先旭没，闽士大夫诔以孝惠云。

林氏 大宏里张恒协妻。孝事翁姑。翁病，恒协割股以疗，未甚痊，氏复割股进之，乃愈。后氏病，男茂海暨三男茂瑞妻施氏亦然，人称“世传孝行”云。

高氏 举人吴化妻，名寅。性仁慈。幼失恃，奉祖母抚二弟，备历艰辛。适吴，事姑萧氏恭谨，姑病笃，焚香默祝，割股以进，病遂瘳。后姑又病，着床八载，氏亦有媳，妯娌六人，汤饭之奉，必经己手，其笃孝至老不懈云。

郑秀娟 副都御史任钥季女。性敏，七岁能诵《孝经》、《论语》。任钥为编修时，举家患厉症，弟念盟濒于危。秀娟方九岁，号泣祷天，请代弟死，以延宗祀。父母与弟俱痊，独秀娟以侍汤药过劳，遽疾不起。士大夫闻之，为作《孝女传》。

陈默姐 潭头文炽女，十七都李云龙妻。方笄时，父病笃，诸弟俱幼，女焚香祝天，割股和药以进，父病遂痊。后复病，其弟仕堂、三弟仕圭妻林氏，各割股以疗其父若翁。人谓：“一门三孝”。

郑氏 五都林以傅妻。夫病危，焚香告天，割股疗之，遂愈。

李蒲姐 沙京人。尝割股以愈母病。许配萧良敬，敬出外岛，氏待字三十六载，归乃成婚。三载生男，夫复他往不归。家极贫，

日夜纺织，抚子成立。

董氏 十三都林开瑞妻。割肝以疗夫病。

林氏 十一都柯顺耳妻。年十八归柯。时舅姑歿，值忌辰，必奠哭，素服三日，或问其故，氏曰：“吾不及事舅姑，素服三日，少表此心耳。”顺耳与陈长焕合伙，渐积数千金。长焕子女长成，用度颇繁，有劝氏分居者，氏曰：“妇人见小，每使丈夫为德不终，奈何以用度计！”自是三世同居，从无诟谇声。迨子琼任湖北云梦、襄阳诸邑令，迎养官署，谆谕行善政。年七十五卒襄阳，奉旨得扶柩入城。

陈氏 十六都黄万为妻。夫病笃，氏焚香默祷，愿以身代，割股和糜以进，乃起沉疴。临终示诸子，伤痕宛然。

何氏 潭头贡生陈友澜妻。孝养翁姑，抚夫孤侄如己出。妾王氏，生子多不育，氏以己子易妾子育之。夫病，割股以疗，遂愈。

洪氏 西隅生员郑超如妻。性孝敬，姑病，割肱以疗，遂愈。后夫病，亦割肱疗之。

李氏 潭头庠生陈一元妻。克尽妇道，夫病笃，割股以疗，寻愈。

翁氏 陈克恩妻。姑病，割股以进。子守奩妻翁氏，亦割股疗舅病。

林氏女

邱氏 举人国铃女。年十八，归优贡林凌霄次子立遵。割股疗舅疾，后姑病，复割右股以进，伤深，寻卒。

邹氏 生员陈兆标妻。性淑慧端慈，敬事舅姑。姑病笃，焚香默祝，割股和羹以进，姑遂愈，延寿二十年。姑卒年九十三，氏年六十七。

李氏 三都举人陈应驹妻。事舅姑孝。姑病笃，氏割股和

药，姑寻愈。

郑氏 鹤上陈玉满妻。性仁慈，好观《女史》，敬夫课子。事姑孝，姑病着床，汤饭之奉必经己手，如是者三年。姑卒，氏于三年丧礼无少懈。里人以“生敬死哀”称之。卒年五十二。

陈氏 仙富李锡松妻。松病疽，不能操家人业，氏事翁姑，兼子职。翁病笃，祈天减算，愿以身代，割股和粥以进。翁没，事姑三十余年无少懈。姑卒年逾九旬。氏以哀毁踵姑而歿。同治五年旌如例。子若采，郡增生。

陈氏 沙京李于奎妻。姑病笃，氏割股和糜进，姑随愈。后六载复病，氏衣不解带者数月，焚香告天，请以身代。姑卒，哭泣尽哀，染病不起，告其夫曰：“妻死夫必娶，夫娶子有母。阳间尔事父，阴间妾事姑。”言毕而卒，时年二十八。

郑氏 西隅陈方振妻。性慈和，明义理。事祖姑及姑克尽妇道，处妯娌无间言。祖姑老病，昼夜侍奉无少懈。姑病笃，割股和药以进，姑寻愈。里党贤之。

郑秀璘 生员存诚女。年十四，诚病几殆，女焚香割腕和药以进，诚昏迷中闻“孝女”二字，病旋愈。适闽县举人王祥仪。

周氏 西隅郑行学妻。性至孝，夫早卒，善事翁姑。姑病，割股以疗。

林氏 岱边郑善可妻。幼习闺训，善事父母。长适郑，事翁姑以孝闻。姑病，氏焚香祷告，叩头出血，割股和药，愿以身代。妾生三子，抚之如己出。

魏氏 岱边林有端妻。性至孝，敬翁姑，和妯娌，缄默少言，素供奉观音大士。翁姑病笃，祷于神前，割股和粥以进，翁寻愈。三党贤之。

周氏 东林村林枝恭童养妻。姑得痲瘵，医药罔效，氏割股以疗，寻愈，时年方十六也。翁病瞽，事之唯谨，数十年扶持



不少懈。族党贤之。

张氏 西隅张家富女。父病两次，皆割股和药以进。及归刘良椿，椿病，氏复割股，夫病愈。惜无出，劝夫先后纳两妾，均和睦无间言。

林氏 陈尚治妻。性至孝。翁前卒，姑年老血衰，艰于便溺，昼夜呻吟，氏百计抚持，不避溷浊，如是期年弗懈。三党称之。

张氏 陈光文妻，贡生清略长孙女。年十九归文，事姑至孝，和睦妯娌，人无间言。姑病，割臂和药以进，吁天减己寿益之。

张氏 王振腾妻。尝两次割股以疗翁病。夫病，又割股两次。氏后以分娩垂危，不罹产难，人以为孝感所致。

陈氏 竹田林祖培妻，同邑醴陵令心炳女也。工刺绣，习书，知大义。及笄归林，克尽妇道，言动悉循礼法，而有潜德。夫堂兄某隽童试籍学时，学官闻其家故饶，奢索册费，某拮据缴纳不如指，学官怒，将请于督学而除其名，某皇急无措，氏闻，脱金钏以应，事解。舅病，焚香吁天，乞减己寿益之，且割臂为剂以进，舅愈。时氏娠已数月，既割臂匿其创，创骤受风，又以孕未十月而产，病遂剧。其姑视之，稍闻其有割臂事以诘氏，答无之。逼而袒其臂，则创痕犹未合也。姑泣曰：“吾今乃知妇之贤孝若是也。”具以告舅，而病已不可为矣。卒年二十余。其舅姑为之悲恻者累日。

陈氏 十一都湖阳李友匡妻。通书，知大义。翁病笃，氏焚香吁天，减算十年以益翁寿，并割股和药以进，翁病随愈，后翁寿终，恰符十年之数。人以为孝感所致云。

陈氏 鹏上黄忠乾妻。夫外出营生，姑老病，常在床蓐，氏侍汤药，三载未尝离侧。三党贤之。

林氏 首占候选按照磨郑金鸿妻。翁病，氏割左股和药以进，翁寻愈。夫病，又割右股。吁天愿减己算以益夫寿。后氏寿至八十三，孙曾林立，人咸以为贤孝之报。

杨氏 邑东增生陈仁诏妻，闽县汉澜女也。性慧而孝，年二十三归陈。姑治家严，氏承顺得其欢心，晨夕奉甘旨，必审所嗜以进。姑老善病，伏侍未尝废离，恒竟夜不就寝。御臧获未尝加以呵斥，故诸中尤以贤孝称。邻有长舌者，鸩悍不可制，及至氏前，辄俯首愧屈。族党中贫不举火者，孤露无依者，力不能婚娶丧葬者，撤簪珥与之无吝容。卒年五十有九。

陈氏 仁诏女，名浣青，小字巧莺。幼有至性，侍母病，药饵粥茗，必亲自点检，不假婢媪手。为人有巧思，刺绣精绝。长喜读书，又好闻忠孝节义轶事。父病，医药罔效，割肘和药以进，数日创溃，梦中呻吟，母因诘之，始出其肘以示。年二十五，归侯官杨仲愉子。

施氏 武庠林鹏霄妻。幼习《内则》，于归后，克尽妇道，和妯娌，训子女以义方。翁病，焚香默祷，割肱和药，病寻愈。

## 校 注

(1) 原志作“字”，疑有误。

## 长乐县志卷二十九下

列女下 贞烈 闺秀 贤媛 寿妇附

贞烈

元

郑静姐 吾庐霖之女。性至孝，朝夕不离父母。有求婚者辄拒之，终身不嫁。将纺绩余资，置田园以备烝尝，卒葬斑鸠岭。子孙称为姑婆墓。

陈义姑 名中，十三都陈硕翁女。父暨兄寿文俱歿，遗孤侄坦，生甫三月，嫂郑改适，母赵氏老且丧明。女时年十二，矢志不醮，植孤养母，独持家事。时不利于孤者，女谨备之。母寻卒，哀毁如礼。攻苦服勤，为襄三丧，毕婚娶。孤日成立，家业渐饶。卒年三十八，孤为服斩衰三年，里闾咸以义称之。至今子孙繁衍，科甲蝉联，为立特祠祀焉。

明

义姑刘八娘 十六都濠溪人。洪武丁卯，年方十七，受聘失偶，守贞不移。值兄嫂皆亡，力抚庶侄，不致为豪右所侵。寿七十余，始终无愧。至今刘氏子孙繁衍，俱崇祀为义姑，以一线之延，皆姑力也。

陈女八娘子 六都陈希文季女，十三都义姑之族裔也。兄璽、塾及嫂俱沦没，璽子昌文、昌显，塾子昌隆、昌朝、昌龄皆幼，女年十六，痛死者未葬，生者无依，遂矢志不醮，躬纺织营葬四丧，抚诸孤成立婚娶，终其身不衰。宏治壬子卒，年六十八。昌隆生文沛，文沛生时范，皆为名臣，迄今子孙繁衍，皆姑力也。世以星井义姑称之。

### 清

义姑 忘其姓，幼鬻于庠生林元桂之母为婢。元桂幼失怙恃，中外无亲属，义姑及笄可嫁矣，惻然不忍去。林有薄田二顷，为收所入，支持门户，辛苦备尝。元桂颇挑达，喜樗博，义姑乞怜先进梁上宝规海之，卒以成立，入邑庠。又积所余为娶妇。未数年，妇以病产卒，义姑复为育子女。邻有悯其年老，微讽之者，答曰：“官事未了，然已老矣。”遂终不嫁。平日持身淑慎，如大家处女。勤女红，俭服食，斋佛诵经。素无疾，老而自备后事，忽一日，沐浴更衣，跌座而逝，若预知死期者。元桂感其义，为持期服，尊之曰“义姑”，立主祀于家。后元桂死，家无人，上宝子运昌太史与元桂交，知其详，悲其遇，为志其事，而以诗表之。

林兰馨姐 贤次女，知诗书，娴吟咏。父卒，事母尤孝，及嫂歿，矢志不嫁，愿终身养母，年三十二卒。

### 右幽贞

### 宋

张汝玉 提刑翀女。好书史，工诗词，许字同郡宣议郎李昌朝。未婚，昌朝卒，汝玉哀毁成疾，死葬十都鲤邱。兄尚书镇，为作志铭：“女弟五十娘，名汝玉，字季纯，嘉定己卯四月二十五日生于临江判官之舍，皇妣林氏，归皇考十有八年，仅得此女，盖钟爱焉。汝玉自幼慧悟，女红事不喜习，雅好《书》、《传》，记览不忘。余从师，汝玉亦偕肄业。皇考每燕宾，必使侍，挑文数篇，

酬诵如流，人以女博士目之。治监国史，研朱仇校，手自抄录，时道古今兴废，有老书生所不能及。作诗词尤工，往往传播皇考班中。朝史卫王当国，愿以为妇，介参政余公以请，考妣与汝玉言，斂容对曰：“大人以白屋致身，儿微贱，何敢攀附权门，且不欲远膝下”。考妣领之，遂许适同郡尚书李公之孙宣议郎昌朝。未几，家门挺祸，考妣继捐馆舍，而昌朝亦弃世，汝玉贞心耿耿，竟以殒命，嘉祐四年二月十八日也。得年二十有二。汝玉天姿明敏，仪相丰端，言语动容，克肖其考。孝于事亲，友于从兄，处族姻敬而有礼，御婢获严而有恩，尝阅女传，见有德者则掩卷叹曰：“吾安得他人而师事乎？”其趣尚如此。呜呼！女子之能力学作词，近古不多见也。天既赋以异禀，乃使之嬰此百罹，消阻顿挫，不得遂其志，何邪？否而泰，蹇而解，理数宜尔。胡舜华种艳，复不得长于世邪？岂姑射仙子游戏人间，世尘莫得而染邪？余寡兄弟，繫汝焉依，一旦永诀，痛哉！其年闰腊月庚申朔，葬于福州山之原，泣为之志，而继以铭。铭曰：“生也其游，死也其休，不柏而葬，天乎何尤？”清乾隆甲戌夏，水潦圯坏，露铭砖，族人修葺之。进士林琼蕤有诗别见。

### 元

陈氏三娘 石梁人，适同乡柯宗实。父希亮老疾，嗣子孱弱，陈归柯，犹经理外家事。至正二十年，海贼劫石梁，宗实适外出，陈念父疾，奔往省之，遇贼，挟以登舟。时宗实有幼侄枢，亦为贼虏，陈语贼曰：“是吾伯氏孤子。”出怀中金赎之。贼取金，置儿大桶中，浮之江，去数篙许，陈遂乘间投江。明日，尸逆流上，止于石梁山旁，夫验背有黑子，曰：“是吾妻也。”昇归葬之。

陈氏 即三娘妹。夫杜某外出而贼至，姑曰：“汝少艾，盍逃诸？”陈曰：“夫不在，从谁逃？”贼突至，击姑仆地，妇抱姑号泣，贼掠之去。有邻姬亦被掠在贼中，见妇戟手骂贼，贼刃其臂



者数四，竟死焉。贼退，闻王母礁有妇人尸，亡一臂，其夫往识，以骨归葬，时年二十七。

### 明

王氏 邑人则章女，福清邬孟妻。洪武中，孟选御史，忠言直谏无所避，以诬误罹重典。氏击登闻鼓乞入官为奴，赎夫罪，诏赦之。一日，孟所鞠囚窃人其家，置银二锭而去，氏方栉，持发追之不及，急呼，逻者获其囚。后孟以谏死，家人配徒，氏焚夫尸，即欲赴火，邻媪持之得止。时孟友户部员外郎张瑄殁孟尸遗骸将行，氏止之曰：“幸少留，妾亦同夫归矣。”遂沐浴自经死。瑄并殁其骸归葬焉。永乐初，监察御史赵明奏请旌其门。

东隅 林氏 王之化妻。归二载，之化疾，氏调汤药，衣不解带。之化不起，氏即欲自缢，家人防之，氏三踊而死。邑令万编上之两府，旌其门曰“镜鸾烈节”。

林氏菜姐 闽县人，大参北塘仲女，许字陈司马幼溪仲子长源。岁丙子，长源夭，以死自誓。欲奔丧，司马止之。有慰解之者，辄颯然曰：“五龄缔盟，今几年矣，禽兽之行，吾不为也。”丁丑，急欲归陈守长源丧，司马复止之，女抚膺大恸，遂绝粒死。永诀时，犹嘱父母曰：“儿当归长乐。”绅衿为诗歌以咏叹之，郑恭介为之序。司马迎其丧与长源合葬。

四都 申屠氏 字希光。美而能诗，适侯官儒士董昌。巨奸方六郎陷其夫于死，旋求娶焉。氏给以厚葬故夫，郎如命，比葬，至见方六郎子房内，即以刀刺之，进视者辄杀之，人莫敢近。径持方六郎头，奔至墓，祭其夫，自刎而死。诗载《全国诗话》。

郑氏 林恒妻。嘉靖己未，倭掠各乡，氏走匿山中，被执，欲迫辱之，胁以刃，不从，骂不绝口，遂遇害。

七都 陈仲姐 林长淮妻。归淮一年，夫病甚，自知难痊，怒目视妇，自齧其齿，巩其事后人。氏揣知之，入室自缢，为家

人所觉，既而自悼曰：“吾夫卧病，不可无侣，吾不忍背君子，当肩随入地耳。”三日淮卒，氏母欲厚敛之，氏不可，曰：“孺子未获报，而母若厚敛，不顺。”旋自缢。天启五年，诏旌之。

林氏惜姐 郑重之妻。孝事翁姑。夫病危，吁天请代。夫死，投缢。闻于朝，旌其门口“贞烈”。

十都 吴氏玉莲 陈九叙妻，生员季备女。柔惠静专。嘉靖己未，为倭寇所掳，迫之行，骂不绝口，延颈受刃，贼遍斫其肤而去。扶归数月卒，时年二十五。

吴氏 沙京许鉴妻。嘉靖己未，夫妇俱为倭寇所掠，拥至十四都沟浒，贼挟刃睨夫，氏持夫号恸，延颈请代。贼怒，截其左右手，投沟而死。夫翌日得释归，异尸葬焉。时年二十二。

十一都 李氏 王恩及妻。明亡，同夫饮药死。恩及传见《忠义》。

十二都 石女采高 舜渔女，参政璧孙女也。幼静淑，不妄笑语。嘉靖己未，倭寇至，女随母入山，系刃衣带中，母怪问之，曰：“急即死耳。”母泣曰：“何至是。”逾旬，寇继至，复随母循海塘而窜，为寇所及，赴海，适陷入泥淖，寇牵其衣，即自刺洒血仆地，寇随斫之，碎身而去。越三日收殓，面如生。时年十八。

陈氏宙姐 布政使崇德孙女。年十八，适同里长史黄公甫孙生员一卿妻。逾八载，隆庆辛未，一卿痢剧，嘱之曰：“我死无子，汝当归汝寡母。”氏号泣曰：“吾无归理，六日为期，从君于地下。”一卿卒，哭擗屡绝，窃衣带自经，家人觉救之，绝粒而逝，距一卿卒，适六日。知县蒋以忠为请旌，匾曰“贞节”。

石谨姐 陈洪阳妻。洪阳少骄，尝忤其亲，谨姐泣谏不从，遂自刎，赖救而苏，洪阳稍悔改行。逾年而病，谨姐吁天求代，洪阳曰：“毋然，尔有孕在身，当善保之。”及卒，氏恸绝。舅姑曰：“何为忘吾子诀时托？”乃复忍死待育。卒以悲伤过甚，生男落地

而殇。氏呼天者三日，曰：“我忍须臾为此耳，今何用生为？”长吁而卒。董司空为之传，谓“不缢不刃，一吁而歿，此哀痛之极，神内绝而从之，死之尤烈者也。”

林珠姐 钦仁里王定鼎妻。鼎卒，氏即自缢。邑令夏允彝旌其门。

林尾姐 陈登妻。通《内则》诸书。登远出，值姑丧，氏尽慎终之礼。登归未几，复欲适齐鲁间，闻有客死者，惨然曰：“伤哉，孤魂何归乎？何如死故乡，骨入故土。”妇心恶其言，阻之不能止。登出一年，果讣至，氏遽投繯，救之复苏，乃云：“夫行时，作何语？固命我矣！当竭力还其骨。”尽出钗钿易金，托人远运，适虏变，逾年棹不得至，氏大恸曰：“我尚何望哉？急往地下求之耳。”即饮鸩死，复张目曰：“死必葬我董峰巅，令可高而望夫归也。”时年二十四。里之往拜者，踵接不绝。邑令夏允彝祭以文，且记诗七章以表之。

十四都 黄氏 诸生林一鹏妻。嘉靖末倭变，遇贼于斗门桥，氏虑为所污，自经死。

二十都 廉氏 林师学妻。嘉靖庚申，夷寇突至，夫妇俱为所掠，拥迫登舟，氏谓夫曰：“汝可潜归，吾死矣，不汝辱也。”遂投海死。知县戴时望匾其门曰：“贞烈”。

翁氏 陈向茂妻。年二十五，夫卒，登时持刀自刎，为姑所夺。阅两月余，防卫稍疏，以小刀自割肺管之半，勺水不入，又七日，更以指甲掐断肺管而没。邑令夏允彝作文祭之，且捐俸为墓。

二十三都 陈四小 万历间，许聘张子卿，未一年，卿夭，四小年止及髻，闻讣黯然吞声，伏机上不起。母命之饭，曰：“吾何饭？”命之入，曰：“吾何归？”嫂氏知其为子卿也，曰：“编氓岂少张子俦哉？”女张目视之，怒应曰：“吾失所天，生亦何益？”出

里衣一、布鞋二，囑家人持付子卿家，以示靡他之意，遂自缢。都人士闻而敬异之。

二十四都 王敬姐 菊潭人，许聘梅城陈国耀。耀叠遭父母丧，哀毁卒，讣至时，敬姐年十九，即趋出奔丧，期以覩面，为戚属所阻。然决死无回心，家人防护密，不得死，绝粒不食。既而思，生不登陈氏之堂，死不经陈亲之目，纵死目不瞑。乃遣婢迎祖姑黄氏至家，入门相见，更服执新妇礼，语若平生，饮食必身侍，汤浴必手持，女伴窃嘲之，不较也。数日，黄氏有归意，敬姐夜沐浴飭衣，人谓将从黄子陈也，竟雉经死。诘旦，颜色如生，众议将其柩与耀同穴。菊潭至梅城二十里，舁夫运柩轻如一羽，瞬息即至，异哉！诸舅刘沂春为之传。按：王烈女旧志失载，府志载之略甚，谓讣三日即死。今观刘传，乃非是。夫烈女之母，刘公同高祖妹也，目见其事，故曲折甚具。其处死，比于从容就义，可谓贤矣。烈女父名金，大参公有恬之曾孙。参《刘鲁庵先生集》。

未祥都图 无名氏女 不知何方人。嘉靖倭乱，被虏至大宏三图，倭去氏衣，氏死不受污。倭刀刺之，体无完肤，血溅地不灭。

潘氏 永宾里王良骥妻。骥贫，远营朝夕，氏孝事孀姑。骥病，叩天求代。及死，掩户自割，诸姑夺之，氏正告曰：“亡人鬼门候久矣，迟速等死，百防何为？”乘间，以衣带毕命柩侧。

#### 清

东隅 郑氏 王平妻。夫死，殉烈。乾隆七年旌。

陈氏 诸生郑君兆妻。夫死，殉焉。

曾氏 叶伯明妻。岁疫，夫与男女俱卒，氏殉焉。

蒲氏 陈友能妻。性静淑，四岁失怙恃，伶丁孤苦，始依族叔，继依舅氏。年十八，许字友能，媒妁中饱聘金，婚几沮，氏以死誓，因归陈。十四日夫卒，典簪珥，治棺衾，营窆岁，尽哀尽礼。工乞，从容就烈，距夫亡四十余日。

黄氏 李克通妻。通痛母死，投井而亡。氏随殉焉。

张氏 林明参妻。夫死，殉焉。氏年十七。

郑氏 高纯英妻。夫卒，殉焉。

张氏 高华成妻。夫卒，殉焉。

郑氏 唐以义妻。生二子。乾隆十八年，疫气盛行，翁、姑、夫、子一时俱歿，氏自缢。

曾氏 阮昌明妻。乾隆十八年，夫死，殉烈。

韩氏 郭鸣亮妻。夫卒，殉烈。

林氏 施孔武妻。夫卒，殉烈。

郑氏 陈义远妻。乾隆四十二年，夫卒，殉烈。

郑氏 陈承泰妻。乾隆五十一年，夫卒日，殉烈。氏年二十五。

邱氏 举人郑有成妻。有成试春官未第，归得癆瘵疾，氏吁神求代，卒不效，遂殉焉。妾林氏，于属纆时，家人方奔泣，氏竟投缢而卒。

郑氏 陈有晟妻。夫卒，殉烈。嘉庆九年，学政以“潜德幽光”旌其门。

林氏 王发齐妻。嘉庆十六年，夫卒四日，殉烈。知县杨清轮以“潜德幽光”旌之。

陈氏 郑行拔妻。夫卒，殉焉。

王氏 李本瑜妻。夫卒日，殉。

韩氏 郑行长妻。夫卒，殉烈。道光间旌。

刘氏 李学澜妻。道光三十年，夫卒日，殉焉。

陈氏 王崇绩妻。绩以苦读吐血，未婚而卒。氏年十七，闻讣归王，殉烈合葬。

卓氏 郑国栋妻。同治间，夫卒，殉烈。

高氏 刘必银妻，上洋顶庠生高球女。归逾年而寡，有遗



腹，节哀待娩。已而生男，既举而僵，曰：“是无可望矣。”绝粒而死。距夫歿逾月。年二十。

西隅 林 氏 长池人，许字张道福。福卒，氏闻讣，诣夫家，行妇礼。立嗣毕，从容殉烈。知县张之珩以“女贞仗节”旌其门。

林 氏 诸生郑敬标妻。夫卒，殉焉。知县尚长裕以“殉烈可风”旌其门。

陈淑姐 十七都人，许字郑代琦。未婚，琦卒，氏即适夫家殉烈。知县崔振琳以“闺中铁汉”旌其门。

陈斌姐 西隅里仁村五楠女。性孝而烈，素能诗。幼许邑郑姓。时邑赛神，舅氏招其往观，媒人某姬，妄造蜚语诉其翁。翁以擅出闺门为辱，驰书告楠，楠怒责室人，斌恐以己累母，遂题绝命词三章，投缢死，年十五。邑侯王公隽廉知其事，为责某姬，并依元韵吊以诗，一时和者甚众。

朱 氏 郑孔瑞妻。夫死，殉烈。知县卫良佐给匾旌之。

石 氏 陈爱威妻。于归两旬，威外出，越三载，卒旅次，氏闻讣立嗣，投缢殉焉。

陈 氏 郑兴九妻。归一载，夫病笃，恐其改节。氏知之，与夫期曰：“若生女即殉，生男俟其能笑，则从君地下也。”夫卒，越七月，生子天叙，三阅月，甫能笑，氏即殉烈。知县杨儒臣以“女中杰出”旌其门。子天叙，邑诸生。

高 氏 郑良瑞妻。归郑一年，夫卒，丧毕，自经以殉。

欧阳氏 陈行荃妻。夫病，割股二次疗之不瘳，遂投缢以殉。

林 氏 陈朝灿妻。夫死，殉烈。

陈 氏 郑行可妻。夫死，殉烈。

郑 氏 陈其大妻。年十九，夫卒，投缢以殉。

曾 氏 郑行武妻。夫死，殉烈。

林 氏 高光祐妻。夫卒，殉焉。

陈氏 王其同妻。夫卒，投缢以殉。

林氏 卢明大妻。夫溺水死，氏殉烈。

陈氏 郑良菁妻。归三载，菁故，氏殉烈。知县侯海给匾旌之。

陈氏 许字林书永子增，未婚，殉烈。

尧宝姐 德周长女，许字王用德子栋，未婚，殉烈；与妹十都尧氏烈妇，时以“同怀二烈”称之。

陈天姐 爱居女，许字闽县邹姓，未婚，殉烈。

陈氏 许字郑代玘，年二十未婚。玘死，氏闻讣诣夫家择嗣，从容以殉。

姜氏 陈式年妻。夫死，殉烈。

黄氏 郑兴洒妻。年二十归郑，匝岁夫死，氏治丧立嗣，从容殉烈。乾隆十一年旌。

张氏 陈式汉妻。夫卒，殉烈。乾隆十一年旌。

阮氏 郑勤澄妻。澄就试，督学杨炳拔入郡庠第一。复试愆期，致遗，愤恚成疾。氏侍病三年，夫卒，投缢殉。乾隆十五年旌。

卢氏 郑行芝妻。夫卒，殉烈。乾隆二十四年，知县贺世骏为请旌焉。

吕氏 郑有典侧室。嘉庆二年，夫卒，殉烈。

李氏 郑昭华妻。嘉庆三年，夫卒，殉烈。

林氏 郑昭香妻。夫卒十日、殉烈。道光间旌。

郑氏 陈庆承妻。夫卒，殉烈。

张永姐 许字林天财，未婚，财卒，次日殉烈。

陈氏 张本勤妻。年二十，夫卒，无子，二日殉烈。

吴氏 张家定妻，名梅姐。生二男，年二十八，夫卒，舅姑欲夺其志，氏贞节自矢。嘉庆末，长男殇，恸哭不食，或以尚

有幼子劝之，遂转念抚孤。道光四年又殇，氏曰：“所以隐忍偷生者，欲为亡人延一线耳。今何望哉？”遂自缢。

萧氏 佾生郑守文妻。年四十六，夫歿，投缢以殉。

二都黄氏 郑善麟妻。年二十五，夫卒，择嗣，投缢以殉。

林氏 兹良女，许字高姓。未婚，夫卒，投缢以殉。

马氏 首占郑用根妻。性敏慧，通书数，能诗。年二十一归郑，生一子殇，夫继亡，氏曰：“妇人从夫从子，吾今两无所从，计唯从之地下耳。”遂从容殉烈。时年二十四。

曾氏 龙门高居河妻。孝翁姑，和妯娌。年二十四，夫故，人有疑其改节者，氏闻之，涕泣不食，曰：“吾奈何为人所疑。”遂自经死。

冬桂姐 东隅陈尚安婢女，许字龙门高信雷。未婚，夫卒，女欲奔丧，主阻之，哀号自经。主为备殓，送高家与雷合葬。乡人贤之。

陈氏 上洋顶高居日妻。年二十七，夫卒，无子，将殉，翁扶病阻之，曰：“余老且病，犹望苟延残喘，妇若此，速余毙矣。”遂不死。翁卒三年，服阕，思践前志，归告母，母复哭劝，氏长叹一声，呕血晕倒，徐苏，雇船归。母遗之药，氏阴置鸩药中饮之，毙于舟中。

陈氏 洋尾下郑时化妻。道光十七年，夫卒，即时殉烈。

林氏 洋尾下郑复洙妻。咸丰五年，夫卒，殉烈。

卓氏 洋尾下黄邦昂聘妻。未婚，昂卒，女闻讣，殉烈。

林氏 闸兜高敬瞻妻。年二十九，夫、子同日卒，遂殉烈。

张氏 龙门高居彩妻。年二十一，夫卒，殉。

曾氏 高居豪妻。年二十四，夫卒，殉。

陈氏 举人高玉模继室。玉模应礼部试，归歿舟次。时氏年二十七，丧归，号天恸哭，欲以身殉。遗腹已数月，其姑劝之

延夫嗣，氏乃忍哀待娩。已而举一男，不数月，氏以哀毁病革，谓其姑曰：“幸善视此一块肉。”言已而歿。

伊氏 中书郑筹继室，江苏知县椿女。幼习书史，明大义。归郑数年而寡，哀毁绝饮食，矢志殉亡。家人朝夕防护之，氏乃佯为浴者，故以水倾床褥，不得睡，夜深众皆倦，遂自经死。衣襟得遗札数行，文词悲恻，有“从一而终”语。妾某氏，亦殉焉。

吴氏 阳厦郑典强妻。年二十四，夫卒，殉焉。

三都 陈氏 林佳宴妻。夫病，割股和药以进。乾隆五十年，夫卒，无子，氏即于夫尸旁投缢以殉。

郑氏 珠湖陈崇熙妻。年二十一孀，二十五岁殉。

四都 廖氏 陈朝淳妻。夫卒，投缢以殉。知县崔振琳以“冰玉完人”匾其门。

李氏 陈廷献妻。夫卒，氏即时殉烈。

陈氏 戴自进妻。夫卒，自缢以殉。

郑氏 邱有书妻。年二十五，夫卒，殡毕，自经。

林氏 邱宗尊妻。乾隆十八年，强暴欲污之，氏不辱，缢死。事闻，诏建坊旌之。

李氏 坑田陈有彪妻。年十六，归彪三月，夫卒，氏矢志殉烈，翁姑劝止之。次年，夫弟生子，甫弥月，氏曰：“吾可以死矣。”翁姑又劝之，氏曰：“夫今有嗣，不幸之幸。”遂自缢。时年十八。

林氏 王道梁妻。年十七归梁，四年夫卒，五日勺水不入口，欲自尽，戚属劝之曰：“汝事姑至孝，今姑老病，汝忍姑而死乎？”氏悟而止。越二年，姑卒，百日后，氏自缢以殉。

邱氏 坑田郑瑞光妻。夫卒，无子，氏绝粒七日，自经以殉。族人郑恭为纪其事。

陈大姐 洋中陈孝仲女。年十七，许字马厝马正彩子亦培。夫

卒，讣闻，自经以殉。事在同治癸亥。丧归合葬。

吴氏 马厝马正图妻。夫卒，同日自经以殉。氏年二十五岁。事在光绪二十四年。

吕氏 马厝马世仲妻。夫死五日，自经以殉。氏年二十四。光绪丁酉年事也。

五都 陈氏 林安哲妻。夫卒，氏即殉烈。

林氏 马思理孙妇。夫客死，氏闻讣即自戕，家人以二岁儿为劝，氏强许诺，卒缢死。

陈氏 许字南溪柯际芑，未婚芑死，自缢以殉。

周氏 陈云元妻。传详十一都蒋氏。

林氏 方治康妻。未婚，夫故，至服闋，殉烈。

林氏 许字方邦钊，未婚，钊卒，氏即殉烈。

六都 林氏 陈廷琼妻。琼卒，氏年二十，殉烈。知县杨儒臣旌之曰“匪石为心”。

林氏 陈利雄妻。不辱于强暴，缢死。雍正十三年旌。

林氏 陈利突妻。夫卒，殉焉。

林氏 陈云汉妻。汉卒，即时殉烈。知县姚之牧旌之曰“从容就义”。

林儒姐 东山克刚女，许配潘佛送。未婚，殉烈，时年十六。

陈氏 竹田林朝铎妻。年二十二，夫卒，三日不食，自缢死。

李氏 林良信妻。年二十孀，无子，氏痛不欲生，告所亲曰：“不能生而偕老，宁愿死而同穴。”遂投缢以殉。

七都 陈玉姐 感恩应春女，许字仙桥林佳谟。谟卒，氏欲奔丧，为众所阻，志益烈，越十三日，竟抵夫家殉焉。

蒋芝姐 屿头人，许字张士兴。兴卒，女谓母曰：“儿本欲适张为未亡人，又恐贻父母忧，不如死之。”遂绝粒四日，适张，死



焉。

柯氏 尤廷议妻。乾隆十九年，夫死，殉烈。

陈氏 感恩监生曾道化妻。性端方谨慎。尝割股疗母疾。归曾，育二男一女。夫病，药饵躬亲，祝天愿代。夫卒，氏择吉嫁女，托幼孤于兄弟，乘间就经。

陈氏 李崇裕妻。道光九年，夫故，殉烈。

高海金姐 龙门则茂女也，许字洋下李汝威三子崇宏。年十八，已订婚期，而宏亡，讣到，即思自尽，既念母丧在殡，隐忍数日，迨母撒灵，往夫家，礼毕，殉烈。

高氏 李利僚未婚妻。夫卒，殉焉。

陈氏 李崇禹妻。夫卒，殉焉。

周氏 华原刘希程妻。年二十四，夫卒，殉焉。

八都 潘氏 三溪陈志真妻。顺治十二年，夫故，氏年三十，哭甚哀，若不欲生，而不言死，邻妪不喻其意，曰：“死岂易事哉？”妇闻之恸，曰：“吾非惜一死，欲抚孤成立耳。”以孤付夫弟，遂投缳。

陈氏 东渡人，许字潘廷栋。未婚，殉烈。知县陈谐旌之曰“贞烈传芳。”

陈氏 潘亨椿妻。于归三年，椿卒，氏缢棺旁。知县卫良佐旌之曰“贞节可风。”

林氏 潘利翰妻。于归逾年，夫卒，氏告翁姑曰：“请市双棺，愿从地下。”翁姑慰解，氏曰：“妇既失所天。偷生奚为？”遂自经。

陈崔姐 江田陈廷显女，许字三溪杨琪兰，未婚，夫死，闻讣自缢。知县姚孔铖旌以匾曰“女中正气”。

邱氏 石门陈希修妻。嘉庆十五年，夫故，氏年二十六，欲以身殉，尊亲劝以抚孤，妇唯唯，朝夕哭奠如常。家人察其志决，

防之密，越数月，竟闭户投缳。

林氏 陈希施妻。嘉庆二十五年，夫故、殉烈。

刘氏 三溪陈尔文妻。年二十八，夫卒，有娠，谓所亲曰：“夫亡与亡，何用生为？然有遗体存，男女未可知，吾将于弥月定生死焉。”及生男道琼，立志抚孤，后又以痲瘵卒，妇恸哭，曰：“吾所以二十四年称未亡人者，为有此孤也。今已矣。”遂投缳卒。

九都 杨氏 李其梁妻。乾隆十一年，夫卒，氏殉。

李氏 林明福妻。夫死，殉烈。

游潭姐 卓明发妻。年十八归发，次年夫卒，氏疑有娠，未死。入月，遂投缳以殉。

陈氏 何士洋妻。夫卒，氏殉。年二十三。

蒋氏 陈进富妻。乾隆五十九年，殉烈。

郑氏 林德谋妻。嘉庆二十五年，夫卒七日，殉烈。

李氏 林圣吉妻。道光三十年，殉烈。

林氏 陈义气妻。咸丰五年，殉烈。

苏氏 名玉姐。幼育于何孔成家。未婚，成卒，咸丰八年，殉烈。

十都 石氏 陈须彝妻。寓居侯邑。夫死，殉焉。侯官县龚廷扬以“正气扶伦”旌之。

郑氏 陈须长妻。夫死，殉焉。

林优姐 詹朝兴妻。夫死，殉焉。时年十九。

郑氏 林敬传妻。夫死，殉焉。

尧氏 李于德妻。德溺水死，氏殉焉。与其姊烈女宝姐，时称“同怀二烈”。

陈氏 李光好妻。乾隆五十五年，殉烈。

潘氏 诸生郑泰岩妻。年二十三，夫卒，衔哀绝粒，欲以身殉，家人防护之，旬后适届新正，乘间扃户自经。时年二十四。

道光十七年旌。

谢氏 郑其梅妻。夫卒，殉烈。道光间旌。

周氏 郑其燕妻。初为屿阳蒋姓义女，性耿介，勤操作，有贤名。归郑不数年，夫故，哭泣尽哀，遍请亲朋，躬自立嗣，于夫终七日殉焉。

林氏 路北李复鳌妻。咸丰六年，夫故，氏方二十岁，昼夜悲号，粒米不进，于夫终七日殉烈。

陈氏 李大金妻。夫卒，殉焉。

谢氏 许道典妻。同治元年，夫卒，殉烈。

谢氏 李友江妻。同治七年，夫卒，殉烈。

石氏 岐头李本捷妻。年十九，夫歿，无子，氏痛不欲生，以姑老，矢志奉之。逾十年而姑卒，遂以身殉焉。

陈氏 岐头李守远妻。年十九归李，甫三年而孀，上无翁姑，下无男女，屈盈七，为夫营葬毕，即投缢以殉。此光绪癸巳年事。

潘氏 福湖郑用鲁妻。年十八，夫卒，绝食而死。

蒋氏 福湖郑治祥妻。年二十八，夫卒，朝夕哀奠，未盈七，绝粒而死。

蒋氏 福湖郑治祥妻。年二十八，夫卒，朝朝哀奠，未盈七，绝粒而死。

蒋氏 湖尾李于炽妻。年十三，母病，割股以疗。十八归李，姑病，祷于神，请减算以增姑寿，割股和药，姑瘳。夫病，又割股以疗。年二十九，夫卒，男学绘甫三月，逾年殇，氏恸哭曰：“未亡人所以苟活者，为李氏一块肉也。今若此，何以生为？”引刀自刎，为家人所阻，遂绝粒以殉。

十一都 郑氏 郡增生柯应凤妻。顺治初，海寇肆掠，凤被执，令为向道，不从，死之；氏痛夫非命，且惧辱，遂触死丹山

下。子元标，邑廩生；孙顺耳，入《义行》传；曾孙琼，以孝廉任知县。入以为义烈之报。

李氏 蒋学修妻。淑慎端庄。夫病，割股和糜而进，随愈；后夫复病，又割股，不效。迨夫卒，殉焉。

蒋氏 适福清陈得栋。与五都陈云元妻周氏，同为贼所掠，逼污之，二妇誓死不辱。贼怒磔两尸，血渍地，历岁久，迹犹不灭。

江氏 郑敦梅妻。乾隆十年，夫卒，氏即殉烈。

陈顺姐 蒋则超妾。年二十三，超卒，殉焉。

李氏 陈昌斗妻。夫死，殉焉。

林淑姒 东隅人，蔚夏仲女，许字青山下黄德隆。未婚，德隆卒，氏闻讣吞声，辄屏居帟中，九阅月，积成笃疾，谓兄调羹曰：“妹得以枢归黄，愿毕矣。”呕血数升而逝。翁兆礼迎其丧，与德隆合葬。

郑辉姐 许字林日蕙。未婚，夫卒，女闻讣，次日奔丧哭奠，自缢死。

陈招姐 江田燮之仲女，许字屿阳蒋梦齋。未婚，齋卒，女闻讣欲殉，母止之，夜缢于母家。次日以尸归，颜色如生。时年十六。

林氏 冯钦明妻。年二十六，夫故，举遗腹孤，逾年殇，氏泣曰：“未亡人所以不死者，为此孤也。今不死何待？然使先人无后，吾虽死，目不瞑。”延戚属立嗣。遂于夫小祥日，祭毕，仰药死。

陈氏 青山下黄万久妻。夫卒，无子，登时殉烈。

黄助姐 青山文挺女，许字屿阳蒋鼎威三子。未婚，夫卒，氏立夫兄次子为嗣，从容就殉。时年十九。

郑氏 青山下黄景善妻。夫卒，无子，七日殉焉。

林氏 许字蒋兴至。未婚而至卒，女闻讣殉焉。

郑氏 蒋兴友妻。夫卒二日，殉烈。

陈氏 许字蒋则傅。未婚而傅卒，女遂殉烈。

林氏 蒋振阔妻。夫卒八日，殉烈。

裘氏 林珠训妻。夫卒十日，殉烈。

冯氏 闺名兰儿，大庾县知县黄荣庚妾也。性温柔，知大义。嫡张氏多病，常在床蓐，氏事之唯谨，十余年相处无间言。随任丰城、定南，赞襄内治，事无巨细，必躬亲。时粤匪猖獗极矣，荣庚致身许国，不欲以家室累，乃遣其正室及幼子回闽，独留氏在侧。南安围急，顾而谓之曰：“吾为人臣，与城存亡，义也。尔女流将何为？”氏曰：“妇人事夫，臣子事君，其义同也。君为忠臣，妾独不能为烈妇乎？如有不测，请先死，以绝君望。”已而城陷，偕其夫死焉。论者谓荣庚之见危授命，固得之祖风，而氏之临变不渝，尤尽乎妇道。忠臣烈妇，实汇聚于一门云。

陈氏 冯钦谟妻。未婚而谟卒，氏殉烈。

詹氏 高永亮妻。夫故，葬毕，投缢殉烈。

李氏 青山黄明迪妻。年二十五，夫歿，家贫，抚遗孤三。未几，仲季继歿，氏悲号，夜半愤烈自尽。时辛亥五月二十八日也。

十二都 郑氏 陈昌山妻。年二十三，夫卒，立嗣及营葬翁姑毕，投缢殉烈。

高蘊姐 二都人，许字郑夫瑞。瑞卒，氏殉焉。知县卫良佐旌之曰“贞烈可嘉”。

林氏 许字石韶。韶卒，氏年十七，殉焉。

郑氏 林彦敏妻。乾隆六年，夫卒，殉焉。

陈贵姐 三溪则和女，许字感恩林彦白。彦白质弱，苦读积病三载，女默为减膳三年。夫讣至，一恸几绝。送归林，投缢以



殉。

黄氏 董述兼妻。嘉庆二十三年，夫故，殉烈。

陈氏 石宗源妻。同治二年，夫卒，殉焉。

缪氏 陈廷发妻，年十六适陈。陈世居古县，廷发高祖业于连之大澳，遂家焉。单传四世，廷发又善病，氏苦育二女。廷发卒，独力营丧。逾月，归古县谋立嗣，顾以世次尊，昭穆中无可嗣者，历十三年，无定议。氏泣告族众曰：“吾本支数代，岂终为若敖之鬼耶？且夫死未葬，吾不即死者，职是故也。”族绅乃援河间纪文达谱例，定以某权立为嗣曾孙，择日告庙。礼毕，氏大言曰：“吾某日往大澳，扶柩归葬先塋，某日是吾死期，某日当为吾合葬。吾十三年之志愿毕矣。”后如所言，投缢卒。

林氏 石学增妻。幼失怙恃，七岁童养于学增家。增病卒，氏年十四，矢死不移，翁姑喻之曰：“吾家贫，治儿丧，衣衾且无所措，何堪媳复死？”氏泣曰：“著时服足矣。乡俗穿吉衣祭告，震人耳目，非儿志也。儿愿夫得嗣子，以奉祭祀，死不憾焉。”次日，投缢以殉。

陈氏 石学维妻。夫故，殉烈。

高氏 石昌加妻。年二十二，昌加溺死，遗孤方二岁，氏抱与姑，曰：“幸善视之，儿不死矣。”是夜缢。

林氏 石学钿妻。夫卒，殉焉。

十三都 林氏 陈兆义妻。翁任大名县尹，结缡七旬，兆义省亲，病卒官所，氏闻讣绝粒，姑力劝之，乃强起。待夫榱归丧葬礼毕，投缢以殉。知县陈谐以“从容就义”旌之。

高氏 陈于时妻。年十八归陈，三载夫卒，誓死以殉。翁姑力劝之不从，投缢而死。

吴氏 陈必仁妻。年二十二，夫卒，遗腹一男，甫三岁，有迫其改醮者，氏乃闭户自经。知县卫建勋以“贞烈”额其门。

刘频姐 二刘女，许字陈镛。未婚，殉烈。布政司杨廷耀以“冰心天植”旌之。

蒋蘋姐 十一都女，许字陈可久。可久故，闻讣奔殉。知县卫良佐旌曰“闺秀完贞”。

王氏 陈利芝妻。夫病九年余，家贫，氏拮据医药。乾隆七年，夫卒，立嗣男纯侯，后二旬殉烈。年三十一。族党以“从容就义”称之。

林玉姐 陈于邦妻。夫卒，氏有娠，誓曰：“生男为夫抚之，女也，当从九原矣。”未几育女，氏即经死。

陈氏 于珠女，许字闽邑邹家。夫死，殉烈。

林彩姐 陈兰上妻。年十九，闻兰上病笃，欲诣夫家奉药饵，父母即择吉归之，至则割股和糜，吁天请代。于归七日，夫卒，含殓毕，从容殉烈。乾隆十五年旌。

郑催姐 陈于东妻。夫卒，即欲殉烈，家人力劝不从，卒自缢。乾隆二十四年，知县贺世骏请旌。

刘氏 陈事镛妻。乾隆五十年，殉烈。

陈氏 后坂于国女，许字闽邑林光诰。夫卒，闻讣自经。时年十七。

郑氏 鹤上陈承韶妻。年二十，夫亡，氏欲殉，姑止之，曰：“尔现身有二个月胎，幸生子，一线可延，何以殉为？”阅五月，胎坠。氏曰：“吾所以不死者为此。今已绝望。”不食数日卒。

郑氏 陈丕相妻。道光十三年，殉烈。

江氏 陈崇攀妻。性极和顺。咸丰三年，夫卒，越八日而殉。

蔡氏 陈丕坤妻。夫卒，殉烈。

王氏 陈尚桦妻。夫卒，殉烈。

柯美姐 陈茂旺妻。夫亡，幼子继殇，氏投缢以殉。时年二

十二。

卓氏 后坂陈丕章妻。夫卒，家徒壁立，矢志抚孤。已而孤夭，氏曰：“吾所以不死者，为有此孤也。今何以生为？”遂投缢死。

十四都 江夏姐 顺治甲午，南贼云扰迫，不及避，贼挟刃欲污之，氏骂不绝口，遂被害。

陈氏 江邦志妻。夫卒，殉烈。知县崔振琳以“孝烈流徽”旌其门。

陈逊官 林长科妻。归半载，夫卒，殯毕，投缢以殉。

陈氏 林明鹤妻。夫死，殉烈。

黄氏 萧厚华妻。夫死，殉烈。知县卫良佐给匾旌之。

李氏 蔡敦受妻。归半载，夫卒，氏有娠，犹延残喘，月余胎堕，投缢以殉。

陈氏 李同恩妻。夫卒，殉烈。

池氏 林明久妻。夫死，氏殉。

王氏 屏山李世发妻。夫死，殉焉。

李氏 杨永毅妻。归杨半载，夫死，翁虑其殉，使人密防之。至月余，防稍疏，自经死。

高氏 陈敬觞妻。归陈五月，夫卒，自经以殉。

江昭官 陈志德妻。归陈一载，夫染疫疾，氏割股以疗，不起，族人畏疫不敢前，氏躬负夫尸，含饭殮殯讫，次日自经。年二十一。

李氏 仙山人，许字十四都陈家。未成婚，翁卒，讣至，女误以为夫卒，默作《十可怜诗》，遂投水死。是非死于翁也，死于夫也，视烈女尤可怜云。

江顺官 王嘉训妻。夫卒，氏年二十一，次日，缢夫殯所。

陈兆官 侍御书女，幼许字云路江竞生。夫卒，讣至，女哭

踊绝食，投缯，以救得苏。时父宦蜀，母延姐妹劝之曰：“女子以聘为礼，未聘，死何益？”女曰：“婚姻一言为定，何以聘相愚？”守贞三年，坐卧小楼。至大祥，诣江门，行礼毕，从容以殉。

王从姐 大积女，聪慧能诗，许字陈行朝。行朝客东洋溺死，父母不以闻。女觉之，不得实，尚未敢死，遂屏簪珥，迹不逾阈。比闻翁逝，讣闻，吊丧不相往来，默为缟素三年。有稔知女才美者，强委禽焉，女曰：“吾死已晚矣。”劝之不允，乃览镜自绘，召画工渲染成之，并题二绝於上，云：“六载深愁血泪枯，应知形影比前输。伤心未识陈郎面，难画人间举案图。”“写成遗照觉情关，分付留存莫等闲。万一天涯人未死，伸图应为念红颜。”遂自缢，气绝竟日，颜色如生。邑令张之珩旌曰：“节冠群英”。

高英姐 流水人。性聪慧，娴大体。年十一，许字陈敬炎，适陈门童养，尚未结褵。三载，敬炎卒，女屡投缯，皆为家人所觉，乃白于翁曰：“妇志决矣，毋相苦也。”遂殉烈。时年十三。

陈焕官 十三都人，许字平坑李佛送。送夭，闻讣，即殉烈，归李合葬。

陈秀姐 初以调迁寓困关，许配林姓。闻夫卒，取素练自经。

江英姐 拱宸女，许字闽邑黄元经。未婚，元经卒，讣至，父母秘不使闻。女察知，自刎未绝，归黄门谒翁姑，自缢殉。乾隆五年旌。

郑庄姐 林长俸妻。夫死，殉烈。

林富姐 壶井用美女，许配小屿王豆官。年十八，未嫁，面夫讣至，家人秘不使闻。女访得实，遂自经以死。归王合葬。

林氏 陈金于妻。夫卒，无子，于五七后，闭户自经。

林氏 江国占妻。夫卒日，殉殡所。嘉庆七年，知县李锜以“节烈堪嘉”旌其门。

林氏 江良驹妻。夫卒三日，殉烈。嘉庆七年，知县李锜

给匾旌其门。

吴氏 江良枢妻。夫卒四日，殉。

林氏 王尚见妻。夫死，殉焉。

卓氏 旒峰王谨方妻。方为三谿长子，省亲西洋，过海遇贼而死。氏闻信，登时殉烈。年二十二。

林氏 许字王玉铸。未婚，铸卒，氏闻赴殉。时咸丰三年。

林氏 王慎笃妻。道光十三年，夫卒，殉焉。

王氏 林兴来妻。夫死，殉焉。

王氏 云路郑则金妻。年十七，归则金。甫一岁，则金以瘵疾亡。氏哀恸晕绝，誓以身殉。其祖姑谕之曰：“从死义，守节亦义，何必死？”氏曰：“守难死易，孙妇为其易耳。且祖姑尚有他孙已授室，不缺孝养，孙妇死，目瞑矣。”越夕自经，族人恻之，为之请旌。

林氏 柯万文妻。夫死。殉焉。

陈氏 琉峰王守球妻。夫卒，殉烈。

柯鑿英姐 百户柯友菊女，许字旒峰王九宰。婚有日矣，夫卒，氏闻讣自经，王迎其柩合葬焉。

李氏 柯忠坦养媳。闻夫懋警外亡，即自经死。

陈菊花姐 何懋陆妻。幼失怙恃，养于夫家。夫客死于外，氏哀毁十数日，自经死。

十五都 林氏 萧有远妻。夫溺死，投缯以殉。

王氏 郑惟贵妻。夫死。殉烈。

郑氏 吴朝孝妻。有二男，相继亡，未几夫故，殉烈。

李爱金 十七都人，许配陈绍圣，未婚，殉烈。

黄氏 陈世俊妻。年二十，夫卒，食贫抚孤，既壮而夭。氏以翁姑及夫停柩未葬，乃日勤操作，积资以营窆窆，立夫侄为嗣。事毕，殉焉。



林氏 谢师香妻。年十九，夫卒，氏守节抚孤，事姑极孝。孤长而夭，遂自经死。

池辉官 许配朱肇旗，未婚，殉烈。

黄月姐 东阳人，许配吴喜，未婚，殉烈。

江氏 郑凤妻。夫故，殉烈。

吴氏 举人刘森荣妻。荣北上，歿于浦城，氏闻讣自经。

黄氏 陈世栋妻。嘉庆十年，殉烈。

萧氏 郑赐昶妻。未婚，昶卒，氏闻讣殉焉。

陈氏 江邦竟妻。夫故，殉焉。

李氏 漳港吴大福妻。年十九，归七月，夫故，殉烈。

石氏 漳港林能平妻。年十八，夫故，殉烈。

柯氏 漳港李传务妻。年二十一，殉烈。

林氏 漳港萧蒸兆妻。年二十六，殉烈。

李氏 仙岐郑治暖妻。道光丙子，夫故，丁亥十月，殉烈。

十六都 江氏 欧阳诗光妻。夫卒，子方襁褓，氏哀毁成疾，以子付翁姑，自缢。

林氏 黄应增妻。夫死，殉烈。

李氏 林良梅妻。夫卒，殉烈。

余氏 林道安妻。夫病三年，拮据医药。夫卒，无子，夫弟妇有娠，冀生男，抚以为嗣，及生女，遂自经。

叶氏 蓝田陈道千妻。年十六，归千。家贫，氏竭力经营，以尽妇道。乾隆癸未六月，夫卒，未有男女，氏备丧具竣，抱尸卧一日夜，尸鼻口有血，悉舐而茹之。越一日，投缯以殉。年二十六。

十七都 蔡氏 卓用福妻。翁失明，氏供甘旨，以孝闻。年二十八，一女一男，相继死。未几夫病笃，与氏决曰：“我死尔必殉，如有孕何？”夫卒，氏欲殉，母泣劝，氏曰：“以婿之壮，甥

之长，尚不长保，若腹中者，其可恃乎？”及语以夫有遗命，乃止。逾两月，胎坠，氏日坐卧帐中，饮食不入口，寻自经死。

郑氏 林能高妻。夫死，殉焉。

徐氏 池莲忠妻。夫死，投缢以殉。

郑氏 黄德畴妻。夫卒，投缢以殉。知县卫良佐给匾旌之。

陈氏 许其哲妻。夫卒，氏先辞父母，归夫家殉焉。

王氏 魁峰刘良贞妻。乾隆五十四年，殉烈。

陈美姐 仙山林能授妻。授外出贸易，其家已订婚期，迟数月未归，人传授死，女即殉烈。时年十九。道光十六年请旌。

林氏 名清英，刘正晓未婚妻。道光十二年，夫卒，殉焉。

萧氏 池兆凤妻。咸丰十年，殉烈。

陈氏 卓期成妻。性温柔，知大义。归四年夫卒，氏以死自誓。妯娌劝之，曰：“夫死无子，吾何生为？”隔六日，遂投缢。

周氏 诸生李韵夔妻。夔醇谨力学，氏端庄不苟言笑。于归后，意气相投，欢相得也。家故赤贫，夔授徒于外，馆谷不足以给，氏左右支撑，晏然若素。已而夔自馆舆病归，药罔效，逾旬而歿，遗一男一女。从容镇定，殓殮如礼，丧次，外罕闻哭泣声，然每夜分，辄抚其子若女而悲悼。届盈七，哭奠尽哀。已，抚夫柩泣曰：“家鲜兄弟，遗孤幼，吾遽死，丧其谁治？今事毕矣，愿从君地下。”入室取缢帛为纆，挂桅架上，投而逝。

十八都 王长姐 壶井林勃行妻。顺治十一年，海寇掠壶山，人争匿小祠中。氏逃至本山菅林，遇贼，逼污之，氏大骂，贼杀之，时年二十二。子敏，方二岁，恋母旁，贼又举刃，旁一贼曰：“一刀焉得杀两命？”以手格之，指伤，两贼相詈去，祠中入借以得免。曾侄孙琼蕤为之传。

郑氏 壶井监生林广妻。雍正八年，夫卒，乏嗣，氏躬备殓具，命市双棺以殉。

李氏 冯显红妻。夫病，割股以疗。夫卒，自经。

潘氏 永瑾女，许字谢某。未婚，殉烈。

李氏 壶井林春谦妻。年十七归林。乾隆十八年，夫卒，氏拜翁姑曰：“有小叔在，可以孝养。”遂投缢。

黄氏 壶山林用道妻。年二十一归林，两年夫卒，乏嗣，氏即求自尽，不得死，既五日，防稍疏，竟自经。

郭氏 潘贞庆妻。嘉庆二十年，夫卒，殉烈。

黄氏 壶井林尚绉妻。年十八归林。咸丰七年，夫卒，殉烈，时年十九。

十九都 林赛姐 世远女，许字江田陈朝采子天山。山苦读，得心疾不起。女闻讣，即欲自缢，父母觉，守之严，月余，乘夜雉经。时年十九。

林定姐 三溪希文女，许字江田陈圣凤子华。年二十，夫死，欲奔丧，父母不许，痛绝复苏。后从之，到夫家，是夜自经。

陈静姐 江田克修女，许字同里谢姓，夫卒，闻讣，自经母家。

田氏 江田陈廷准妻。夫死无子，生一女甫三月。氏俟夫服成后投缢，抵死犹抱其女不释。族人哀之。

郑氏 江田陈三迁妻。年十八归陈，夫病，割股和糜以进，不起，氏躬亲棺殓，次日自经。时年十九。

林氏 三山人，许配江田陈昌体。未婚，体卒，氏闻讣，至夫家经死。

田氏 玉融人，许字江田陈廷焯子有信。未婚，夫死，氏闻讣，经于母家。时年十七。

李氏 鼎头人，许字江田陈朝直。朝直卒，李闻讣，至夫家经死。

潘氏 三溪孝整女，许字江田陈道悦。年十七，未婚而悦

死，女闻，告其亲曰：“一身许人，死生以之，吾志已决，不能以未嫁拘也。”遂闭户自经，送归陈门合葬。嗣子诸秋，太学生。

翁氏 名冬桂，优贡生谢宸书妾。性明慧。宸书善病，伏侍汤药，昼夜不懈，经岁无倦色。宸书病革，矢以身殉。比歿，遂仰药死，相距一时许耳。嫡子为之请旌焉。

王氏 江田陈明宽妻。结褵三载，宽得咯血疾，氏奉侍唯谨，割股减算者屡矣。及病垂危，愿以身代，先一日投缢死，宽亦随逝。此同治八年七月事也。呜呼！氏岂知命不可代？而一念真诚，矢死靡他，于例虽未合，其志亦大为可哀已。

林氏 江田监生陈光辉侧室。夫病笃，割股疗之，不瘳。托子贞和、贞禄於嫡，嘱课举业，饮醕而卒，冀代夫也。夫逝，人咸哀之。

田氏 贡生陈崢嵘妻。夫病，勤奉侍；夫歿，殡毕，殉焉。

郑氏 江田陈明协妻。年十九归陈，逾年协卒，誓以身殉。家人防之，月余防稍间，饮醕殉焉。

潘氏 三溪人，许字江田陈云霖。霖苦读，得心疾卒，氏闻讣殉烈，时年十八。

陈氏 流水高则祈妻。归三载，夫故，遗一子甫九月，氏矢志抚孤。次年子复夭，遂投缢死。咸丰七年，学宪吴以“节烈秋霜”旌之。

陈氏 流水高天爵妻。夫卒，殉烈。学宪吴匾之曰“节烈秋霜。”同治八年请旌。

蓝氏 江田陈诸群妾。夫死将殡，哭曰：“姑少待，我愿从君地下，以服事君。”遂服毒而死。

二十都 黄氏 郑善临妻。孝事翁姑，夫疾三年，奉药不怠，夫卒，殉焉。年二十五。

郑氏 名好送姐，松下柏绥长女，许字大社王道束。乾隆

六十年，海匪蔡牵劫掠松江，掳男女二十九人，好送姐与幼弟灶，并在掳中。矢志不污，诈言放弟归家，即以身从。匪信为然，另驾小艇送灶回。女自脱鞋付弟，望弟上岸，遂投江死，时年十七。

何氏 山前罗明臣妻。夫卒，殉烈。

郑氏 垅下林有玉妻。夫卒，殉焉。年十八。

郑氏 林景珮妻。夫死，殉焉。

陈氏 林昌美妻。年二十四，美死，氏自缢以殉。

二十一都 陈氏 林文绪妻。归未逾年，绪卒，殉焉。知县张琮以“一片冰心”旌之。

蓝氏 郑任来妻。夫死，投缢以殉。

钟氏 高元临妻。夫死，殉烈。

金氏 陈叔哲妻。夫死，殉烈。

陈谓姐 林廷体妻。夫斫枯树压死，氏投缢以殉。

郑氏 仙崎人，陈昌实妻。夫死，殉焉。

刘氏 陈广楚妻。夫卒，无子，投缢以殉。

张氏 陈有道妻。归陈二月，夫卒，氏投缢以殉。

刘氏 陈典炳妻。年十八归陈。夫勤举子业，致血疾，氏为调护，渐愈；往省肄业月余，旧疾作，卒馆次。氏闻讣，抚膺痛哭，备殓葬具，指夫弟妇所怀孕为嗣，尸至，亲殓毕，遂投缢死。越七日，媪生男，立为嗣。

周氏 陈式銮妻。夫卒，投缢以殉。

刘氏 陈有真妻。归三载，夫卒，无子，立夫兄子为嗣，投缢以殉。

潘正姐 闽县象洋人，许字谢珪，未嫁珪亡，氏闻讣，整妆归谢，拜夫，庙见如成婚礼。及夕，投缢以殉。时年十七。

姜氏 陈道振妻。乾隆乙巳年，夫卒，殉焉。

李氏 陈道会妻。乾隆甲午年，夫卒，殉焉。



陈氏 张敦县妻。年十九，适县。县家贫，出外贸易，卒于旅次。讣至，氏欲殉，以有娠忍死，冀生男以延夫嗣。后生女亦不育，遂投缳。

林氏 陈本阜妻。年二十二，夫卒，殉夫而死。

许氏 林克康妻。年十九，夫死，投缳以殉。

方安里 卢茂姐 姜如海妻。夫死，殉烈。

陈氏 刘良开妻。夫死，殉烈。

陈氏 刘禄谦妻。夫死，殉烈。

陈氏 刘以洁妻。夫死，与妾□氏并殉。

陈氏 刘尊谦妻。夫死，殉焉。

陈氏 刘定谦妻。夫死，氏殉。

游氏 刘言谦妻。夫死，殉烈。知县卫良佐以“女中烈士”旌其门。

陈成姐 刘则祥妻。夫死，殉烈。知县胡宗文以“奇节流馨”旌其门。

方璋姐 许字陈尔森。森卒，殉烈。

卢生姐 许字刘绍第。第卒，殉烈。

徐氏 文庄刘良全妻。乾隆戊申，夫卒，殉烈。乡人感其节，为竖碑于真武庙边。

施琉姑 南靖学教谕楠三女。楠将赴任，囑其兄梓代为择配，梓为许字林家。女知之，楠在南靖，未之知也，又为择婿家焉。女闻其事，郁郁终日，不食不语，是夜遂投缳卒。时乾隆五十八年。

林氏 姜义清妻。乾隆己酉，夫卒，殉烈。

吴氏 陈守波妻。夫卒，年方二十，父母怜其年少，欲夺其志，既有成议，氏闻，闭户自经。

陈淑慧 姜仁廉妻。未婚，夫卒，女闻赴欲殉，父母防之。翌日，早起，自经死。昇至夫家，颜色如生。合葬焉。

陈氏 枫林姜敬丹妻。咸丰乙卯，夫卒，氏于次年殉烈。族人人为之请旌。

林氏 姜承佳妻。夫卒七日，殉烈。

刘氏 王绩连妻。年十九，夫卒，殉烈。邑令以“重如泰山”旌之。

邵氏 许贵邦妻。年二十一归许，次年，夫卒，氏遂投缯殉焉。

林氏 刘孝楷妻。夫死，氏殉。

施杏珠 方安里刘用节未婚妻，大宏村监生文品长女，诸生德辉姊也。幼失怙，秉性聪慧，从师读于外庭，极善解悟，旁涉丹青，亦颇不俗，每览古人节义事，辄为之起敬。年十二，许字编修刘成杰之堂兄用节。刘固望族，而节亦高自期许，以力学积劳成疾，寻遭父丧，哀毁而卒。珠母闻耗，以婿家相距不远，且平昔过从稔习，走视之，佯言往母家，然濒行泪几下，女知有异，询母，母未之答，遽去。珠返卧室，仿佛见一素衣人，立榻旁，趋语邻媪，媪以实告，珠谓姑姊曰：“吾失所天，何以生为？”遂投缯死。迨母归时，珠已气绝莫拯。刘闻而义之，翌晨迎其尸归，合殡焉。远近观者如堵墙，咸为之咨嗟叹息云。此同治四年事也。九年，邑令旌以匾曰“贞烈”。

刘氏 王万森妻。光绪乙酉三月十五日，殉烈。时氏年二十。

鲍氏 刘孝先妻。年二十一，夫故，殉烈。

郑氏 刘用叶妻。年二十三，夫故，殉烈。

余氏 刘良全妻。年二十八，夫卒，殉烈。

郑氏 刘永科妻。夫死，投缯以殉。

陈氏 刘友铃妻。夫卒，氏年二十九，民国二年十月殉烈。

大宏里 陈六姐 施示周妻。夫卒，殉焉。

陈康姐 施盛明妻。夫卒，氏殉。

郑氏 陈昌翼妻。归陈十二日，夫卒，氏从容就殉。督学沈涵旌曰“奇节凌霜”，知县陈谐题曰“女中烈士”。

郑瑞姐 翁厚乐妻。夫卒，殉烈。

刘氏 王尚珍妻。夫死，殉烈。知县卫良佐以“从容就义”旌其门。

王氏 陈茂桂妻。夫卒，年少无子，投缢以殉。知县卫良佐以“贞烈可风”旌之。

高氏 陈孟最妻。郑芝龙子见其美，欲掳之，不从，触马头死，最年二十三，仅一子，亦义不再娶。

江氏 王行珍妻。夫死，殉烈。知县杨儒臣以“心坚匪石”旌之。

林氏 陈宜生妻。夫卒，殉焉。

曾氏 陈书厚妻。年二十四，夫卒，欲殉，念亲老女幼，忍死以尽事育。越三年，母家欲夺其志，投缢死。

周氏 林鹤妻。夫卒，殉烈。

王氏 林明清妻。夫卒，殉烈。

刘氏 林克裕妻。夫卒，殉烈。

孙氏 陈万昭妻。夫死，殉烈。

李氏 陈助昭妻。夫死，殉烈。

王氏 陈拱德妻。夫病，割股和糜。夫死，从容以殉。知县尚长裕以“节烈可风”旌之。

陈氏 林仕适妻。夫死，投缢以殉。

田氏 陈象昭妻。夫死，殉焉。

刘氏 陈发德妻。夫死，殉烈。

陈氏 林慈旺妻。夫溺死，氏即殉烈。

曾氏 陈宽德妻。夫死，殉焉。

- 刘氏 陈大定妻。夫卒，自缢以殉。
- 林应姐 沙堤人，许字陈勉德，未婚，殉烈。
- 刘金姐 沙堤林玉桐妻。乾隆二十三年，桐卒，氏年十九，闭户投缢。知县黄瑞鹤为之传。
- 陈氏 汶上王代尊妻。乾隆十二年，夫卒，殉焉。
- 林氏 文石陈尔庆妻。乾隆二十八年，成婚三月，夫死，殉焉。
- 陈氏 文石刘则旺妻。乾隆五十六年，夫卒，殉焉。
- 陈氏 沙堤李守昂妻，嘉庆十七年，夫卒，越三日殉。
- 萧氏 文石高德利妻，嘉庆二十一年，殉烈。
- 刘氏 曹用秦妻，嘉庆二十三年，夫卒，服满殉焉。
- 郑氏 厚福曹朝乾妻。夫死，无子，事姑益笃。姑亡，丧葬尽礼，未几投缢。嗣子金鹏。
- 刘氏 施世杰妻。道光九年，夫卒，自缢，颜色如生。
- 施氏 厚福曹用典妻。道光十五年，殉烈。
- 池氏 塔前陈学爵妻。道光十八年，殉烈。
- 陈氏 霞江王锦采妻。夫卒，守制，水浆不入口，期年而殉。
- 姜氏 汶上王万康妻。道光二十一年，夫卒，即殉。
- 林氏 施文煌妻。道光二十七年，夫卒，终七而殉。
- 姜氏 王春淦妻。夫死，殉焉。
- 高氏 井南郑则进妻。夫死七日，殉烈。
- 林氏 王文松妻。年二十一，夫死，闭户自经，与夫同殁。
- 邱氏 后安陈孟栋妻。嘉庆十六年，夫卒二日，殉烈。
- 刘氏 王绩鞏妻。成婚未周月，夫溺死，遂殉烈。训导高之槐以“重于泰山”旌之。
- 游氏 林文瑞妻。夫卒，殉烈。

陈氏 林荣寿妻。年十七归寿，是年夫卒，氏遂殉焉。

周氏 王代尊妻。夫卒，殉烈。

张氏 汶上郑良灏妻。同治元年，夫卒，泣血三载，除服，闭户经死。

刘氏 六品军功陈耀武妻。同治三年，武奉宪守台身故，氏闻讣就殉。

刘氏 陈令韶妻，富民县知县铭勋孙女。年二十五，夫卒，无子，晨夕奠哭，不三月，绝粒死。

郑氏 壁岭林光祥妻，寄居省城。同治七年，夫卒，殉焉。

刘氏 施世杰妻。年十九归杰，二十，夫卒，殉烈。

刘信姐 施殷若妻。夫卒，氏抚孤，越八年孤亡，氏营坟立嗣毕，遂投缢死。知县张以“彤管流光”旌之。

二十三都 陈氏 茂柄女，适坟尾薛家。夫卒，无子，劝其效母守节，氏曰：“吾之不幸，与吾母异。母有男女，吾则何依？”竟投缢死。

陈氏 李幹元妻。夫卒，毕丧事，投缢以殉。

刘氏 年十八，归陈时中。越二年，夫卒，殉烈。

曾氏 年十九，归陈时言。越四年，夫卒，殉烈。以侄如捷为嗣。

林氏 年十七，归陈茂济。越三年，夫卒，氏殉。侄仕潮嗣。

官氏 叶尚书妻。夫卒，殉烈。

陈氏 程可光妻。夫卒，自缢以殉。

江月姐 许字林肇玮。夫死，闻讣归林，三月，自经卒。总督觉罗满保以“贞烈维风”旌之。

许厚姐 许字周山陈易慈。未婚，殉烈。知县廖三友以“闺中正气”旌之。



林氏 许字黄大造。未婚，殉烈。

陈氏 薛克有妻。乾隆二十九年，殉烈。

王氏 诰赠中议大夫国学生王日炎次女，适刘国昌。夫卒，即日自经。道光八年旌。

邵氏 楼下许贵邦妻，寄居阮洋。嘉庆癸酉，殉烈。

池氏 胡久奎妻。乾隆初，归胡三载而夫亡；生一子，越二载又殇。父母欲夺其志，乃自经死。

二十四都 刘秉顺 适林鼎湟。顺治丙戌，鼎湟携家避兵，刘与妇谢氏及二女各藏利刃衣带间，为毕命计。闻胡指挥偕妾殉难，刘叹谓妇并女曰：“扰攘之际，岂无巾帼须眉？”越日，兵掠其地，刘偕妇并二女相继刎死，四尸相抱，血流溅地不灭，鼎湟奔赴藁葬之。

随姐 姓未详，陈伯魏妻。伯魏僦居福安，海寇至，随姐被执，逼污之，给贼曰闭门，因举门闲击贼，贼仆地，乃浮河逸去；俄又受缚于他贼，幽之楼上，不从，贼怒，痛笞之，复给贼释其缚，跃出楼下死。尸横道上五日，颜色如生。

陈氏 董孝爽妻。夫卒，殉烈。

姜氏 董昌悠妻。夫卒，殉烈。

陈氏 董永秋妻。夫卒，殉烈。

董诗姐 尔高女，许字萧寿郎。寿郎夭，是夜入梦，惊醒，知夫已故。次日讣至，即归萧家殉烈。

林仪姐 前林君连女，幼许字董元扩。元扩夭，氏归董殉烈。知县卫良佐给匾旌之。

施二妇 谢家仆妇。夫死，自缢。

王氏 年十七，适鬻香人某，徙居闽县。夫死家贫，与姑共卧，初不言死。经数日，姑寐，密燃香拜姑床前，自缢。同里入醮金代殓合葬。

林氏 适马家。夫死，殉烈。事详陈汉章《天游居集》。

陈氏 珠湖人，适吴家，成婚二年，夫病，割股私祝于庙，愿以身代。夫卒，为营殡殓毕，次日投缢以殉。备载陈汉章《天游居集》。

陈氏 许字谢顺。顺卒，氏闻讣奔丧，自缢死。时年十四。

林志姐 许字陈德初。未婚，德初歿，氏闻讣归陈，拜谒舅姑、哭奠夫灵毕，殉焉。

林定姐 许字陈国华。未婚，国华歿，氏闻讣，夜阑起梳洗更衣，登楼自缢。

林齐姐 倒桥哲在女，许字霞村陈道。夫死，氏殉烈。时年十六。

林氏 董述锦妻。乾隆三十六年，夫卒，殉烈。

魏氏 胡以彩妻。彩客外乡，有无赖子挑之，氏忿自缢，人咸怜之。时乾隆四十年。

陈春姐 郑辉官妻，未婚。辉官渔于连邑，溺死，氏悲恸，誓不独生。择日归郑，见翁姑行子妇礼，从容殉烈。初，辉官尸无觅处，氏殉日，浮出，同伴载以回家，时氏尚未入棺，同堂治丧，合葬。

林周姐 刘辉生妻。年二十三归，辉生时已病重，氏躬侍汤药，四十日夫卒，母家欲夺其志，遂自缢。

郑玉钗 刘克显妻。夫客死，棺回，氏请抬入室治丧。俗忌不利，因难之曰：“尔能为烈妇，抬入可也。”氏忻然曰：“是不难耳。”遂自缢。

吴氏 张家定妻。夫死，殉焉。

马氏 仙富李行祚妻。夫与子俱卒，偕媳王氏同殉。

吴氏 傅极长妻。年十七归长，二载夫卒，遗腹未娩，及生女，遂自缢。

陈氏 西宅黄世雨妻。年十五归雨，二年卒，氏痛哭绝食，自缢以殉。

程氏 董谊振妻。道光十四年，夫卒，殉烈。

陈氏 孙崇孝未婚妻。年十六，闻夫卒，投缢自尽。合葬马筹，乡人祭之。

陈氏 仙富李和俊妻。咸丰四年，殉烈。

陈氏 董义里妻。咸丰十一年，殉烈。

程氏 仙富李永贞妻。道光七年，夫故；十五年，子又死，氏即自经。

未详都图 郑氏 林某妻。嫁甫数日，夫卒，氏哀毁而亡。

王氏 陈舜亦妻。夫病笃，氏割臂三寸许，作羹以进，不愈。氏告叔用炳，以愿从死意。用炳乃迎其父母来，止之不可，卒自经死。时年二十二。

高氏 陈殷澜妻。婚甫五日，夫病笃，氏割胸和药以进，不效，自缢以殉。

吴氏 郑行桂妻。夫卒，殉烈。

林氏 施某妻。为强暴所迫，不屈，自缢。事闻，旌之。遂置暴于法。

林氏 某妻。为强暴所迫，守义不污，自缢。事闻，旌之。

陈氏 高某妻。为强暴所迫，守义不污，遂自缢，后事闻，旌之。

陈氏 石焯妻。夫歿，有欲夺其志者，于夫小祥后，从容整衣自缢死。

陈氏 林秉辉妻。夫死，殉焉。道光间旌。

董氏 王友植妻。夫卒，氏殉。道光间旌。

陈氏 谢尊祖妻。于归三月，夫卒，遗腹生女，遂殉焉。道光间旌。

- 林氏 王秀英妻。夫卒，殉焉。道光间旌。
- 王氏 戴德衡妻。夫卒，氏殉。道光间旌。
- 张氏 吴兴家妻。夫卒，氏殉。道光间旌。
- 何氏 陈司檄妻。夫卒，殉焉。檄一作携。
- 王氏 陈绍桐妻。夫死，殉焉。
- 王氏 陈仕祖妻。夫卒，氏殉。
- 郑氏 陈云章妻。夫死，殉焉。
- 李氏 陈式奎妻。夫死，氏殉。
- 王氏 陈行唐妻。夫卒，氏殉。
- 林氏 陈敏列妻。夫卒，氏殉。
- 郑氏 陈继国妻。夫卒，氏殉。
- 蒋氏 陈于臻妻。夫卒，氏殉。
- 郑氏 陈丕镶妻。夫卒，氏殉。
- 郑氏 陈昌宝妻。夫卒，殉焉。
- 李氏 陈廷信妻。夫卒，氏殉。
- 黄氏 陈丕忠嗣母。殉烈。
- 王氏 陈丕旺妻。夫卒，氏殉。
- 林氏 郑用都妻。夫卒，氏殉。
- 林氏 郑行良妻。夫卒，殉焉。
- 高氏 郑祖发妻。夫死，氏殉。
- 尧氏 王栋未婚妻。夫卒，殉焉。
- 钱氏 应行敏妻。夫卒，氏殉。
- 林氏 高某未婚妻。夫卒，殉焉。
- 林氏 张长福妻。夫卒，氏殉。
- 刘氏 杨用雅妻。夫卒，氏殉。
- 陈氏 薛某妻。夫卒，氏殉。
- 陈氏 卓期成未婚妻。夫卒，殉焉。

- 黄氏 蒋某未婚妻。夫卒，氏殉。
- 高氏 李某未婚妻。夫死，氏殉。
- 林氏 蒋尚伦妻。夫卒，氏殉。
- 卢氏 刘某未婚妻。年十二，夫卒，殉焉。
- 林氏 金克美妻。夫卒，氏殉。
- 郑成姐
- 李氏 黄正铭妻。夫卒，氏殉。
- 林氏 卢明大妻。夫卒，殉焉。
- 郑氏 邱有书妻。夫死，殉焉。
- 李氏 黄世品妻。夫卒，遗腹数月，冀延夫嗣，弥月生男，未几男殇，投缳以殉。
- 陈氏 潘元禄妻。归数载，禄卒，氏以有娠不遽死，弥月得男。逾年孤殇，氏曰：“已矣，无复望矣。”遍告诸亲，从容而死。
- 蒋氏 高茂疆妻。年二十三，生一男一女。夫病，割股以疗，旋卒。氏矢志抚孤，采野菜以给朝夕，越三月男殇，以女托兄弟，投缳殉焉。
- 陈氏 蔡世灿妻。灿卒。氏有娠未死，生男基又殇，氏曰：“上事老姑有妾及妾男培与勤在，吾从夫矣。”遂投缳。
- 李氏 杨昌苞妻。夫歿，子方周岁，越二年，孤殇，氏即殉烈。
- 唐氏 陈其列妻。夫死，孤幼，抚孤至八岁，痘殇，自缢死。
- 林氏 高孝荣妻。生男三岁，荣卒；岁余，男又殇，投缳死。
- 张氏 董昌兼妻。性聪慧，能诗文。夫溺死，氏有娠五月，后生男，半岁男殇，氏题诗一绝以寄意，即时殉烈。诗别见。



陈氏 许世贞妻。夫卒，抚二孤，未几，相继夭，投缢死。

林青官 陈元绶妻。生一子。夫卒，抚遗孤，饥寒相依。越六月，孤暴殤，即自缢。

郑氏 李善经妻。夫卒，抚孤。未几，孤亡，自缢以殉。

邱氏 郑国祥妻。年二十八，夫、子相继亡，氏缢以殉。

高氏 邱大魁妻。年二十一，夫卒，子殤，氏即缢死。

陈氏 刘友团妻。咸丰八年，夫卒。遗一孤，孤复殤，氏泣告母曰：“曩所不即死者，为刘氏存一脉耳，今无望矣。”同治四年，殉焉。

#### 补 遗

王氏 沙京上李村李法璧妻。年二十五，夫卒，矢志抚孤，未几，孤殤，痛哭累日，闭门自经。年四十八。

曹氏 岭南陈隆蔚妻，举人元纲次媳也。隆蔚得癩疾，臭不可近，氏入门后，服事不怠，虽矢溲之役，未尝有所畏避。年二十，夫逝，不旬日，亦自经。里党感其贤，俱为礼祭，夫兄寿铭为之请旌。祀郡邑节孝祠。

刘氏 岭南陈令韶妻。年十九，夫卒，氏绝粒七日而逝。嗣子寿铭，举人。

陈氏 汶上王文松妻。夫卒，是夜自缢。

高氏 井南郑则政妻。年十八归郑。不数载，夫以痲瘵卒，殡葬毕，遂自缢死。

刘氏 字淑贞，云路陈伯钟聘室。伯钟卒，女闻讣自刎，与夫合葬於玉浦之龟山焉。

何氏 陈司挺妻。夫死，殉烈。

## 闺秀

### 清

陈泮妻林氏 名琼玉。其母黄淑畹，为永福任女。琼玉承母教能诗，年二十一归于泮。泮屡试不售，赍志以歿。琼玉年二十八，家徒四壁，为饘粥以活遗孤。其《悼亡》云：“琅琅清夜读书声，补缀曾分一角檠。才绽绵囊收赋草，谁知君便薄浮生”。“闭门岑寂雪霏霏，恸哭人生百事非，竟日薄餽难一饭，可怜稚子倦啼饥”。《训子偶成》云：“廿年育子已成人，盼得孙枝朵朵新，辛苦持家无一业，须知儒素本清贫”。“由来吾道最艰难，汝展双眉我亦安，若得照常勤一事，菜根二圃可同欢。”俨然儒家言也。今其诗附刻《香草笺》末帙。

太常卿梁上国妻许夫人 名馥荃，字鸾案。父崇楷，闽县人，任山西闻喜县知县。女少随宦，父公余时，辄授以诗史之学，兼工琴。及归梁，梁供职京邸，数十年耿耿持介节。鸾案习清苦，严笔札，惟日以课子女为乐事。所著有《琴韵轩诗词》四卷，不轻示人。子云铤、云镶、云镛，皆励学成名。第三女适侯官许明经濂，尤工诗画。

梁韵书 字蓉函，太常卿上国第三女。少从其母许夫人学，善画，工琴，精于诗，尤长乐府。适侯官副贡生许濂。许家世多闺秀，如寿竹廖夫人、许素心、洪兰士，皆有集传。蓉函踵其后，尤轶然于女士之表。其为子廩生文璧应郑巡抚祖琛观风之作《荔支香》云：“荔支香，驿路长，岭南贡使趋咸阳。十里一置五里堠，七日七夜飞骑忙。长生殿上南薰凉，累累虬卵倾瑶筐，颠坑仆谷那复计？喜及蟠桃筵畔供新尝。荔支来，妃子笑，玉骨冰肌朗相照。仙果真开顷刻花，乐章恰进《清平调》。吁嗟乎：“侧生余毒

流匏犀，岂知疮痍先黔黎。红尘影断迷烽火，霓羽歌残咽鼓鼙。沉香亭北春风冷，梨树坟边秋雨凄。方家红，陈家紫，绝品枫亭世无比。征求幸不到闽南，未共官茶斗充饷。莆田有女淑且美，闲吟团扇长门里，不用明珠慰寂寥，诩因口腹烦乡里？区区恩宠奚足论？要识河洲风化始。君不见，当时爱梅高调故自佳，何曾遣进罗浮花？”又有《百炼镜》、《红线毯》、《牡丹芳》、《涧底松》拟白香山诸乐府，皆寓意深远，琅琅可诵。著有《静庵诗文集》八卷。

冯景淮妻李氏 名蕊馨，字绿卿，侯官举人鸿珍女。少工诗，不事雕琢。常与从兄庶常彦彬、中翰彦章等相唱和。彦章刻《蒹葭草堂》集，绿卿诗最多。其《闻二兄吟咏口占》云：“绣楼静坐理金针，微听窗前不断吟。欲和新诗敲未稳，天边红日已西沉。”《题紫兰姐小影》云：“传神妙笔写来真，一副潇湘玉骨身。闲向小阑干畔立，几枝修竹伴诗人。”咏《杨花》云：“飘残萍叶池中影，卷尽桃花陌上尘。”《纸帐》云：“明月三更寒未透，白云一榻冻犹封。”年十九，景淮卒，代事太姑李、节姑丁，尤极孝养。卒年五十有六。所著有《霜筠轩诗草》、《篝灯课读草》。子承基，道光庚戌进士。

郑嗣音 首占村榕次女也，适侯邑儒士陈景程。姑早亡，奉翁极孝。性娴吟咏，在家时，每与兄弟姊妹相唱和，及井臼躬操，遂不复事笔墨。年二十四，以婉难卒。今所存《芷香阁遗草》，皆其未嫁前作也，弟元模辑而序之。

郑徽音 首占村榕三女也，适龙门高轩，屡蹶童试，咯血而卒。徽音奉迈姑，抚嗣子，苦节十二年歿。素通文翰，在家时，与诸兄唱和，旋焚弃之，以吟咏非女子所宜也。今所存者《别吴门大姑》及《训侄》二律，犹有柏舟之遗音焉。

林蕊仙 字梅卿，闽县孝廉守中次女，观察邱景湘妻。幼娴

诗礼，及归琼山，贤孝有声。景湘宦游京粤，多得其内助。归里后借隐退思居，辄于池、亭、荷、荔间眉案联吟，俨如老友。著有《绣余吟》诗集。

## 贤媛

### 宋

黄寺丞榘妻朱氏 字淑真，朱子次女也。守儒风，明妇道，环堵一室，与榘相敬如宾。一日，朱子到其家，适榘外出，山居市远，膳惟麦饭葱汤，惭愧不自安。朱子示以诗云：“葱汤麦饭两相宜，葱补丹田麦补脾。莫道此中滋味少，前村还有未炊时。”读此诗，而淑真之贤愈见。按：《坚瓠集》亦采此诗，误作黎沈。

### 明

林祐妻潘氏 三溪村人，幼许配於祐。祐以父罪窜偕行，不得娶，愿绝婚。女曰：“业已许林，则林妇也，岂可以颠沛二心哉？”未几，母卒，里有为隶兵者，妍其貌，密赂女叔，强委禽焉。女不从，隶兵诉之官逮鞠，县令王遵道嘉其节操，乃罪诉者，适祐亦还家，竟归之。

卓选场妻陈氏 幼许聘选场，因病誓，父欲夺氏改嫁，不从。父逼之，遂自缢，救之得苏，年至三十有二，邑令夏允彝闻而贤焉，为鼓乐遣官送之，并捐俸为合奁费。以“女中廷式”旌之。

### 清

青桥儒士陈义观妻黄氏 性勤俭，孝养翁姑，爱敬士类，课子孙诵读不少倦，年八十七，以寿终。

陈坛妻郑氏 性淑慧，幼通《内则》、《女史》诸书，能古文词。年二十，适坛。家贫，善承夫子意，事舅姑生敬死哀。举二子，长开泰，次九鼎，督之甚严，篝灯夜绩课读，每至夜分，膏

火或不继，即令默诵，有讹者，以香照之剖疑义，悟而后已。后二子学有成立，氏力为多云。

知县林琼蕤妻陈氏 十四都汉章女。性孝友，通诗史，章爱之，不轻许人。年二十一适蕤，蕤家贫勤读，屢空，晏如。翁姑甘旨及薪米需，氏辄转移母家，不以累蕤，俾得力学成名。随任高阳县署，荆钗裙布，善政悉赞成焉。课三子特严，常曰：“人有万顷田，汝家数卷书耳。不稼胡穡？匪独农也。慎勿习纨绔，坠汝父风。”待侧室周氏，尤有《樛木》之遗。

陈承昊妻王氏 少字承昊。昊出，不知所之。氏父母为更择配，氏不可，自请归事舅姑。及承昊返，氏年三十八，始成婚。

仙岐郑万朗妻陈氏 贞鸿女也。年十二，父母双亡，家贫，遗幼弟元耀，抚之备极苦辛。及笄，有议婚者，氏曰：“吾若适人，载载幼弟作何安置？”又三年，万朗闻其贤，使媒求聘，氏约必带弟偕行，否则毋相慰也。郑从之。时弟方八岁，依郑居十余载，既成立，氏为婚娶，始送归陈。后元耀卒，氏厚待其子，如待元耀云。

教谕梁赞图妻王氏 少以孝闻。父病，吁天减纪，割臂肉以疗，父竟寿考。归梁，勤俭宜家。以子章钜贵，晋封太夫人。尚书祖之望铭其墓。

诸生陈峰妻林氏 通文义，未尝涉经史，而论议辄有合于古。尝听其子庚焕论魏徵事，断之曰：“秦王不当为人臣，祸实胎于高祖之失策。为魏徵计，惟有劝太子以逊位，否则动以骨肉之情，晓以经权之义。不务出此，顾导以争功，劝以速断，是何言者？为太宗者知兄弟不相容，则当弃妻子，变姓名，逃之远方，庶得两全。乃竟手刃同气，戕灭诸子，此其存心，何异建成、元吉？且置其父于何地耶？”闽县通儒蔡容闻而称之，曰：“由前之说，两疏之见几也；由后之说，泰伯之至德也。而所以责太宗者，尤前



贤所未发。”后庚焕详述平生事略，成《林孺人言行录》一卷，载通志《经籍》中。庚焕凜母教，卒励学成大儒，林氏实植之基而养之正也。

赠君黄景飞妻李氏 淑慎温柔，克明妇道。与景飞相庄数十年，藜藿自安，未尝有交谪声。居恒以礼自持，虽至亲非衣缙不见。与妯娌处，无疾言遽色。子明镛早卒，抚孙星枢早岁成名，犹亲见之焉。寿九十，累赠太夫人。

赠君郑行彪妻林氏 会城故家女，年十七归彪。家素贫，力操作。彪卒，挈二孤依母家。勤治女红，博工值以供脩脯。次子敷亨，幕游数省，馆谷渐充，而勤俭犹昔，惟家忌必丰。性庄重，虽至亲，非衣缙不见。次子没，谓其媳曰：“吾孀守抚孤，冀其有成；今而子奇峰幼慧，必能承父志，毋以身殉。”旋同长子归故里。及奇峰入邑庠，氏喜甚。再至省，以长子病复归。甲午，将举乡科，囑峰励志，峰以是科领乡荐，惜氏已先数月卒，寿八十六。以奇峰黜赠太恭人。

赠君郑榕妻陈氏 幼同诸兄读书，于五经、四书均能成诵。父仲宽爱之，不轻许人。时榕馆子其家，英年积学，宽知其贤，以氏字之。令和平，始成婚焉。椎髻布衣，以俭勤佐吏治。尤能逮下，有古《樛木》风。迨榕解组归，道卒羊城，携四幼子扶柩归闽。事迈姑，抚弱息，伶仃孤苦，家计独持，常借妾程氏勤十指以佐不给，视嫡、庶子衣服饮食如一，而督课綦严，每诸子从塾归，必考经书，如背诵不熟，即呵责不少贷。尝曰：“经术者，文章之本，作文不先通经，是犹无源之水，其流必竭。”故其子若孙，接武科名，均能本经术为文章，皆氏栽培力也。以子元璧贵，诰赠太夫人。

举人陈时夏妻田氏 故家女也。幼习经史，尤喜儒书。既嫁而贫，斥奩饰献家长，躬操井臼，缝紵不辍，不复事笔砚矣。尝

言：“妇人虽不能治生，亦当勤习家务，以分家长烦忧。”侍王姑及节姑高氏疾，朝夕抱持，不离左右，饮食皆口哺之。与时夏相庄二十年，燕居无失仪。惟好言古今人物兴废得失，及心性出入之微。逮时夏歿，家益窘，并日而食或断炊，不轻求贷于人。性不喜佞佛，每教子读书，必明天理良心，而存之於心，施之於事而已。尝自述其与夫论学语，著为《敬和堂笔训》授其子，盖粹然儒家言也。孀十年卒。闽中女士能杰然轶乎闺闾文采之外，而好为学士弟子学者，田氏一人而已。

广西巡抚梁章钜妻郑氏 光策女，有达识。其随宦淮海道署也，章钜往权苏臬，挈长子逢辰驻吴门，留眷属于袁浦，适高堰溃，洪泽湖溢，急报至，合境汹汹。军校请曰：“署后河有大舟，请凿垣登舟可逃死。”氏曰：“众方争舟、我舟独能完乎？不如守楼，即不测，犹愈争舟也。”金陈楼不可恃状，氏曰：“吾与斯楼共存亡，汝曹畏死，听自去。”竟无一人敢动者。水忽南注，得无事。时清江浦官廨眷属，皆有登舟之议，闻氏言，皆不敢先发。后随宦江苏藩署，值江北大水，流民数万计，迫冬号寒者万人，氏节衣食费，制棉衣袴万余领给之，流民无冻死者。归里逾年，以疾终。病革犹囑逢辰，斥奁具，易钱五百千，以为敬节堂费云。

赠君黄一桂继室王氏 幼涉诗书，嫻闾范。归黄时，翁知其贤，委家政焉。善事舅姑，亲操井臼，与侧室陈尤和睦无间，有《樛木》风。夫积学未售，晚得风痹，尝困床蓐三年，奉之无缺。及卒，诸儿均未成立，勉力延师，尝述先业艰难，及人事之得失，世态之炎凉，以训其子。未几，仲子鹤三，季子见三，先后举于乡，见三复成进士，并登仕版。时粤氛猖獗，氏不忧，谕之曰：“天下治乱，皆由州县，而安危系焉。果能为民父母，即可造福一方，勉之。”见三在中州，由县令晋刺史。每有家书到豫，必戒以毋喜事，毋畏事，毋徇情，毋矫情，毋偏好恶，毋逞刑威。闻者

叹为名言。以道梗不就养，在家日课诸孙，游泮水登贤书者复相继而起。虽屡膺封诰，仍俭约惜福。年登上寿。计生平所为，其无愧古之陶、欧欤？以子见三诰封太夫人。

封君陈际治妻黄氏 赤屿昌运女也。性至孝，家贫翁老，操女红，勤纺织，甘旨未尝缺于供；青灯课子，督责不少恕；睦亲善邻，妯娌称贤淑者，人无间言。卒年三十九。以子赞诰赠太夫人。

儒士林茂树妻陈氏 翁早逝，姑目失明，氏同夫日夜以舌舐姑目，历三年，而目复明，邑侯给匾奖焉。卒年六十五。

训导陈宗英妻谢氏 名少姒，侯官震孙女。少识字，好读《女诫》、《女箴》诸书。及归陈，不及事舅姑，有美味必熟而荐之。躬操井臼，四十年无倦色。叔姒马氏寡，周恤备至。及病，马氏奉汤药如子妇，其卒也，哭之哀，旋病歿，感其德者深也。初道光间，夫自陕西归，病几殆，少姒割左肱肉和药以进，病旋愈。嗣又重病，又割右肱肉进，病复愈。及姒将入敛时，子妇为沐浴，见疮痍，始知之。年六十一。

廩生林森然妻蒋氏，屿头故家女也。森然少失恃，频年随其父增高在外教读。氏躬操作，勤女红，以助家计。有小姑甫八龄，待之如妹，抚恤备至，及适人，凡奁具适于用者，悉推与之，岁时问遗不衰。夫病，焚香割股和药以进，病寻愈。治家井井有条，森然舌耕糊口，无内顾之忧者，皆氏力也。年未五十，以瘵瘵卒。迄今三党犹举以为法焉。

漳港儒士陈春英妻柯氏 英素贫，舌耕糊口，氏纺绩佐读，椎髻布衣，晏如也。英中年得病，氏焚香默祝，割股和药，罔效。泣曰：“家道清寒，囊无斗粟，欲从夫于地下，一妇人死何足惜，若二子何？”乃操作女红，忍饥度日。送子入塾，必训以读书明理，毋辱身以辱亲。间有小过，夏楚不少宽。邻里贤之。卒年八十六。

学究吴匾其门曰：“孝慈永世”。子建中，邑庠生。

彭公锐妻陈氏 锐病笃，百药罔效，氏祈天愿以身代，割股肉切为十八片，和物以进，夫病愈，后十八年卒。人以为诚感之应。

监生柯春元继室陈氏 涉书史，明大义。年二十归柯，举一子甫三周，夫病亟，割肱减算，卒不起。前室遗子女三，皆幼稚，抚如己出，延师训读，夕自课所授书，背诵解说乃已。善持家，无私积，无偏爱，毫姑为之心慰。子长，议请旌奖，氏曰：“妇人守节分耳，奚以名为？但愿汝曹读书循理，勿负吾苦守志。旌表求名，非吾志也。”素好行善事，怜贫恤困，宗族亲戚赖养贍者凡几辈。寿七十六卒，里中皆为流涕。长子良贞，业儒；次良光，业农，均谨厚；三寿亨，氏所出也，甲辰举子乡，官教谕。

湖北知县陈光斗妻林氏 同邑林振光姊也。嫁时家贫，舅病困笃，鬻钗珥以供医药。孝行淑德，族党称之。常役十指持家计，光斗得以肆于学，无内累。光斗病店垂殆，林氏子夜祷天求代，割臂和药进，病寻瘳。光斗弟光曾妻郑氏，来归二十年未有子。初日者言：“林氏命有六子。”于是得三人矣，怜郑望子切，祷于观音大士，愿己子自此而止，俾郑早育。后郑连举三子，林亦复产三子不育，至诚之感如此。

## 寿妇附

### 清

后山陈恒晃妻郑氏 寿百有七岁。乾隆三年建坊。

青山黄邦模妻陈氏 东隅故家女。幼习姆教，以淑慧称。长归模，先意承志，得舅姑欢。模性慷慨，敦族睦邻，轻财好施。氏勤襄家政，井井有条。处妯娌以礼，待婢仆以恩，教训子女，爱



不忘劳。尝谓：“妇人宜明大义，持大体，则闺范立而家道成。”性俭约，而施与不吝，戚属缓急必量为周恤，族邻穷姬藉以全活者甚多，盖数十年如一日焉。卒年八十七。陈莲石观察为之传。

赠君蒋则选妻陈氏 逮事太翁姑及翁姑，视寒暖，洁膳羞，色养备至，深得重闱欢心。与则选唱随七十余载，相敬如宾。遇有善事，必左右力赞其成。举丈夫子五，随其材质，课之耕读。孙二十，曾孙二十有九，玄孙三。美秀者敦诗书，雄伟者嫻弓马，文经武纬，济济一门。嘉庆二十三年，寿登百有四龄。邑侯杨清轮详清建坊，闽浙总督旌其门曰“七叶衍祥”。

赠君郭忠善妻李氏 寿一百四岁。道光元年建坊。

屿头蒋兴洛妻魏氏 寿一百岁。

首占郑惟胜妻林氏 寿九十七。

青山黄万玉妻陈氏 寿九十四。

赠君陈源妻戴氏 漳坂故家女也。性温柔，知大体。及笄归源，逮事太姑及翁姑，色养备至，以孝闻。源慷慨好施，必极力赞成，无吝色。子七人，均英伟，负时名。长心炳，出宰湖南，以年老路远不就养，在家含饴自乐。孙、曾五十余人，玄孙二人，晨昏问视，恒不识其名，但点颌而已。卒年八十四。以子心炳敕封太孺人。

青桥陈孟琳妻郑氏 生子五人。道光辛卯，年九十五，邑令王履谦以“百龄闾范”旌之。卒年九十七。

青山周厚康妻黄氏 寿九十七

监生陈寿颐妻董氏 淑慎端凝，待一家子侄仁而有礼，妯娌间亦极和婉，处婢仆以恕，又好施穷乏。事太舅姑、舅姑兢兢不倦，得其欢心，乡邻称为孝妇。颐卒年七十八，氏整顿家规，延师训子若孙，有①九十余尚勤率作计。亲见太舅姑、舅姑至曾、元孙凡七叶，子、孙、曾、玄奉晨昏者一百二十余人。咸丰十年，奉



旨建贞寿坊。寿一百六岁。

青山黄万绥妻陈氏 寿九十三。

岐头李以植妻林氏 寿一百一岁。同治三年，教谕谢绍筠，训导周维翰以“女中人瑞”旌之。

陈氏 岱岭诸生名山女，邑增生林继侨母也。侨就馆聘，氏同媳程氏吹灯共话，每至夜分，四十年姑媳情逾母子，举家羨之。卒年八十四，程氏卒年八十一。

洋里吴大邦妻陈氏 幼夫明，而性聪慧。父丕国，慎于择婿，见邦善读书，以女妻之，并媵以美婢。邦娶后，见妇虽瞽，操作如常，善持家，遂不复置妾。连举六子一女，教督严肃，均能成立。晚年家昌裕，邻舍贫乏者无不赙恤。寿八十八，五代同堂，子扬芳、扬年举乡饮介宾。

文石刘则上妻高氏 逮事太翁姑及翁姑以孝称。现年一百四岁，子二，长良乐，年八十二；次良龙，年八十。孙七人，曾孙二十四人，玄孙二十八人，来孙五人。六代同堂，洵为“女中之瑞”。同治八年，知县彭光藻以“百龄闾范”旌。

青桥陈澍淦妻高氏 性慈祥，勤纺绩，教子孙以守分安业为务。年九十三，以寿终。例赐封宜人。

汶上陈尔会妻刘氏 现年一百一岁。

汶上王伟万妻陈氏 现年一百一岁。

青桥陈允千妾郑氏 现年九十。

湖尾李于楼妻黄氏 楼家故贫，常贸易苏州。氏躬操女红，以供甘旨，能得舅姑欢。及楼道卒，独持家计，教督子孙，均能成立。寿九十三。

东隅陈于美妻郑氏 孝翁姑，和妯娌，年九十，以寿终。子文川、文治、文国、文熾，俱年迈古稀。

青桥副贡候选知县陈弼妻郑氏 同邑慈溪知县廷珪女。寿一

百一岁。宣统三年旌，钦赐“期颐裕后”，如例建坊。

二十四都 林智皋妻李氏 现年八十二岁

壺井陈忠朗妻林氏 性温柔，勤女红，训子孙以力食为务。年一百有三岁。民国元年终。子敬彩、敬全俱八十余岁。

生员高中美妻陈氏 寿九十三岁。

高体厚妻黄氏 寿九十二岁。

高仁常妻陈氏 寿九十五岁。

李于铿妻周氏 寿九十二岁。

李永平妻许氏 寿九十四岁。

李斯敬妻高氏 寿八十五岁。

坑田郑则伟妻董氏 寿一百二岁，卒时五子俱存，长孔澄，年八十三，次孔长、孔银、孔禧、孔团皆年登古稀，一时传为佳话。禧子际升，光绪甲辰廩贡勋，光绪壬寅亚魁。

邱世祐妻高氏 现年八十三岁。子澍霖，宣统己酉附贡。

林必福妻李氏 现年九十五岁。

东渡陈德协妻田氏 现年八十二岁。

坑田郑则茂妻林氏 寿九十四岁。

鹏上黄庆润妻郑氏 寿九十六岁。

监生黄良琼妻林氏 寿九十一岁。

首占郑宏元妻陈氏 寿八十二岁。一门二十余口共爨。

郑宏陶妻陈氏 寿八十三岁。

郡庠生邹道化妻林氏 氏孝事翁姑，好赈贫乏，卒年八十三岁。孙、曾林立，五代同堂。

东仓陈学康妻欧氏 寿一百一岁。

高岐李养元妻陈氏 现年八十四岁。

李绍塘妻高氏 寿九十二岁。

李绍振妻吴氏 寿八十二岁。

大宏监生林桂香妻陈氏 寿九十三岁。

庠生石麟妻蒋氏 性勤俭，孝养翁姑，爱敬士类，教子孙以守分安业为务。卒年九十岁。

陈本润妻吴氏 性温柔宽厚，无所介意。人即以非理相加，未尝怒形于色。卒寿九十一岁。

陈本观妻刘氏 氏年三十六，观卒，内持家计，外理店务，巨细精粗，丝毫不紊。虽丈夫无以逾也。卒时孙、曾林立，寿八十一岁。

林建兰妻刘氏 寿九十六岁。

六林林用楼妻蒋氏 寿九十岁。

林圣奎妻官氏 寿一百二岁。

林用尧妻陈氏 寿九十岁。

上李李姬干妻郑氏 寿九十六岁。

鹤上陈应元继室林氏 性淑慎，处妯娌以和，待婢仆以恕，又好施穷乏。子二：长瑞汉，附贡；次瑞麟，武举人。孙、曾多有声庠序。寿一百二岁。邑侯徐承禧详请建坊，制军何璟以“百龄闾范”旌之。

西隅张家鲁妻林氏 氏虽农家女，而谨守妇道，勤勤家政，戚党贤之。至于敬礼士类，周恤贫乏，尤若素性焉。寿九十三岁卒。时长子玉镇，年七十有七；孙日暄，国学生；锦树，运同衔；曾孙立中、凤墀、凤章、仕显均在庠。一门人多醇谨，盖其俭约有自矣。

东隅刘友标妻李氏 闽邑故家女也。归刘时，舅姑妯娌称其和顺慈惠，夙有寿征。而氏佐持家政外，尤谨训诲，故儿媳皆敦礼让，食指繁盛至数十人，内外无间言。时推为“女中人瑞”。卒年一百三岁。光绪二十四年，奉旌建坊。孙曾相继游庠，有食饩登仕版者。

高绍祉妻郑氏 寿九十岁。

琼林高良华妻杨氏 寿八十三岁。

珠湖陈崇振妻林氏 寿八十六岁。

屿头蒋则彼妻陈氏 寿一百二岁。

青山黄兆庚妻林氏 寿八十三岁。

林桂香妻陈氏 寿九十三岁。

西隅 张元贞妻陈氏 寿八十四。

东隅乡饮耆宾刘以成妻高氏 寿八十一岁。以孙炳 南诰赠宜人。

湖尾李永亮妻郑氏 性端厚慈祥，教子孙以守分安业为务。逮事翁姑，尤称纯谨。寿八十一岁。

### 节孝坊表

六节坊 在西关外罗汉山。为双江陈方桂妻郑氏、陈式涟妻林氏、陈式灼妻欧氏、陈义书妻张氏、妾郑氏、陈庆成妻郑氏立。

三节坊 在九都胡榕岭。为湾里陈敬求妻高氏、孙敷施妻高氏、敷达妻高氏立。

双节坊 一在南关外，为林圣添妻王氏、子国材妻陈氏立。一在西隅厚德村，为陈达勉妻林氏、男监生逢韶妻高氏立。一在里仁村西，为诰赠宜人陈丕文妻林氏、次孙尚豪妻严氏立。一在南关外官仓岭，为高体唐妻林氏同媳阮氏立。一在十六都，为生员陈天保妻卓氏、弟天成妻郑氏立。一在十九都，为江田陈有波妻李氏、男道畴妻蒋氏立。一在二十都小祉，为林必贵妻高氏、男有和妻陈氏立。一在二十一都，为谢宸浩妻潘氏、男文恭妻林氏立。一在二十三都，为监生周格可妻游氏、妾陈氏立。以下未详建坊地址。一为十都李复滨妻王氏同媵薛氏立。一为十一都李孝

筹妻林氏、妾施氏立。一为十二都石宗剑妻高氏、侧室蔡氏立。一为贡生林彪妻蒋氏、妾曾氏立。一为林开运妻黄氏、妾李氏立。

节孝坊 一在县治东，为郑叙都妻林氏立。一为郑昭臻妻高氏立。一在东门外岭口，为郑世卫妻王氏立。一为监生陈循焯妻郑氏立。一在岭口牛山下，为郑昭乐妻郭氏立。一在石岙岭，为林德彬妻陈氏立。一在岭西，为陈有滋妻谢氏立。一为陈承梅妻刘氏立。一在西关外厚德村，为陈式满妻郑氏立。一为王诚仰妻陈氏立。一在天王寺边，为郑茂爵妻翁氏立。一在西关外，为曾忠江妻郑氏立。一为陈方桂妻郑氏立。一为张法漳妻陈氏立。一在里仁村，为郑用发妻陈氏立。一在南关外，为郑敬正妻柯氏立。一为王思美妻谢氏立。一为李守书妻陈氏立。一为郑良进妻骆氏立。一为王代西妻陈氏立。一为郑茂增妻林氏立。一为郑茂奎妻林氏立。一为陈丕宗妻王氏立。一为郑其芳妻林氏立。一为陈尚洙妻邱氏立。一为高则源妻陈氏立。一为例贡生刘协妻王氏立。一为邑庠生刘向阳妻陈氏立。一为陈珂勉妻王氏立。一为郑昭河妻黄氏立。一为高居乾妻王氏立。一为高体魁妻黄氏立。一为高纯竹妻郑氏立。一为郑国扬妻杨氏立。一为黄万时妻郭氏立。一为郑昭俊侧室林氏立。一在北关外，为陈式灼妻欧氏立。一在福州东门外，为陈承尧妻李氏立。一在二都，为郑任魁妻林氏立。一在三都岱边，为陈恒勇妻高氏立。一在珠湖，为陈典安妻田氏立。一为陈世庆妻林氏立。一在五都，为林云石妻方氏立。一为庠生林治如妻程氏立。一在六都竹田，为林孝栋妻陈氏立。一在八都，为陈思骥妻周氏立。一在石门，为生员陈应准妻郑氏立。一为陈学程妻蒋氏立。一为生员陈宗华妻蒋氏立。一为陈立品妻郑氏立。一在九都，为陈国佑妻李氏立。一为欧阳长楨妻陈氏立。一在北山，为郑良乐妻陈氏立。一在岱岭，为陈明勉妻高氏立。一为林圣言妻陈氏立。一在九都，为郑纯锐妻陈氏立。一在青桥，为郡



庠生赠奉政大夫陈际蕃妻杨氏立。一为陈际清妻邱氏立。一在十都湖尾，为李于雅妻陈氏立。一在北湖，为郑文泽妻王氏立。一在十一都屿头，为蒋文钦妻林氏立。一为生员蒋嵩高妻陈氏立。一为蒋廷璧妻陈氏立。一在青山下，为黄文就妻李氏立。一为黄国睿妻陈氏立。一为黄景飨妻柯氏立。一在湖南，为李孝冠妻高氏立。一为李六宁妻郑氏立。一在十二都，为郑春英妻林氏立。一为陈永婉妻林氏立。一在十三都，为陈显楫妻林氏立。一为监生陈灯光妻郑氏立。一为陈于豹妻林氏立。一为陈于真妻郑氏立。一为陈于略妻郑氏立。一为陈于柏妻郑氏立。一为陈于端妻李氏立。一为陈承让妻郑氏立。一在十四都，为林长佩妻翁氏立。一为旒峰监生王天惠妻陈氏立。一为杨肇双妻萧氏立。一为王代卫妻林氏立。一在大屿洞旁，为柯孝达妻李氏立。一在十六都东峰岭，为吴碧昭妻杨氏立。一在十七都，为施有梁妻郑氏立。一为林能为妻姜氏立。一在十九都江田，为陈湑妻方氏立。一为陈有彩妻郑氏立。一为陈有领妻汪氏立。一为陈有波妻李氏立。一为陈有池妻郑氏立。一为谢顺平妻邓菊姑立。一为陈诸群妻蓝氏立。一为陈诸庸妻黄氏立。一为陈道统妾蔡氏立。一在大宏里，为高必璋妻陈氏立。一为陈宗璋妻刘氏立。一为郑纯岳妻陈氏立。一为王代兴妻郑氏立。一为诸生陈夏妻卢氏立。一为施世建妻林氏立。一在方安里，为刘则立妻高氏立。一为陈守雅妻叶氏立。一为刘永株妻柯氏立。一为刘孝长妻陈氏立。一为施文敬妻刘氏立。一在二十三都后山，为陈朝建妻姚氏立。一在周山，为陈安远妻黄氏立。一为陈永声妻吴氏立。一在判院，为林梅诚妻李氏立。一在金峰街，为李学梁妻林氏立。一在四都坑田牌下，为邑庠生邱国日继室陈氏立。一在后屿，为七都华原郑逢珠妻林氏立。以下未详建坊地址，一为林仁恭妻蒋氏立。一为郑勤碑妻陈氏立。一为王大珠妻陈氏立。一为陈行大妻张氏立。一为郑仕岳妻陈氏立。一

为贡生陈钟谦妻冯氏立。一为三都高永灏妻郑氏立。一为张忠碧妻王氏立。一为八都陈用昌继室黄氏立。一为十都李显御妻陈氏立。一为李复高继室薛氏立。一为十一都郑用钗妻陈氏立。一为雁塘林育训妻郑氏立。一为十二都董孝高妻陈氏立。一为董文在妻徐氏立。一为十八都林益仪妻陈氏立。一为林光泳妻王氏立。一为二十都郑任鉴妻林氏立。一为郑任铨妻林氏立。一为二十四都董则对妻池氏立。一为李伟万妻刘氏立。一为林崇兴妻黄氏立。一为十都李德馨妻游氏立。

贞节坊 一在四都，为高伯明妻陈氏立。一在十二都，为林以德妻王氏立。一在东门外岭口，为节女刘玉红立。以下未详建坊地址。一为洋下张本笋未婚妻陈氏立。一为王利章未婚妻林氏立。

贞烈坊 一在南门外，为李克通妻黄氏立。一为黄平妻郑氏立。一为郑勤澄妻阮氏立。一为郑行芝妻卢氏立。一为邱宗尊妻林氏立。

贞寿坊 一在屿头，为蒋则选妻陈氏百有五岁立。一在二十三都，为陈宏晃妻郑氏百有七岁立。一在省东关外，为陈寿颐妻董氏百有六岁立。

### 校 注

(1) 原志“有”疑“年”字之误。

## 长乐县志卷三十

### 杂录

志备正史之采择，其体例未可不严，必如逸诗之考，遗事之搜，或者语之近怪，论之不经，雾集淮海，尘加岳嵩，杂者其醇之累乎？然史书亦记奇闻，载籍不遗说部，杂而录焉，是亦辘轩风土，论次人物，所不可缺者。扬子《方言》，燕公《广记》，论者不尽以为诞矣。志杂录。

时江李觐，一日与处士陈烈同赴蔡君谟饮道山亭，正春营妓皆在后圃卖酒，君谟因命以佐饮，烈已不乐；酒行，众妓方歌，烈逾墙而遁。觐座上赋诗曰：“七闽山水掌中窥，乘兴登临看落晖。谁在画楼沽酒处，几多鸣橹趁潮归？晴来海色依稀见，醉后乡心积渐微。山鸟不知红粉乐，一声檀板便惊飞。”烈闻之，遂投牒云：“李觐本无上行，辄造宾筵，诋释氏为妖狐，指孟轲为非圣。按吾圣经云：‘非圣人者，无法合依名教，肆诸市朝。’”君谟览牒，笑谓来者云：“传语先生，今后不复使弟子也。”（同治彭志）

陈烈幼尝与蔡君谟同砚席，后君谟镇福唐，励精为郡严肃，合境大化。一日烈往见焉，维舟亭下，闻君谟之严察，不往谒。留诗曰：“溪山龙虎盘，溪水鼓角喧，中宵乡梦破，六月衣衾寒。风雨生残树，蛟螭喜怒澜。殷勤嘱舟子，移棹过前滩。”亭吏录诗以呈，襄威严为之少霁。（同治彭志）

安南国王陈日照者，原姓名为谢升卿，少有志，不肖为举子业。《闲歌》诗有云：“池鱼便作鲲鹏化，燕雀安知鸿鹄心？”类多不羁语。好与博徒豪侠游，屡窃其家所有，以资妄用，遂失爱于父；其叔乃独异之，每加回护。会其家有姻集，罗列器皿颇盛，至夜席卷而去，往依族人之仕湖湘者。至半途呼渡，舟子所须未满，殴之，中其要害，舟遽离岸，谢立津头以俟，闻人言舟子已殁，因变姓名逃去。至衡为人所捕，适主者亦闽人，遂阴纵之。至永州，久之无聊，授生徒自给。永守林岳亦同里，颇善遇之。居无何，有邕州永平寨巡简过水，一见奇之，遂挟以南。寨居邕、宜间，与交趾邻境，有弃地百里，每博戏，则其国贵人皆出于市。国相乃王之婿，有女亦从而来，见谢美少年，悦之，因请以归。会试举人，谢居首选，因纳为婿。其王无子，以国事授相，相又昏老，遂以属婿，以此得国焉。自后屡遣人至闽访其家，或以为事不可料，不宜与之通，竟以岁久难访问，返命焉。其事得之陈合惟金枢云。（同治彭志）

宋钱四娘，奇女也。莆田南洋有六塘，潴水灌田千二百顷，城南有溪，会涧壑之水三百六十六，东趋入海。治平元年，四娘捐赀巨万至莆，鸠工筑陂于将军滩前，开渠南行。陂甫成，忽溪流横溢，坏陂，四娘痛愤赴水死。七日尸浮出，远近闻香，里人立庙祀之。每风雨夕，见双灯过木兰，故老传为四娘巡陂云。（同治彭志）

明洪武三年庚戌，首开乡试，闽县陈信之，元进士，以怀安学中式；林文寿，元进士，以长乐学再中。则是元进士明初不入于进士之列也。莆田林泰元，闽县知县，复中建文己卯举人，则是元时搢绅，明时与诸生等，而仍得入试闈中也。（雍正通志）

长乐县学西偏，洪武初，有古柳一株，高二丈许，忽榕子寄生其颠，岁月既久，榕肤色如柳。诸生皆喜，以为登第之兆。居

三年，陈全廷试为榜眼；又三年，马铎廷试为状元；其领乡荐、中甲榜者，难一二计。训导陈慈名其轩为“瑞榕”，而为之记。（雍正通志）

马铎幼时与林志共学，志恃学博才高，铎独不让之。志乡会俱第一，殿试罢，遍扣诸名士之作，皆不己若，深以状元自负。迨传胪之夕，梦有马踏其首，既而马果第一，怏怏不服，每于上前争之。上口：“朕出一对，佳者为优。”题云：“风吹不响铃儿草。”马即对云：“雨打无声鼓子花。”上大欣赏。志移时不能对，遂愧服。或云铎赴京会试，见路旁有节妇冢坏，捐金修之，是夜梦一妇人谢以诗云：“昨日多蒙到妾家，炉中缺火未煎茶，郎君此去登金榜，雨打无声鼓子花。”不知其意，至是始验。（同治彭志）

李马 永乐戊戌，廷试第一人，御笔改为骐。唱名，马不知骐为己，不敢应，上口：“马也。”后出拜上科状元陈循，有马上插旗之梦。至是陈循又梦迎新科状元，一木人骑马上执一令字黄旗。及传胪，状元乃李骐，始知木人为李，黄旗应御书其字也。见《闽省贤书》

成化二年，长乐士人陈丰独坐山斋。梁上二鼠相斗，忽坠为二老翁，长可五六寸，对坐剧饮，声如小儿。既而有二女子，歌舞劝酬。其歌词曰：“天地小如喉，红轮自吞吐。多少世间人，都被红轮误。”又歌：“去去去，此间不是留依处。依住三十三天天外天，玉皇为依养男女。”酒既阑，乃合为一大鼠，向士人作拱揖状而去。（同治彭志）

谢廷袞，大司农杰之父也。岁贡生，京师谒选之次，梦授一官，衙宇規制皆如学宫，而堂独非“明伦堂”榜。既觉，心异之，以语人曰：“妄耳，安有学而堂不明伦者？”既注选临江府学训导，既至，所见宛如梦中，而中堂榜为“明德堂”，诘之，乃宋文丞相所书，后人不欲更之也。语僚友，莫不惊叹事之前定如此。（雍正通



志)

万历己丑，谢在杭与徐惟和下第，过杭州六和塔，爱其幽静，各赋一诗欲题壁间，而寺僧号呼：“奈何浪疥吾壁，吾且取水涤之。”在杭笑，不复题。越三载，在杭拜吴兴司理，行部至杭，询之，则寺僧惧罪逸去久矣。在杭大笑，因复题云：“双旌五马绕江城，惊起山僧合掌迎。三载重来浑似梦，终军原是弃繻生。”

谢在杭少读书邑萧氏园。园素多怪异，人无敢居者，谢不之信。一夕坐灯下，忽一女子前拜且泣，谢叱之，女子曰：“妾负冤久，求公伸之，非魅也。妾湖州德清人，幼随父客此，同行某甲者，中表戚也，利父囊橐，遂杀父，恐妾鸣于官司，并置诸死，今数载矣。君异日必官于湖，望逮甲，穷治抵罪，使妾家知妾父子死所，父子目瞑矣。”谢许之，戒勿复出为祟，自是竟无它。是年，谢中乡试，果筮仕湖州推官，抵任后，即檄县捕甲至，一讯立伏，遂抵罪，郡人以为神。姚礼部琅曾令长乐，为予言如此。（雍正通志）

苏门余澹心曰：“余闽人，而生长金陵，生平以未游武夷、未食荔枝为恨，今读吴航陈伯驹诗，幽奇鲜丽，如登幔亭、云窝之上，饱餐宋家香水晶丸矣。妙哉，技至此乎。”见《雪鸿堂诗话》。

长闽交界之区，为五竹铺。山行四五里，有卢芝潭焉。巉岩削壁，水深无底。父老曰：“此前明夏允彝祷雨处也。上香时，潭中忽见龙爪，归半路，浓云四起，山雨欲来，允彝祝曰：‘神果有灵，暂停云此山，俟回县时，与吾民共赏之。’果然。因勒‘停云’于石，迄今二百余年，鲜有能继之者。”同治八年七月间，合境大旱，民以为忧，邑令彭光藻偕守戎蒋得胜、广文萧国香，邑绅陈赞、黄见三、郑向奎、陈良骥、郑鹏程等拈香诣祷，得雨未普。越四日，令投牒本县城隍及闽邑城隍，是夜又雨。迟明，复同守戎芒鞋素服步祷。时秋阳亢烈，汗挥如雨，令独往返无倦色，

旁观者咸叹息泣下。数日之内，果沛甘霖，令大喜过望，大书‘霖雨苍生’四字于潭之石壁，并叙其缘起。地之灵欤？神之灵欤？抑人之诚，有以感之欤？（《蕉雨山房随笔》）

长邑山多田少，故民食多仰于延、建诸郡。但运来者，巡哨每以接济挟之，从则所索不贖，违则辄行掠散，最为民患。明邑令郑尚友申请县给船，由用小船运载至县。既非出海之舟，难加接济之日，利民防奸，两得之矣。（同治彭志）

长邑之田，一岁再熟，晚禾所得无几，佃户资以自给，且豆、麦、番薯之属，又足以佐谷食之不及。惟奸民外贩，水则由马江、洋门诸渡口出闽县，陆则由坑田运入福清，而谷乃耗竭。是非严禁，民食无由足也。（同治彭志）

沿海之民，以渔为生，每患谷竭，专依浙、广米，至则米价差平；不然，则苦饥甚于内地。（同治彭志）

番薯之种，长乐最盛，然每至冬节后，渐有烂者，至冬末春初，则色味俱变，不可食矣。康熙间，东山村有陈朝范母某氏者，以意求铁匠制铁卷镰为长条，晒而干之，久而不败。后改为铜卷镰之尤佳，即所传薯米也。壶井林琼蕤叙其事而记之。（同治彭志）

他处田亩一主而已，长乐之田，有面有根，富者买而收租，贫者买根耕种；且有不自种而令他人代佃。佃户一还面租，一还根租，或总输租于根主，而根主分还面主者，承佃既久，私令他人转佃，则又有小根焉，名曰“让耕”。日久弊生，田主苦之，近革除殆尽，惟界里等村尚存一二耳。更有一种年远租贱，佃户辗转售耕，名“锄头根”，田主卖田，佃户诡云有根，反把持取利。近日争讼多由于此，尤宜查核。（同治彭志）

长乐之讼，多因田土，其弊总由产业之售，粮不过割，有贸产几十年、粮仍本户者。久之，互相转售，卖主不知产属何人，反得赔粮之累。又有据田自佃，恐一过户，业主不令耕种，于是卖

主势必遭租，业主因而遭粮以相抵，遂至讼讦无有已时，乾隆二十三年，详请：置买田产，凡典契、赎契，虽遵例免税，应照律过割。奉宪飭遵，一切契卷，无论载断书赎，均应推收过割粮，归现业输掌。如欲回赎，即于契内注明“回赎”字样，统作典契。若写立卖契，无“回赎”字样，即属卖断之产，一概不准找赎。此法一行，庶诸弊绝，而讼端亦息。（同治彭志）

闽中山田甚佳，数尺之地，即筑塍引水，播以佳种。苟非极旱，泉流不竭也。其田高下相乘，泉流互注，每行田间，泉声淙淙，不啻百道水帘。延建之间，更为尽力，而长邑亦无废壤也。（同治彭志）

长邑之田，依山傍海，每忧旱涝者，多因堤防不修、沟渠不浚，所以蓄泄无由也。湖、浦、斗门诸水利，尤当加意。（同治彭志）

《墨客挥麈》曰：“闽中无雪。故北人嘲云：‘南人不识雪，向道似杨花。’然南方杨柳实无花，是南人非止不识雪，亦不识杨花也。大观<sup>②</sup>庚寅季冬二十二日，余在长乐，而雪数寸，遍山皆白玉，人莫不相惊视，盖未尝见也。是日，召友人吴述正同赏，时南轩梅一株盛开，述正笑曰：‘如此景致，亦恐北人所未识。’是岁荔枝木皆冻死，遍山连野，弥望尽枯。至后年春，始于旧根株渐抽芽蘖，又数年始复繁盛。谱云：‘荔枝木坚理难老，至今有三百岁者，生结不息’。今去君谟歿又五十年矣，是三百五十年间未有此寒也。此系前朝气候，今则风景转移，寒暑略似中州矣。”（同治彭志）

《名贤清话》曰：“元厚之平生不喜处外，外补多缺望。及以给事中领长乐，亲旧祖道都门，勉以东闽盛府，百货所聚，永嘉之柑，乌石荔枝，珍绝天下。厚之下车，作诗谢之云：‘丹荔黄柑北苑茶，劳君诱我向天涯。争如太液池边看，池北池南总是花。’”

(同治彭志)

长乐田价之昂，盖以地狭人多也。谢在杭《五杂俎》更能推明其故。其言曰：“江南大贾，强半无田，盖利息薄，赋役重也。江右、荆、楚、五岭之间，米贱田多，无人可耕，亦不以田为贵，故其人虽无甚贫，亦无甚富，百物俱贱，无可化居转徙故也。闽中田赋亦轻，而米价稍为适中，故仕宦富室，相竞蓄田，贪官势族，有畛隩遍于邻境者。至于连疆之产，罗而取之；无主之业，曷而丐之；寺观香火之奉，强而夺之。黄云遍野，玉粒盈艘，十九皆大姓之物，故富者日富，而贫者日贫矣。”（同治彭志）

《五杂俎》曰：“闽中自高山至平地，截截为田，远望如梯直，昔人所云‘水无涓滴不为用，山到崔嵬尽力耕’者，可谓无余地矣。而人尚什伍游食于外。设使以三代井田之法处之，计口授田，当十无田也。”（同治彭志）

荔枝以枫亭为最，核小而香多也。长乐之“性画”次之，肌丰而味胜也。“中观”又次之，色味俱醇，而繁多不绝也。三者之外，人间常见尚有二十余种，如桂林、金钟、火山之类，品中称劣矣。然犹足为扶余天子也。（同治彭志）

长邑之果，荔枝最矣，龙眼次焉。熟食之品，西施舌最矣，鲋鱼次焉。闻江瑶柱殊绝，若石鳞鱼之似虾蟆，土笋之似蚯蚓，其味甚美，其形可憎。弹丸之邑，有此诸珍，亦足以夸矣。然无如其再熟之禾与番薯、小豆为可爱，何也？饥得以食，民赖为天也。（同治彭志）

夏允彝曰：“闽中土语，天下以为难通，然亦就漳、泉言耳。如长邑，虽妇人女子细辨其音，皆可半识也。惟称子，必曰‘仔’；称恶人，必曰‘呆人’。不独语言，即文字皆然。余解之曰：“以子加人，殆以未能成人者，未可为子耳。呆字于《海篇》音保，义为保安，然他方以愚人为呆人，其音为“孩台”切。恶人多巧



诈，何以云呆？然小人落得为小人，其在庶民必要三尺，贵仕必污青史，虽以恶为呆可也。”（同治彭志）

长之语有四：北乡多调迁省会，故音颇与省同，所异者，轻重耳；梅花则旧为军户所，另有梅花腔；南乡如松下、大小祉，近福清，则带有福清语；惟附县居民，不变土音。（同治彭志）

长邑壶井地方有蛭埋，通乡公派，五年阍分一次。照凭娶亲烟户分给，少子承父业。其余，一人娶亲，分埋一分。若入洋者，守节乏嗣者，父母沦亡只存幼女者，皆得一分。俗多孳生，尚文学，少穷民，皆其立法之善也。（同治彭志）

长乐风俗之坏，莫过于械斗。械斗之端，多起于拦抢。或因一人之事，迁怒通乡，或因一时之争，结衅数载，狭路相逢，辄遭毒手，私刑吊拷，甚于官箠，互相报复，仇怨愈深。甚至宰牲演戏，邀请同宗，约期纠斗。而一二强乡，视持械为寻常，以杀人为儿戏，越境帮斗，自夸余勇，迨酿出入命，而讼棍、歇家，视为利藪。又罗织殷实，希图按名贿摘，或为私和之地。至讹钱不遂，则又混指为喝令、主使、正帮凶各项名目。元恶逍遥事外，无辜拖累网中。买犯顶凶，丛弊百出。推原其故，多由好事之乡，敛钱助恶，被殴身死者，其家有帮项钱，有抽丰稻。被告正凶亦然，且许其奉主入祠。出罪之日，饯酒送行，遇赦而回，家已中产。愚民无识，反生艳羨，械斗安得不多乎？近虽严行示禁，此风稍戢，而根株未断，难免复萌，为司牧者所当随时留意也。（同治彭志）

长乐命案，真者固多，假者亦不少。或钱债细故，或口角微嫌，辄以疲癯残疾之人挺身撒赖，名曰“作彩”。一与计较，即服毒恐吓，否则投缳投水。迨救援不及，则张大其词，以为讹钱之地。罗织殷实，按户贿摘，动以千计。至于夫妻反目，女流短见，轻生自尽，律以三从之义，百死奚辜？乃母家不知大义，辄带数十人，坐轿数十乘，百般混闹，苛索棺衾，讹分布匹，勒追妆奁。



遭事之家，胆怯心寒。控官则出巡有费，铺堂有费，且恐祸成不测，不得不委曲以从，其流弊有不可胜言者。若夫路毙贫民，无论有伤与否，差保辄视为奇货，或勾通尸亲，或假冒尸亲，荼毒殷户，几于一网打尽。更有游方流丐，百十成群，辄将饥毙丐尸，抬到小乡地面，甚至将垂毙丐伙，暗地打死，移尸富户门首，肆行讹诈，尤为闾阎大害。所愿司民牧者，察其弊，汰其费，坐其诬告之罪，当场断结，勿使拖延，则假命可自绝矣。（同治彭志）

近日花会遍起，有数村而一会者，有一村而数会者。会首三五人至十数人不等，择一空旷之地，挂巴其间，门分三十七名，一钱可赔三十。乡愚希图小利，老少男女皆为所愚。其害有八：花会名单遍地，践踏抛弃字纸，一也；到处请神，日夜祈祷，不应，则毁其像，褻渎神明，二也；男昏于外，女迷于内，几不知耕织为何事，荒废本业，三也；香烛牲醪，相望于道，典当借贷，以求必得，花耗钱财，四也；抽签祈梦，男女淘杂，庙观之内，几成野田草露之场，败坏风俗，五也；蒙犯风露，宿庙求神，每当春夏，必发为瘟疫，传染疾病，六也；人众既杂，外来宵小得以藏匿其中，招引盗贼，七也；家产荡尽，索债临门，束手无策，遂至轻生自尽，戕贼性命，八也。种种弊端，较之赌场，祸烈加倍。官欲严禁，而胥役兵丁得规包庇，此尤不可不防也。（同治彭志）

溺女之风，闽省为多，而长乐尤甚。或因家计维艰，忍生一念；或虑嫁资多累，毒肆一时。呱呱落地，方幸投生；惨惨倾盆，谁怜绝命？夫虎狼尚不食儿，父母居然溺女。律以故杀之条，难逃国法；揆诸好生之德，尤犯天和。现经官绅设立育婴局，城隅稍知变革，而乡都之间，仍沿积习。仁人君子，所当援之以道也。（同治彭志）

长乐龙脉发源于石尤岭，蜿蜒至岱边，分为两支：一至董峰，一至县城。堪輿家谓：石岳岭一带，系县城来龙过峡所在，最忌

开凿。宋林安上凿石开港，幸石坚不果，而元气剥伤已多。年来附近小民，辄在岭上开挖粪池，蔓延日甚，有识者深以为忧，而苦于道谋之无成也。同治八年，知县彭光藻博采舆论，两次亲临诣勘，谕令每口粪池给工值二千，计共二十二口，限十日内一律填平，勒石永禁在案。爰将碑文附录于右，以备稽查。正堂彭为勒石永禁事：“照得石岗岭一带，系县城来龙，所有附近居民粪池，现已给价填塞，嗣后严禁，毋再开凿。违者重究不贷。特示。”

### 校 注

①考现有摩崖应为芦藤。

②原志作大元有误，特予更正。

